

明史

清 張廷玉 等撰

# 明史

第 四 冊  
卷 四〇 至 卷 四六（志）

中 華 書 局

# 明史卷四十

## 志第十六

### 地理一

自黃帝畫野置監，唐虞分州建牧，沿及三代，下逮宋、元，廢興因革，前史備矣。明太祖奮起淮右，首定金陵，西克湖、湘，東兼吳、會。然後遣將北伐，并山東，收河南，進取幽、燕，分軍四出，芟除秦、晉，訖於嶺表。最後削平巴、蜀，收復滇南。禹跡所奄，盡入版圖，近古以來，所未有也。

洪武初，建都江表，革元中書省，以京畿應天諸府直隸京師。後乃盡革行中書省，置十三布政使司，分領天下府州縣及羈縻諸司。又置十五都指揮使司以領衛所番漢諸軍，其邊境海疆則增置行都指揮使司，而於京師建五軍都督府，俾外都指揮使司各以其方附焉。成祖定都北京，北倚羣山，東臨滄海，南面而臨天下，乃以北平爲直隸，又增設貴州、交趾二布

政使司。仁宣之際，南交屢叛，旋復棄之外徼。

終明之世，爲直隸者二：曰京師，曰南京。爲布政使司者十三：曰山東，曰山西，曰河南，曰陝西，曰四川，曰湖廣，曰浙江，曰江西，曰福建，曰廣東，曰廣西，曰雲南，曰貴州。其分統之府百有四十，州百九十有三，縣千一百三十有八。羈縻之府十有九，州四十有七，縣六。編里六萬九千五百五十有六。而兩京都督府分統都指揮使司十有六，行都指揮使司五，曰北平，曰山西，曰陝西，曰四川，曰福建，留守司二。所屬衛四百九十有三，所二千五百九十有三，守禦千戶所三百一十有五。又土官宣慰司十有一，宣撫司十，安撫司二十有二，招討司一，長官司一百六十有九，蠻夷長官司五。其邊陲要地稱重鎮者凡九：曰遼東，曰薊州，曰宣府，曰大同，曰榆林，曰寧夏，曰甘肅，曰太原，曰固原。皆分統衛所關堡，環列兵戎。綱維布置，可謂深且固矣。

計明初封略，東起朝鮮，西據吐番，南包安南，北距大磧，東西一萬一千七百五十里，南北一萬零九百四里。自成祖棄大寧，徙東勝，宣宗遷開平於獨石，世宗時復棄哈密、河套，則東起遼海，西至嘉峪，南至瓊崖，北抵雲朔，東西萬餘里，南北萬里。其聲教所訖，歲時納贄，而非命吏置籍，侯尉羈屬者，不在此數。嗚呼盛矣！

論者謂交趾之棄，未爲失圖，而開平近遷，則守衛益薄，雖置萬全都指揮使司，不足以



鎮伏山後諸部，故再傳而有土木之變。然睿皇自以失律蒙塵，非由經制未備。景帝任賢才，修守禦，國步未移，乘輿旋復。由是觀之，三衛者，一隅之隘，而無關大計也審矣。至其季世，流寇首禍於西陲，浸尋蔓延，中原爲之糜爛。金湯之固不足以制土崩，版宇之廣不足以成犄角。疆圉不蹙於曩時，形勝無虧於初盛，而強弱懸殊，興亡異數者，天降喪亂，昏桮內訌，人事之乖，而非地利之失也。語曰「在德不在險」，詎不信夫。

今考其升降之差，沿革之故，具著於篇。作地理志。

## 京師 南京

京師 禹貢冀、兗、豫三州之域。元直隸中書省。洪武元年四月分屬河南、山東兩行中書省。二年三月置北平等處行中書省，治北平府。先屬山東、河南者皆復其舊。領府八，州三十七，縣一百三十六。八月置燕山都衛。與行中書省同治。八年十月改都衛爲北平都指揮使司。九年六月改行中書省爲承宣布政使司。永樂元年正月建北京於順天府，稱爲「行在」。二月罷北平布政使司，以所領直隸北京行部；罷北平都指揮使司，以所領直隸北京留守行後軍都督府。十九年正月改北京爲京師。罷北京留守行後軍都督府，直隸後軍都督

府。衛所有實土者附見，無實土者不載。罷北京行部，直隸六部。洪熙初，仍稱行在。正統六年十

一月罷稱行在，〔一〕定爲京師。府八，直隸州二，屬州十七，縣一百一十六。爲里三千二百三十

有奇。府州縣建置沿革，俱自元始。其沿革年月已見元史志者，不載。其未見元史志及明改元舊，并新增、新廢者，悉

書。北至宣府，外爲邊地。東至遼海，與山東界。南至東明，與山東、河南界。西至阜平，與山西界。洪

武二十六年編戶三十三萬四千七百九十二，口一百九十二萬六千五百九十五。

順天府元大都路，直隸中書省。洪武元年八月改爲北平府。十月屬山東行省。二年三月改屬北

平。三年四月建燕王府。永樂元年正月升爲北京，改府爲順天府。永樂四年閏七月詔建北京

宮殿，〔二〕修城垣。十九年正月告成。宮城周六里一十六步，亦曰紫禁城。門八：正南第一重曰承天，第二重曰端

門，第三重曰午門，東曰東華，西曰西華，北曰玄武。宮城之外爲皇城，周一十八里有奇。門六：正南曰大明，東曰東

安，西曰西安，北曰北安，大明門東轉曰長安左，西轉曰長安右。皇城之外曰京城，周四十五里。門九：正南曰麗正，

正統初改曰正陽；南之左曰文明，後曰崇文；南之右曰順城，〔三〕後曰宣武；東之南曰齊化，後曰朝陽；東之北曰東

直；西之南曰平則，後曰阜成；西之北曰彰儀，〔四〕後曰西直；北之東曰安定；北之西曰德勝。嘉靖三十二年築重

城，〔五〕包京城之南，轉抱東西角樓，長二十八里。門七：正南曰永定，南之左爲左安，南之右爲右安，東曰廣渠，東之

北曰東便，西曰廣寧，西之北曰西便。領州五，縣二十二。弘治四年編戶一十萬五百一十八，口六

十六萬九千三十三。萬曆六年，戶一十萬一千一百三十四，口七十萬六千八百六十一。

大興倚東南有大通河，亦曰通惠河，水自玉河出，繞都城東南，下流至高麗莊，入白河，卽元運河也。又有玉河，源自玉泉山，流經大內，出都城東南，注大通河。

宛平倚西山在西。〔六〕有桑乾河出山西馬邑縣，流千里入京師宛平縣境。出盧溝橋下，又東南分爲二：一至通州，入白河；一至武清小直沽，合衛河，入於海。又有沙河、高粱河、清河，皆在西北。西又有沿河口守禦千戶所，有盧溝、王平口、石港口、齊家莊四巡檢司。

良鄉府西南。有琉璃河，卽古聖水，下流入淀。北有天津關。

固安府西南。元固安州。洪武元年十二月降爲縣。西南有拒馬河，卽涑水。源自代郡，下流合易水爲白溝，入三角淀。

永清府南。南有拒馬河。

東安府東南。元東安州，治在西。洪武元年十二月降爲縣。三年徙今治。南有鳳河，卽桑乾分流，南入三角淀。

香河府東南。元屬鄆州。洪武十年二月省入州。十三年二月復置，改屬府。西有板簣口河，源出通州東之孤山，經縣界，入於白河。

通州 洪武初，以州治潞縣省入。西有通惠河，西南有渾河，卽桑乾，至州東張家灣，俱合於白河。有張家灣巡檢司。西南有弘仁橋巡檢司。西距府四十里。領縣四。

三河州東。北有沟河。又西有洳河，西南有鮑丘河，一名矣榆河，卽東潞水，俱流入於沟河。西有泥窪鋪巡檢司，後移於夏店鋪。

武清州南。元屬漷州。洪武十二年來屬。有三角淀，在縣南，卽古之雍奴，周二百餘里，諸水所聚。有直沽，在縣東南，衛河、白河、丁字沽合流於此入海。有巡檢司。又東北有河西務，東南有楊村二巡檢司。

漷縣州南。元漷州。洪武十四年二月降爲縣來屬。有漷河，一名新河，東入於白河，卽盧溝之下流。

寶坻州東南。元直隸大都路。洪武十年二月來屬。東有潮河。南有沟河。又縣東南有梁城守禦千戶所，建文二年，燕王置。有蘆臺巡檢司。

霸州 洪武初，以州治益津縣省入。拒馬河舊在北，後徙治南。又南有沙河。東有苑家口巡檢司。北距府二百十里。領縣三。

文安州南，少東。西有易水。東北有得勝、火燒等淀。

大城州東南。東北有黃汊河，源自交河，分流至縣境，入三角淀。

保定州南，少西。洪武七年九月省入霸州。十三年十一月復置。玉帶河在北，東流入會通河。西南有磁河，東南與玉帶河合。

涿州 洪武初以州治范陽縣省入。西有獨鹿山。北有涿水，西北有挾河，合焉。南有范水。東北距府百四十里。領縣一。

房山州北，少西。西有大房山。北有大安山。西南有青龍潭，其下流爲挾河，一名韓村河，至涿州與胡良河合。北有磁家務巡檢司。

昌平州元昌平縣，直隸大都路。正德元年七月升爲州，旋罷。八年復升爲州。舊治白浮圖城，景泰

元年築永安城於東，三年遷縣治焉。北有天壽山，成祖以下陵寢咸在。東南有白浮山。西南有駐蹕山。又南有

榆河，一名溫餘河，下流爲沙河，入於白河。又東南有鞏華城，嘉靖十九年築。東北有黃花鎮。弘治中，置渤海守

禦千戶所於此，萬曆元年移於慕田峪，四年復故。西有鎮邊城，又有常峪城，俱正德十年五月築，各置守禦千戶所。

又有白陽守禦千戶所，亦正德中置。西北有居庸關。南距府九十里。領縣三。

順義州東，少南。元順州。洪武元年十二月改爲順義縣，屬府。正德元年七月來屬。東有白河，西南有榆河，又有潮河，俱流入焉。

懷柔州東北。洪武元年十一月省入檀州。十二月復分密雲、昌平二縣地置，屬府。正德元年七月來屬。東有黍谷山。西有白河。

密雲州東北。元檀州，後置縣，爲州治。洪武元年十一月省縣入州。十二月復置縣，省州入焉，屬府。正德元年七月來屬。南有白檀山。西有白河。東有潮河。北有古北口，洪武十二年九月置守禦千戶所於此。三十年改爲密雲後衛。又有石塘嶺、牆子嶺等關。

薊州洪武初，以州治漁陽縣省入。西北有盤山。東北有崆峒山。又洵水在北，沽河在南。州北有黃崖



峪、寬佃峪等關。東又有石門鎮。西距府二百里。領縣四。

玉田州東南。東北有無終山，又有徐無山。又東有梨河。北有漚水。東南有興州左屯衛，永樂元年自故開平境移置於此。

豐潤州東南。南有沙河。西南有漚水。

遵化州東。東北有五峯山。南有靈靈山及龍門峽。又東有灤河。西南有梨河。北有喜峯口、馬蘭峪、松亭等關。

平谷州西北。洪武十年二月省入三河縣。十三年十一月復置。東南有洵河，又有洳河。西北有營州中屯衛，永樂元年自故龍山縣移置於此。又東有黃松峪關，與密雲縣將軍石關相接。

保定府元保定路，直隸中書省。洪武元年九月爲府。十月屬河南分省。二年三月來屬。領州三，縣十七。東北距京師三百五十里。弘治四年編戶五萬六百三十九，口五十八萬二千四百八十二。萬曆六年，戶四萬五千七百一十三，口五十二萬五千八十三。

清苑倚。北有徐河，一名大冊水，自滿城經縣北至安州，東入淀。又西有清苑河。又南有張登巡檢司，嘉靖十三年自滿城縣方順橋移置於此。

滿城府西，少北。洪武十年五月省入慶都縣。十三年十一月復置。北有徐河。南有方順河。

安肅府北，少東。元安肅州。洪武二年七月降爲縣。易水在北。曹河在南。徐河在西。西南又有鮑河。又西有

遂州，元屬保定路。洪武初降爲縣。八年二月省。

定興府北，少東。元屬易州。洪武六年五月改屬府。西有拒馬河，卽涑水也。又易水自西來，合焉，謂之白溝河。南有河陽巡檢司，後移於清苑縣界之固城鎮。

新城府東北。元屬雄州。洪武初屬北平府。六年五月改屬府。南有白溝河。西南有巨河鎮巡檢司。

雄府東北。元雄州。洪武二年七月省州治歸信縣入焉。七年四月降爲縣。北有白溝河。南有瓦濟河。

容城府東北。元屬雄州。洪武七年四月省入州。十三年十一月復置，來屬。舊治在拒馬河南，景泰二年遷於河北。西有易水，又有濡水。

唐府西，少南。西北有大茂山，卽恒岳也，東麓有岳嶺口巡檢司。又唐河在西，源出恒山，流經定州曰澆水，下流合於南易水。又西北有倒馬關，有巡檢司，後移於縣西之橫河口。又有周家鋪、軍城鎮二巡檢司。

慶都府西南，南有唐河。北有祁水。

博野府南。舊治在今蠡縣界，直隸保定路。洪武元年徙今治，改屬祁州。六年五月還屬府。西北有博水。南有唐河，亦曰澆水。又有永安鎮巡檢司，有鐵燈盞巡檢司。

蠡府南，少東。元蠡州，屬真定路。洪武二年七月來屬。八年正月降爲縣。楊村河在南，滋、沙、唐三河之下流也，俗亦謂之唐河。

完府西。元完州。洪武二年七月降爲縣。西有伊祁山，祁水出焉，其下流爲方順河。

祁州 洪武二年七月以州治蒲陰縣省入。北有唐河，西南有滋河，至州東南合沙河，流入易水。北距府百二十里。領縣二。

深澤州南，少西。西有滋河。

束鹿州東南。北有故城。今治，天啓二年所徙。漣沱河在南。又南有百天口巡檢司。

安州 洪武二年七月以州治葛城縣省入。七年降爲縣。十三年十一月復升爲州。北有易水，府境九河之水所滙也，下流至雄縣南，爲瓦濟河。西距府七十里。領縣二。

高陽州南。元屬安州，洪武六年五月改屬府。尋屬蠡州。八年正月省入蠡縣。十三年十一月復置，還屬。故城在東，洪武三年圯於水，遷於今治。東有馬家河，其上流爲蠡縣之楊村河。

新安州東，少北。元直隸保定路。洪武七年七月省入安州。十三年十一月復置，來屬。西有長流河，一名長溝河，其上源爲鮑河。南有曹河，又有徐河，經縣南，合流爲溫義河，又南與長流河合，又東南入於瓦濟河。

易州 洪武初，以州治易縣省入。西南有五迴山，雷溪出焉，徐河之上源也。西北有窮獨山，濡水所出。又南有易水，出州境之西山，與濡水並東流，而爲白溝河，所謂北易水也。又有雹水，一名鮑河，出縣西南，東南流爲長流河，所謂南易水也。西有紫荆關，洪武中置守禦千戶所於此。又有官座嶺、五迴嶺、金陂鎮、奇峯口、塔崖口五巡檢司。南距府百二十里。領縣一。

涑水州東北。東有涑水，亦曰拒馬河，源出山西代郡，下流合易水。北有乾河口，西北有黃兒莊二巡檢司。

河間府 元 河間路，直隸中書省。洪武元年十月爲府，屬河南分省。二年三月來屬。領州二，縣十

六。北距京師四十里。弘治四年編戶四萬二千五百四十八，口三十七萬八千六百五十八。萬曆六年，戶四萬五千二十四，口四十一萬九千一百五十二。

河間倚。西南有滹沱河。西有滏水。西南有景和鎮巡檢司。

獻府南。元 獻州。洪武初，省州治樂壽縣入焉。八年四月降爲縣。有滹沱河自代郡流入境，經縣南，至青縣合衛河達於海。有單家橋巡檢司。

阜城府南。元屬景州。洪武七年改屬府。西北有胡盧河，卽禹貢衡漳水。

肅寧府西。中堡河在縣東。

任丘府北，少西。元屬莫州。洪武七年改屬府。西北有瓦濟河，下流爲五官淀，注於滹沱河。北有莫州，元治莫亭縣，屬河間路。洪武七年七月，州縣俱省。

交河府東南。元屬獻州。洪武八年四月改屬府。十年五月省入獻縣。十三年十一月復置。東有衛河，源自衛輝，流入故城境，經縣東，過滄州，又東北至直沽入海，一名御河。又西北有高河，經縣南，合滹沱，謂之交河，下流入衛縣，以此名。又南有潞河。又東有泊頭鎮巡檢司。

青府東北。元 清州。〔七〕洪武初，以州治會川縣省入。八年四月降爲縣，尋改清爲青。滹沱河自縣南流入衛，謂之

岔河口。其支流經縣之北者，曰獨流河。

興濟元屬清州。洪武初省。十三年復置，屬府。衛河在城西。

靜海府東北。元曰靖海，屬清州。洪武初，更名。八年四月改屬北平府。十年五月來屬。縣北有小直沽，衛河自西來，與白河合，入於海。又有丁字沽、鹹水沽。又北有天津衛，永樂二年十一月置。

寧津府東南。南有土河，自山東德州流入，又東入山東樂陵縣界。

景州 洪武初，以州治蓆縣省入。東有衛河。東北有胡盧河。又東有安陵、西北有宋門二巡檢司。又東北有李晏鎮。西北距府百八十五里。領縣三。

吳橋州東，少南。西有衛河。

東光州東北。洪武七年七月省入阜城縣。十三年十一月復置。南有衛河，又有胡盧河。

故城州南，少西。有衛河，自山東武城縣流入境。又西南有索盧枯河。

滄州 洪武初，以州治清池縣省入。〔八〕舊治在東南。洪武二年五月徙於長蘆，即今治也。東濱海。西有衛河。南有浮河。北有長蘆巡檢司。西距府百五十里。領縣三。

南皮州西南。衛河在縣西。

鹽山州東南。東濱海，產鹽。東南有鹽山。

慶雲州東南。洪武六年六月析山東樂安州北地置，來屬。



眞定府 元 眞定路，直隸中書省。洪武元年十月爲府，屬河南分省。二年正月屬山東。三月來屬。領州五，縣二十七。東北距京師六百三十里。弘治四年編戶五萬九千四百三十九，口五十九萬七千六百七十三。萬曆六年，戶七萬四千七百三十八，口一百九萬三千五百三十一。〔九〕

眞定倚滹沱河在城南。又北有滋河，自山西靈丘縣流入，經行唐縣之張茂村伏流不見，至府北南孟社復出，下流合於南易水。

井陘府西南。元屬廣平路威州。洪武二年來屬。東南有城山，又有甘洵河，亦名冶河，南與綿蔓水合。又故關在其西。

獲鹿府西南。西有抱犢山，有西屏山。又有蓮花山，白鹿泉出焉，東流爲西河，卽洹水上源也。又有土門關在西，亦曰井陘關。

元氏府西南。西北有封龍山，泚水所出，下流入胡盧河。西南有槐水，下流曰野河。

靈壽府西北。東北有衛水，〔一〇〕源出恒山，禹貢「恒、衛既從」卽此。俗名雷溝河，東北入於滹沱。北有叉頭鎮巡檢司，後遷於慈峪鎮。

藁城府東南。北有滹沱河，又有滋河。

樂城府南。縣北有故城，今治洪武初所徙。西有汶河。

無極府東，少北。元屬中山府。洪武初廢。四年七月復置，屬定州。七年四月改屬府。南有滋河。

平山府西，少北。北有漳沱河，東北有冶河入焉。西北有号山。西有十八盤、下口村巡檢司。

阜平府西北。東北有大茂山。北有派河。西有龍泉關。

行唐府北。元屬保定路。洪武二年屬定州，正統十三年十月直隸真定府。西有滋河。西北有兩嶺口巡檢司。

定州元中山府。洪武二年正月改曰定州。三年以州治安喜縣省入。滹水在北。沙河在南，下流合

於滹水。西北有倒馬關守禦千戶所。景泰二年置關，與紫荆、居庸爲內三關。北有清風店巡檢司。西南距府百

三十里。領縣二。

新樂州西南。西南有沙河。

曲陽州西北。元屬保定路。洪武二年來屬。恆山在西北，恆水出焉。又沙河在南，自山西繁峙縣流入。

冀州洪武二年以州治信都縣省入。西北有漳水。北有漳沱河。成化十八年，漳沱挾漳南注爲州患。正

德十二年，二水自寧晉縣南北流，患始息。又北有潞水，一名枯潞，下流合於漳。西北距府二百八十里。領

縣四。

南宮州南，少西。故城在縣西北，成化十六年遷於今治。漳水在北。潞水在南。東南有董家廟堡巡檢司。

新河州西，少南。有清水河，成化後堙。

**棗強** 州東，少北。西北有索盧水，乃衛河之支流也，亦曰黃盧河。

**武邑** 州東北。西有潯水。西北有漳水。

**晉州** **洪武二年**以州治鼓城縣省入。南有漳沱河。西距府九十里。領縣三。

**安平** 州東北。漳沱河舊在縣南，萬曆二十三年自束鹿縣南行，始不經縣境。

**饒陽** 州東北。北有漳沱河。西南有饒河，即漳沱河支流也。

**武強** 州東。漳河在縣東。又南有漳沱河，舊合於漳，萬曆二十六年北出饒陽縣境，而縣之漳沱河始涸。

**趙州** **洪武元年**以州治平棘縣省入。南有洹河，下流入於胡盧河。北距府百二十里。領縣六。

**柏鄉** 州南。東北有野河，即槐水也，下流入於胡盧河。

**隆平** 州東南。**洪武六年九月**省入柏鄉縣。十三年十一月復置。東有灋水，東北與沙河合，下流入於胡盧河。沙河，亦槐水之別名也。又東北有大陸澤，亦曰廣阿，漳水所滙。

**高邑** 州西南。北有黑水，〔二〕即槐水也，流合縣南之沛水。

**臨城** 州西南。南有敦輿山。西南有鐵山。西北有泚水，東經釣盤山下，與沛水合。

**贊皇** 州西南。西南有贊皇山，沛水出焉，亦曰沙水。又城北有槐水。西北有黃沙嶺巡檢司。

**寧晉** 州東，少南。東南有胡盧河，其上流即漳水也，深、冀羣川悉滙於此。東北有百尺口巡檢司。

**深州** **洪武二年**以州治靜安縣省入。南有故城，今治本吳家莊，永樂十年遷於此。漳沱河在東北。

**胡盧**

河在東南。有傅家池巡檢司，後廢。西距府二百五十里。領縣一。

衡水州南，少東。故城在縣西南，永樂十三年遷於今治。西有漳水。南有洚水。又北有滹沱河，舊與漳合，成化八年北徙，不經縣界。西南有鹽池。

順德府元順德路，直隸中書省。洪武元年爲府。十月屬河南分省。二年三月來屬。領縣九。距

京師一千里。弘治四年編戶二萬一千六百一十四，口一十八萬一千八百二十五。萬曆六年，戶二萬七千六百三十三，口二十八萬一千九百五十七。

邢臺倚西北有夷儀山，又有封山，一曰西山。又有黃榆嶺，上有黃榆關。又漳水在東南，自河南臨漳縣流入，下流爲胡盧河，至交河縣合滹沱河，此爲漳水經流也。又東南有百泉水，其下流爲澧河，一名渦水，又名鴛鴦水。西有西王社巡檢司。

沙河府南。弘治四年以沙壅遷縣於西山小屯。十八年六月復還舊治。西南有磬口山，產鐵。南有沙河，亦名渦水。

南和府東，少南。南有漳河，合縣西之澧河，又縣西北有泚水，蓋伏流而旁出者。

任府東北。東北有泚水。東有澧水。

內丘府北。東南有泚水。

唐山府東北。西北有堯山。西有泚水。

平鄉府東，少南。西南有漳河，西有沙河，又有洛河。東有滏陽河。萬曆三十年，漳挾滏陽河北出，會於沙、洛諸河，而漳水之舊流益亂。

鉅鹿府東北。漳水舊在縣東，有大小二河，亦謂之新舊二河，其後北徙，不復至縣境，而二河遂成平陸。北有鉅鹿澤，卽隆平縣之大陸澤也，澤畔舊有鹽泉。

廣宗府東，少北。洪武十年六月省入平鄉、鉅鹿二縣。十三年十一月復置。漳水舊在西。又東有枯澤河。

廣平府元廣平路，直隸中書省。洪武元年爲府。十月屬河南分省。二年三月來屬。領縣九。東北距京師千里。弘治四年編戶二萬七千七百六十四，口二十一萬二千八百四十六。萬曆六年，戶三萬一千四百二十，口二十六萬四千八百九十八。

永年倚。北有沙河。又有洛水，自河南武安縣流入。西南又有滏水，自河南臨漳縣流入，亦曰滏陽河。西有臨洛鎮巡檢司。西南又有黃龍鎮。

曲周府東北。西南有漳水。東有滏陽河。

肥鄉府東南。漳河在縣西北。

雞澤府東北。漳河在縣東。又西有洛河，又有沙河自南來合焉。



廣平府東南。北有漳河。

成安府南。元屬磁州。洪武初廢。四年六月復置，來屬。西南有洹水，〔二〕自河南臨漳縣流入，其下流合於衛

河。又南有漳水，亦自河南臨漳縣流入。

威府東北。元威州。至正間，省州治洛水縣入州。洪武二年四月降爲縣。漳水舊在南，洛水自西流入焉。

邯鄲府西南。元屬磁州。洪武元年來屬。西北有洛河。東有滏陽河。

清河府東北。元屬大名路。洪武六年九月來屬。東有衛河。

大名府元大名路，直隸中書省。洪武元年爲府。十月屬河南分省。二年三月來屬。領州一，縣

十。東北距京師千一百六十里。弘治四年編戶六萬六千二百七，口五十七萬四千九百七十二。萬曆六年，戶七萬一千一百八十，口六十九萬二千五十八。

元城倚。故城在東，洪武三十一年圯於衛河，徙此。東有沙麓山。西有漳河。北有衛河，卽永濟渠也，自河南汲縣流入，下流合漳河。東北有小灘鎮巡檢司。

大名府南，少東。元與元城縣同爲大名府治。洪武十年五月省入魏縣。十五年二月復置。永樂九年移於今治。北有愜山，東南有衛河。

魏府西，少北。舊治在縣西。洪武三年遷於此。南有魏河，又有新舊二漳河，下流俱合於衛河。

南樂府東。南有繁水，北入於衛河。

清豐府東南。元屬開州。洪武七年三月改屬府。西南有澶水，伏流至古繁水城西南，謂之繁水。

內黃府西南。元屬滑州。洪武七年三月改屬府。北有衛河。東有繁水。西有洹水。西北有回隆鎮，有回龍廟巡檢司。嘉靖三十六年，漳河決於此，入衛。

濬府西南。元濬州治在浮丘山之西。洪武二年四月降爲縣，徙治於山東北之平坡。嘉靖二十九年復徙城於山巔，卽今治也。東有大伾山，一名黎陽山，又名清澶山。西有衛河。北有淇水，自河南淇縣流入，經縣南，東入於衛，謂之黎水，亦謂之濬水。又西有長豐泊。西南有新鎮巡檢司。

滑府西南。元滑州。洪武二年四月省州治白馬縣入焉。七年三月降爲縣。西北有衛河。東南有老岸鎮巡檢司。

開州 洪武二年四月以州治濮陽縣省入。大河故道在城南，正統十三年，河決入焉。景泰五年塞。北距府百六十里，領縣二。

長垣州南。舊治在縣東北，洪武二年以河患遷於古蒲城。南有黃河故道。東南有朱家口，正統十三年，河決於此。又南有大社口，萬曆十五年，河復決焉。又東南有大岡巡檢司，本治永豐里，尋徙竹林，後徙大岡。

東明州北。洪武十年五月省入州及長垣縣。弘治三年九月復置，屬府。萬曆中，仍屬州，其舊治在今縣南。洪武初，徙今縣西。弘治三年始徙於今治。南有黃河，有杜勝集巡檢司。

永平府 元永平路，直隸中書省。 洪武二年改爲平灤府。四年三月爲永平府。領州二，縣五。西距

京師五百五十里。弘治四年編戶二萬三千五百三十九，口二十二萬八千九百四十四。萬曆六年，戶二萬五千九十四，口二十五萬五千六百四十六。

盧龍倚。東南有陽山。西有灤河，自開平流經縣境，有漆河自北來入焉。東有肥如河，經城西入於漆。北有桃林口關。

遷安府西北。北有都山。東有灤河。又北有劉家口、冷口、青山口等關。

撫寧府東，少南。舊治在陽河西，洪武六年十二月所徙。十三年又遷於兔耳山東。東南濱海。又東有榆河，又有陽河，一名洋河，俱自塞外流入，俱東南注於海。東有山海關。洪武十四年九月置山海衛於此。〔二〕北有撫寧衛，永樂元年二月置。又有董家口、義院口等關。東有一片石口，一名九門水口。

昌黎府東南。西北有碣石山。東南有溟海，亦曰七里海。有黑陽河，自天津達縣之海道也。又有蒲泊，舊產鹽，置惠民鹽場於此。北有界嶺口、箭捍嶺等關。

灤州 洪武二年九月以州治義豐縣省入。南濱海。東有灤河。又南有開平中屯衛，永樂元年二月自沙峪移置於此。東北距府四十里。領縣一。

樂亭州東南。南濱海。西有灤河，經縣北岳婆港分爲二，東曰胡盧河，西曰定流河，各入於海。景泰中，胡盧河塞，定流河獨自入海，其水清碧，亦謂之綠洋溝。又西南有新橋海口巡檢司。萬曆四十三年移於灤州西之榛

子鎮。

延慶州 元龍慶州，屬大都路。 洪武初，屬永平府。三年三月屬北平府，尋廢。永樂十二年三月置

隆慶州，屬北京行部。十八年十一月直隸京師。隆慶元年改曰延慶州。西有阪泉山。南有八

達嶺。東北有媯川，俗名清水河，下流注於桑乾河。又西南有沽河。東南有岔道口，與居庸關相接。關口有居庸關守

禦千戶所，洪武三年置。建文四年，燕王改爲隆慶衛，隆慶元年曰延慶衛。東南又有柳溝營，隆慶初，置城於此，爲防

禦處。領縣一。東南距京師百八十里。弘治四年編戶一千七百八十七，口二千五百四十

四。萬曆六年，戶二千七百五十五，口一萬九千二百六十七。

永寧 本永寧衛，洪武十二年九月置。 永樂十二年三月置縣於衛城。媯川在西。東有四海冶堡，天順八年置。西

北有靖胡堡，東南有黑漢嶺堡，北有周四溝堡，俱嘉靖中置。又有劉斌堡，萬曆三十二年所置也。

保安州 元屬上都路之順寧府。 洪武初，廢。永樂二年閏九月置保安衛。十三年正月復置州於衛

城，屬北京行部。十八年十一月直隸京師。舊州城在西南山下，景泰二年移於雷家站，〔二四〕即今治也。

西南又有涿鹿山，涿水出焉。西北有磨笄山，亦曰雞鳴山，又有鷓鴣嶺。又桑乾河在西南，自山西蔚州流入，東有媯

川來入焉，謂之合和口。西有甯川，亦入於桑乾。東有東八里堡、良田屯堡、麻谷口堡，俱洪武二十五年置。南有美

峪守禦千戶所，本在州西之美峪嶺，永樂十二年置。十六年二月徙於董家莊。景泰二年又移於此，與山西蔚州界。東南距京師三百里。弘治四年編戶四百四十五，口一千五百六十。萬曆六年，戶七百七十二，口六千四百四十五。

萬全都指揮使司 元順寧府，屬上都路。洪武四年三月，府廢。宣德五年六月置司於此。領衛十五，蔚州、延慶左、永寧、保安四衛俱設於本州縣，三守禦千戶所三，廣昌、美峪二所，亦設於本處，堡五。東南距京師三百五十里。

宣府左衛 元宣德縣，爲順寧府治。洪武四年，縣廢。二十六年二月置衛，屬山西行都司。二十八年四月改爲宣府護衛，屬谷王府。三十五年十一月罷宣府護衛，復置，徙治保定。永樂元年二月直隸後軍都督府。宣德五年六月還故治，改屬。洪武二十四年四月建谷王府，永樂元年遷於湖廣長沙。西有灤河，源自炭山，下流入開平界。南有桑乾河，洋河東流入之。又有順聖川，延袤二百餘里，下流亦合於桑乾河。北有東西二城，其東城爲順聖縣，元屬順寧府，西城爲弘州，元屬大同路，洪武中俱廢。天順四年修築二城。又東北有大白陽、小白陽及龍門關等堡。東南有雞鳴驛堡。北有葛峪堡。西北有長峪口、青邊口、羊房等堡。

宣府右衛 洪武二十六年二月置，與左衛同城，屬山西行都司。二十八年四月改爲宣府護



衛，屬谷王府。三十五年十一月罷宣府護衛，復置，徙治定州。永樂元年二月直隸後軍都督府。宣德五年六月還故治，改屬。

宣府前衛 洪武二十六年置，治宣府城，屬山西行都司。永樂元年二月直隸後軍都督府。宣德五年六月改屬。

萬全左衛 元宣平縣，屬順寧府。洪武四年，縣廢。二十六年二月置衛，屬山西行都司。三十五年徙治山西蔚州。永樂元年二月徙治通州，直隸後軍都督府，尋還故治。宣德五年改屬。北有洋河，西海子自西來，流入之。又西北有沙城堡。西有會河堡。東有寧遠站堡。東距都司六十里。

萬全右衛 洪武二十六年二月置，與左衛同城，屬山西行都司。三十五年徙治山西蔚州。永樂元年二月徙治通州，直隸後軍都督府。二年徙治德勝堡。宣德五年改屬。北有翠屏山，又有野狐嶺。西北有西陽河，二河下流入灤河。東有張家口堡。西有新河口堡。北有膳房堡、上莊堡。西北有新開口、柴溝、洗馬林等堡。西南有渡口堡，又有西陽河堡。東距都司八十里。

懷安衛 元懷安縣，屬興和路。洪武三年屬興和府，改屬山西大同府，尋廢。二十六年二月置衛，

屬山西行都司。永樂元年二月直隸後軍都督府。宣德五年六月改屬。西北有花山。北有蕤麻嶺。南有水溝口河，東入於洋河。東北有威寧縣，元屬興和路，洪武中廢。又西有李信屯堡，嘉靖十六年置。東距都司百二十里。

保安右衛 永樂十五年置於順聖川，直隸後軍都督府。十七年移治西沙城。二十年徙懷

安城內。宣德五年六月改屬。

懷來衛元懷來縣，屬龍慶州。

洪武二年屬永平府。三年三月屬北平府，尋廢。三十年正月置

懷來守禦千戶所。永樂十五年改爲懷來左衛，明年曰懷來衛，直隸後軍都督府。宣德五

年六月改屬。北有螺山，或云卽滏山也。東南有嬌川。西有沽河。又西南有土木堡。東南有榆林堡，又有殷繁

冰。西北距都司百五十里。

延慶右衛 本隆慶右衛，永樂二年置於居庸關北口，直隸後軍都督府。宣德五年六月來

屬，徙治懷來城。隆慶元年更名。

開平衛 本獨石堡，宣德五年築。六月自開平故城移衛，置於此。東有東山，韭菜川出焉，經城南，

與氈帽山水合。又南有獨石水，下流合於龍門川。南有半壁店、貓兒峪等堡。東北有清泉堡。西南距都司三

百里。

龍門衛 宣德六年七月置於故龍門縣。東有紅石山，紅石水出焉，下流合於龍門川。西有大松山。北有洗

馬嶺。西北有金家莊堡。東有三岔口堡。西距都司百二十里。

興和守禦千戶所 永樂二十年自興和舊城徙宣府城內。宣德五年六月改屬。

龍門守禦千戶所 宣德六年七月置於李家莊。西有西高山。東有白河。北有牧馬堡。東有寧遠堡。東

北有長伸地、〔二七〕滴水涯等堡。東南有樣田堡。西南距都司二百四十里。

長安嶺堡 永樂九年置。弘治二年置守禦千戶所於此。有長安嶺，名槍桿嶺。西北有鷹窩山泉。西南距都司一百四十里。

鵬鶚堡 宣德五年六月置。北有浩門嶺。南有南河，下流入於白河。西南距都司一百七十里。

赤城堡 宣德五年六月置。東有赤城山。又有東河，即通州白河之上源也，又有西河，合焉。西北有鎮寧堡，弘治十一年置。西南距都司二百里。

雲州堡 元雲州，屬上都路。洪武三年七月屬北平府。五年七月廢。宣德五年六月置堡。景泰五年置新軍千戶所於此。東北有龍門山，亦曰龍門峽，下爲龍門川。又北有灤河。東北有金蓮川。西北有鴛鴦泊。又金蓮川東有鎮安堡，成化八年置。西南距都司二百十里。

馬營堡 宣德七年置。西北有冠帽山。南有灤河。又西北有君子堡。西有松樹堡。東南有倉上堡。西南距都司二百里。

北平行都指揮使司 本大寧都指揮使司，洪武二十年九月置。治大寧衛。二十一年七月更名。領衛十。永樂元年三月復故名，僑治保定府，而其地遂虛。景泰四年，泰寧等三衛乞居大寧廢城，不許，令去塞二百里外居住。天順後，遂入於三衛。西南距北平布政司八

百里。

大寧衛 元大寧路，治大定縣，屬遼陽行省。

洪武十三年爲府，屬北平布政司，尋廢。二十年八月置

衛。九月分置左、右、中三衛，尋又置前、後二衛。二十八年四月改左、右、後三衛爲營州

左、右、中三護衛。永樂元年二月省，又徙中、前二衛於京師，直隸後軍都督府。洪武二十

四年四月，寧王府建於此，永樂元年遷於江西南昌。南有土河。東南有大鱗場。東北有惠和縣，又有武平縣。東有和

衆縣。元俱屬大寧路，洪武中俱廢。

新城衛

洪武二十年九月置。永樂元年廢。

距行都司六十里。

富峪衛

本富峪守禦千戶所。洪武二十二年二月置。二十四年五月改爲衛。永樂元年二

月徙置京師，直隸後軍都督府。

距行都司一百二十里。

會州衛

洪武二十年九月置。永樂元年廢。南有冷嶺。西北有馬孟山，廣袤千里，土河之源出焉，下流合

於瀋河，又南入於遼水。

距行都司

里。

榆木衛

洪武二十年九月置。永樂元年廢。

距行都司

里。

全寧衛

元全寧路，直隸中書省。洪武中廢。二十二年四月置衛。永樂元年廢。有潢河，又有黑龍江。

西南距行都司二百

里。

營州左屯衛

洪武二十六年二月置。永樂元年三月徙治順義縣，屬大寧都司。南有塔山。

距行都司里。

營州右屯衛元建州，屬大寧路。洪武中，州廢。二十六年二月置此衛。永樂元年三月徙治薊州，

屬大寧都司。西北距行都司四百里。

營州中屯衛元龍山縣，屬大寧路。洪武中，縣廢。二十六年二月置此衛。永樂元年三月徙治平

谷縣西，屬大寧都司。南有榆河。距行都司里。

營州前屯衛元興州，屬上都路。洪武三年七月屬北平府。五年七月廢。二十六年置此衛。永樂

元年三月徙治香河縣，屬大寧都司。西有新開嶺。南有老河，源出馬孟山，流經此，又經行都司城南，東

北入於潢河。西南有興安縣，元屬興州，順帝後至元五年四月廢。距行都司里。

營州後屯衛洪武二十五年八月置。永樂元年三月徙治三河縣，屬大寧都司。距行

都司里。

興州左屯衛洪武中置。永樂元年二月徙治玉田縣，直隸後軍都督府。距行都司

里。

興州右屯衛洪武中置。永樂元年二月徙治遷安縣，直隸後軍都督府。距行都司

里。

興州中屯衛洪武中置。永樂元年二月徙治良鄉縣，直隸後軍都督府。距行都司

里。

興州前屯衛

洪武中置。

永樂元年二月徙治豐潤縣，直隸後軍都督府。

距行都司

里。

興州後屯衛

洪武中置。

永樂元年二月徙治三河縣，直隸後軍都督府。

距行都司

里。

開平衛

元上都路，直隸中書省。

洪武二年爲府，屬北平行省，尋廢府置衛，屬北平都司。永樂元

年二月徙衛治京師，直隸後軍都督府。四年二月還舊治。宣德五年遷治獨石堡，改屬萬

全都司，而令兵分班哨備於此，後廢。西北有臥龍山。南有南屏山，又有灤河。東北有香河，又有簸箕

河、閭河，西南有兔兒河，下流俱合於灤河。又東有涼亭、沈阿、賽峯、黃崖四驛，路接大寧、古北口；西有桓州、威虜、

明安、臨寧四驛，路接獨石。俱洪武中置，宣德後廢。又西北有寧昌路，東北有應昌路，北有泰寧路，又有德寧路，元

俱直隸中書省。西有桓州，元屬上都路。洪武中皆廢。

距北平都司

里。

開平左屯衛

洪武二十九年八月置於七合營。

永樂元年廢。

距都司

里。

開平右屯衛

洪武二十九年置於軍臺。

永樂元年廢。

距北平都司

里。

開平中屯衛

洪武二十九年置於沙峪。

永樂元年二月徙治眞定府，直隸後軍都督府。尋

徙治灤州西石城廢縣。

距都司

里。

開平前屯衛

洪武二十九年八月置於偏嶺。

永樂元年廢。

距北平都司里。

開平後屯衛

洪武二十九年八月置於石塔。

永樂元年廢。

距北平都司里。

興和守禦千戶所

元隆興路，直隸中書省。皇慶元年十月改爲興和路。

洪武三年爲府，屬北平布政司。

四年後，府廢。三十年正月置所。永樂元年二月直隸後軍都督府。二十年爲阿魯台所

攻，徙治宣府衛城，而所地遂虛。東北有凌霄峯。南有威遠川。西有魚兒灤。又西有集寧路，元直隸中

書省。西北有寶昌州，元屬興和路。又有高原縣，元爲興和路治。洪武中俱廢。

距北平都司

里。

寬河守禦千戶所

洪武二十二年二月置。永樂元年二月徙治遵化縣，仍屬大寧都司。又僑

置寬河衛於京師，直隸後軍都督府。東南有寬河，一名豹河，下流經遷安縣西北，又東合於灤河。

距北平都司

里。

宜興守禦千戶所

元宜興縣，屬興州。致和元年八月升爲宜興州。洪武二年兼置衛，屬永平府。三年三

月屬北平府。六月改衛爲守禦千戶所。五年七月，州廢，存所。永樂元年，所廢。

距北平都司

里。

南京 禹貢揚、徐、豫三州之域。元以江北地屬河南江北等處行中書省，又分置淮東

道宣慰使司治揚州路屬焉；江南地屬江浙等處行中書省。明太祖丙申年七月置江南行中書

省。治應天府。洪武元年八月建南京，罷行中書省，以應天等府直隸中書省，衛所直隸大都

督府。十一年正月改南京爲京師。十三年正月己亥罷中書省，以所領直隸六部。癸卯改

大都督府爲五軍都督府，以所領直隸中軍都督府。永樂元年正月仍稱南京。統府十四，直

隸州四，屬州十七，縣九十有七。爲里萬三千七百四十有奇。北至豐、沛，與山東、河南界。西至英山，

與河南、湖廣界。南至婺源，與浙江、江西界。東至海。距北京三千四百四十五里。

應天府元集慶路，屬江浙行省。太祖丙申年三月曰應天府。洪武元年八月建都，曰南京。十一

年曰京師。永樂元年仍曰南京。洪武二年九月始建新城，六年八月成。內爲宮城，亦曰紫禁城，門六：正

南曰午門，左曰左掖，右曰右掖，東曰東安，西曰西安，北曰北安。宮城之外門六：正南曰洪武，東曰長安左，西曰長安

右，東之北曰東華，西之北曰西華，北曰玄武。皇城之外曰京城，周九十六里，門十三：南曰正陽，南之西曰通濟，又西

曰聚寶，西南曰三山，曰石城，北曰太平，北之西曰神策，曰金川，曰鍾阜，東曰朝陽，西曰清涼，西之北曰定淮，曰儀

鳳。後塞鍾阜、儀鳳二門，存十一門。其外郭，洪武二十三年四月建，周一百八十里，門十有六：東曰姚坊、仙鶴、麒麟、

滄波、高橋、雙橋，南曰上方、夾岡、鳳臺、大馴象、大安德、小安德，西曰江東，北曰佛寧、上元、觀音。領縣八。洪



武二十六年編戶一十六萬三千九百一十五，口一百十九萬三千六百二十。弘治四年，戶一十四萬四千三百六十八，口七十一萬一千三。萬曆六年，戶一十四萬三千五百九十七，口七十九萬五百一十三。

上元倚。太祖丙申年遷縣治淳化鎮，明年復還舊治。東北有鍾山，山南有孝陵衛，洪武三十一年置。北有覆舟山。西北有雞鳴山、幕府山。又東北有攝山。東南有方山。北濱大江。東南有秦淮水，北流入城，又西出，入大江。又北有玄武湖。東有青溪，又有淳化鎮巡檢司。

江寧倚。南有聚寶山、牛首山。西南有三山、烈山、慈姥山。西濱大江。東北有靖安河。西南有大勝關、江寧鎮。東南有秣陵關。西有江東四巡檢司。北有龍江關，置戶分司於此。

句容府東。南有茅山。北有華山，秦淮水源於此。北濱大江。西北有龍潭巡檢司。

溧陽府東南。元溧陽州。洪武二年降爲縣。東南有鐵山、銅山。西南有鐵冶山。北有長蕩湖，一名洮湖，與宜興、金壇二縣分界。西北有溧水，一名瀨水，上承丹陽湖，東流爲宜興縣荆溪，入太湖，舊名永陽江，又曰中江也。西北有上興埭巡檢司，後廢。

溧水府東。元溧水州。洪武二年降爲縣。東南有東廬山，秦淮水別源出焉。南有石臼湖，西連丹陽湖，注大江。

高淳府南。弘治四年以溧水縣高淳鎮置。西南有固城、丹陽、石臼諸湖。東南有廣通鎮，俗曰東壩，有廣通鎮巡檢司。

江浦府西。本六合縣浦子口巡檢司，洪武九年六月改爲縣，析和、滁二州及江寧縣地益之。二十五年七月移於

江北新開路口，仍置巡檢司於舊治。東南濱大江，有江淮衛，洪武二十八年正月置。又有西江口巡檢司。

六合府西北。元屬眞州。洪武三年直隸揚州府。二十二年二月來屬。東有瓜步山，濱大江，滁河水自西來，入焉。有瓜埠巡檢司。

鳳陽府元濠州，屬安豐路。太祖吳元年升爲臨濠府。洪武二年九月建中都，置留守司於此。六

年九月曰中立府。七年八月曰鳳陽府。洪武二年九月建中都城於舊城西，三年十二月始成。周五十里

四百四十三步。立門九：正南曰洪武，南之左曰南左甲第，右曰前右甲第，北之東曰北左甲第，西曰後右甲第，正東曰獨山，東之左曰長春，右曰朝陽，正西曰塗山。中爲皇城，周九里三十步，正南門曰午門，北曰玄城，東曰東華，西曰西

華。領州五，縣十三。距南京三百三十里。洪武二十六年編戶七萬九千一百七，口四十二萬七千三百三。弘治四年，戶九萬五千一十，口九十三萬一千一百八。萬曆六年，戶一十一萬一千七十，口一百二十萬二千三百四十九。

鳳陽倚。洪武七年八月析臨淮縣地置，爲府治。十一年又割虹縣地益之。北濱淮，南有鑛鄒山，西濠水出焉。又

西南有皇陵城，洪武二年置衛。西北有長淮關，洪武六年置長淮衛於此。東北有洪塘湖屯田守禦千戶所，洪武十一年置。

臨淮府東北。元曰鍾離，爲濠州治。洪武二年九月改曰中立。三年十一月改曰臨淮。七年爲府屬。北濱淮。有濠水，東源出濠塘山，西源出鏤鄒山，至城西南合流，東入淮。

懷遠府西北。荆山在縣西南。塗山在縣東南。淮水經兩山峽間，有北肥水入焉。又北有渦水亦入淮，謂之渦口。又西南有洛水，與壽州分界，逕縣南新城村入淮。有洛河鎮巡檢司。

定遠府南。南有池河。西有洛河。又有英武衛在北，飛熊衛在東北，俱洪武十一年置。

五河府東北。元屬泗州。洪武四年二月來屬。舊治在縣南，永樂元年圯於水，徙治西北界。嘉靖二十五年遷於滄河北，卽今治也。東濱淮。東南有濳河，西北有滄河、沱河，東北有潼河，並流合淮，謂之五河口。又西有上店巡檢司，後廢。

虹府東北。元屬泗州。洪武七年七月來屬。南有汴河。東南有潼河。西有沱河。

壽州 元安豐路，屬河南江北行省。太祖丙午年曰壽春府。吳元年曰壽州，屬臨濠府。洪武二年九月直隸中書省。四年二月還屬，後以州治壽春縣省入。北濱淮。淮水逕山中，謂之硤石山，有西肥水來合焉。東北有八公山，東肥水逕其下，西入淮，謂之肥口。又西北有潁水，亦入淮。又南有芍陂水，西有淖水，俱入淮。又北有下蔡縣，南有安豐縣，俱洪武中省，有下蔡鎮巡檢司。又東有北爐鎮、西有正陽鎮二巡檢司。東距府一百八十里，領縣二。

霍丘州西南。西南有大別山。北濱淮，史河、澧河俱流入焉。南有開順鎮、丁塔店，西有高唐店三巡檢司。

蒙城州北。北有渦水，又有北肥水。

泗州元屬淮安路。太祖吳元年屬臨濠府。洪武二年九月直隸中書省。四年二月還屬府，後

以州治臨淮縣省入。南濱淮，有汴水自城北南流入焉。西距府二百十里，領縣二。

盱眙州南。東南有都梁山。東北有龜山。西有浮山。北濱淮，有池河自西來入焉。又東北有洪澤湖，淮水之所

匯也。又西有舊縣巡檢司。

天長州東南。治山在縣南。西北有石梁河，下流爲五湖，接高郵州界。東北有城門鄉巡檢司。

宿州元屬歸德府。洪武四年二月來屬。龍山在西南，北肥水出焉。又北有睢河，自河南永城縣流入，下流至

宿遷縣合淮，亦曰小河也。南有汴河，亦自永城縣流入，又有濇河與渙水合。又東南有沱水。東南距府二百

三十三里。領縣一。

靈璧州東。西南有齊眉山。北有磐石山。黃河在東北。南有汴河。北有睢河。又南有固鎮巡檢司。

潁州元屬汝寧府。洪武四年二月來屬。淮河在南，自河南固始縣流入，下流合大河入海。又南有汝水，自河

南息縣流入，逕朱臯鎮入淮。又北有潁河，自河南沈丘縣流入。洪武二十四年，黃河決於河南，由陳州合潁，逕太

和縣，又逕州城北，又逕潁上縣，至壽州同入於淮。永樂九年，河復故道。宣德、正統、成化、正德間，河、潁時通時

塞，俗亦稱潁爲小黃河。西北又有沈丘鎮巡檢司。東距府四百四十里。領縣二。

潁上州東南。東有潁河。南有淮河。東北有西肥水。

太和州西北。南有潁水，亦名沙河。北有西肥水。又有洪山、北原和二巡檢司。

亳州元屬歸德府。洪武初，以州治譙縣省入，尋降爲縣，屬歸德州。六年屬潁州。弘治九年十月復升爲州。西有渦河，自河南鹿邑縣流入，北有馬尚河，流合焉。南有西肥水，卽夏肥水也。又東南有城父縣，洪武中廢。又有義門巡檢司。東南距府四百五十里。

淮安府元淮安路，屬淮安道宣慰司。太祖丙午年四月爲府。領州二，縣九。西南距南京五百里。

洪武二十六年編戶八萬六千八百八十九，口六十三萬二千五百四十一。弘治四年，戶二萬七千九百七十八，口二十三萬七千五百二十七。萬曆六年，戶一十萬九千二百五，口九十二萬六千三十三。

山陽倚北濱淮。高家堰在其西南。南有運河，永樂中濬。西南有永濟河，萬曆九年開，長六十五里，亦謂之新運河。東南有射陽湖。東北有馬邏鄉、廟灣鎮、羊寨鄉三巡檢司。

清河府西。縣治濱黃河，崇禎末，遷治縣東南之甘羅城。南有淮河，東北與黃河合，謂之清口，舊謂之泗口。自徐州至此，皆泗水故道，爲黃河所奪者也。南有洪澤湖，有洪澤巡檢司。又東有馬頭鎮巡檢司。

鹽城府東南。東濱海，有鹽場。北有射陽湖。西有清溝、西北有喻口鎮二巡檢司。

安東府東北。元安東州。洪武二年正月降爲縣。東北胸山在南。東北有鬱洲山，在海中，洪武初，置東海巡檢

司於此，後移於州南之新壩。西南有漣河，又有桑墟湖，濱海。南有淮水，東北過雲梯關，折旋入於海。自清口至此，皆淮水故道，爲黃河所奪者也。又漣水自西北來，東南流入淮。又西北有碩項湖。東北有五港口、長樂鎮，東南有壩上三巡檢司。

桃源府西北。元曰桃園。洪武初，更名。北有大河，卽泗水故道。西北有古城巡檢司。東有三義鎮巡檢司，崇禎末，移於縣西之白洋河鎮。

沭陽府北。元屬海寧州。洪武初改屬。東南有流水，自山東鄒城縣流入，其下流爲漣水。又北有桑墟湖。

海州元曰海寧州。洪武初，復曰海州，以州治朐山縣省入。北有于公、白溝等浦，皆產鹽。南有惠澤，西北有高橋二巡檢司。南距府二百七十里。領縣一。

贛榆州北。西北有羽山。東濱海。東北有荻水鎮，南有臨洪鎮二巡檢司。

邳州元屬歸德府。洪武初，以州治下邳縣省入。四年二月改屬中都。十五年來屬。北有艾山，接山東沂水縣界。西有沂水，自沂州西流，至下邳入泗。又西北有沭河。萬曆三十五年開沭以通運，自沛縣夏鎮迄直河口，長二百六十餘里，避黃河險者三百餘里。有直河口巡檢司。又西有新安巡檢司。東南距府四百五十里。領縣二。

宿遷州東南。北有阿嵎山。南有大河，卽泗水故道。又東南有睢水，入大河，曰睢口，亦曰小河口。又東南有白洋河，西北有駱馬湖，皆入大河。東北有劉家莊巡檢司。

睢寧州南。北濱大河。有睢水自西來，經縣界，至睢口入河。

揚州府元揚州路，屬淮東道宣慰司。太祖丁酉年十月曰淮海府。辛丑年十二月曰維揚府。丙午

年正月曰揚州府。領州三，縣七。西距南京二百二十里。洪武二十六年編戶一十二萬三千九十七，口七十三萬六千一百六十五。弘治四年，戶一十萬四千一百四，口六十五萬六千五百四十七。萬曆六年，戶一十四萬七千二百一十六，口八十二萬七千八百五十六。

江都倚。元末廢。太祖辛丑年復置。西有蜀岡。東有官河，卽古邗溝，今運河也。南濱大江。東北有艾陵湖。

北有邵伯湖，有邵伯鎮巡檢司。又東有萬壽鎮、西北有上官橋、南有瓜洲鎮三巡檢司。又東有歸仁鎮巡檢司，後遷便益河口。

儀真府西。元眞州，治揚子縣。洪武二年，州廢，改縣曰儀真。西北有大、小銅山。南濱江。南有運河。東南有

舊江口巡檢司，尋移於縣南汊河口。

泰興府南。南濱江。西北有口岸鎮、東有黃橋鎮、南有印莊三巡檢司。

高郵州元高郵府，屬淮東道宣慰司。洪武元年閏七月降爲州，以州治高郵縣省入。西有運河。西北

有樊梁、甓社、新開等湖。西南有白馬塘。北有張家溝、東北有時堡二巡檢司。又西有北阿鎮。東有三垛鎮。西

南距府百二十里。領縣二。

寶應州北。西有運河，又有汜光、白馬、射陽等湖。南有槐樓鎮、西南有衡陽二巡檢司。

興化州東。南有運河。東有得勝湖。東北有安豐巡檢司。又東北有鹽場。

泰州 洪武初，以州治海陵縣省入。東濱海。南濱江。西有運河。東北有西溪鎮、北有寧鄉鎮、東南有

海安鎮三巡檢司。西距府百二十里。領縣一。

如臯州東南。大江在縣南。運河在縣北。東有掘港、南有石莊、北有西場三巡檢司。又東南有白浦鎮。

通州 洪武初，以州治靜海縣省入。南有狼山，臨大江，有狼山巡檢司。東南濱海，舊有海門島及布州夾。

西有運鹽河。又東北有石港巡檢司。城南有利豐監，宋置。西距府四百里。領縣一。

海門州東。舊治禮安鄉圯於海，正德七年徙治餘中場。嘉靖二十四年八月遷於金沙場以避水患。海在東，大江

於此入海。又西有張港、東有吳陵、又有安東壩上、又有白塔河四巡檢司。東南有料角嘴。

蘇州府 元平江路，屬江浙行省。太祖吳元年九月曰蘇州府。領州一，縣七。西距南京五百八十

八里。洪武二十六年編戶四十九萬一千五百一十四，口二百三十五萬五千三十。弘治

四年，戶五十三萬五千四百九，口二百四萬八千九十七。萬曆六年，戶六十萬七百五十

五，口二百一萬一千九百八十五。

吳倚。西有姑蘇山。西南有橫山，又有穹窿、光福等山。又有太湖。湖縱廣三百八十三里，周三萬六千頃，跨蘇、



常、嘉、湖四府之境，亦曰具區，亦曰五湖，中有包山、莫釐山。又南有吳淞江，亦曰松江，亦曰松陵江，亦曰笠澤，自太湖分流，東入海。又西有運河。西南有木瀆、東山、用頭三巡檢司。又有橫金巡檢司，後廢。

長洲倚。西北有虎丘山，又有陽山，又有長蕩、陽城等湖。東有婁江，源出太湖。東南有運河。又北有吳塔、東南有陳墓二巡檢司。又東有唐湖巡檢司，後廢。

吳江府東南。元吳江州。洪武二年降爲縣。西濱太湖。東有吳淞江，又有運河。又東南有白蜆江。又東有同里，南有平望，西南有震澤，東南有簡村、汾湖五巡檢司。又東有長橋、西南有澗溪、東南有因瀆三巡檢司，後廢。

崑山府東。元崑山州。洪武二年降爲縣。南有吳淞江。西有女婁江。東南有澱山湖。又南有千墩浦，東有夏駕浦，皆注於婁江。東南有石浦巡檢司，後移於千墩浦口。西北有巴城巡檢司，後移於縣西之眞義鎮。

常熟府北。元常熟州。洪武二年降爲縣。萬曆末避諱曰嘗熟。西北有虞山。北有福山，下臨大江。有福山浦，又東有白茆浦，東北有許浦，西北有奚浦、黃泗浦，爲五大浦。皆分太湖西北之水，注於大江。南有運河。有許浦、白茅、黃泗、福山四巡檢司。

嘉定府東。元嘉定州。洪武二年降爲縣。東濱海。南有運河。又南有吳淞江，西南有白鶴江，西南有青龍江，南有蟠龍江，皆匯吳淞江入海。又劉河在縣北，卽婁江也。又東南有吳淞江守禦千戶所，洪武十九年置。又有寶山守禦千戶所，本協守吳淞中千戶所，嘉靖三十六年置，萬曆五年更名。又東有顧涇、東南有江灣二巡檢司。

又西南有吳塘、南有南翔二巡檢司，後廢。

**太倉州** 本太倉衛，太祖吳元年四月置。弘治十年正月置州於衛城，析崑山、常熟、嘉定

三縣地益之。東濱海。海口有鎮海衛，洪武十二年十月置，後移於太倉衛城。南有劉河，其入海處曰劉河口，

有劉家港巡檢司。北有七鴉浦，亦東入海。又東北有甘草巡檢司。又有唐茜涇口巡檢司，後移於東花浦口，尋廢。

又有茜涇巡檢司，亦廢。西距府一百零五里。領縣一。

**崇明州** 東。元崇明州，屬揚州路。洪武二年降爲縣。八年改屬蘇州府。弘治十年正月來屬。舊治在縣東北曰東

沙，爲海所圯。永樂十九年、嘉靖八年、三十三年三遷，亦俱圯於水。萬曆十三年遷於平洋沙巡檢司，卽今治

也。四面環海。西有西沙、北有三沙二巡檢司。

**松江府** 元直隸江浙行省。太祖吳元年正月因之。領縣三。西北距南京七百七十里。洪武二十

六年編戶二十四萬九千九百五十，口一百二十一萬九千九百三十七。弘治四年，戶二十

萬五百二十，口六十二萬七千三百一十三。萬曆六年，戶二十一萬八千三百五十九，口

四十八萬四千四百一十四。

**華亭** 倚崑山在縣西北。東南濱海，有鹽場。又西北有澱山湖，西有泖湖。〔一八〕東南有黃浦，西北有趙屯、大盈、

顧會、松子、磬龍等五浦，俱會吳淞江入海。東南有金山衛，又東有青村守禦千戶所，俱洪武二十年二月置。西

北有小貞村、西南有柳橋二巡檢司。南有金山巡檢司，本治張堰，後徙胡家巷。東南有南橋巡檢司，本戚睦，後徙治更名。又有陶宅巡檢司，後廢。又東南有柘林鎮，嘉靖間築城戍守。

上海府東北。東濱海，有鹽場。北有吳淞江，有巡檢司。東有黃浦，有巡檢司。東南有南匯，皆守禦中，後千戶所，

洪武二十年二月置。又有三林莊巡檢司。又有南贛巡檢司，後廢。嘉靖三十六年築城曰川沙堡，置兵戍守焉。

青浦府西北。嘉靖二十一年四月以今縣東北之新涇巡檢司置，析華亭、上海二縣地益之。三十二年廢爲青龍鎮，

仍置新涇巡檢司。萬曆元年復於唐行鎮置縣，卽今治也。北有吳淞江。東有顧會等浦。西南有澱山湖。又西有安莊鎮，殿山巡檢司置於此。

常州府 元常州路，屬江浙行省。 太祖丁酉年三月丁亥曰長春府，己丑曰常州府。萬曆末，避諱曰

嘗州府。領縣五。西北距南京三百六十里。洪武二十六年編戶一十五萬二千一百六十四，口七十七萬五千五百一十三。弘治四年，戶五萬一百三十一，口二十二萬八千三百六十三。萬曆六年，戶二十五萬四千四百六十，口一百萬二千七百七十九。

武進倚。東爲晉陵縣，元時同治郭內。太祖丁酉年三月改武進縣曰永定，晉陵縣曰京臨。尋以京臨省入永定。

壬寅年八月仍改永定曰武進。東南有馬跡山，濱太湖。北有大江。西有孟瀆，又有得勝新河，俱北入江。南有運河。西南有滬湖，與宜興界。東有陽湖，與無錫界。西有魏村，闌守禦百戶所，洪武三年置。又有奔牛巡檢

司。西北有小河巡檢司，舊在鄭港，後移小河寨，尋復遷孟河城。北有澡江巡檢司，舊在江北沙新河，後遷縣北於塘村。

無錫府東。元無錫州。洪武二年四月降爲縣。西有慧山，梁溪出焉，西南入太湖，其別阜曰錫山。西南有太湖。東南有運河。又西北有高橋，東南有望亭二巡檢司。

宜興府南。元宜興州。太祖戊戌年十月曰建寧州，尋復曰宜興州。洪武二年降爲縣。西南有荆南山，又有國山，又有龍池山。又東南有香蘭山，臨太湖。又有唐貢山，產茶。西北有山山，有長蕩湖。北有運河。南有荆溪。西南有百瀆，疏荆溪之下流，注於太湖，後多堙廢。東北有下邳，北有鍾溪，東南有湖汊，西南有張渚四巡檢司。

江陰府西北。元江陰州，直隸江浙行省。太祖甲辰年曰連洋州，尋復曰江陰州。吳元年四月降爲縣，來屬。北有君山，濱大江。西南又有秦望山。東有香山。南有運河。又申浦在西，又有黃田等港，俱注大江。東有石頭港巡檢司。西有利港巡檢司，後移於夏港。又東有范港巡檢司，後廢。又有楊舍鎮，嘉靖三十七年築城。

靖江府東北。成化七年閏九月以江陰縣馬駄沙置。<sup>〔一〕</sup>大江舊分二派，繞縣南北。天啓後，潮沙壅積，縣北大江漸爲平陸。西南有新港巡檢司。

鎮江府元鎮江路，屬江浙行省。太祖丙申年三月曰江淮府，十二月曰鎮江府。領縣三。西距南京城二百里。洪武二十六年編戶八萬七千三百六十四，口五十二萬二千三百八十三。弘

治四年，戶六萬八千三百四十四，口一十七萬一千五百八。萬曆六年，戶六萬九千三十九，口一十六萬五千五百八十九。

丹徒倚。北有北固山，濱大江。江中西北有金山，東北有焦山。又城西江口有蒜山。又京峴山在東，圖山在北，〔二〇〕濱江爲險。又南有運河。西有高資鎮，東北有安巷，東有丹徒鎮，北有姜家嘴四巡檢司。

丹陽府東南。北濱大江，又有練湖。南有運河。又東有呂城鎮巡檢司，尋移鎮東。又有包港巡檢司，尋移顧巷。

金壇府東南。西有茅山。〔三一〕東南有長蕩湖，一名洮湖，有湖溪巡檢司。北有白鶴溪。

廬州府元廬州路，屬河南江北行省。太祖甲辰年七月爲府，置江淮中書行省於此，尋罷。領州二，

縣六。距南京五百十里。洪武二十六年編戶四萬八千七百二十，口三十六萬七千二百。弘治四年，戶三萬六千五百四十八，口四十八萬六千五百四十九。萬曆六年，戶四萬七千三百七十三，口六十二萬二千六百九十八。

合肥倚。西有雞鳴山，肥水所出，東南流入巢湖。西南有紫蓬山。東有浮槎山、橫山。〔三二〕又東南有四頂山，俯

瞰巢湖，湖周四百餘里，中有姥山、孤山。又東北有滁水，源出龍潭，下流至六合縣入江。又東有店阜河，南有

三汊河，皆入巢湖。東北有梁縣，洪武初省。西南有廬鎮關巡檢司，後徙於縣東之石梁鎮。

舒城府西南。西南有龍眠山，與桐城縣界。西有三角山。又巢湖在東。又南有北峽關，亦與桐城界。

廬江府南。元屬無爲州。洪武初，改屬府。東北有治父山。東有巢湖。東南有黃陂湖。西有冷水關，有巡檢司。

無爲州 洪武中，以州治無爲縣省入。大江在東南。東有濡須水，一名天河，自巢湖分流，東北入江。又

東有奧龍河，東南有泥汭河，土橋河，北有黃落河，鎮四巡檢司。西北距府二百八十里。領縣一。

巢州北。東南有七寶山，與含山縣濡須山相對峙，有西關在其上。巢湖在西，西北有柘臯河流入焉。南有石梁河，卽濡須上流也，東南有清溪入焉。西南有焦湖巡檢司。

六安州 洪武四年二月屬中都臨濠府，以州治六安縣省入。十五年改屬。三西有淠水，亦曰淠水，下流至壽州入淮。西南有麻埠巡檢司，後廢。又西北有和尚灘巡檢司，弘治間屬霍山縣，後移於新店，仍來屬。東距府百八十里。領縣二。

英山州西南。縣治本直河鄉，崇禎十二年徙於西北之章山，十六年又遷於北境之添樓鄉。多雲山在西北，接湖廣羅田縣界。西有英山河，湖廣淠水之上源也。

霍山州西南。本六安州故埠鎮巡檢司，弘治二年改爲縣。南有霍山，亦曰天柱山，亦曰衡山，又謂之南岳也。東南有鐵鑪山，多鐵冶。又西南有四十八盤山，又淠河在東，源出霍山，下流至壽州入淮。西北有千羅峽，西南有上土市二巡檢司。

安慶府 元安慶路，屬河南江北行省。太祖辛丑年八月曰寧江府，壬寅年四月曰安慶府。領縣六。

北距南京六百五十里。洪武二十六年編戶五萬五千五百七十三，口四十二萬二千八百四。弘治四年，戶四萬六千五十，口六十一萬六千八十九。萬曆六年，戶四萬六千六百九，口五十四萬三千四百七十六。

懷寧倚南濱大江，西有皖水流入焉，曰皖口。西北有觀音港巡檢司。東有長風沙鎮巡檢司。

桐城府東北。東有浮山，一名浮度山。西北有龍眠山。北有北峽山，與舒城界，有北峽關巡檢司。又北有西峽山，亦謂之南峽石，對壽州峽石則此爲南也。東南濱江，有樅陽河，自西北流入焉。又東有六百丈，東南有馬踏石、源子港三巡檢司。

潛山府西北。元末廢。洪武初復置。西北有灊山，亦曰天柱山，亦曰皖公山，即霍山也，皖水出焉，別流曰灊水，合流注大江。又有天堂山，後部河所出，有天堂寨巡檢司。

太湖府西北。西北有司空山。城西有馬路河，即後部河之下流也，東合於灊水。又西北有南陽、白沙，東北有小池，北有後部四巡檢司。

宿松府西南。東有馬頭山。又小姑山在縣南大江中，與江西彭澤縣界，有小姑山巡檢司。又西南有歸林灘、南有涇江口二巡檢司。

望江府西南。南濱江。東有雷池，南入江，曰雷江口，亦曰雷港，有巡檢司。西有泊湖，北有慈湖，東北有漳湖，下流俱入江。又西南有楊灣鎮巡檢司。

太平府 元太平路，屬江浙行省江東道。 太祖乙未年六月爲府。 領縣三。 東距南京百三十五里。 洪武二十六年編戶三萬九千二百九十，口二十五萬九千九百三十七。 弘治四年，戶二萬九千四百六十六，口一十七萬三千六百九十九。 萬曆六年，戶三萬三千二百六十二，口一十七萬六千八十五。

當塗 倚。城北有采石山，一名牛渚山，臨大江。西南有博望山，與和州梁山夾江相對，亦曰東梁山。又丹陽湖在東南，周三百餘里，分流蕪湖，西入江。南有姑熟溪，又有黃池河，西南有大信河，北有慈湖，皆入大江。有采石、大信二巡檢司。

蕪湖府 西南。西南有戰鳥山，在大江中。西北有七磯。南有魯明江，一名魯港，又有石碗河，俱注大江。西有河口鎮巡檢司，後移於魯港鎮。

繁昌府 西南。西北有礪山，在江中。又三山磯在東北，濱江。又西有荻港，入大江。有三山、荻港二巡檢司。

池州府 元池州路，屬江浙行省江東道。 太祖辛丑年八月曰九華府，尋曰池州府。 領縣六。 東北距南京五百五十里。 洪武二十六年編戶三萬五千八百二十六，口一十九萬八千五百七十四。 弘治四年，戶一萬四千九十一，口六萬九千四百七十八。 萬曆六年，戶一萬八千三



百七十七，口八萬四千八百五十一。

貴池倚。南有齊山。北濱江。東有梅根港。西有池口河，卽貴池也，又西有李陽河，俱流入大江。有池口鎮、李陽河二巡檢司。

青陽府東。西南有九華山。北有青山。西有五溪水，出九華山，又南有臨城河，俱會流大通河入江。

銅陵府東北。南有銅官山。東有城山。西濱大江。又南有大通河，北有荻港河，俱入大江，有大通巡檢司。

石埭府東南。北有陵陽山。西有礫山，官溪出焉，卽池口河之源也。又舒溪在南，下流合蕪湖縣之魯港入江。

建德府西南。南有龍口河，東南入饒州府之獨山湖。又有堯城溪，下流爲東流縣之江口河，入江。又西南有永豐鎮巡檢司。

東流府西。西南有馬當山，枕大江，與江西彭澤縣界。南有香口河，流入江，有香口鎮巡檢司，後移於吉陽鎮。

寧國府元寧國路，屬江浙行省。太祖丁酉年四月曰寧國府。辛丑年四月曰宣城府。丙午年正月

曰宣州府。吳元年四月仍曰寧國府。領縣六。北距南京三百十里。洪武二十六年編戶九萬九千七百三十二，口五十三萬二千二百五十九。弘治四年，戶六萬三百六十四，口三十七萬一千五百四十三。萬曆六年，戶五萬二千一百四十八，口三十八萬七千一百一十九。宣城倚。北有敬亭山。西有清弋江，西北至蕪湖縣入江。又東有宛溪，與東北之句溪合，北流入大江。又南湖

亦在東北，流注於句溪。北有黃池鎮、東北有水陽鎮二巡檢司。

南陵府西。西有工山。南有呂山，淮水出焉。東有青弋江。又西南有漳水，與淮水合，入於青弋江。又南有鐵嶺巡檢司。

涇府西。南有承流山。西有賞溪，亦曰涇溪，其上流卽舒溪也。又東南有藤溪來合焉，下流入青弋江。東南有茹麻嶺巡檢司。

寧國府東南。西有紫山。西北有文脊山。東南有千秋嶺，有關。東有東溪，出浙江於潛縣天目山。西有西溪，出績溪縣龍叢山，卽句溪上源也。東南有嶽山巡檢司，舊置嶽山下，洪武中遷於紐口，復移於石口鎮。又西南有胡樂巡檢司。

旌德府南。北有石壁山。西有正山。西南有箬嶺，與太平、歙二縣界。東有徽水，自績溪縣流入，卽藤溪上流也。東北有烏嶺巡檢司，廢。又北有三溪巡檢司。

太平府西南。南有黃山，與歙縣分界。西有龍門山，有巡檢司。南有麻川，與舒溪合流入涇縣，爲賞溪。西南有宏潭巡檢司，後移於郭巖前。

徽州府元徽州路，屬江浙行省。太祖丁酉年七月曰興安府。吳元年曰徽州府。領縣六。北距南京六百八十里。洪武二十六年編戶一十二萬五千五百四十八，口五十九萬二千三百六

十四。弘治四年，戶七千二百五十一，口六萬五千八百六十一。萬曆六年，戶一十一萬八千九百四十三，口五十六萬六千九百四十八。

歙倚。西北有黃山，亦曰黟山，新安江出焉，東南流爲歙浦。又東曰新安江，至浙江建德縣，與東陽江合爲浙江上源。又楊之水在西，亦曰徽溪，合於歙浦。東南有街口鎮、王千寨二巡檢司。西北有黃山巡檢司。

休寧府西。東北有松蘿山。西有白嶽山。東南有率山，率水出焉，新安江別源也。西南有浙溪，東流與率水合。

又西有吉陽水，亦曰白鶴溪，下流合於浙溪。西南有黃竹嶺巡檢司，尋廢。東南有坎厦巡檢司，後移於屯溪。

婺源府西南。元婺源州。洪武二年正月降爲縣。北有浙嶺，浙溪水出焉，一名漸溪，新安江別源也。西北有大廣山，婺水所出，南流達於鄱陽湖。又西南有太白，東有大鏞嶺二巡檢司。又西有項村巡檢司，舊治澆嶺，後移縣西北之嚴田。萬曆九年復故。

祁門府西。東北有祁山。西有新安山，又有武陵嶺。北有大共山，大共水出焉，南流入江西浮梁縣界。有大共嶺巡檢司。又西南有良禾嶺巡檢司，後移於苦竹港。

黟府西。西南有林歷山。又有武亭山，橫江水出焉。又東北有吉陽山，吉陽水所出。南有魚亭山，魚亭水出焉。俱流合橫江。

績溪府東北。西北有徽嶺山。東有大鄣山，浙水出焉，亦新安江別源也。又龍叢山在東北，楊之水出焉，流合大鄣山水。有叢山關，與寧國縣界。東有西坑寨巡檢司，尋廢。西北有濠寨巡檢司。

徐州元屬歸德府。洪武四年二月屬中都臨濠府。十四年十一月直隸京師。東南有雲龍山。天啓四年遷州治於雲龍山。東北有盤馬山，產鐵。又有銅山。東南有呂梁山，泗水所經。大河自蕭縣流入，經州城北，遂奪泗水之道，東經百步洪、呂梁洪而入邳州界。有呂梁洪巡檢司。又睢水在南。領縣四。南距南京一千里。洪武二十六年編戶二萬二千六百八十三，口一十八萬八百二十一。弘治四年，戶三萬四千八百八十六，口三十五萬四千三百一十一。萬曆六年，戶三萬七千八百四十一，口三十四萬五千七百六十六。

蕭州西南。舊治在縣西北，今治萬曆五年徙。南有永固山。北有大河，舊汴河所經道也。南有睢水。又西北有趙家圈巡檢司。嘉靖四十四年，大河決於此。

沛州西北。元屬濟寧路。太祖吳元年來屬。南有大河。東有泗河，自山東魚臺縣流入境。又泡河在西，薛河在東，又北有南沙河、北沙河，皆會於泗。又昭陽湖在縣東。又東北有夏鎮。

豐州西北。元屬濟寧路。太祖吳元年來屬。大河在南。北有豐水，卽泡河也。

碭山州西。元屬濟寧路。太祖吳元年來屬。東南有碭山。其北有芒山。大河自河南虞城縣流入，舊經縣南，嘉靖三十七年徙在北。又南有睢水。

滁州元屬揚州路。洪武初，以州治清流縣省入。七年屬鳳陽府。二十二年二月直隸京師。南

有琅邪山。西南有清流山，清流關在其南，清流水出焉，合於滁水。又滁水自全椒縣流入，下流至六合縣入江。西有

大鎗嶺巡檢司。領縣二。東距南京一百四十五里。洪武二十六年編戶三千九百四十四，口

二萬四千七百九十七。弘治四年，戶四千八百四十，口四萬九千七百一十二。萬曆六年，戶六千七百一十七，口六萬七千二百七十七。

全椒州南。洪武初省，十三年十一月復置。東南有九鬮山。西北有桑根山。又滁水在南，自合肥縣流入，有襄水自北流合焉。

來安州北。洪武初省，十三年十一月復置。東北有五湖山，下有五湖。北有石固山。又來安水在東，東南合清流河。又東南有湯河，南入滁河。東北有白塔鎮巡檢司。

和州元治歷陽縣，屬廬州路。洪武初，省州入縣。二年九月復改縣爲州，仍屬廬州府。七年屬鳳

陽府，尋直隸京師。梁山在南，與當塗縣博望山夾江相對，謂之天門山，亦曰西梁山。又東南有橫江，南對當塗

縣之采石磯。西南有柵江，卽濡須水，入江之口也。南有白石水，又有裕溪河，源出巢湖，皆南流注於江。西有麻湖，

亦曰歷湖，永樂中堙。東北有烏江縣，洪武初省。東有浮沙口，南有裕溪鎮二巡檢司。又南有牛屯河巡檢司，後移

於烏江鎮，卽故烏江縣也。領縣一。東南距南京百三十里。洪武二十六年編戶九千五百三十

一，口六萬六千七百一十一。弘治四年，戶七千四百五十，口六萬七千一十六。萬曆六年，戶八千八百，口一十萬四千九百六十。

含山 州西。洪武初省，十三年十一月復置。南有白石山，白石水出焉。西南有濡須山，與無爲州界。西對巢縣之七寶山，濡須水出其間，卽東關口也。又南有三叉河，東合裕溪入江。

廣德州 元廣德路，屬江浙行省。太祖丙申年六月曰廣興府。洪武四年九月曰廣德州。十三年四月

以州治廣德縣省入，直隸京師。西有橫山。南有靈山。西北有桐川，匯丹陽湖入江，亦名白石水。南有廣

安，西南有陳陽，北有杭村三巡檢司。又東南有苦嶺關，路通浙江安吉州。又有四安鎮。領縣一。北距南京

五百里。洪武二十六年編戶四萬四千二百六十七，口二十四萬七千九百七十九。弘治四年，戶四萬五千四十三，口一十二萬七千七百九十五。萬曆六年，戶四萬五千二百九十六，口二十二萬一千五十三。

建平州 西北。西南有桐川，又有南碕湖，亦謂之南湖，與宣城縣界，流入丹陽湖。北有梅渚，南有陳村二巡檢司。

## 校勘記

〔一〕洪熙初仍稱行在正統六年十一月罷稱行在十一月，原作「八月」，據英宗實錄卷八五正統六

年十一月甲午條改。原脫「洪熙初仍稱行在」，據明史稿志一八地理志補。按永樂十九年改北京爲京師，卽去行在之稱，見太宗實錄卷一一七永樂十八年九月丁亥條、國權卷一七頁一一七三。洪熙元年三月戊戌要復都南京，改北京爲行在，見仁宗實錄卷八下。正統六年，仍以北京爲京師，罷稱行在。本志記永樂十九年改北京爲京師，而脫去洪熙元年這一過程的記載，則「正統六年十月罷稱行在」卽不可解。

- 〔三〕永樂四年閏七月詔建北京宮殿 原脫「詔」字。按本書卷六成祖紀，四年閏七月壬戌下詔，「以明年五月建北京宮殿」，太宗實錄卷四四同。是四年閏七月下詔，實際修建在五年五月。據補。
- 〔三〕南之右曰順城 順城，寰宇通志卷一、元史卷五八地理志作「順承」，明史稿志一八地理志、明會典卷一八七、讀史方輿紀要卷一一作「順成」，當是因「承」「城」「成」音同而產生的不同寫法。
- 〔四〕西之北曰彰儀 彰儀，本書卷一一景帝紀、明史稿志一八地理志、讀史方輿紀要卷一一都作「彰義」。「彰義」是金時舊名，見金史卷二四地理志。

- 〔五〕嘉靖三十二年築重城 三十二年，原作「二十三年」，據本書卷一八世宗紀、明史稿志一八地理志、世宗實錄卷三九六和四〇三改。按世宗實錄卷三九五嘉靖三十一年三月丙午條議准築外城，又卷三九六嘉靖三十二年閏三月乙丑條「建京師外城興工」，又卷四〇三嘉靖三十二年十月辛丑條「新築京師外城成」。

〔六〕西山在西 原作「北西山在西」，衍「北」字，據明史稿志一八地理志、明一統志卷一、讀史方輿紀要卷一一刪。

〔七〕元清州 清州，原作「青州」，據明史稿志一八地理志、寰宇通志卷二、元史卷五八地理志、讀史方輿紀要卷一三改。按本志下文稱洪武八年，「改清爲青」。

〔八〕以州治清池縣省入 原脫「治」字，據明史稿志一八地理志補。

〔九〕口一百九萬三千五百三十一 一百九萬，原作「一十九萬」，據明史稿志一八地理志、明會典卷一九改。

〔一〇〕東北有衛水 原脫「東北」兩字，據明史稿志一八地理志、明一統志卷三、讀史方輿紀要卷一四補。

〔一一〕北有黑水 原脫「北」字，據明史稿志一八地理志、讀史方輿紀要卷一四補。

〔一二〕西南有洹水 洹水，原作「恆水」，據明史稿志一八地理志、讀史方輿紀要卷一五改。本志卷四二彰德府臨漳縣下有「洹水」，和本條下的「自臨漳縣流入」相應。

〔一三〕洪武十四年九月置山海衛於此 原脫「十」字，據明史稿志一八地理志、太祖實錄卷一三九洪武十四年九月甲申條補。

〔一四〕景泰二年移於雷家站 站，原作「站」，據明史稿志一八地理志、明一統志卷五改。



〔二五〕領衛十五蔚州延慶左永寧保安四衛俱設於本州縣 四衛，原作「五衛」。按以上所列蔚州、延慶左、永寧、保安共四衛，非五衛。將此四衛加以下文所列萬全都司所屬十一衛，共得十五衛，與「領衛十五」之語正合。本書卷九〇兵志、明會典卷一二四所載萬全都司屬衛亦正十五。「五」字乃「四」字之譌，今改正。

〔二六〕西北有西陽河 西陽河，原作「白陽河」，據本志下文「西陽河堡」及明史稿志一八地理志、讀史方輿紀要卷一八改。

〔二七〕東北有長伸地 長伸地，原作「長仲地」，據明史稿志一八地理志、讀史方輿紀要卷一八改。

〔二八〕西有泖湖 泖湖，原作「茆湖」，據明史稿志一八地理志、讀史方輿紀要卷二四改。下文「茆橋」據同上改作「泖橋」。

〔二九〕成化七年閏九月以江陰縣馬馱沙置 成化七年閏九月，原作「成化八年九月」。明史稿志一八地理志、明一統志卷一〇都作「七年」。憲宗實錄卷九六繫於七年閏九月辛亥。據改。

〔三〇〕京峴山在東圖山在北 原作「京峴山在東東圖山在北」，下一「東」字緣上一「東」字而衍，據明史稿志一八地理志、明一統志卷一一、讀史方輿紀要卷二五刪。

〔三一〕西有茅山 茅山，原作「芽山」，據明史稿志一八地理志、明一統志卷一一改。

〔三二〕東有浮槎山橫山 橫山，明史稿志一八地理志、寰宇通志卷一七、明一統志卷一四作「黃山」。

〔三〕十五年改屬十五年，原作「六十年」。洪武無六十年，據明一統志卷一四、讀史方輿紀要卷二六改。

# 明史卷四十一

## 志第十七

### 地理二

#### 山東 山西

山東 禹貢青、兗二州地。元直隸中書省，又分置山東東西道宣慰司治益都屬焉。洪武元年四月置山東等處行中書省。治濟南府。三年十二月置青州都衛。治青州府。八年十月改都衛爲山東都指揮使司。九年六月改行中書省爲承宣布政使司。領府六，屬州十五，縣八十九。爲里六千四百有奇。南至鄒城，與南直界。北至無棣，與北直界。西至定陶，與北直、河南界。東至海。距南京一千八百五十里，京師九百里。洪武二十六年編戶七十五萬三千八百九十四，口五百二十五萬五千八百七十六。弘治四年，戶七十七萬五百五十五，口六百七十五萬九千六百七十五。萬曆六年，戶一百三十七萬二千二百六，口五百六十六萬四千九十九。

濟南府 元 濟南路，屬山東東西道宣慰司。〔一〕太祖吳元年爲府。領州四，縣二十六。

歷城倚。天順元年建德王府。南有歷山。東有華不注山。有大清河在西北，卽濟水故道，自壽張縣流經縣界，

東北至利津入海。又小清河，卽濟之南源，一名灤水，出城西 趵突泉，經城北，下流至樂安縣入海。又大明湖在城內。又東北有堰頭鎮巡檢司。

章丘府東。東有長白山，又有鬻山。南有東陵山，又有長城嶺。又小清河在北。又東有清河，一名繡江，合諸泉西北匯爲白雲湖，下流入小清河。

鄒平府東北。西南有長白山，接章丘、長山二縣界。北有小清河。

淄川府東。元 般陽路治此，屬山東東西道宣慰司。太祖吳元年改路爲淄川州，縣仍爲附郭。二年七月，州廢，來屬。西南有夾谷山。南有原山，與萊蕪縣界，其山陰淄水出焉。又西有孝婦河，自益都縣流入，合瀧、萌、般諸水，下流入小清河。

長山府東北。元屬般陽路。洪武二年七月來屬。西南有長白山。西北有小清河。南有孝婦河。

新城府東北。元屬般陽路。洪武二年七月來屬。七年十二月省入長山、高苑二縣，後復置。北有小清河。西北有孝婦河。東有烏河，其上流卽時水，下流至高苑縣入小清河。

齊河府西。元屬德州。洪武二年七月改屬府。有大清河。

齊東府東。元屬河間路。洪武初來屬。北有大清河。東有減水河，成化元年開濬，洩小清河漲溢入大清河。

濟陽府北。南有大清河。

禹城府西北。元屬曹州。洪武二十年來屬。西有漯水枯河，俗名土河。

臨邑府北。元屬河間路。洪武初來屬。西北有盤河。

長清府西南。元屬泰安州。洪武二年七月改屬府。東南有青崖山、隔馬山、方山。西南有大清河。又有沙河，自縣南流入焉，亦曰沙溝河。又東南有石都寨巡檢司。

肥城府西南。元屬濟寧路。洪武二年七月來屬。西北有巫山，一名孝堂山，肥水出焉，西流入大清河。

青城府東北。元屬河間路。洪武二年省入鄒平、齊東二縣。十三年十一月復置，來屬。北有大清河。北有大石關，舊置巡檢司，後廢。

陵府西北。元德州，治安德縣，直隸中書省。洪武元年省安德縣入州。七年七月移州於故陵縣。十三年十一月置陵縣於此。東有德河，下流西入衛河。

泰安州元直隸中書省。洪武初來屬，以州治奉符縣省入。北有泰山，卽岱宗也，亦曰東岳，汶水出焉，下

流至汶上縣合大清河。又東南有徂徠山。南有梁父山。又城西有泰安巡檢司。北距府百八十里。領

縣二。

新泰州東南。西北有宮山，本名新甫。西南有龜山。東北有小汶河，西流合汶水。又西有上四莊巡檢司。

萊蕪州東。洪武初，改屬濟南府。二年仍來屬。東北有原山，其山陽汶水別源出焉。又西南有冠山。西北有韶山。諸山多產銅鐵錫。

德州元陵州，屬河間路。〔三〕洪武元年降爲陵縣，屬濟寧府。二年七月改屬德州。七年七月省

陵縣，移德州治焉。西有衛河。東南有故篤馬河，俗名土河。東南距府二百八十里。領縣二。

德平州東。東北有般河，亦曰盤河，〔三〕或以爲古鈞盤也。

平原州東南。

武定州元棣州，治厭次縣，屬濟南路。洪武初，州縣俱廢。六年六月復置州，改名樂安。宣德元

年八月改爲武定州。永樂十五年，漢王府遷於此。宣德元年除。南有大清河，又有土河，又有商河。東南有

清河巡檢司。西南距府二百四十里。領縣四。

陽信州北。元屬棣州。東有商河。

海豐州東北。洪武六年六月析樂安州南地置，屬濱州，後來屬。東北濱海。又北有鬲津河，又有無棣縣，元屬棣

州，洪武初省。東北有大沽河口巡檢司。

樂陵州西北。舊治在縣之咸平鎮，屬滄州，洪武元年改屬濟寧府，二年移治富平鎮，七月來屬。南有般河及鬲津

河，又有土河。西南又有商河。西北有舊縣鎮巡檢司。

商河州西南。南有商河。

濱州 洪武初，以州治渤海縣省入。東北濱海，產鹽。南有大清河。北有土傷河，卽鬲津別名也。西南

距府三百五十里。領縣三。

利津州東。東北濱海，有永阜等鹽場。東有大清河，流入海。又東北有豐國鎮巡檢司。

霑化州西北。東北濱海，有富國等鹽場。又有久山鎮巡檢司。

蒲臺州南。元屬殷陽路。洪武二年七月來屬。東濱海。北有大清河。

兗州府元兗州，屬濟寧路。洪武十八年升爲兗州府。領州四，縣二十三。東北距布政司三百五

十里。

滋陽倚。洪武三年四月建魯王府。元曰巖陽。洪武初，省入州。十八年復置。成化間，改爲滋陽。泗水在東，

又有沂水，自曲阜縣西流來合焉。

曲阜府東。東南有尼山，沂水所出。又東有防山。北有泗水。又有洙水，西南流入於沂水。又北有孔林。

寧陽府北。西北有汶水，支流爲洸水。洸水者，洙水也，洸、洙相入受，通稱也，俱西南入運河。又東北有堽城堰，

卽汶、洸分流處也。

鄒府東南。元屬滕州。洪武二年七月改屬。東南有嶧山，亦曰邾嶧，又曰鄒嶧。東北有昌平山。西南有龜山。

又有泗河。

泗水府東。東有陪尾山，泗水出焉，經縣北，下流至南直清河縣入淮。

滕府東南。元滕州，治滕縣，屬益都路。洪武二年七月，州廢，縣屬濟寧府。十八年來屬。東南有桃山。東北有連青

山。又西南有新運河，北自南陽，南至境山，長一百九十四里，嘉靖四十四年所開。又薛水，源自縣東高、薛二山

間，西南流，合潞水，一名南沙河，至沛縣入運。又有北沙河在縣北，西流經魚臺入招湖。又南有沙溝集巡檢司。

嶧府東南。元嶧州，屬益都路。洪武二年降爲縣，屬濟寧府，後來屬。東南有柱子山，舊名葛嶧山，永水流其下。

又北有君山，一名抱犢山，西泇水所出，東南流至三合村，有東泇河自沂水來會焉。又南合武河、彭、永諸水注

於泗，謂之泇口。萬曆中，改爲運道，自夏鎮至直河口，凡二百六十餘里，避黃河之險者三百三十里。又西北有

鄒塢鎮巡檢司，嘉靖中，移於縣西拖梨溝。又東南有臺莊巡檢司，萬曆三十四年置。

金鄉府西南。元屬濟寧路。洪武十八年來屬。金莎嶺在東。大河在西南。

魚臺府西南。元屬濟州。洪武元年屬徐州。二年七月屬濟寧府。十八年來屬。泗河在東，卽運道也。北有荷

水，一名五丈溝，東入泗。又東有穀亭鎮，嘉靖九年，黃河決於此。又南有塌場口，洪武、永樂間，爲運道所經。

單府西南。元單州，屬濟寧路。洪武元年省州治單父縣入州。二年七月乃降州爲縣，屬濟寧府。十八年來屬。舊

城在南，正德十四年五月因河決改遷。南濱大河。

城武府西南。元屬曹州。洪武四年屬濟寧府。十八年來屬。縣城，正德十四年五月因河決改遷。南有故黃河，

卽洪武間之運道也，弘治後堙。



濟寧州 元任城縣，爲濟州治。至正八年罷濟州，徙濟寧路治此。 太祖吳元年爲濟寧府。十八年降爲州，

以州治任城縣省入。南臨會通河。西有馬腸湖。又東南有魯橋鎮巡檢司。東距府六十里。領縣三。

嘉祥州東。元屬單州。洪武二年來屬。南有塔山。東有會通河。北有故黃河，一名塔章河，卽楊場口之上流也。

鉅野州西北。元爲濟寧路治，至正八年徙路治任城縣，以縣屬焉。南有高山。東有鉅野澤，元末爲黃河所決，遂涸。東南有會通河。西南有故黃河，弘治後堙。西有安興集巡檢司。

鄆城州西北。西有灘水，又有故黃河，又有故濟水在西南。

東平州 元東平路，直隸中書省。 太祖吳元年爲府。七年十一月降爲州，屬濟寧府，以州治須城

縣省入。十八年改屬。北有瓠山。東北有危山。西南有安山，亦曰安民山。下有積水湖，一名安山湖。山

南有安山鎮，會通河所經也。汶水在南，西流入安山湖。又西北有金線關巡檢司。東南距府百五十里。領

縣五。

汶上州東南。西南有蜀山，其下爲蜀山湖。又西爲南旺湖，其西北則馬踏河，運道經其中而北出，卽會通河也。

又汶水在東北，舊時西流入大清河。永樂中，開會通河，堰汶水西南流，悉入南旺湖。

東阿州西北。故城在縣西南。今治，本故穀城縣也，洪武八年徙於此。南有礪礪山。西有魚山。會通河自西

南而北經此，始與大清河分流。又西有馬頰河，俗名小鹽河，東流入大清河。又張秋鎮在西南，弘治二年，河決於此。七年十二月塞，賜名安平鎮。

**平陰**州東北。南有汶河。西南有大清河，又有滑口鎮巡檢司，後廢。

**陽穀**州西北。東有會通河。又東有阿膠井。

**壽張**州西。洪武三年省入須城、陽穀二縣。十三年十一月復置，屬濟寧府，後來屬。東南有故城，元時縣治在焉。

今治，本王陵店，洪武十三年徙置。南有梁山澗，即故大野澤下流。〔四〕東北有會通河，又有沙灣，弘治前黃河經此，後堙。西南有梁山集巡檢司。

**曹州** 正統十年十二月以曹縣之黃河北舊土城置。東有舊黃河，洪武初，引河入泗以通運處也。永

樂中，亦嘗條濬。南有灘河。東南有荷澤，流爲荷水。東北距府三百里。領縣二。

**曹州**東南。元曹州，治濟陰縣，直隸中書省。洪武元年省濟陰縣入州。二年，州治自北徙於盤石鎮。四年降爲縣，

屬濟寧府。正統十年十二月置州，以縣屬焉。西南有黃陵岡，與河南儀封縣界。弘治五年，黃河決於此，河遂

在縣南，東入單縣界，至南直徐州，合泗入淮。又西有賈魯河，嘉靖前猶爲運道，後廢。東南有楚丘縣，元屬曹

州，洪武初省。又西北有安陵鎮巡檢司。

**定陶**州東南。元屬曹州。洪武元年屬濟寧府。十年五月省入城武縣。十三年十一月復置，仍屬濟寧府。正統

十年十二月來屬。西有黃河故道。弘治前，河經此，至張秋之沙灣入會通河。

**沂州**元屬益都路，後省州治臨沂縣入州。洪武元年屬濟寧府。五年屬濟南府。七年十二月屬青

州府。十八年來屬。弘治四年八月建涇王府，嘉靖十六年除。西有艾山。東有沂水，源自青州沂水縣，南流

至州境，與枋水合，下流入泗。又有流水，流經南直安東縣爲漣水，入淮。又西南有泃水，亦曰東泃水，下流合嶧縣之西泃水入運。西南有羅藤鎮巡檢司。西距府五百六十里。領縣二。

郟城州東南。洪武初置。東有馬陵山，又有羽山，與南直贛榆縣界。又流水在東。沂水在西。西有磨山鎮巡檢司，後廢。

費州西北。西北有蒙山。西南有大沫涸，又有朐水，東北有蒙陽水，下流俱入於沂河。西南有關陽鎮、西北有毛陽鎮二巡檢司。

東昌府元東昌路，直隸中書省。洪武初，爲府。領州三，縣十五。東距布政司二百九十里。

聊城倚。城東有會通河。西南有武水枯河，卽漯河也，爲會通河所截，中堙。

堂邑府西。東北有會通河。西有舊黃河。

博平府東北。洪武三年三月省，尋復置。西南有會通河。東北有故黃河。

茌平府東北。西有故黃河。又西北有故馬頰河。

莘府西南。北有弇山，舊有泉湧出，曰弇山泉。

清平府北。元屬德州。洪武元年屬恩州。二年七月屬高唐州。三年三月省，尋復置，改屬。西有會通河。西南有魏家灣巡檢司。

冠府西南。元冠州，直隸中書省。洪武三年降爲縣，來屬。西北有衛河。又東有賈鎮堡，東北有清水鎮堡，俱嘉

靖二十二年築。

臨清州 元臨清縣，屬濮州。洪武二年七月改屬。弘治二年升爲州。舊治在南，洪武二年徙治臨清。

景泰元年又於開東北三里築城，徙治焉。會通河在城南，有衛河自西來會，至天津直沽入海，爲北運河。東南距府百二十里。領縣二。

丘州西。元直隸東昌路。弘治二年改屬州。東南有衛河，又有漳河。

館陶州西南。元屬濮州。洪武二年七月屬東昌府，三年三月省，尋復置，仍屬東昌府。弘治二年改屬州。西有衛河，自元城縣流入。又西南有漳河。又西南有南館陶鎮巡檢司。

高唐州 元直隸中書省。洪武初，以州治高唐縣省入，來屬。西有漯河，溢涸無常。又有馬頰河，一名舊黃河。西南距府百二十里。領縣三。

恩州北。元恩州，直隸中書省。洪武二年降爲縣，來屬。西有故城。今治本許官店，洪武七年七月徙於此。西北有衛河。東南有馬頰枯河。又高雞泊亦在縣西北。

夏津州西。洪武三年三月省，尋復置。西南有衛河。又東有馬頰故河。又西有裴家圈巡檢司。

武城州西北。西有衛河。東南有沙河。東北有甲馬營巡檢司。

濮州 元直隸中書省。洪武二年以州治鄆城縣省入，來屬。故城在東，景泰三年以河患遷於王村，卽今治

也。東南有故黃河，永樂中，河流由此入會通河，後堙。又西南有濮水，一名洪河。東北距府二百里。領縣三。

范州東北。洪武三年三月省，尋復置。東南有故城，洪武二十五年圯於河，始遷今治。又東南有水保寨巡檢司。

觀城州西北。洪武三年三月省，尋復置。又東有馬頰河，有黑羊山水自西北流入焉。

朝城州北。洪武三年三月省，尋復置。西南有故潔河。

青州府元益都路，屬山東東西道宣慰司。太祖吳元年爲青州府。領州一，縣十三。西距布政司三

百二十里。

益都倚。洪武三年四月建齊王府，永樂四年廢。十三年建漢王府，十五年遷於樂安。成化二十三年建衡王府。

南有雲門山，與劈山連。西北有堯山。又西有九迴山，北陽水出焉，亦曰澠水，經治嶺山麓，曰五龍口，下流經

樂安縣，入巨淀。又有南陽水，源出縣西南石膏山，流經城北，又東北合北陽水。又西有淄水，下流至壽光入海。又西南有顏神鎮，孝婦河出焉，入淄川縣界。有顏神鎮巡檢司，嘉靖三十七年築城。鎮西南有青石關。

臨淄府西北。南有牛山。又有鼎足山，女水出焉，下流合北陽水。又有獬山。又有南郊山，其下爲天齊淵。城

東有淄水，又西有澠水，又有系水，下流俱入時水。其時水自西南而東北，亦曰邳水，又有澧水流入焉，下流俱至樂安縣入海。南有淄河店巡檢司，後廢。

**博興府**西北。元博興州。洪武二年降爲縣。南有小清河，有時水。

**高苑府**西北。東南有商山。西南有小清河。西北有田鎮巡檢司，後廢。

**樂安府**北。東北濱海，有鹽場。北有小清河。東有時水。又東南有淄水，又有北陽水，又有巨洋水，俱匯流於縣東北之高家港入海。港卽古之馬車瀆也。有高家港巡檢司。又西北有樂安鎮巡檢司。又東北有塘頭寨，有百戶所駐焉。

**壽光府**東北。北濱海，有鹽場。西有淄水，又有北陽水。又東有巨洋水。又西北有清水泊，卽古之鉅定湖也，其北接樂安縣之高家港。又東北有廣陵鎮巡檢司。

**昌樂府**東。元屬濰州，尋省，後復置，仍屬濰州。洪武初，改屬。西北有故城。洪武中，徙於今治。東南有方山，東丹水所出，北逕昌樂故城，西丹水流合焉，下流至壽光縣入於海。又南有白狼水，至濰縣入海。**臨朐府**東。南有朐山，又有大峴山，上有穆陵關巡檢司。又東有沂山，一名東泰山，流水、濶水俱發源於此。濶水，一名巨洋水，西合石溝水，至壽光入海。又東北有丹山，一名丸山，西丹河及白狼水出焉。

**安丘府**東南。元屬密州。洪武二年七月，州廢，屬府。西南有牟山，又有嶧山。又東北有岵山。東有濰水，下流經濰縣入海。又北有汶水，源亦出沂山，下流合濰水。

**諸城府**東南。元爲密州治，屬益都路。洪武二年七月，州廢，屬府。東南有琅邪山。西南有常山，又有馬耳山。北有濰水，東北有盧水，流合焉。南有信陽鎮巡檢司。又南有南龍灣海口巡檢司。

蒙陰府西南。元屬莒州。洪武二年七月改屬府。南有蒙陰山。東有長山，有蒙水，北流入沂水。東南有紫荊關。巡檢司，萬曆間廢。

莒州 元屬益都路。洪武初，以州治莒縣省入。西有浮來山。又西北有箕屋山，濰水出焉。又西南有流水，流入沂州界。南有十字路，西南有葛溝店二巡檢司。北距府二百里。領縣二。

沂水州西北。西北有大弁山，與雕厓山連，沂水出焉，南流經沂州界入泗。東北有沭水。

日照州東北。東濱海，有鹽場。東南有夾倉鎮巡檢司。

萊州府 元萊州，屬般陽路。洪武元年升爲府。六年降爲州。九年五月復升爲府。領州二，縣五。西距布政司六百四十里。

掖倚。北濱海，有鹽場。又有三山島，在海南岸。東北有萬里沙。西南有掖水，北入海。東南有小沽河。又東北有王徐砦守禦千戶所，嘉靖中置。又西有海倉，北有柴葫寨二巡檢司。

平度州 元膠水縣。洪武二十二年正月改置。北有萊山。西有膠水，下流至昌邑北入海。東有大沽河，源自黃縣蹲犬山，流經州，與小沽河合，通名爲沽河，至即墨縣入海。小沽，卽尤水也。又西南有亭口鎮巡檢司。北

距府百里。領縣二。

濰州西。元濰州，屬益都路。洪武元年以州治北海縣省入。九年屬萊州府。十年五月降爲縣。二十二年正月改

屬州。南有濰水，東北入海。又東北有固堤店巡檢司。

昌邑州西北。元屬濰州。洪武十年五月省入濰縣。二十二年正月復置，來屬。東有濰水。東北有膠河。北有魚兒鎮巡檢司。

膠州元屬益都路。洪武初，以州治膠西縣省入。九年來屬。西南有鐵嶺山，膠水所出，亦曰膠山。東北有沽河，南流入海。又東南海口有靈山衛，又有安東衛，俱洪武三十一年五月置。又有夏河寨千戶所，在靈山衛西南。石臼島寨千戶所，在安東衛南。俱弘治後置。又西南有古鎮巡檢司。北有逢猛鎮巡檢司。北距府二百二十里。領縣二。

高密州西北。元屬膠州。洪武元年屬青州府。九年五月屬萊州府，尋復屬州。東有膠水。西有濰水。又西南有密水，一名百尺溝，北會於濰水。

即墨州東。元屬膠州。洪武初，屬青州府。九年五月屬萊州府。十年五月仍屬州。東南有勞山，在海濱。又有田橫島，在東北海中。東有鼇山衛，洪武二十一年五月置。又東北有雄崖守禦千戶所，南有浮山守禦千戶所，俱洪武中置。又東北有栲栳島巡檢司。又即墨營舊在縣南，宣德八年移置縣北，有城。

登州府元登州，屬般陽路。洪武元年屬萊州府。六年直隸山東行省。九年五月升爲府。領州一，縣七。西距布政司一千零五十里。



蓬萊倚。洪武初廢。九年五月復置。北有丹崖山，臨大海。南有密神山，密水所出。西南有黑石山，黑水所出，

經城南合流，北入於海。西有龍山，產鐵。東有高山巡檢司，本置於海中沙門島，後遷朱高山下。又東南有楊家店巡檢司。

黃府西南。東南有萊山。西南有蹲犬山，大沽水出焉。又東有黃水，東南有泮水，合流入海。又西有馬停鎮巡檢司。

福山府東南。東北有之罘山，三面臨海。西南有義井河，北入海。又奇山守禦千戶所在東北，洪武三十一年置。又北有孫芥鎮巡檢司。

棲霞府東南。東有鉅嶧山，嘗產金，亦名金山。又有百澗山，西北有北曲山，二山舊皆產鐵。又南有翠屏山，大河出焉，即義井河之上源也。

招遠府西南。元屬萊州。洪武九年五月來屬。東北有原瞳河，北入海。西有東良海口巡檢司。

萊陽府南。元屬萊州。洪武九年五月來屬。東南有昌水，源發文登縣之昌山，一名昌陽水，南入海。東有奚養澤。又東南有大嵩衛，洪武三十一年五月置。衛西有大山千戶所，成化中置。又南有行村寨巡檢司。

寧海州元直隸山東西道宣慰司。洪武初，以州治牟平縣省入，屬萊州府。九年改屬。東有金水河，一名沁水，西南有五丈河，俱北入海。又西南有乳山寨巡檢司。西距府二百二十里。領縣一。

文登州東南。元屬寧海州。洪武初，改屬萊州府。九年五月屬登州府，後仍屬州。東南有斥山。南有成山，又

有鐵槎山。又西有鐵官山。東南濱海。南有靖海衛，東有成山衛，北有威海衛，皆洪武三十一年五月置。又寧津守禦千戶所在東南，亦洪武三十一年置。又東有海陽守禦千戶所，在靖海衛南。金山守禦千戶所，在威海衛西。百尺崖守禦千戶所，在威海衛北。尋山守禦千戶所，在成山衛東南。俱成化中置。又北有辛汪寨，東北有溫泉鎮，東有赤山鎮三巡檢司。

遼東都指揮使司 元置遼陽等處行中書省，治遼陽路。洪武四年七月置定遼都衛。六年六月置遼陽府、縣。八年十月改都衛爲遼東都指揮使司。治定遼中衛，領衛二十五，州二。十年，府縣俱罷。東至鴨綠江，西至山海關，南至旅順海口，北至開原。由海道至山東布政司，二千一百五十里。距南京一千四百里，京師一千七百里。

定遼中衛 元遼陽路，治遼陽縣。洪武四年罷。六年復置。十年復罷。十七年置衛。西南有首山。南有千山。又東南有安平山，山有鐵場。又西有遼河，自塞外流入，至海州衛入海。又西北有渾河，一名小遼水，東北有太子河，一名大梁水，又名東梁水，下流俱入於遼水。又東有鴨綠江，東南入海。又東有鳳凰城，在鳳凰山東南，成化十七年築，爲朝鮮入貢之道。又南有鎮江堡城。又連山關亦在東南。

定遼左衛

定遼右衛 俱洪武六年十一月置。

定遼前衛 洪武八年二月置。

定遼後衛 本遼東衛，洪武四年二月置。八年二月改。九年十月徙治遼陽城北，尋復。

東寧衛 本東寧、南京、海洋、草河、女直五千戶所，洪武十三年置。十九年七月改置。

自在州 永樂七年置於三萬衛城，尋徙。

以上五衛一州，同治都司城內。

海州衛 本海州，洪武初，置於舊澄州城。九年置衛。二十八年四月，州廢。西南濱海，有鹽場。

西有遼河，匯渾河、太子河入海，謂之三岔河。又西有南、北通江，亦合於遼河。東有大片嶺關，有鹽場。東北距都司百二十里。

蓋州衛 元蓋州，屬遼陽路。洪武四年廢。五年六月復置。九年十月置衛。二十八年四月，州

復廢。東北有石城山。又北有平山，其下有鹽場。又東有駐蹕山，西濱海，有連雲島，上有關。又東有泥河，南有清河，東南有畢里河，下流皆入於海。又南有永寧監城，永樂七年置。又西北有梁房口關，海運之舟由此入遼河，旁有鹽場。又東有石門關。西有鹽場。北有鐵場。北距都司二百四十里。

復州衛 本復州，洪武五年六月置於舊復州城。十四年九月置衛。二十八年四月，州廢。西濱海。西南有長生島。又南有沙河，合麻河，西注於海。東有得利羸城，元季土人築，洪武四年二月置遼東衛於此，尋徙。又南有樂古關。西有鹽場。北有鐵場。北距都司四百二十里。

金州衛 本金州，洪武五年六月置於舊金州。八年四月置衛。二十八年四月，州廢。東有大黑山，小沙河出焉。又有小黑山，駱馬河、澄沙河俱出焉。衛東西南三面皆濱海。南有南關島。東有蓮花島。東南有金線島。又東有皮島，又有長行島。南有雙島及三山島。〔六〕西南有鐵山島。東北有蕭家島，有關。又旅順口關在南，海運之舟由此登岸，有南、北二城，其北城有中左千戶所，洪武二十年置。又東南有望海碣石城，永樂七年置。又衛東有鐵場。東北有鹽場。北距都司六百里。

廣寧衛 元廣寧府路。洪武初廢。二十三年五月置衛。洪武二十五年三月建遼王府。建文中，改封湖廣荊州府。西有醫無閭山。南濱海。東有路河，東北有珠子河，下流皆注於遼河。又板橋河在西，南流入海。北有白土廠關，又有分水嶺關。西北有魏家嶺關。又北有懿州，元屬遼陽路。洪武二十六年正月置廣寧後屯衛於此。永樂八年，州廢，徙衛於義州衛城。又西南有閭陽關，東北有望平縣，元俱屬廣寧路。又西北有川州，元屬大寧路。又東北有順州，西北有成州，元俱屬東寧路。又西南有鍾秀城，元置千戶所於此。俱洪武中廢。東距都司四百二十里。

廣寧中衛

廣寧左衛 俱洪武二十六年正月置。二十八年四月廢。三十五年十一月復置。

廣寧右衛 本治大凌河堡，洪武二十六年正月置。二十八年四月廢。三十五年十一月復置。〔七〕

以上三衛，俱在廣寧衛城。

廣寧前衛

廣寧後衛 俱洪武二十六年正月置。後俱廢。

義州衛 元義州，屬大寧路。 洪武初，州廢。二十年八月置衛。西北有大凌河，下流入海。東北有清河，下

流合大凌河。東南距都司五百四十里。

廣寧後屯衛 洪武二十六年正月置於舊懿州。永樂八年徙治義州衛城。

廣寧中屯衛 元錦州，屬大寧路。 洪武初，州廢。二十四年九月置衛。東有木葉山。西有東、西紅螺山。西

南有杏山。東南有乳峯山。又東有大凌河、小凌河。又西有女兒河，與小凌河合。又南有松山堡，在松山西，宣德五

年正月置中左千戶所於此，轄杏山驛至小凌河驛。東有大凌河堡，洪武二十六年正月置廣寧右衛，二十八年四月廢。

宣德五年正月置中右千戶所於此，轄凌河驛至十三山堡。又城南有鹽場二，鐵場一。又西有鐵場。東南距都司

六百里。

廣寧左屯衛 洪武二十四年九月置於遼河西，後徙廣寧中屯衛城。

廣寧右屯衛 元廣寧府地。 洪武二十六年正月置於十三山堡。二十七年遷於舊閭陽縣之臨海

鄉。北有十三山。山西有十三山堡。西有大凌河。又西南有望梅嶺。又南有鹽場。東有鐵場。東南距都司五

百四十里。

廣寧前屯衛 元瑞州，屬大寧路。 洪武初，屬永平府。七年七月，州廢。二十六年正月置衛。西北

有萬松山。北有十八盤山。西有麻子峪，有鐵場。東南爲山口峪，有鹽場。東北有六州河，下流至蛇山，務入海。西有山海關，與北直撫寧縣界。又有急水河堡，宣德五年正月置中前千戶所於此，轄山海東關至高嶺驛。又東有杏林堡，宣德五年正月置中後千戶所於此，轄沙河驛至東關驛。東距都司九百六十里。

寧遠衛 宣德五年正月分廣寧前屯、中屯二衛地置，治湯池。西北有大團山。東北有長嶺山。南濱海。東有桃花島。東南有覺華島城。西有寧遠河，卽女兒河也，又名三女河。又東有塔山，有中左千戶所，轄連山驛至杏山驛，西有小沙河中右千戶所，〔八〕轄東關驛至曹莊驛，俱宣德五年正月置。又南有鹽、鐵二場。東距都司七百七十里。

瀋陽中衛 元瀋陽路。洪武初廢。三十一年閏五月置衛。〔洪武二十四年建瀋王府。永樂六年遷於山西潞州。東有東牟山。南有渾河，又東有瀋水入焉。又西有遼河。又東北有撫順千戶所，洪武二十一年置。所東有撫順關。又北有蒲河千戶所，亦洪武二十一年置。南距都司百二十里。

瀋陽左衛

瀋陽右衛 俱洪武中置。建文初廢。洪武三十五年七月復置，〔七〕後仍廢。

瀋陽中屯衛 洪武三十一年閏五月置。建文中廢。洪武三十五年十一月復置，屬北平都司，後屬後軍都督府，寄治北直河間縣。

鐵嶺衛 洪武二十一年三月以古鐵嶺城置。二十六年四月遷於古歸州之地，卽今治也。西

有遼河，南有汎河，又南有小清河，俱流入於遼河。又南有懿路城，洪武二十九年置懿路千戶所於此。又范河城在衛南，亦曰汎河城，正統四年置汎河千戶所於此。東南有奉集縣，即古鐵嶺城也，接高麗界，洪武初置縣，尋廢。又有咸平府，元直隸遼東行省。至正二年正月降爲縣。洪武初廢。南距都司二百四十里。

三萬衛元開元路。洪武初廢。二十年十二月置三萬衛於故城西，兼置兀者野人乞例迷女直軍民府。二十一年，府罷，徙衛於開元城。洪武二十四年建韓王府。永樂二十二年遷於陝西平涼。西北有金山。東有分水東嶺。北有分水西嶺。西有大清河，東有小清河，流合焉，下流入於遼河。又北有上河，東北有艾河，流合焉，謂之遼海，即遼河上源也。又北有金水河，北流入塞外之松花江。又鎮北關在東北。廣順關在東。又西有新安關。西南有清河關。南有山頭關。又北有北城，即牛家莊也，洪武二十三年三月置遼海衛於此。二十六年，衛徙。又南有中固城，永樂五年置。南距都司三百三十里。

遼海衛 洪武二十三年三月置於牛家莊。二十六年徙三萬衛城。

安樂州 永樂七年置，在三萬衛城。

山西 禹貢冀州之域。元置河東山西道宣慰使司，治大同路。直隸中書省。洪武二年四月置山西等處行中書省。治太原路。三年十二月置太原都衛。與行中書省同治。八年十月改都衛

爲山西都指揮使司。九年六月改行中書省爲承宣布政使司。領府五，直隸州三，屬州十六，縣七十九。爲里四千四百有奇。東至眞定，與北直界。北至大同，外爲邊地。西南皆至河，與陝西、河南界。距南京二千四百里，京師千二百里。洪武二十六年編戶五十九萬五千四百四十四，口四百七萬二千一百二十七。弘治四年，戶五十七萬五千二百四十九，口四百三十六萬四百七十六。萬曆六年，戶五十九萬六千九十七，口五百三十一萬九千三百五十九。

太原府 元冀寧路，屬河東山西道宣慰司。

洪武元年十二月改爲太原府，領州五，縣二十。

陽曲倚。

洪武三年四月建晉王府於城外東北維。西有汾水，自靜樂縣流經此，下流至滎河縣合大河。西北有天門關巡檢司。東北有石嶺關巡檢司。

太原府西南。

元曰平晉，治在今東北。

洪武四年移於汾水西，故晉陽城之南關。八年更名太原。西有懸壺山，

一名龍山，又名結綯山，晉水所出，下流入於汾。西北有蒙山。東有汾水。東南有洞渦水，源自樂平，下流入汾。

榆次府東南。

東南有涂水，〔二〕合小涂水西北流，入洞渦水。

太谷府東南。

東南有馬嶺，〔二〕路出北直邢臺縣，上有馬嶺關，有巡檢司。西有太谷，一名咸陽谷。東北有象谷

水，流入汾。

祁府南，少西。

東南有胡甲山，隆舟水出焉，下流至平遙入汾。南有隆舟峪巡檢司。又東有團柏鎮。



徐溝府南。北有洞渦水，至此合汾。

清源府西南。北有清源水，東流，南入汾。

交城府西南。東北有羊腸山。東南有汾水。又西有文水。

文水府西南。西南有隱泉山。〔三〕東有文水，南入汾。又東北有猷水，或以爲卽鄔澤也。

壽陽府東。西有殺熊嶺。南有洞渦水，黑水流合焉。

孟府東北。元孟州。洪武二年降爲縣。東北有白馬山。北有漳沱河，東入北直平山縣界。東北有伏馬關，一名

白馬關。又東有榆棗關。

靜樂府西北。元管州。洪武二年改爲靜樂縣。東北有管涔山，汾水所出。又東北有燕京山，上有天池。又北有

寧化守禦千戶所，洪武二年置。又東南有兩嶺關，置故鎮巡檢司於此，後移於稍東順水村。又南有樓煩鎮巡檢司。又東北有沙婆嶺巡檢司，後移於陽曲縣天門關。

河曲府西北。元省。洪武十三年十一月復置。西有火山，臨大河。河濱有娘娘灘、太子灘，皆套中渡河險要處

也。北有關河，以經偏頭關而名，西北流入大河。成化十一年十二月置偏頭關守禦千戶所，與寧武、雁門爲

三關。

平定州東有綿山，澤發水出焉，卽治河上源，合沾水，東流至平山縣入漳沱。西南有洞渦水，合浮化水，西流入汾。

東南有新固關守禦千戶所。又東有故關，卽井陘關也，洪武三年置故關巡檢司於此。又有葦澤、盤石二關在縣東

北，俱接井陘縣界。西北距府一百八十里。領縣一。

樂平州東南。東有臯落山，一名靈山。西南有少山，一名沾嶺，爲沾水、清漳二水之發源。沾東流入澤發水，漳北流，折而西南，入和順縣之梁榆水。又西有陡泉嶺，洞渦水所出。又靜陽鎮在縣東南。

忻州 洪武初，以州治秀容縣省入。北有滹沱河，又有忻水，一名肆盧川，自北流入焉。西南有牛尾莊巡檢司，後移於州北十里。又西有寨西巡檢司，西北有沙溝巡檢司，後俱廢。又忻口寨亦在州北。又東南有赤塘關。南距府百六十里。領縣一。

定襄州東，少北。北有滹沱河。又南有叢象山，有三會水流合焉。東北有胡谷砦巡檢司，後廢。

代州 洪武二年降爲縣。八年二月復升爲州。句注山在西，亦名西陁，亦曰雁門山，其北爲雁門關，有雁門守禦千戶所，洪武十二年十月置。又於關北置廣武營城。又東有夏屋山，一名下壺。又南有滹沱河，源自繁峙入州界，西南流經崞、忻、定襄，又東經五臺、孟，入真定界。又北有太和嶺、水勤口二巡檢司，後俱廢。西南距府三百五十里。領縣三。

五臺州東南。元臺州。洪武二年改爲五臺縣。八年二月來屬。東北有五臺山，有清水河，東北流，合鹿陽河，南入於滹沱。又東南有高洪口巡檢司。又東北有大谷口、飯仙山二巡檢司，後俱廢。

繁峙州東。元堅州。洪武二年改爲繁峙縣。八年二月來屬。舊治在縣南，成化三年二月移治東義村。萬曆十四年十二月徙於河北之石龍崗。東北有秦戲山，滹沱河所出也，迴環千三百七十里，至北直靜海縣入海。又北，

有茹越口、東北有北樓口、東有平刑嶺三巡檢司，後俱廢。又東有郎嶺關城，洪武十七年築。

**崞州**西南。元崞州。洪武二年降爲縣。八年二月來屬。西南有崞山。東南有石鼓山，又有滹沱河。又西北有寧

武關，有寧武守禦千戶所，景泰元年置。又有八角守禦千戶所，嘉靖三年八月置。又西南有蘆板寨巡檢司。又西北有楊武峪、吊橋嶺、胡峪北口三巡檢司。

**崞嵐州** 本崞嵐縣，洪武七年十月置。八年十一月升爲州。北有崞嵐山，其東爲雪山。西南有嵐

漪河，北有蔚汾水，下流俱入大河。又西北有崞嵐鎮巡檢司，後廢。又北有天潤堡隘，路通朔州。西北有于坑堡隘，又有洪谷堡隘，俱通保德州。東南距府二百八十里。領縣二。

**嵐州**南，少東。元嵐州。洪武初，降爲縣。西南有黃尖山，蔚汾水所出。又北有二郎關、鹿徑嶺二巡檢司。

**興州**西南。元興州。洪武二年降爲縣。八年十一月來屬。東北有石樓山。西濱大河，南有蔚汾水流入焉。又東有界河口、西南有孟家峪二巡檢司。

**保德州** 洪武七年降爲縣。八年十一月屬崞嵐州。九年正月復升爲州。西濱大河。東北有

得馬水巡檢司，後廢。東南距府五百里。

**平陽府**元晉寧路，屬河東山西道宣慰司。洪武元年改爲平陽府。領州六，縣二十八。東北距布政

司五百九十里。

臨汾倚。西有姑射山。西南有平山，晉水、平水皆出於此，東流入於汾。

襄陵府西南。西南有三隴山。東有汾水。南有太平關，有巡檢司。

洪洞府北，少東。東有九箕山。西有汾水。

浮山府東，少南。西有浮山。北有澇水，東南有澇水，下流俱入汾。

趙城府北。元屬霍州。洪武三年改屬。西有羅雲山，又有汾水、霍水，自東南流入焉。

太平府西南。元屬絳州。洪武二年改屬。東有汾水。

岳陽府東北。東有沁水，流入澤州界。北有澗水。又南有赤壁水，西北流，會澗水入汾河。

曲沃府南。元屬絳州。洪武二年改屬。南有紫金山，產銅。北有喬山。西有汾水。西南有澮水，下流入汾。

翼城府東南。元屬絳州。洪武二年改屬。東南有澮高山，產銅，下有澮泉。又東有烏嶺山，澮水出焉。

汾西府北，少西。西有青山，產鐵。東有汾水。

蒲府西北。元屬隰州。洪武二年改屬。西有第一河，西流入大河。東有張村岔巡檢司。

靈石府北。元屬霍州。萬曆二十三年五月改屬汾州府。四十三年還屬府。東有綿山，即介山也。城北有汾水，

又東有谷水流入焉。又北有靈石口巡檢司。西南有陰地關，又有汾水關。

蒲州元河中府。洪武二年改爲蒲州，以州治河東縣省入。中條山在東南，即雷首山也，又名首陽山，跨

臨晉、聞喜、垣曲、平陸、芮城、安邑、夏縣、解州之境。又南有歷山。又大河自榆林折而南，經州城西，又經中條山

麓，又折而東，謂之河曲。臨河有風陵關巡檢司。又東南有涑水，卽絳水下流，又南有媯水，俱注於大河。東北距府四百五十里。領縣五。

臨晉州東北。東南有王官谷。西有大河。南有涑水。又西有吳王寨巡檢司。

榮河州北，少東。大河在城西，汾水至此入河。

猗氏州東北。南有涑水。東南有鹽池。

萬泉州東北。南有介山。

河津州東北。西北有龍門山，夾河對峙，下有禹門渡巡檢司。汾水舊由榮河縣北雕丘入河，隆慶四年東徙，經縣

西南葫蘆灘入河。

解州 洪武初，以州治解縣省入。南有檀道山，又有石錐山。東南有白徑嶺。南濱大河。東有鹽池。西北

又有女鹽池。東北有長樂鎮巡檢司。東南有鹽池巡檢司。東北距府三百四十里。領縣五。

安邑州東北。西有司鹽城。北有鳴條岡。又有涑水。西南有鹽池。南有聖惠鎮巡檢司。西南有西姚巡檢司。

夏州東北。北有涑水。

聞喜州東北。東南有湯山，產銅。南有涑水。又東北有乾河，又有董澤。

平陸州東南。東北有虞山，一名吳山。又東有傅巖。南濱大河，中有底柱山。東有大陽津，上有關，亦曰茅津。

有沙澗茅津渡巡檢司。又有白浪渡巡檢司。

芮城州西南。大河南經縣，西折而東。東南有陌底渡巡檢司。西北有萬壽堡。東有襄邑堡。

絳州 洪武初，以州治正平縣省入。西北有九原山。〔二〕南有汾水，澮水自東南流入焉。西有武平關。東北距府百五十里。領縣三。

稷山州西。南有稷神山，又有汾水。

絳州東南。東有太行山。東南有太陰山，又有陳村峪，涑水出焉，經開喜、夏、安邑等縣，至蒲州入黃河。又西北有絳山，絳水出焉，西流入涑。又東南有教山，教水出焉，卽乾河之源也。絳山產鐵。

垣曲州東南。西北有折腰山，山有銅冶。又東北有王屋山。南濱河，西有清水流入焉。又北有乾河。西北有橫嶺背巡檢司。西南有留莊隘。

霍州 洪武初，以州治霍邑縣省入。東南有霍山，亦曰霍太山。西有汾水，又有霍水、廩水，俱出霍山，下流俱入汾。南距府百四十五里。

吉州西有孟門山，大河所經。西南有壺口山。又烏仁關在西，平渡關在西北，俱有巡檢司。東距府二百七十里。領縣一。

鄉寧州東南。西南有兩乳山。西有黃河。西北有龍尾磧巡檢司。

隰州 洪武初，以州治隰川縣省入。西有蒲水，南入大河。東北有廣武莊巡檢司。東南距府二百八十里。領縣二。

大寧州西南。西濱大河。又東南有昕川，西注於河。西有馬關，大河經其下，有巡檢司。

永和州西。西濱大河。西北有永和關，有巡檢司。又有興德關。西南有鐵羅關。三關俱與陝西濱河爲界。

汾州府元汾州，屬冀寧路。洪武九年直隸布政司。萬曆二十三年五月升爲府。領州一，縣七。

東北距布政司二百里。

汾陽倚。元曰西河。洪武初，省入州。萬曆二十三年五月復置，更名。東有汾水。又東北有文水，一名萬谷河，

自文水縣東南流入焉。西有金鎖關、黃蘆嶺二巡檢司。

孝義府南，少東。西北有狐岐山，勝水出焉，東流入汾。又縣南有雀鼠谷，與介休縣界，汾水自東北來經此。又

西有溫泉鎮巡檢司。

平遙府東。南有麓臺山，一名蒙山，又名謁戾山。西有汾河。東有中都水，又有原祠水，合流注於汾河。又南有

普同關巡檢司，後移於縣東北之洪善鎮。

介休府東南。有介山，亦曰綿山。西有汾水，東有石洞水，西流入焉。東北有鄆城泊，與平遙、文水二縣界，卽昭

餘祁藪之餘浸也，或亦謂之蒿澤。東南有關子嶺巡檢司。

石樓府西，少南。元屬晉寧路之隰州。萬曆四十年改屬。東南有石樓山。西有黃河，又有土軍川流入焉。又西

北有上平關，西有永和關，東北有窟龍關三巡檢司。

臨府西北。元臨州，屬冀寧路。洪武二年降爲縣。萬曆二十三年五月來屬。北濱黃河，東北有榆林河流入焉。西北有剋狐寨巡檢司。

永寧州 元石州，屬冀寧路。洪武初，以州治離石縣省入。隆慶元年更名。萬曆二十三年五月

來屬。大河在西。東有穀積山，下有石窟村，東川河出焉。北有赤堅嶺，一名離石山，離石水出焉，亦曰北川河，合流注於大河。又西有青龍渡，北有赤堅嶺二巡檢司。又西有孟門關。東南距府百六十里。領縣一。

寧鄉州南。東南有樓子臺山。西有黃河。

潞安府 元潞州，屬晉寧路。洪武二年直隸行中書省。九年直隸布政司。嘉靖八年二月升爲潞安

府。領縣八。西北距布政司四百五十里。

長治倚。永樂六年，藩王府自藩陽遷此。元上黨縣。洪武二年省入州。嘉靖八年二月復置，更名。東南有壺關

山，舊置壺口關於山下。〔二四〕西南有潞水，卽濁漳水，自長子縣流入，下流至河南臨漳縣，合清漳水。又西有藍水，東流與濁漳水合。

長子府西，少南。東南有羊頭山。西南有發鳩山，一名鹿谷山，濁漳水發源於此。西北有藍水，南有梁水，皆流入漳水。

屯留府西北。西北有三巘山。又西南有盤秀山，藍水出乎其陽，絳水出乎其陰，下流俱合濁漳水。



襄垣府北，少西。南有濁漳水。西北有小漳水，又有涅水，自武鄉縣流入界，合小漳水，下流入濁漳水。西有五嶺山巡檢司。

潞城府東北。西有三垂山。北有濁漳水，又有絳水，流合焉，謂之交漳。

壺關府東南。南有趙屋嶺，西南有大峪嶺，俱產鐵。東南有羊腸坂。西北有壺水，西入濁漳。

黎城府東北。西北有濁漳水，東南入河南林縣界。東北又有清漳水，流入河南涉縣界。又東北有吾兒峪巡檢司。

平順嘉靖八年二月以潞城縣青羊里置，析黎城、壺關、潞城三縣地益之。東北有濁漳水。東南有虹梯關、玉峽關。二巡檢司。

大同府元大同路，屬河東山西道宣慰司。洪武二年爲府。領州四，縣七。南距布政司六百七十里。

大同倚。洪武二十五年三月建代王府。北有方山。西北有雷公山。東有紇真山。又東北有白登山。又西有大

河。又南有桑乾河，自馬邑縣流經此，其下流至蔚州入北直境，爲盧溝河。又西北有金河，又有紫河，皆流入大

河。又西有武州山，武州川水出焉。又東有御河，一名如渾水，〔二五〕南有十里河流合焉，卽武州川也，俗曰合

河，南入於桑乾。北有威寧海子。又有孤店、開山、虎峪、白陽等口，俱在東北。又北有貓兒莊。

懷仁府西南。西有清涼山，西南有錦屏山，舊皆有鐵冶。南有桑乾河。西南有偏嶺等口。

渾源州南有恒山，卽北嶽也，與北直曲陽縣界。東有五峰山。又南有翠屏山，漣水出焉，與嘔夷水合，下流爲唐河。

又北有桑乾河。西南有渾源川，下流入桑乾河。又東有亂嶺關、南有瓷窯口、東南有大寨頭三巡檢司。西北距府百三十里。

應州 洪武初，以州治金城縣省入。北有桑乾河。西有小石口巡檢司。東南有胡峪口巡檢司。南有茹越口巡檢司。又有北婁、大石等口，路通繁峙縣。北距府百二十里。領縣一。

山陰 州西南。北有桑乾水。

朔州 洪武初，以州治鄯陽縣省入。西南有翠峰山。西北有黃河。又南有灰河，下流入桑乾河。又西有武州，元屬大同路，洪武初省。北有沙淨口、西南有神池口二巡檢司。東北距府二百八十里。領縣一。

馬邑 州東，少北。西北有洪濤山，澧水出焉，俗名洪濤泉，卽桑乾河上源也，至北直武清縣入海。東南有雁門關。又北有白陽。

蔚州 元屬上都路之順寧府。至大元年十一月升爲蔚昌府，直隸上都路。洪武二年仍爲州。四年來屬，以州治靈仙縣省入。東有九宮山，又有雪山。又東南爲小五臺山。北有桑乾水，東入北直保安州界。又北有壺流水，一名胡盧水，西南有滋水流入焉，下流入北直眞定府界。東北有定安縣，元屬州，洪武初廢。西南有石門口，東南有神通溝鎮，東北有鴛鴦口、長寧鎮四巡檢司。又東有九宮口巡檢司，後移於州南黑石嶺。又東北有美峪口巡檢司，尋徙於董家莊。又有興寧口巡檢司，後移於北口關。西北距府三百五十里。領縣三。

廣靈 州西，少北。北有九層山。東南有豐水，卽葫蘆河上源也。又西南有滋水。北有平嶺關巡檢司，後徙於縣

西南之林關口。

廣昌州東南。元曰飛狐。洪武初，更名。東南有白石山。東有雕窠崖，舊有洞產銀。〔一〕又桑乾河在北。唐河在南，卽澧水也。又涑水在東，源出北崖古塔，與縣南之拒馬河合，東入北直涑水縣界。又紫荆關在東北，接北直易州界。倒馬關在南，接北直定州界。又飛狐關在北，今爲黑石嶺堡，與蔚州界。

靈丘州西南。東南有隘門山，西北有槍峯嶺，卽高是山也，嘔夷水出焉。又有枚回嶺，滋水出焉。

澤州元澤州，屬晉寧路。洪武初，以州治晉城縣省入。二年直隸行中書省。九年直隸布政司。東

南有馬牢山。南有太行山，山頂有天井關，關南卽羊腸坂。又東北有丹水，南有白水流入焉，下流注於沁河。東南有

柳樹店，南有橫望嶺二巡檢司。領縣四。西北距布政司六百二十里。

高平州北，少東。西北有仙公山，丹水出焉。又西南有空倉堡巡檢司。西北有長平關，又有磨磬寨。

陽城州西。西南有析城山，南有王屋山，與垣曲縣及河南濟源縣界。東有沁河，又西北有渡澤水入焉。

陵川州東北。西北有蒲水，西流入於丹水。南有永和隘巡檢司，後廢。

沁水州西北。東有沁河。又西有蘆河，下流入於沁水。西北有東烏嶺巡檢司。

沁州元屬晉寧路。洪武初，以州治銅鞮縣省入。二年直隸行中書省。九年直隸布政司。萬曆

二十三年五月改屬汾州府，三十二年仍直隸布政司。西南有護甲山，涅水出焉。南有銅鞮山。正西有銅鞮水，有二流，一名小漳河，一名西漳河，下流入襄垣縣，合濁漳水。領縣二。西北距布政司三百十里。

沁源州西，少南。北有綿山，沁水出焉，經縣東，下流至河南修武縣入大河，行九百七十餘里。又北有綿上巡檢司。武鄉州東北。西有涅水，又西有武鄉水入焉。

遼州元屬晉寧路。洪武初，以州治遼山縣省入。二年直隸行中書省。九年直隸布政司。東南

有太行山，洛水所出，上有黃澤嶺，嶺有十八盤巡檢司。又東有清漳水，分二流，至東南交漳村而合，南入黎城縣界。又西北有遼陽水，流合清漳水。領縣二。西北距布政司三百四十里。

榆社州西。西有榆水。西南有武鄉水。又西北有黃花嶺、馬陵關二巡檢司。

和順州北。東有黃榆嶺，北有松子嶺，西有八賦嶺，俱有巡檢司。又清漳水在西北，松嶺水及八賦水、梁榆水俱流入焉。

山西行都指揮使司 本大同都衛，洪武四年正月置。治白羊城。八年十月更名。二十五年八月徙治大同府。二十六年二月領衛二十六，宣府左、右，萬全左、右，懷安五衛，改屬萬全都司。後

領衛十四。朔州衛治州城，安東中屯衛寄治應州城。

大同前衛 洪武七年二月置，與行都司同城。

大同後衛 洪武二十五年八月置，與行都司同城，尋罷。二十六年二月復置，治行都司東，

後仍徙行都司城。東有聚落城，天順三年築。嘉靖二年九月置聚落守禦千戶所於此，來屬。

大同中衛 洪武二十五年八月置，與行都司同城，後罷。

大同左衛 洪武二十五年八月置，與行都司同城。三十五年罷。永樂元年九月復置。七

年徙治鎮朔衛城。

大同右衛 洪武二十五年八月置，與行都司同城。三十五年罷。永樂元年九月復置。七

年徙治定邊衛城。

鎮朔衛 洪武二十六年二月置，屬行都司。永樂元年二月徙治北直薊州，直隸後軍都督

府，而衛城遂虛。七年徙大同左衛來治。正統十四年又徙雲川衛來同治。東有雕嶺山。北有

兔毛川，即武州川也。又西北有御河，自塞外流入，下流入於桑乾河。又北有鹽池。東北距行都司一百二

十里。

定邊衛 洪武二十六年二月置，屬行都司。永樂元年二月徙治北直通州，直隸後軍都督

府，而衛城遂虛。七年徙大同右衛來治。正統十四年又徙玉林衛來同治。西有大青山。東北

有海子窟，兔毛川出焉，分爲二，其一東南流入左衛界，其一西北流自殺虎口出塞。又有南大河，經衛東南，合於兔毛川。東南距行都司一百九十里。

陽和衛元白登縣，屬大同路。洪武初，縣廢。二十六年二月置衛。宣德元年徙高山衛來同治。北有雁門山，雁門水出焉。南有桑乾河。西南距行都司一百二十里。

天成衛元天成縣，屬興和路。洪武四年五月改屬大同府，縣尋廢。二十六年二月置衛，後徙鎮

虜衛來同治。桑乾河在南。南洋河在北，卽雁門水也，東入宣府西陽和堡界。西南距行都司一百二十里。

威遠衛 正統三年三月以淨水坪置。南有大南山。西有小南山。又南有南大河，下流入於兔毛川。東距行都司一百八十里。

平虜衛 成化十七年置，與行都司同城。嘉靖中徙今治。西有小青山，又有黃河自東勝衛流入。北有南大河。西北有雲內縣，本元雲內州，屬大同路，洪武五年廢。宣德中復置縣，屬豐州，正統十四年復廢。西北有平地縣，元屬大同路，亦洪武中廢。東北距行都司二百四十里。領千戶所一。

井坪守禦千戶所成化二十年七月置。

雲川衛 洪武二十六年二月置，屬行都司。永樂元年二月徙治北直畿內，直隸後軍都督府。宣德元年還舊治，仍屬行都司。正統十四年徙治舊鎮朔衛城，與大同左衛同治，而衛城遂虛。東距行都司二百十里。

玉林衛 洪武二十六年二月置，屬行都司。永樂元年二月徙治北直畿內，直隸後軍都督府。宣德元年還舊治，仍屬行都司。正統十四年徙治舊定邊衛城，與大同右衛同治，而衛城遂虛。東有玉林山，玉林川出焉。東距行都司二百四十里。

鎮虜衛 洪武二十六年二月置，屬行都司。永樂元年二月徙治北直畿內，直隸後軍都督府。宣德元年還舊治，仍屬行都司。正統十四年徙治天成衛城，與天成衛同治，而衛城遂虛。東距行都司百十里。

高山衛 洪武二十六年二月置，屬行都司。永樂元年二月徙治北直畿內，直隸後軍都督府。宣德元年徙陽和衛城，與陽和衛同治，仍屬行都司，而衛城遂虛。嘉靖二年九月置高山守禦千戶所於此，屬大同前衛。東有高山。西有兔毛川。東距行都司三十里。

宣德衛 元宣寧縣，屬大同路。洪武中，縣廢。二十六年二月置宣德衛，後廢。東南距行都司八十里。

東勝衛 元東勝州，屬大同路。洪武四年正月，州廢，置衛。二十五年八月分置東勝左、右、中、前、後五衛，屬行都司。二十六年二月罷中、前、後三衛。永樂元年二月徙左衛於北直盧龍縣，右衛於北直遵化縣，直隸後軍都督府。三月置東勝中、前、後三千戶所於懷仁等處守禦，而衛城遂虛。正統三年九月復置，後仍廢。北有赤兒山。西有黃河。西北有黑河，源出舊豐州之

官山，西流入雲內州界，又東經此，入於黃河。又有兔毛川，亦入於黃河。又有紫河，源出舊豐州西北之黑峪口，下流至雲內州界，入於黑河。又西有金河泊，上承紫河，下流亦入於黃河。西北有豐州，元屬大同路，洪武中廢，宣德元年復置；正統中內徙，復廢。又有淨州路，元直隸中書省，亦洪武中廢。西距行都司五百里。領千戶所五。

失寶赤千戶所

五花城千戶所

幹魯忽奴千戶所

燕只千戶所

瓮吉刺千戶所

俱洪武四年正月置。

### 校勘記

〔一〕元濟南路屬山東東西道宣慰司 原脫「道」字，據本志淄川下注及元史卷五八地理志補。

〔二〕元陵州屬河間路 原作「元屬河間陵州路」。按元無「陵州路」，據元史卷五八地理志乙正。

〔三〕東北有般河亦曰盤河 原脫「亦」字，據明史稿志一九地理志補。

〔四〕南有梁山灤即故大野澤下流 原闕「即」字，據明史稿志一九地理志補。



〔五〕巨洋水西合石溝水 石溝水，原作「石構水」，據明史稿志一九地理志、寰宇通志卷七五、明一統志卷二四改。

〔六〕南有雙島及三山島 三山島，原作「三十島」，據明史稿志一九地理志、讀史方輿紀要卷三七改。

〔七〕三十五年十一月復置 三十五年，原作「二十五年」。據明史稿志一九地理志作「永樂初」，太宗實錄卷一四作洪武三十五年十一月乙未，據改。

〔八〕西有小沙河中右千戶所 原脫「小」字，據明史稿志一九地理志、寰宇通志卷七七、遼東志卷一補。

〔九〕建文初廢洪武三十五年七月復置 三十五年，原作「二十五年」，據太宗實錄卷一〇下洪武三十五年七月戊戌條改。又按太宗實錄稱：「初，建文中，改瀋陽左衛爲衡山護衛，右衛爲臨安護衛」。是「建文初廢」，當作「建文中更名」。下一條，瀋陽中屯衛，「建文中廢」。洪武三十五年十一月復置，「三十五年」也誤作「二十五年」，據太宗實錄卷一四洪武三十五年十一月己亥條改。

〔一〇〕府東南東南有涂水 「東南有涂水」的「東南」兩字，原沿上文「府東南」的「東南」兩字而脫，據明史稿志一九地理志、明一統志卷一九、讀史方輿紀要卷四〇補。

〔二〕府東南東南有馬嶺 第二個「東南」兩字，原沿上文「東南」兩字而脫，據明史稿志一九地理志、明一統志卷一九、讀史方輿紀要卷四〇補。

〔三〕府西南西南有隱泉山 「西南有隱泉山」的「西南」兩字，原沿上文「西南」兩字而脫，據明一統志卷一九、讀史方輿紀要卷四〇補。

〔三〕西北有九原山 九原山，原作「九泉山」，據明史稿志一九地理志、寰宇通志卷七九、明一統志卷二〇改。

〔四〕舊置壺口關於山下 壺口關，原作「壺關口」，據明史稿志一九地理志、讀史方輿紀要卷四二一改。

〔五〕又東有御河一名如渾水 御河，原作「街河」，誤，據讀史方輿紀要卷四十四改。

〔六〕舊有洞產銀 銀，明史稿志一九地理志作「銅」，讀史方輿紀要卷四四作「舊設銅山冶」。

# 明史卷四十二

## 志第十八

### 地理三

#### 河南 陝西

河南 禹貢豫、冀、揚、兗四州之域。元以河北地直隸中書省，河南地置河南江北行中書省。治汴梁路。洪武元年五月置中書分省。治開封府。二年四月改分省爲河南等處行中書省。三年十二月置河南都衛。八年十月改都衛爲都指揮使司。九年六月改行中書省爲承宣布政使司。府八，直隸州一，屬州十一，縣九十六。爲里三千八百八十有奇。北至武安，與北直、山西界。南至信陽，與江南、湖廣界。東至永城，與山東、江南界。西至陝州，與山西、陝西界。距南京一千一百七十五里，京師一千五百八十里。洪武二十六年編戶三十一萬五千六百一十七，口一百九十一萬二千五百四十二。弘治四年，戶五十七萬五千二百四十九，口四百三十六萬四百七

十六。萬曆六年，戶六十三萬三千六十七，口五百一十九萬三千六百二。

開封府 元汴梁路，屬河南江北行省。

洪武元年五月曰開封府。八月建北京。十一年，京罷。領州

四，縣三十。

祥符倚。洪武十一年正月建周王府。

大河舊在城北。正統十三年，河決滎陽，東過城西南，而城遂在河北。東

爲開封縣，元時同治郭內，洪武中省。南有朱仙鎮。東北有陳橋鎮。

陳留府東，少南。北有大河。東北有睢水，下流至南直宿遷縣合泗水。(一)

杞府東南。北有睢水，又有舊黃河，洪武二十五年河決之故道也。嘉靖三十六年，全河合淮入海，而縣遂無河患。

通許府東南。西南有故黃河，弘治後北徙，不經縣界。

太康府東南。北有渦水，自通許縣流入，下流至南直懷遠縣入淮。東有馬廠集，正統十三年河決，自杞縣經此。

尉氏府南，少西。西南有大溝，東北合康溝，入於黃河。

洧川府西南。南有故城，洪武二年以河患遷今治。又南有洧水，下流至西華縣合潁水。東南有南席店，弘治九

年，河入栗家口，南行經此。

鄆陵府南，少西。北有洧水。

扶溝府南，少東。東有沙河，一名惠民河，又名小黃河，卽宋蔡河故道也。成化中濬，下流達南直太和縣界。又北

有洧水，自西流入焉。又東北有黃河故道，弘治二年淤。

中牟府西。東有故城，天順中，徙今治。大河在縣北。又有汴河，舊自滎陽而東，下流經祥符縣南，又東南至南直泗州入於淮。正統六年改從此入河，後淤。西北有圃田澤。

陽武府西北。北濱大河，自此至南直徐州，大河所行，皆唐、宋汴河故道。

原武府西北。北有黑陽山，下臨大河。洪武二十四年，河決於此。正統十二年復決焉。東南有安城縣，洪武初置，正統中廢。

封丘府北。南有大河。西南有荆隆口，一名金龍口。弘治二年、五年，萬曆十五年，崇禎四年、五年，河屢決於此。又西北有沁河，弘治六年淤。西南有中欒鎮巡檢司。

延津府西北。大河舊經縣北。成化十四年，河決，徙流縣南，而縣北之流遂絕。西北有沙門鎮，弘治十一年移項城縣西之香臺巡檢司於此。

蘭陽府東，少北。北濱大河，有李景高口。萬曆十七年，河決於此。

儀封府東，少北。元屬睢州。洪武十年五月改屬南陽府，後來屬。故城在縣北，洪武二十二年二月圯於河，徙日樓村，即今治也。東北有黃陵岡，大河舊經其下，入曹縣界。弘治五年，河決於此，尋塞之，改從岡南入睢州界。

又賈魯故河，亦在縣北，正德四年，河決入焉。

新鄭府西南。元屬均州。隆慶五年七月改屬。西南有大隗山，一名具茨山，潁水出焉，一名魯固河，下流入潁。

又南有涇山。北有大河。又有漆水，一曰澮水，流合縣南之洧水。

陳州 洪武初，以州治宛丘縣省入。南有潁水。又西有沙水，亦曰小黃河，至潁岐口，與潁水合，下流分爲二。崇禎間，屢決於西南之苑家埠口。又南有故黃河，嘉靖時，黃河南出之道也。西北距府二百六十五里。領縣四。

商水州西南。洪武初廢。四年七月復置。北有潁水，又有澠水，亦曰大澠水。

西華州西，少北。北有潁水，又有沙水，卽小黃河也。西南有澠水，又有常社鎮巡檢司。

項城州南。東北有故城。今治本南頓縣之殄寇鎮也。宣德三年遷。東有潁水，西有澠水流入焉。洪武二十四年，大河自陳州經縣界合潁，下入於淮。永樂九年，河始復故道。又東北有沙水。

沈丘州東南。元屬潁州。洪武初廢。弘治十年改乳香臺巡檢司置，來屬。東北有潁水，東入南直潁州界。又北有沙河，東入南直太和縣界。又東有界首巡檢司。又北有南頓縣，洪武初廢。景泰初，置南頓巡檢司於此。

許州 洪武初，以州治長社縣省入。西有潁水。北有潁水。又東有東湖，一名秋湖。又西北有石固鎮，與長葛縣界。東北距府二百二十里。領縣四。

臨潁州東南。西有潁水，潁水自縣北流入焉。又西南有小澠水。

襄城州西南。南有首山。東北有潁水。南有汝河。

鄆城州東南。南有沙水，亦曰大澠水，上流卽故汝水也，又東南有澧水來入焉。(三)

長葛州西北。北有洧水。西有潁水。

禹州元曰鈞州。三洪武初，以州治陽翟縣省入。萬曆三年四月避諱改曰禹州。成化二年七月建徽王府。嘉靖三十五年除。北有禹山，又西北有鑛山，有鐵母山，舊俱產鐵。又北有潁水，下經襄城，一名渚水，至臨潁合沙河。東北距府三百二十里。領縣一。

密州西北。南有洧水，又有潑水。

鄭州 洪武初，以州治管城縣省入。西南有梅山，鄭水出焉，下流舊入汴水，後堙。又西有須水，源出滎陽縣，舊亦入於汴水。正統八年嘗濬以分決河之流，後亦堙。東北距府百四十里。領縣四。

滎陽州西。南有大周山，汴水出焉。又東南有嵩渚山，京水出焉。又有素水，源出小徑山，北流與京水合，下流入於鄭水。又大河在北。東有須水鎮，崇禎十年築城。

滎澤州北，少西。元直隸汴梁路。洪武中，改屬州。北有故城。洪武八年因河患徙於南。成化十五年正月又徙北，濱大河。東南有孫家渡，正統十三年，大河決於此。

河陰州西北。舊治在大峪口，洪武三年爲水所圯，徙於此。東北有廣武山，與三皇山連。西有敖倉，北濱大河。

汜水州西。故城在縣東，洪武十一年七月徙於成臯。崇禎十六年又遷西北。北濱河，洛水自西，東至滿家溝合汜水入焉。又西有虎牢關，洪武四年九月改曰古嶠關，有巡檢司。

**河南府** 元河南府路，屬河南江北行中書省。

**洪武元年爲府。**領州一，縣十三。東距布政司三百八

十里。

**洛陽**倚。

洪武二十四年建伊王府。嘉靖四十三年廢。萬曆二十九年十月建福王府。北有北邙山。西南有闕塞

山，亦曰闕口山，亦曰伊闕山，俗曰龍門山。又西北有穀城山，亦曰簪亭山，灋水所出。又東南有大谷，谷口有

關。又大河在北。又有洛水，源自洛南冢嶺山，東經盧氏、永寧諸縣，至洛陽、偃師、鞏縣入於河。又東有伊水，

自盧氏縣東北流至偃師縣而入洛。又北有灋水，西有澗水，俱流會於洛。又西南有孝水。

**偃師**府東，少北。南有緱氏山。又有洛水，西有伊水流合焉。

**鞏**府東北。西南有轅轅山，上有關。北濱河。西北有洛水，舊經縣北入河，謂之洛汭，亦曰洛口。嘉靖後，東過汜

水縣入河。又南有鄆水，會洛入河，亦曰鄆口也。又東南有石子河，西南有長羅川，皆流入洛水。又西南有黑

石渡巡檢司。

**孟津**府東北。舊治在縣東，今治本聖賢莊，嘉靖十四年七月遷於此。西北有大河。又西有硤石津，又西有委粟

津，又有高渚、馬渚、陶渚，皆大河津濟處。東北有孟津巡檢司。

**宜陽**府西南。西有女兒山。東南有鹿蹄山，一名非山，甘水出焉。又北有洛水。西有宜水，又有昌谷水，與甘水

俱流注於洛。又西南有趙保鎮、木冊鎮二巡檢司。

**永寧**府西南。北有崤山，崤水出焉，北注於河。〔四〕其東曰穀陽谷，穀水所出焉。又南有洛水。東北有刀轅川，下



流爲昌谷水。又有大宋川，下流爲宜水。又西有崇陽鎮，又有高門關、東有嵎底關三巡檢司。

**新安府**西。西有缺門山。北有大河。又南有澗水，穀水自北流入焉。東有慈澗水，亦流入穀水。又有函谷新關。

**澠池府**西。元屬陝州。洪武中改屬。東北有廣陽山，亦曰澠池山，北溪水出焉。又有白石山，澗水所出。西北濱河。南有穀水。又西北有南村巡檢司。

**登封府**東南。北有嵩山，卽中岳也，亦曰太室山。又西有少室山，潁水中源出焉；又有右源，出於山之南溪，又有左源，出於西南之陽乾山，合流至南直壽州入淮。又北有陽城山，洧水所出，下流至扶溝縣入沙河。又東南有嵎嶺，卽箕山也，上有嵎坂關。又東南有五渡水，流入潁，亦曰三交水。又西南有少陽河，亦流入潁。

**嵩府**西南。元嵩州，屬南陽府。洪武二年四月降爲縣，來屬。三塗山在西南。陸渾山在東北。又東有篩山，〔三〕北有露寶山，西有大礪山，皆產錫。西南有伏牛山，卽天息山也，山有分水嶺，汝水出焉，下流至南直潁州入淮，行千三百五十餘里。又南有伊水，西北有高都川流入焉。又西南有舊縣鎮巡檢司。西有沒大嶺巡檢司。

**盧氏府**西南。元屬嵩州。洪武元年四月屬南陽府。三年三月屬陝州。萬曆初，改屬府。西南有熊耳山，洛水自陝西商州流入境，經此。東南有巒山，一名悶頓嶺，伊水所出。北有鐵嶺，東澗水出焉，東南入洛。又東北有馬回川，亦入於洛。又東南有欒州鎮、西南有朱陽鎮、〔六〕北有杜管鎮三巡檢司。又西有白華關。

**陝州**元屬河南府路。洪武元年四月改屬南陽府，以州治陝縣省入。東有底柱山，在大河中。山有三門，中曰神門，南曰鬼門，北曰人門，惟人門修廣可行舟，鬼門最險。又南有棗水，一名永定澗，亦曰漫澗，西北入

河。又東南有硤石關，有巡檢司。又有雁翎關。〔七〕東距府三百里。領縣二。

靈寶州西，少南。北濱河。又西有弘農澗。南有饒略鎮巡檢司。又有函谷故關。西南又有洪關。

閿鄉州西南。東南有夸父山，一名秦山，中有大谷關。北濱河，自山西芮城縣流入，東南至永城縣，入南直碭山縣界。西有湖水，又有盤澗水北流入焉。又西有潼關，與陝西華陰縣分界。

歸德府元直隸河南江北行省。洪武元年五月降爲州，屬開封府。嘉靖二十四年六月升爲府。領

州一，縣八。西距布政司三百五十里。

商丘倚。元曰睢陽。洪武初省。嘉靖二十四年六月復置，更名。舊治在南，弘治十五年圯於河，十六年九月遷

於今治。北濱河。正統後，河決而南。城嘗在河北，正德後，仍在河南。北有丁家道口巡檢司。東南有武津關巡檢司。

寧陵府西。南有睢水。北有桃源集巡檢司。

鹿邑府南。元屬亳州。洪武中改屬。南有潁水，又蔡河自西流入，謂之蔡河口，卽沈丘縣之沙河也。又北有渦水，東流入南直亳州境。

夏邑府東。元曰下邑。洪武初，更名。北濱大河。又東南有睢水。

永城府東南。洪武元年五月屬開封府。十一月來屬。北有碭山，又有芒山，皆與南直碭山縣界。又睢水、滄水皆

在縣南。又南有泡水，弘治間淤塞。

虞城府東北。元屬濟寧路。洪武二年正月來屬。南有故城。嘉靖九年遷於今治。北有黃河。

睢州 元屬汴梁路。洪武初，屬開封府，以州治襄邑縣省入。十年五月降爲縣。十三年十一

月復升爲州。嘉靖二十四年六月來屬。北濱河。又有睢水亦在州東北。東距府百七十里。領縣二。

考城州北。元末省。洪武四年八月復置，屬開封府。十年五月復省。十三年十一月復置，屬州。舊治在縣東南。

正統十三年徙。北濱大河。

柘城州東南。元末省。洪武四年八月復置，屬開封府。十年五月省入寧陵縣。十三年十一月復置，屬州。北有

睢水。南有渦水。

汝寧府 元直隸河南江北行省。〇〇 洪武初，因之。領州二，縣十二。距布政司四百六十里。

汝陽倚。天順元年三月建秀王府，成化八年除。十年建崇王府。洪武初，縣廢，四年七月復置。北有汝水，源出

天息山，東流入境，過新蔡東南入淮。又南有潁水，又有汶水，又有潯水，又西北有瀨水，俗名泥河，下流俱入於汝。又城南有柴潭。東有陽埠巡檢司。

眞陽府東。元屬息州。洪武四年省入汝陽縣。景泰四年置眞陽鎮巡檢司於此。弘治十八年十二月仍置縣，而

徙巡檢司於縣南銅鐘店，仍故名，尋廢。南有淮水。又汝水在縣東，北有潁水流入焉。

上蔡府北。洪武初廢，四年五月復置。西有汝水，西南有沙水流合焉。

新蔡府東，少南。元屬息州，後廢。洪武四年五月復置，改屬。南有汝水，又潁水自城北流合焉。又東北有瓦店巡檢司。

西平府西北。北有汝水，源出縣西南雲莊、諸石二山。自元末塌斷故汝，而此水遂爲汝源。嘉靖九年復塞，改爲洪河之上流。

確山府西南。洪武十年五月省入汝陽縣，十三年十一月復置。成化十一年九月改屬信陽州。弘治二年八月仍屬府。西北有朗山，〔九〕亦曰樂山。北有黃西河，下流爲練河，流入汝。又西有竹溝巡檢司。南有明港巡檢司。遂平府西，少北。西南有查牙山，其東南相接者曰馬鞍山。又西有洪山，龍陂之源出焉，自西平縣雲莊諸山之水既塞，遂以此爲汝源。南有濯水，又有沙河，又北有石洋河，其下流皆入於汝。

信陽州元爲信陽縣，屬信陽州，後廢。洪武元年十月置信陽州於此，屬河南分省。四年二月屬中都臨濠府。七年八月改屬。十年五月降爲縣。成化十一年九月復升爲州。西南有賢首山。南有士雅山，又有峴山。東南有石城山，亦曰冥山。北有淮水，又南有潁水流入焉。東北距府二百七十里。領縣一。

羅山州東。元信陽州治，後州縣俱廢。洪武元年十月置州於舊信陽縣，復置羅山縣屬焉。十年五月直隸汝寧府。

成化十一年九月還屬州。北有淮水，又南有小黃河入焉。東南有大勝關巡檢司，與湖廣黃陂界。西南有九里關，卽黃峴關，義陽三關之一，有巡檢司，與湖廣應山縣界。

光州 洪武初，以州治定城縣省入。四年二月改屬中都臨濠府。十三年仍來屬。北有淮水。又南有潢水，北流入淮水。西南有陰山關。西北距府三百里。領縣四。

光山州西南。南有石盤山。北濱淮。南有潢水，亦曰官渡河。又南有木陵關。西南又有白沙、[二〇]土門、斗木嶺、黃土嶺、修善衝等五關，與湖廣麻城縣界。東南有牛山鎮巡檢司，後移於長潭。又有沙窩鎮巡檢司，後廢。

固始州東北。南有白鹿崖。北濱淮。東有史河，西有潁河，俱入南直霍丘縣界，下流入淮。又東北有朱臯鎮，與南直潁州界，有巡檢司。

息州西北。元息州，洪武四年二月屬中都臨濠府。尋降爲縣，屬潁州。七年仍來屬。南濱淮。東北有汝水。北有楊莊店巡檢司，後移於縣東北之固城倉。

商城州東南。成化十一年四月析固始縣地置。南有金剛臺山。又東南有竹根山。東有大蘇山，灌水出焉，流入南直霍丘縣。又東有牛山河，卽史河上源也。西南有五水關河。又南有五河，下流俱入於史河。又南有金剛臺巡檢司，本置金剛臺山下，嘉靖二十七年移於縣東南之水東案。又南有長嶺關，東南有松子關，俱接湖廣羅田縣界。

**南陽府**元直隸河南江北行省。洪武初，因之。領州二，縣十一。距布政司六百八十里。

**南陽**倚。洪武二十四年建唐王府。城南有精山。北有百重山、雒衡山。又有分水嶺，其水北流入於汝水，南流

入於清水。西南有臥龍岡。東有清水，一名白河，下流至湖廣襄陽縣界入漢水。西南有湍水，西北有洱水，皆流入清水。

**鎮平府**西。洪武十年五月省入南陽縣。十三年十一月復置。西北有五朵山，產銅。東有潦河，流入清水。

**唐府**東南。洪武三年以故比陽縣地置。南有唐子山。東北有大狐山，〔二〕亦曰壺山，泚水所出。又西有黃潭水，又有泌水，下流皆入清水。又東北有石夾口關。

**泌陽府**東。元爲唐州治。洪武二年二月省入州。十三年十一月，州廢，復置縣。東有銅山，泌水出焉。又北有漁水，東北有澗水，下流俱入汝水。又象河關在縣東北，有巡檢司。

**桐柏府**東南。本唐縣之桐柏鎮巡檢司。成化十二年十二月改置縣，而移巡檢司於毛家集。東有桐柏山，淮水所經，下流至南直安東縣入海，行二千三百餘里。又東有大復山。西北有胎簪山，淮水所出。又西有澧水，亦曰醴水，下流入泌水。

**南召府**北。成化十二年十二月以南陽縣南召堡置。北有丹霞山，一名留山。北有魯陽關，卽三鴉路口也，與魯山縣界。有鴉路鎮巡檢司，成化十二年十二月移於窪石口。

**鄧州**元治穰縣。洪武二年二月，縣廢。十三年十一月復置縣。十四年五月復省入州。南有析

隈山。西北有白崖山。北有湍水，又東有湍水，亦名趙河，自北來入焉。東北距府百二十里。領縣三。

內鄉州北，少西。東有熊耳山，湍水所出。西南有浙水，又有丹水。又北有菊潭。東北有金斗山巡檢司，後廢。又西北有西硤口關巡檢司。又西南有黨子口關。又西有武關，路出陝西商州。

新野州東南。西有清水，又有湍水，又北有泚水，東有棘水，皆流入於清水。

淅川州西。成化六年析內鄉縣地置。東南有太白山。又有丹崖山。東有均水，又西南有浙水，北有丹水俱流入焉，南入於漢水。西北有花園頭巡檢司，又有荊子口關。又西有峽口鎮，南接湖廣均州界。

裕州 洪武初，以州治方城縣省入。東北有方城山，渚水出焉，下流入泚水。西南距府百二十里。領縣二。

舞陽州東北。汝水在縣北，舊入西平縣界，元末於渦河竭斷其流，使東歸潁，而西平之水始別爲汝源。南有灤水，亦曰舞水，又有灤水，下流俱入於汝寧府之汝水。西南有沙水，即漁水也。又北有澧水，下流歸故汝水。

葉州北，少東。北有黃城山，一名長城山，有汝水。又北有湛水，流入汝。東北有沙水，一名漁水，又名泚水，又北有昆水入焉，下流入於汝。又北有昆陽關。

懷慶府 元懷慶路，直隸中書省。洪武元年十月爲府，屬河南分省。領縣六。東南距布政司三百里。

河內倚。永樂二十二年建衛王府。正統三年除。八年，鄭王府自陝西鳳翔府遷此。北有太行山，又有碗子城山，

上有關。又有沁河，源出山西沁源縣，流入府境，下流至武陟入大河。又有丹河，自澤州流入，注於沁河。又西有柏鄉城，崇禎四年築。

濟源府西。元屬孟州。洪武十年五月改屬府。南濱大河。西有王屋山，接山西垣曲縣界，濟水出焉。西北有琮山，溴水出焉。又東北有沁水，經兩山之間，一名枋口水。又西北有軹關。〔二〕西有邵原鎮巡檢司。

修武府東，少北。西有沁水。

武陟府東。大河在縣南。東有沁河，至南賈口入焉。又東北有蓮花池，萬曆十五年，沁河決此。又西北有寧郭城，景泰中築。

孟府南，少西。元孟州。洪武初，以州治河陽縣省入。十年五月降爲縣。西南濱大河。

溫府東南。元屬孟州。洪武十年五月改屬府。南濱大河，溴水自西北流入焉。又西南有濟水，舊自濟源縣流經沈河鎮，南注於河，後其道盡入河中。

衛輝府元衛輝路，直隸中書省。洪武元年八月爲府。十月屬河南分省。領縣六。東南距布政司

一百六十里。

汲倚。弘治四年八月建汝王府。嘉靖二十年除。隆慶五年二月建潞王府。北有衛河，源出輝縣，下流至北直靜海縣入海，行二千餘里。又東北有淇門鎮。



胙城府東，少南。洪武十年五月省入汲縣。十三年十一月復置。

新鄉府西南。北有衛河。西北有清水。又西南有大河故道，正統十三年河決縣之八柳樹由此，尋塞。西有古沁河，永樂十三年後，時決時涸。

獲嘉府西，少南。洪武十年五月省入新鄉縣，十三年十一月復置。大河舊在縣南。天順六年中，河自武陟徙入原武，而縣界之流絕。北有清水，又有小丹河合焉。

淇府北。元淇州，後廢。洪武元年九月復置。十二月降爲縣。西北有淇水，又清水自東北流入焉，下流入於衛河。輝府西北。元輝州，後廢。洪武元年九月復置。十二月降爲縣。西有太行山。西北有白鹿山。又有蘇門山，一名百門山，山有百門泉，泉通百道，其下流爲衛水，故又名衛源。又西南有清水。又西北有侯趙川，西有鴨子口。  
二巡檢司。

彰德府 元彰德路，直隸中書省。洪武元年閏七月爲府。十月屬河南分省。領州一，縣六。南距布政司三百六十里。

安陽倚。永樂二年四月建趙王府。元末，縣廢。洪武元年九月復置。東北有韓陵山。西北有銅山，舊產銅。北有安陽河，本名洹水，〔二〕自林縣流入，至北直內黃縣入衛河。又北有濁漳水。

臨漳府東北。元末廢。洪武元年九月復置。西有清、濁二漳水，合流於此，曰交漳口，入北直界。又有溢水，下

流入於漳河。西南又有洹水。

湯陰府南。元末廢。洪武元年九月復置。西有蕩水，經縣治北，下流入衡水。

林府西，少南。元林州，後廢。洪武元年九月復置。二年四月降爲縣。西北有隆慮山，亦曰林慮，洹水出焉。又西南有天平山。西有太行山。又北有濁漳水，自山西平順縣流入。

磁州元治滏陽縣，屬廣平路，後州縣俱廢。洪武元年十一月復置州，屬廣平府。二年四月來屬。西

北有神麇山，滏水出焉。又南有清漳水。北有車騎關巡檢司。南距府七十里。領縣二。

武安州西北。元末廢。洪武元年十一月復置。東南有滏山，滏水出焉。西南有磁山，產磁石。東北有洛河，流

入北直邯鄲縣界。又西有固鎮巡檢司。

涉州西，少北。元屬真定路，後廢。洪武元年十一月復置，屬真定府。二年四月來屬。南有涉水，卽清漳水也，自山西黎城縣流入。又東北有偏店巡檢司，後移於縣西南之吾而峪口。

汝州元屬南陽府。洪武初，以州治梁縣省入。成化十二年九月直隸布政司。東南有霍山。又有魚

齒山，涉水出於此，入葉縣界。又西南有鳴臯山。又有空峒山。南有汝水。西有廣成澤。〔四〕領縣四。東北距

布政司四百九十里。

魯山州西南。東有魯山。西有堯山，洹水所出，西南有波水流入焉。又西北有歇馬嶺關巡檢司。

邠州東，少南。東南有汝水，西有鳳澗水流入焉。

寶豐州東南。成化十一年四月析汝州地置。南有汝水，又有汝水。

伊陽州西，少南。成化十二年十二月以汝州之伊闕故縣置，析嵩及魯山二縣地益之。西有伊陽山。又有堯山，卽

天息山也，上有分水嶺，汝水出焉，俗又名沙水。又南有汝水。西有伊水。西南有上店鎮巡檢司，成化十二年十二月移於常界嶺。又有普掾關巡檢司，廢。

陝西 禹貢雍、梁二州之域。元置陝西等處行中書省，治奉元路。又置甘肅等處行中書

省。治甘州路。洪武二年四月置陝西等處行中書省。治西安府。三年十二月置西安都衛。與行中書

省同治。八年十月改都衛爲陝西都指揮使司。九年六月改行中書省爲承宣布政使司。領府

八，屬州二十一，縣九十有五。爲里三千五百九十七。東至華陰，與河南、山西界。南至紫陽，與湖廣、

四川界。北至河套，西至肅州。外爲邊地。距南京二千四百三十里，京師二千六百五十里。洪

武二十六年編戶二十九萬四千五百二十六，<sup>〔二〕</sup>口二百三十一萬六千五百六十九。弘治四年，戶三十萬六千六百四十四，口三百九十一萬二千三百七十。萬曆六年，戶三十九萬四千四百二十三，口四百五十萬二千六十七。

**西安府**元奉元路，屬陝西行省。洪武二年三月改爲西安府。領州六，縣三十一。

**長安**倚。治西偏。洪武三年四月建秦王府。北有龍首山。南有終南山。西南有太一山，又有子午谷，谷中有關。

北有渭水，源出鳥鼠山，流經縣界，至華陰入黃河。又西有灃水。又西北有鎬水，合滌水，〔二六〕又南有潏水，亦曰沔水，合潏水，俱北流入渭。

**咸寧**倚。治東偏。渭水在南。東有澧水，合霸水流入渭。

**咸陽**府西北。舊治在渭河北，洪武二年徙於渭南。東北有涇水，東入渭。東南有灃水，北入渭。

**涇陽**府北。西北有甘泉山。南有涇水，源自嶺頭山，流經縣界，至高陵縣入渭。又北有治谷水，合清谷水，下流入渭。

**興平**府西，少北。南有渭水。

**臨潼**府東，少北。東南有驪山，有溫泉。北有渭水。西有潼水，又東有戲水，俱北入渭。又東有泠水，一曰零水，至零口鎮亦入渭。又南有蕘鹽驛，舊產鹽。

**渭南**府東。元屬華州。嘉靖三十八年十一月改屬府。北有渭水。

**藍田**府東南。南有七盤山，旁有綰坡，謂之七盤十二綰，藍關之險道。又有嶢山。東南有藍田山，有關。西有霸水，西北有長水，亦曰荆溪，又南有輞谷水，亦曰輞川，俱注於霸水。

鄠府西南。南有牛首山，潞水出焉。北有渭水。西南有甘泉，西有漢陂，俱流合潞水，注於渭。又灋水在南，合高觀谷、太平谷諸水，入長安縣界。

整屋府西南。西南有駱谷，谷長四百二十里，谷口有關。谷中有十八盤，又有柴家關二巡檢司。北有渭水。南有龍水，西南有黑水流入焉。又東有駱谷水，東南有芒水，並北入渭。

高陵府東北。西南有渭水，涇水自西北流合焉。

富平府東北。元屬耀州。萬曆三十六年改屬府。西南有荊山。西北有漆沮水，舊經白水縣南入洛，自鄭渠堙廢，不復東入洛矣。東北有美原巡檢司，尋廢。

三原府北，少東。元屬耀州。弘治三年十一月改屬府。西北有堯門山。東北有漆沮水。西有清水，下流注於渭。醴泉府西北。元屬乾州。嘉靖三十八年十一月改屬府。西北有九嵎山，又有武將山。東有涇水，又有甘谷水，流合焉。

華州南有少華山。北有渭水，與同州界。西有赤水，分大小二流，又有石橋水，俱北注渭。西距府二百里。領縣二。

華陰州東。南有華山，亦曰太華，卽西嶽也。東有牛心谷。西南有車箱谷。東北有大河，自朝邑縣流入，至渭口，與渭水合，所謂渭汭也。南有敷水，北入渭。東北有潼水，入於大河。東有潼關。洪武七年置潼關守禦千戶所。九年十一月升爲衛，屬河南都司。永樂六年直隸中軍都督府。

**蒲城**州西北。東有洛水。又西有西鹵池，南有東鹵池，舊產鹽。

**商州** **洪武七年五月降爲縣。** **成化十三年三月仍爲州。**東南有商洛山。西有熊耳山，伊水所出。南

有丹崖山，舊產銅。又有冢嶺山，洛水所出，下流至河南汜水縣入大河。又南有丹水，流入河南內鄉縣界。東有

武關，西有秦嶺二巡檢司。又東有龍駒寨。西北距府二百二十里。領縣四。

**商南**州東，少南。成化十三年三月以商縣之層峯驛置，尋徙治於洧河西。西南有兩河，卽丹水也，東有洧河，南

有挾川，俱入焉。東有富水堡巡檢司。

**雒南**州北，少東。元曰洛南，屬商州。洪武七年五月改屬華州。成化十三年三月復來屬。天啟初，改洛爲雒。東

北有魚難山，魚難水出焉，西北有玄扈山，玄扈水出焉，俱北入於洛。東南有三要、東北有石家坡二巡檢司。

**山陽**州南，少東。本商縣之豐陽巡檢司，成化十二年十二月改爲縣，而移巡檢司於縣東南之漫川里，仍故名。東

南有天柱山。西南有甲河，流入湖廣上津縣界，注於漢水。又東有竹林關巡檢司。

**鎮安**州西南。景泰三年以咸寧縣野豬坪置，屬府。天順七年二月遷治謝家灣。成化十三年三月改屬州。西有

泮水，合縣南洧水入洧陽縣界，注於漢江。北有舊縣，西有五郎壩二巡檢司。

**同州**北有商原。南有渭水。西南有沮水，一名洛水。西南距府二百六十里。領縣五。

**朝邑**州東。東有大河。南有渭水。又有洛水，舊自縣南經華陰縣西北葫蘆灘入渭；成化中，自縣南趙渡鎮徑入

於河，不復入渭。東北有臨晉關，一名大慶關，卽蒲津關也，舊屬蒲州，洪武九年八月來屬。有蒲津關巡檢司。

郃陽州東北。東有黃河。

韓城州東北。西有梁山，一名呂梁山，濱大河。東北有龍門山，夾河對峙。

澄城州北。西有洛水。

白水州西北。南有故城。洪武初，徙於今治。西有洛水，白水流入焉。西北有馬蓮灘巡檢司。

耀州東有沮水，西有漆水流入焉。又有清水，流入三原縣界。南距府百八十里。領縣一。

同官州東北。北有神水峽，峽內有金鎖關巡檢司。又西北有北高山，漆水出焉，東南流與同官川水合。又東有沮水，南有安公谷水，其下流合於沮水。

乾州西北有梁山，接岐山縣界。其南有漠谷，漠谷水經其下，流爲武水。又東北有甘谷水。又西有武亭水。東南距府百六十里。領縣二。

武功州西南。西南有太白山，又有武功山。東南有惇物山。南有渭水。又西有漠谷水，又有武亭水，自縣東北流合焉。俱匯於漳水。

永壽州北。東有涇水。西南有錦川河，下流爲漠谷水。有土副巡檢司。又有穆陵關。

邠州元直隸陝西行省。洪武中來屬，以州治新平縣省入。北有涇水。西南有白土川，二七亦名漆水，東南注於渭水，與入洛之漆異。東南距府三百五十里。領縣三。

淳化州東。南有黃嶽山。西有涇水。東有清水，南流入耀州界。

三水州東北。成化十三年九月析淳化縣地置。東南有石門山。東有三水河，一名汎水，西南流入涇水。東南有石門巡檢司。

長武州西北。萬曆十一年三月以邠州宜祿鎮置。北有涇水，自涇州流入。南有汭水，一名宜祿水，亦自涇州流入，逕縣東停口鎮，與黑水河合，入於涇水。西有窯店巡檢司，本名宜祿，治宜祿鎮。弘治十七年遷於正東之冉杏，仍故名。萬曆十一年又遷，更名。

鳳翔府元屬陝西行省。洪武二年三月因之。領州一，縣七。東距布政司三百四十里。

鳳翔倚。永樂二十二年建鄜王府。正統八年遷於河南懷慶府。東北有杜陽山，杜水所出。西北有雍山，雍水出焉，下流合漆水入渭。又東南有橫水，亦曰橫渠，東入渭。

岐山府東。東北有岐山。又有梁山。又北有武將山。南有渭水，西北有岐水，又東有漳水，俱流入扶風縣界。又南有斜谷水，北入渭。

寶雞府西南。東南有陳倉山。西南有大散嶺，大散關在焉。又有和尚原，接鳳縣界。南有渭河，東有汭河流入焉。又東南有箕谷水，有洛谷水，俱北入渭。西南有益門鎮二里散關，東南有虢川二巡檢司。〔二八〕又東南有金牙關。

扶風府東。西南有渭河。東有漆河，又有雍水自東南流入焉，又南有漳河，俱流入武功縣界。



郿府東南。元屬奉元路。洪武二年來屬。西有衙嶺山，褒水出其南，流入沔，斜水出其北，流入渭。西有五丈原。又西南有斜谷，南入漢中，有斜谷關。北有渭水。

麟遊府東北。西有漆水，南有麟遊水，下流俱入於渭。西南又有杜水，亦曰杜陽川，東入漆。西北有石窯關巡檢司。

汧陽府西，少北。元屬隴州。嘉靖三十八年十一月改屬府。舊治在縣西，嘉靖二十七年徙於今治。南有汧河。

隴州 元屬鞏昌總帥府。延祐四年十一月省州治汧源縣入州。洪武二年來屬。西北有隴山，上有關曰隴關，亦曰大震關，一名故關，有故關大寨巡檢司。又有安夷關，亦曰新關。又西有小隴山，一名關山。又西南有岍山，汧水出焉。南有吳山，即吳嶽，古文以爲岍山。西南有白環谷，白環水出焉。西有弦蒲藪，汭水出焉，下流合於涇水。南有渭水。西南有方山原。又南有隴安、西南有香泉二巡檢司。東南距府百八十里。

漢中府 元興元路，屬陝西行省。洪武三年五月爲府。六月改名漢中府。領州一，縣八。〔一〕東北距布政司九百六十里。

南鄭倚。萬曆二十九年十月建瑞王府。西南有巴嶺山，南連孤雲、兩角、米倉諸山，達四川之巴州。南濱漢水，又曰沔水，源自蟠冢，經縣界，下流至湖廣漢陽府入大江。又有沮水，漢水別源也，又西北有褒水，俱流入漢水。南有青石關巡檢司。

褒城府西北。洪武十年六月省入南鄭縣，後復置。東北有褒谷，自此出連雲棧，北抵斜谷之道也。南有沔水，卽

漢水也。又有廉水，又城東有褒水，西南有讓水，一名遜水，下流俱入沔水。北有雞頭關巡檢司。又有虎頭關。

西北有漢陽關。

城固府東，少北。南有漢水。東北有壻水，又名智水，下流入漢水。又西北有黑水，或云卽褒水之上源。

洋府東南。元洋州。洪武三年降爲縣。十年六月省入西鄉，後復置。北有興勢山。東有黃金谷。南有漢水。西

北有壻水，西有瀟水，亦曰駱谷水，又東有酉水，俱南入漢。

西鄉府東南。東有饒風嶺，有關。北有漢水。東有洋水，卽清涼川也，〔三〇〕西北合木馬河入漢。東南有鹽場關、

西南有大巴山、東北有子午鎮三巡檢司。

鳳府西北。元鳳州。洪武七年七月降爲縣。南有武都山。北有嘉陵江，源出縣之嘉陵谷，下流至四川巴縣入於

大江。又東有大散水，亦注於嘉陵江。東北有清風閣巡檢司。南有留壩巡檢司，後遷廢丘關，又遷柴關，仍故

名。南有仙人關。西有馬嶺關。

沔府西。元沔州，屬四川廣元路。洪武三年改屬漢中府，省州治鐸水縣入州。七年七月降爲縣。十年六月省入

略陽，後復置。成化二十一年六月屬寧羌州。嘉靖三十八年十一月仍屬府。北有鐵山。東南有定軍山。南有

漢水。西有沮水，又有大安水，南入於漢。西南有大安縣，洪武初廢。又西有石頂關。

寧羌州本寧羌衛。洪武三十年九月以沔縣之大安地置。成化二十一年六月置州，屬府。東

北有五丁山，亦曰金牛峽。北有嶓冢山，漢水出焉，亦曰漾水，下流至湖廣漢陽縣合大江。又東有嘉陵江，西有西漢水合焉。西南有白水，自洮州衛流經此，亦曰葭萌水，有白水關，其下流至四川昭化縣合於嘉陵江。又東北有瀘水，流入漾水，謂之瀘口。又東有沮水。北有陽平關巡檢司。東北距府三百里。領縣一。

略陽州北。元屬沔州。洪武三年屬府。成化二十一年六月改來屬。西有盤龍山。東南有飛仙嶺，棧道所經也。

東有沮水，爲漢水之別源。南有嘉陵江，西北有犀牛江，卽西漢水也。又西有白水江。東北有九股樹，西有宜口二巡檢司。又西北有白水鎮巡檢司，後廢。

延安府元延安路，屬陝西行省。洪武二年五月爲府。領州三，縣十六。南距布政司七百四十里。

膚施倚。東有延水，又有清化水流入焉。

安塞府西北。西有洛水。北有延水，出縣西北之蘆關嶺，又東南有西川水，北有金明川，俱流入焉。又北有塞門守禦千戶所，洪武十二年置。西南有敷政巡檢司。

甘泉府西南。北有野豬峽。西有洛河，南有伏陸水流入焉。又東北有庫利川。

安定府東北。北有高柏山，懷寧河出焉，東流入於無定河。西北有白洛城，洪武三年築。

保安府西北。西南有洛河，有喫莫河流入焉。北有大鹽池。又西有靖邊守禦千戶所，隆慶元年二月置。北有順寧巡檢司。

**宜川** 府東。南有孟門山，在大河中流。又西南有銀川水，北有汾川水，西南有丹陽諸川，俱流入大河。

**延川** 府東，少北。東濱大河。北有吐延川，合清澗水，流注於大河。又東北有永寧關，臨河。

**延長** 府東。東濱河。南有延水，流入大河。

**青澗** 府東北。元屬綏德州。嘉靖四十一年改屬府。東有黃河，東北有無定河流入焉。又西有青澗河。

**鄜州** 東有洛水，南與單池水合，又名三川水。西有直羅巡檢司。北距府百八十里。領縣三。

**洛川** 州東南。西南有洛水。東南有鄜城巡檢司。

**中部** 州南。北有橋山，亦曰子午嶺，沮水出焉。西北有谷河及子午水，俱入於沮水。又東北有洛水。

**宜君** 州南。西南有玉華山，又有鳳凰谷。東有洛水。東北有沮水。

**綏德州** 洪武十年五月省入府，後復置。南有魏平關。東有黃河。城東有無定河，一名奢延水，亦曰圖

水，西北有大理水流入焉。東北有官菜園渡口巡檢司。西南距府三百六十里。領縣一。

**米脂** 州北。西有無定河。有大理水，又有小理水，西北有明堂川，俱流入無定河。北有碎金鎮，西南有克戎寨二

巡檢司。又西有銀州關，成化七年修築。

**葭州** 洪武七年十一月降爲縣，屬綏德州。十三年十一月復升爲州，屬府。東濱大河，西有葭

蘆河，城東有眞鄉川流合焉。西南距府五百八十里。領縣三。

**吳堡** 州南。元屬州。洪武七年十一月改屬綏德。尋省。十三年十一月復置，還屬。東濱河。

神木州北。洪武初省。十三年十一月復置。西北有楊家城，正統五年移縣治焉。成化中，復還故治。南有大河。北有濁輪川。西南有屈野川。

府谷州東北。洪武初省。十三年十一月復置。東濱大河，北有清水川入焉。

慶陽府元屬鞏昌總帥府。洪武二年五月直隸行省。領州一，縣四。東南距布政司五百七十里。

安化倚。洪武二十四年四月建慶王府。二十六年遷於寧夏衛。元省。洪武中復置。東北有白於山，洛水所

出。又城東有東河，西有西河，流合焉，下流爲馬蓮河。又西有黑水河，源出縣北之太白山，下流至長武縣合於涇河。東北有槐安，北有定邊二巡檢司。又西南有驛馬關，又有靈州，又有大鹽池三巡檢司，廢。

合水府東南。東有建水，西有北岔河，流合焉，謂之合水，西南入馬蓮河。又東北有華池水，有平戎川流合焉，東入鄜州之洛河。有華池巡檢司。

環府西北。元環州，屬鞏昌總帥府。洪武初，降爲縣，來屬。西有環河，出縣北青岡峽，下流爲府城之西河。又南有黑水河，又有鹹河，西南有甘河，俱注於環河。又西有葫蘆泉。西北有清平關。西北有安邊守禦千戶所，弘治中置。

眞寧府東南。元屬寧州。萬曆二十九年改屬府。西有馬蓮河。南有大陵、小陵諸水，卽九陵川之上源也。東有雕山嶺巡檢司。

寧州元屬鞏昌總帥府。

洪武中來屬。東有橫嶺，又有九龍川，亦曰寧江，亦曰九陵川，西南流，會上流羣川，而南

注於涇河。東北有襄樂巡檢司。北距府百五十里。

平涼府元屬鞏昌總帥府。

洪武三年五月直隸行省。領州三，縣七。東南距布政司六百五十里。

平涼倚。

洪武二十四年建安王府。永樂十五年除。二十二年，韓王府自遼東開原遷此。西南有可藍山。西有

崆峒山。

又有笄頭山，涇水出焉，下流至高陵縣入渭。又西有橫河，東有湫峪河，俱流入涇河。又西有羣牧監。

洪武三十年置陝西行太僕寺。

永樂四年置陝西苑馬寺，領長樂等六監，開成等二十四苑，俱在本府及慶陽、鞏

昌境內。

正統三年又併甘肅苑馬寺入焉。又東有通梢關。

崇信府東南。

北有汭水。西南有赤城川，南有白石川，流合焉，下流合於涇水。

華亭府南。

西有小隴山。西北有瓦亭山，有瓦亭關巡檢司，所謂東瓦亭也。東北有涇河。東南有汭水。又東南

有三鄉鎮，北有馬鋪嶺二巡檢司。

鎮原府東北。

元鎮原州，屬鞏昌總帥府。洪武初，降爲縣，來屬。西北有胡盧河，分二流，一北注於黃河，其支流

東南注於涇河。

南有高平川，流入胡盧河。西有安平寨巡檢司。西北有蕭關。西南有木峽關。又西有石峽關。

南有驛藏、木靖二關。

隆德府西南。

元屬靖寧州。嘉靖三十八年十一月改屬府。東有好水，西流與苦水合。西北有武延川，流入好水。

東南有捺龍川，流入苦水。

涇州元直隸陝西行省。洪武三年以州治涇川縣省入，來屬。舊治在涇水北。今治本皇甫店，洪武三年徙於此。北有涇河，有汭水。東有金家凹巡檢司。西北距府百五十里。領縣一。

靈臺州東南。西北有白石原。東北有三香水，一名三交川，下流至邠州合涇水。又西南有細川水，東北流合於三交川。

靜寧州元屬鞏昌總帥府。洪武中來屬。南有隴山。北有橫山，卽隴山支阜。南有水洛川，一名石門水，下流至秦州入略陽川。又西有苦水河，卽高平川之上源。東距府二百三十里。領縣一。

莊浪州東南。元莊浪州，直隸陝西行省。洪武三年屬鳳翔府。八年三月降爲縣，來屬。西有苦水川。

固原州 本固原守禦千戶所，景泰三年以故原州城置。成化四年升爲衛。弘治十五年置州，屬府。西南有六盤山，上有六盤關，東北有清水河出焉，下流合鎮原縣之胡盧河。又北有黑水，北流入於大河。又東西有二朝那湫，其下流注於高平川。南有開成州，元直隸陝西行省，治開成縣。洪武二年省州，以縣屬平涼府。成化三年廢縣。又東南有廣安州，元屬開成州，洪武二年省。又西有甘州羣牧所，永樂中置。又西北有西安守禦千戶所，成化五年以舊西安州置。北有鎮戎守禦千戶所，成化十二年以葫蘆峽城置。東北有平虜守禦千戶所，弘治十四年以舊豫望城置。又北有下馬關，嘉靖五年置。東南距府百七十里。

鞏昌府元屬鞏昌總帥府。洪武二年四月直隸行省。領州三，縣十四。東距布政司千六十里。

隴西倚西有首陽山，上有關。北濱渭水，東有赤亭水，西流入焉。

安定府北。元定西州，屬鞏昌總帥府。至正十二年三月改名安定州。洪武十年降爲縣，屬府。北有車道峴。西有西河，東有東河，流合焉。北有峴口巡檢司。

會寧府東北。元會州，屬鞏昌總帥府。至正十二年三月改爲會寧州。洪武十年降爲縣，屬府。東有響水，北流入大河。東有青家巡檢司。

通渭府東北。北濱渭，西有華川，東流入焉。

漳府南。西南有故城。今治，正統中所徙。西北有西傾山。南有漳水，北流入渭。東南有鹽井。

寧遠府東。南有太陽山，舊產鐵。北有桃花峽，兩山夾峙，渭水經其中。西有廣吳水，又有山丹水，俱源出岷州，並流北注渭。

伏羌府東。西南有朱圉山，俗名白崖山。北有渭水，西南有永寧河，西有洛門川，俱東北注於渭。

西和府東南。元西和州，屬鞏昌總帥府。洪武十年降爲縣，屬府。舊治在西南白石鎮，洪武中，移於今治。北有祁山。南有黑谷山，上有關。西北有西漢水，亦曰鹽官水。西南有濁水，卽白水江也。東北有鹽井。

成府東南。元成州，屬鞏昌總帥府。洪武十年降爲縣，屬府。西北有仇池山。東南有西漢水。西南有濁水，又西有建安水，又有洛谷川，俱流入西漢水。又東有泥陽水，下流至徽州界入嘉陵江。又北有黃渚關巡檢司。



秦州元屬鞏昌總帥府。洪武二年屬府，省州治成紀縣入州。西南有蟠冢山，西漢水出焉，下流至寧羌州。

合嘉陵江。東北有渭水，有秦水東流入渭。又西有西谷水，下流入西漢水。又南有籍水，西南有段谷水流入焉。

又東有長離水，即瓦亭川下流也，俱流入於渭。南有高橋巡檢司。又有石榴關。又有現子關。西距府三百里。

### 領縣三。

秦安州北。東有大隴山。又東北有瓦亭山，所謂西瓦亭也。城南有渭水。又西有隴水，瓦亭川自東北流合焉。

又東有松多川，下流入於秦水。又東有隴城關巡檢司。

清水州東。東有隴山，有盤嶺巡檢司。西南又有小隴山。西有渭水。東有秦水，南有清水流入焉。

禮州西南。元禮店文州軍民元帥府，屬吐蕃宣慰司。洪武四年十一月置禮店千戶所。十一年屬岷州衛。十五年

改屬秦州衛。成化九年十二月置禮縣於所城，屬州。故城在東。洪武四年移於今治。東南有西漢水。西南有

岷峨山，岷江出焉，東南流入階州界合於西漢水。又西有漩水鎮、南有板橋山二巡檢司。

階州元屬鞏昌總帥府。洪武四年降爲縣，屬府。十年六月復爲州。舊城在東南岷龍岡上。今城，洪武

五年所置。北有白水江。東北有犀牛江，即西漢水也。又西北有羌水，下流合白水江。又東有七防關巡檢司。西

北距府八百里。領縣一。

文州東南。元文州。至元九年十月置，屬吐蕃宣慰司。洪武四年降爲縣，屬府。十年六月改屬州。二十三年三

月省。成化九年十二月復置，仍屬州。東南有青唐嶺，路入四川龍安府。東有白水，西有黑水，流合焉。又北

有羌水，一名太白水。東有文縣守禦千戶所，本文州番漢千戶所，洪武四年四月置。二十三年改文縣守禦軍民千戶所。成化九年更今名。又東有玉壘關。西北有臨江關。

徽州元屬鞏昌總帥府。洪武十年六月降爲縣，屬府，後復升爲州。東南有鐵山。南有嘉陵江，又有河池水流入焉。又南有虞關巡檢司。西南有小河關。西北距府四百八十里。領縣一。

兩當州東。洪武十年六月省入徽縣，後復置，屬州。南有嘉陵江。

臨洮府元臨洮府，屬鞏昌總帥府。泰定元年九月改爲臨洮路。洪武二年九月仍爲府。領州二，縣三。南距布政司千二百六十里。

狄道倚。西南有常家山，與西傾山相接。北有馬塞山，浩尾河出於其北，阿干河出於其南，俱東流入大河。又西南有洮河，自洮州衛流入。又東有東峪河，南有邦金川，皆流會洮河。北有摩雲嶺巡檢司。又北有打壁峪關，有結河關。南有南關，有下櫟關，有八角關、十八盤關。西有三岔關，有分水嶺關。

渭源府東，少南。西有南谷山，渭水所出。又有鳥鼠山，渭水所經，東至華陰縣入大河。又西有分水嶺，東流者入渭，西流者入洮，上有分水嶺關巡檢司。又西南有五竹山，清源河出焉，逕縣東南入渭。

蘭州元屬鞏昌總帥府。洪武二年九月降爲縣，來屬。成化十三年九月復爲州。建文元年，肅王府自甘州衛遷此。南有阜蘭山。北濱大河，所謂金城河也，湟水自西，洮水、阿干河俱自南，先後流入焉。又西南有灘

水，合於洮水。北有金城關，下有鎮遠浮橋，有河橋巡檢司。西北有京玉關，南有阿干鎮關。西南有鳳林關。南距府二百十里。領縣一。

金州東，少南。元金州，屬鞏昌總帥府。洪武二年九月降爲縣，屬府。成化十三年改屬州。舊城在南，洪武中，移於今治。北有大河，東北流亂山中，入靖虜衛界。又南有浩尾河，一名閃門河，入於大河。東北有一條城，萬曆二十五年置。

河州元河州路，屬吐蕃宣慰司。洪武四年正月置河州衛，屬西安都衛。六年正月置河州府，屬陝西行中書省。七年七月置西安行都衛於此，領河州、朶甘、烏斯藏三衛。八年十月改行都衛爲陝西行都指揮使司。九年十二月，行都指揮使司廢，衛屬陝西都指揮使司。十年分衛爲左右。十二年七月，府廢，改左衛於洮州，升右衛爲軍民指揮使司。成化九年十二月置州，屬府，改軍民指揮使司爲衛。西南有雪山，與洮州界。西北有小積石山，上有關。大河自塞外大積石山東北流，逕此，又逕榆林衛北，折而南，與山西中流分界，至潼關衛北，折而東，入河南界，回環陝西境四千餘里。南有大夏河，卽灘水也，亦曰白石川。又西北有積石州，元屬吐蕃宣慰司，洪武四年正月改置積石州千戶所。西南有貴德州，元屬吐蕃宣慰司，洪武八年正月改置歸德守禦千戶所。又南有寧河縣，東北有安鄉縣，元俱屬河州路，洪武三年廢，六年復置。十二年復廢。又東南有定羌巡檢司。東北距府百八十里。

靈州元屬寧夏府路。洪武三年罷。弘治十三年九月復置，直隸布政司。大河在城北，洛浦河自南流

入焉。南有小鹽池。距布政司九百九十三里。

興安州元金州，屬興元路。萬曆十一年八月更名。二十三年直隸布政司。舊治漢水北，後遷水南。萬

曆十一年又遷故城南三里許。北有漢水。又西有衡河，亦曰恒河，下流入漢江。東北有乾祐關巡檢司，廢。領縣

六。西北距布政司六百四十里。

平利州南，少東。元末省。洪武三年置，屬四川大寧州。五年二月來屬。十年六月復省，後復置。東有女媧山，

灌溪水出焉，西北與黃洋河合，入於漢。南有鎮坪巡檢司。

石泉州西。元末省。洪武三年置，屬四川大寧州。五年二月來屬。嘉靖三十八年十一月改屬漢中府。萬曆十

一年還屬州。南有十八盤山，有漢江。西有饒風河，東有遲河，〔三〕俱入漢。又西有饒風嶺巡檢司，本治縣東

遲河口，後遷下饒風鋪，更名。

洵陽州東。元末省。洪武三年復置。五年二月來屬。東北有水銀山，產水銀、硃砂。南有漢江，東有旬水流入

焉。又有乾祐河，自西北流入旬水。東有閭關，西北有〔三岔〕二巡檢司。

漢陰州西，少北。元末省。洪武三年復置。十年六月省入石泉縣，後復置，屬州。嘉靖三十八年十一月改屬漢

中府。萬曆十一年還屬州。南有漢水。東北有直水，又有恒河，俱流入漢水。又西有方山關。

白河州東南。成化十二年十二月以洵陽縣白河堡置，屬湖廣鄖陽府。十三年九月來屬。北有漢江，東入湖廣鄖西縣界。南有白石河，分二流，俱北注於漢。

紫陽州西南。正德七年十一月以金州紫陽堡置。初治紫陽灘之左，嘉靖三十五年遷於灘右。西有漢江。

洮州衛元洮州，屬吐蕃宣慰司。洪武四年正月置洮州軍民千戶所，屬河州衛。十二年二月升爲

洮州衛軍民指揮使司，屬陝西都司。西南有西傾山，桓水出焉，下流爲白水江，又潞川亦出焉，一名洮水。又北有石嶺山，上有石嶺關。東有黑松嶺，上有松嶺關。又東有黑石關、三岔關、高樓關。北有羊撒關。西南有新橋關、洮州關。東南有舊橋關。南距布政司千六百七十里。

岷州衛元岷州，以舊祐川縣地置，屬吐蕃宣慰司。洪武四年正月置岷州千戶所，屬河州衛。十一年七月升爲衛，屬陝西都司。十五年四月升軍民指揮使司。嘉靖二十四年又置州，改軍民指揮使司爲衛。四十年閏五月，州廢，仍置軍民指揮使司。洪武二十四年建岷王府。二十六年遷雲南。北有岷山，洮河經其下。南有白水，一名臨江。又東有石關。東北有鐵州，元屬吐蕃宣慰司。洪武四年正月置鐵城千戶所，屬河州衛，後廢。領所一。南距布政司千五百五十里。

西固城守禦軍民千戶所衛南。本西固城千戶所，洪武七年三月置，屬鞏昌府。十五年四月改置，來屬。南有白水。北有化石關。西北有平定關。

榆林衛 成化六年三月以榆林川置。其城，正統二年所築也。西有奢延水，西北有黑水，經衛南，爲

三岔川流入焉。又北有大河，自寧夏衛東北流經此，西經舊豐州西，折而東，經三受降城南，折而南，經舊東勝衛，又

東入山西平虜衛界，地可二千里。大河三面環之，所謂河套也。洪武中，爲內地。天順後，元裔阿羅出、毛里孩、孛羅

出相繼居之。西南有鹽池，舊屬寧夏衛，嘉靖九年來屬。又衛東有長鹽池、紅鹽池。西有西紅鹽池、鍋底池。又東有

長樂堡，分轄雙山等十二營堡，爲中路。又有神木堡，分轄鎮羌等九營堡，爲東路。西有安邊營，分轄永濟等十二營

堡，爲西路。俱成化後置。又北有邊牆，成化九年築，長一千七百七十餘里，東起清水營，接山西偏頭關界，西抵定

邊營，接寧夏花馬池界。南距布政司千一百二十里。

寧夏衛 元寧夏府路，屬甘肅行省。洪武三年爲府。五年，府廢。二十六年七月置衛。二十八年

四月罷。永樂元年正月復置。洪武二十六年，慶王府自慶陽府遷此。西有賀蘭山。又西南有峽口山，黃河

流其中，一名青銅碛。黃河出硤東流，亦曰三岔河。又東有黑水河，南有清水河，卽葫蘆河下流也，俱注於黃河。有

寧夏羣牧千戶所，洪武二十七年十二月置。領千戶所四。東南距布政司千四百里。

靈州守禦千戶所，衛東南。洪武十六年十月置，治在河口。宣德三年二月徙於城東。弘治十三年九月復置靈州

於所城。

興武守禦千戶所，衛東南。正德元年以興武營置。

韋州守禦千戶所，衛東南。弘治十年以故韋州置。西有大蠡山。南有小蠡山。東有東湖。

平虜千戶所衛北，少東。嘉靖三十年以平虜城置。東北有老虎山，濱大河。北有鎮遠關。

寧夏前衛 在寧夏城內，洪武十七年置。

寧夏左屯衛

寧夏右屯衛 亦俱在寧夏城內，洪武二十五年二月置，後廢。三十五年十二月復置。

寧夏後衛 本花馬池守禦千戶所，成化十五年置。正德元年改衛。其城，正統九年所築

也。東北有方山。西有花馬池。西北有大鹽池。又西有小鹽池。東有長城關，正德初置。東南距布政司千

一百二十里。

寧夏中衛 元應理州，屬寧夏府路。洪武三年，州廢。永樂元年正月置衛。西有沙山，一名萬斛堆。大河

在南。又西南有溫圍水，流入大河。又有裴家川。又東南有鳴沙州，元屬寧夏府路。洪武初廢。南距布政司千

一百十里。

靖虜衛 正統二年以故會州地置，屬陝西都司。南有烏蘭山，上有烏蘭關。北有大河。西南有祖厲河，東

北有亥刺河，皆注於大河。西南有會寧關。南距布政司千二百二十里。

陝西行都指揮使司 元甘肅等處行中書省，治甘州路。洪武五年十一月置甘肅衛。二十五年罷。

二十六年，陝西行都指揮使司自莊浪徙置於此。領衛十二，守禦千戶所四。距布政司二千

六百四十五里。

甘州左衛倚元甘州路。洪武初廢。二十三年十二月置甘州左衛。二十七年十一月罷。二十

八年六月復置。洪武二十五年三月建肅王府。建文元年遷於蘭縣。西南有祁連山。西北有合黎山。東北有人

祖山，山口有關，曰山南，嘉靖二十七年置。又東北有居延海。西有弱水，出西南山谷中，下流入焉。又有張掖河，流

合弱水，其支流曰黑水河，仍合於張掖河。又東南有盧水，亦曰沮渠川。

甘州右衛

甘州中衛 俱洪武二十五年三月置。

甘州前衛

甘州後衛 俱洪武二十九年置。四衛俱與甘州左衛同城。

肅州衛元肅州路，屬甘肅行省。洪武二十七年十一月置衛。西有嘉峪山，其西麓卽嘉峪關也。弘治七年正月

扁關曰鎮西。西南有小崑崙山，亦曰雪山，與甘州山相接。北有討來河，東會於張掖河。西南有白水，又西北有黑水，

東南有紅水，俱流入白水，下流入西寧衛之西海。又東北有威虜衛，洪武中置，永樂三年三月省。東距行都司五

百十里。

山丹衛元山丹州，直隸甘肅行省。洪武初廢。二十三年九月置衛，屬陝西都司，後來屬。東南有焉支

山。西有刪丹河，卽弱水也。北有紅鹽池。西距行都司百八十里。



永昌衛 元永昌路，屬甘肅行省，至正三年七月改永昌等處宣慰司。 洪武初廢。十五年三月置衛，屬陝西

都司，後來屬。北有金山，麗水出焉。西南有白嶺山，亦曰雪山。西有水磨川，上有水磨關。又東南有塞占河。西

北距行都司三百十里。

涼州衛 元涼州，屬永昌路。 洪武九年十月置衛，屬陝西都司，後來屬。南有天梯山，三岔河出焉。東南

有洪池嶺。又東北有白亭海，有潞野澤。又西有土彌干川，即五澗水也，亦出天梯山，下流合於三岔河。又東有雜木

口關。又有涼州土衛，洪武七年十月置。西北距行都司五百里。

鎮番衛 本臨河衛，洪武中，以小河灘城置。三十年正月更名。建文中罷。永樂元年六月

復置。西有黑河，即張掖河下流也。又東有三岔河。南有小河。西有鹽池。西南有黑山關。西距行都司五百

五十里。

莊浪衛 洪武五年十一月以永昌地置。十二年正月置陝西行都指揮使司於衛城。二十六

年，行都司徙於甘州。建文中，改衛爲守禦千戶所。洪武三十五年十月復改所爲衛，屬

陝西都司，後來屬。東有大松山。其北有小松山。西有分水嶺，南出者爲莊浪河，北出者爲古浪河。又南有大

通河，與莊浪河合，北流經衛西，入於沙漠。北距行都司九百四十里。

西寧衛 元西寧州，直隸甘肅行省。 洪武初廢。六年正月置衛。宣德七年十一月升軍民指揮使司，

屬陝西都司，後來屬。西南有小積石山，與河州接界。東南有峽口山，亦曰湟峽。南有大河，自西域流入，迴環

於陝西、山西、河南、山東四布政司，及南直隸之地，幾至萬里，至淮安府清河縣，南合長淮，又東至安東縣南入於海。又北有湟水，卽蘇木連河也，東入大河。又西南有賜支河，又城北有西寧河，皆流入大河。又西北有浩靈水，西南有宗哥川，俱流合於湟水。又西有西海，亦名卑禾羌海，俗呼青海。西北有赤海。又有烏海鹽池。東南有綏遠關。西北距行都司千三百五十里。

碾伯守禦千戶所 本碾北地。洪武十一年三月置莊浪分衛。七月改置碾北衛，後廢，而徙西寧衛右千戶所於此。成化中更名。南有碾伯河。西北距行都司千二百三十里。

沙州衛 元沙州路，屬甘肅行省。洪武初廢。永樂元年置衛。正統間廢。南有鳴沙山。東南有三危山。又東有龍勒山，又有渥洼水。西有瓜州，元屬沙州路，洪武初廢。東距行都司千三百六十里。

鎮夷守禦千戶所 洪武三十年以甘州衛地置。建文二年罷。永樂元年復置所，舊在西北，天順八年移於今治。南有黑河，卽張掖河也。西南有鹽池。北有兔兒關。東南距行都司三百里。

古浪守禦千戶所 正統三年六月以莊浪衛地置。古浪河在東。又南有古浪關。東有石峽關。東南距行都司六百四十里。

高臺守禦千戶所 景泰七年以甘州衛之高臺站置。弱水在北。又西有合黎山。西南有白城山。東南距行都司一百六十里。

## 校勘記

〔一〕下流至南直宿遷縣合泗水 合泗水，原作「合大河」，據明史稿志一九地理志、明一統志卷一三、讀史方輿紀要卷四七改。

〔二〕東南有澧水來入焉 澧水，原作「濃水」，據明史稿志一九地理志改。讀史方輿紀要卷四七作「澧河」，嘉慶重修一統志卷二一八作「澧水」，並引水經注「醴水東逕鄆城縣故城南」。

〔三〕元曰鈞州 鈞州，原作「均州」，據明史稿志一九地理志、寰宇通志卷八三、明一統志卷二六改。均州在湖廣，不在河南。

〔四〕崱水出焉北注於河 河，原作「洛」，據明史稿志一九地理志、水經注卷四、讀史方輿紀要卷四八改。洛水在永寧南，崱水在永寧北。崱水北注，是入河，不是入洛。

〔五〕東有篩山 原脫「有」字，據明史稿志一九地理志補。

〔六〕西南有朱陽鎮 朱陽鎮，原作「南朱陽鎮」，據明史稿志一九地理志、明會典卷一三九刪。讀史方輿紀要卷四八作「朱陽關」，無「南」字。

〔七〕又有雁翎關 翎，原作「領」，據明史稿志一九地理志、寰宇通志卷八五改。

〔八〕元直隸河南江北行省 在「河南江北行省」下原衍「汝寧府」三字，今刪。

〔九〕西北有朗山 朗山，原作「郎山」，據明史稿志一九地理志、明一統志卷三一改。讀史方輿紀要

卷五〇確山縣，稱「開皇八年改曰朗山縣」，即因朗山得名。

〔一〇〕西南又有白沙 白沙，原作「北沙」，據明史稿志一九地理志、明一統志卷三一改。讀史方輿紀要卷五〇稱後魏元英破梁將吳子陽於白沙，即此。

〔一一〕東北有大狐山 大狐山，原作「大孤山」，據明史稿志一九地理志改。讀史方輿紀要卷五一認爲大狐山即張衡南都賦的「天封大狐」。

〔一二〕又西北有軹關 軹關，原作「枳關」，據明史稿志一九地理志、寰宇通志卷八九、明一統志卷二八改。讀史方輿紀要卷四九謂軹關在軹道，因稱。

〔一三〕本名洹水 洹水，原作「垣水」，據明史稿志一九地理志、寰宇通志卷九一改。

〔一四〕西有廣成澤 成，原作「城」，據明史稿志一九地理志、讀史方輿紀要卷五一改。

〔一五〕洪武二十六年編戶二十九萬四千五百二十六 二十六年，原作「二十五年」，據明史稿志二〇地理志改。本志各承宣布政使司所列戶口都作「洪武二十六年」，是年有戶口統計。

〔一六〕合淝水 淝水，原作「彪水」，據明史稿志二〇地理志、寰宇通志卷九二、明一統志卷三二改。淝水亦稱「淝池」，水經注卷一九「淝池出鄆池，西入於鄆」。

〔一七〕西南有白土川 川，原作「州」，據明史稿志二〇地理志、讀史方輿紀要卷五四改。

〔一八〕東南有虢川二巡檢司 虢川，原作「虎川」，據明會典卷一三九改。

〔二九〕領州一縣八 原作「領州二，縣十四」，是沿用明會典卷一六、明一統志卷三四舊文，和下文州縣數不合。漢中府原包括興安州所屬六縣，故作「領州二，縣十四」。萬曆二十三年把興安州和領縣六從漢中府劃出，直隸布政使司，所以只餘州一縣八，據改。

〔三〇〕東有洋水卽清涼川也 明史稿志二〇地理志、明一統志卷三四、讀史方輿紀要卷五六都以洋水和清涼川爲二水。

〔三一〕東有遲河 遲河，原作「池河」，據明史稿志二〇地理志、明一統志卷三四改。讀史方輿紀要卷五六稱「河名遲者，以此河易漲而難消也」。又稱「舊設遲河巡司於此」，字亦作「遲」。



# 明史卷四十三

## 志第十九

### 地理四

#### 四川 江西

四川 禹貢梁、荆二州之域。元置四川等處行中書省。〔一〕治成都路。又置羅羅蒙慶等處宣慰司，治建昌路。屬雲南行中書省。洪武四年六月平明昇。七月置四川等處行中書省。九月置成都都衛。與行中書省同治。八年十月改都衛爲四川都指揮使司。領招討司一，宣慰司二，安撫司五，長官司二十二及諸衛所。九年六月改行中書省爲承宣布政使司。領府十三，直隸州六，宣撫司一，安撫司一，屬州十五，縣百十一，長官司十六。爲里千一百五十有奇。北至廣元，與陝西界。東至巫山，與湖廣界。南至烏撒、東川，與貴州、雲南界。西至威茂，與西番界。距南京七千二百六十里，京師一萬七百一十里。洪武二十六年編戶二十一萬五千七百一十九。

口一百四十六萬六千七百七十八。弘治四年，戶二十五萬三千八百三，口二百五十九萬八千四百六十。萬曆六年，戶二十六萬二千六百九十四，口三百一十萬二千七十三。

成都府 元 成都路。洪武四年爲府。領州六，縣二十五。

成都倚。洪武十一年建蜀王府。

華陽倚。北有武擔山。又有外江，自灌縣分流經城北，遶城而南，一名清遠江。又有內江，亦自灌縣分流經城南，遶城而東，亦名石犀渠。合流南注於大江。此府城之內、外江也。東有寧州衛，洪武十一年四月置。東南有馬

軍寨巡檢司。

雙流府西南。洪武十年五月省入華陽縣。十三年十一月復置。東南有牧馬川，卽府城內、外江下流也。

郫府西。有內江，一名郫江，卽府城內江之上流也。

溫江府西，少南。西南有阜江，亦曰內江。

新繁府西北。洪武十年五月省入成都縣。十三年十一月復置。西北有沱江。又西有湔澳口。

新都府北。東有雒水，自什邡縣流經此，下流至瀘州入大江，亦曰中水。北有湔水，卽大江別流，自灌縣東北出，流經此，至漢州入雒水。東北有綿水，自漢州流至此入雒江。三水同流，亦曰郫江也。

彭府北。元 彭州。洪武十年五月降爲縣。北有九隴山，有葛瓊山，又有大隋山、中隋山。南有沱江，又北有濛水



流合焉。又東有濛陽縣，元屬彭州。洪武十年五月省。又北有白石溝巡檢司。

崇寧府西北。元屬彭州。洪武四年屬府。十年五月省入灌縣。十三年十一月復置。南有沱江。

灌府西，少北。元灌州。洪武中，降爲縣。西北有灌口山。又有玉壘山，下有玉壘關，一名七盤關。又西南有青

城山。又西有湔江，亦曰都江，亦曰湔棚江，古離堆也。岷江經此，正流引而南，支流分三道，繞成都境。有石

渠水口。又有白沙水，下流入都江。又南有沱江，卽郫江上源也。又西有蠶崖關巡檢司。西南有獠澤關。

金堂府東。洪武十年五月省入新都縣。十三年十一月復置。東北有三學山。南有雲頂山。有金堂峽，雒水經

此，曰金堂河。東南又有懷口巡檢司。

仁壽府南，少東。東有麗甘山，下有鹽井。東有三峒山，又有蟠溪，下流入資江。又南有陵井，產鹽，亦曰仙井。

井研府南，少東。洪武六年十二月置。十年五月省入仁壽縣。十三年十一月復置。東北有鐵山，舊產鐵。南有

鹽井。

資府東。明玉珍置資州。洪武初，降爲縣。南有珠江，卽雒江也，東流爲資江。東有銀山鎮巡檢司。

內江府東南。洪武中置。西有中江，卽雒之異名。南有棹木鎮巡檢司。

安府北，少東。元安州，治在西北。洪武中，降爲縣，移於今治。南有浮山，黑水出焉，南流入羅江縣界。北有曲山

關。東有小東壩關。又東南有睢水關，關西有綿堰堡，綿水發源處也。

簡州 洪武六年降爲縣。正德八年又升爲州。舊治在絳河北。正德八年徙治河南。東北有石鼓山。

西有分棟山。東有雁水，卽雒水也，絳水自北來合焉，一名赤水，亦曰牛鞞水。又城內有牛皮井，產鹽。西有龍泉鎮巡檢司。西南有陽安關。西北距府百五十里。領縣一。

資陽州東。洪武六年十二月置，屬府。十年五月省入簡縣。成化元年七月復置，仍屬府。正德中，改屬州。西有資溪，流入雁水。東有資陽鎮巡檢司，後移治濛溪河。

崇慶州元治晉原縣。洪武中省縣入州。西有鶴鳴山。西北有鄒江，東流入新津界。又北有味江，東北有白馬江，皆岷江南出之別名也。西北有永康縣。東南有江源縣，明玉珍復置，洪武初省。西有清溪口巡檢司。東北距府百十里。領縣一。

新津州東。南有天社山。〔三〕南枕大江，一名阜江。東有北江，亦曰新穿水，自府城南流經此合大江。

漢州明玉珍復置雒縣，爲州治。洪武四年省縣入州。東有雒水，有綿水。又西南有湔水，流入雒。又北有雁水，亦流入雒，故雒水亦兼雁水之名。又東北有石亭水，流合綿水。東南有三水關巡檢司。西南距府百十里。領縣三。

什邡州西。洪武十年五月省入綿竹縣。十三年十一月復置。西北有章山，雒水出此，亦名雒通山。南有高鏡關，雒水經其南。又西有大逢山。

綿竹州西北。西北有紫巖山，綿水出焉。又有紫溪河，一名射水河。又北有睢水關。

德陽州東北。洪武十年五月省入漢州。十三年十二月復置。北有鹿頭山，上有鹿頭關。東有綿水。西南有石

亭水。南有白馬關巡檢司。

綿州元屬潼川府。洪武三年來屬。十年五月降爲縣。十三年十一月復爲州。東有富樂山。西有涪水，源出松潘衛，流經此，亦曰綿江，下流至合州，合於嘉陵江。又西北有安昌水，一名龍安水，東南流合涪水。又東有潺水，亦合於涪水。東有魏城巡檢司。西南距府三百六十里。領縣二。

羅江州南。洪武六年十二月省入綿州。十三年十一月復置。東北有羅江，涪水與安昌水會流處也。又西有黑水，自安縣流入界。又西南有白馬關巡檢司，關與德陽縣鹿頭關相對。

彰明州北。洪武十年五月省入綿縣。十三年十一月復置。東北有太華山。西有涪江，北有廉水，西有讓水，俱流入焉。

茂州元治汶山縣，屬陝西行省吐蕃宣慰司。洪武中省縣入州。十六年復置縣，後復省。南有岷山，卽隴山之南首也。汶江自松潘衛流入，經山下，又東經州城西，東南流，迴環於四川、湖廣、江西三布政司及南直隸之地，入於海，幾七千餘里。南有鷄宗關、東有積水關、北有魏磨關三巡檢司。又南有七星關，又有雁門關。東有桃坪關。北有實大關。西北有黃崖關，有汶山長官司，又南有靜川長官司，東南有隴木頭長官司，西南有岳希蓬長官司，俱洪武七年五月置，屬重慶衛。又北有長寧堡，本長寧安撫司，宣德中，平曆日諸蠻置，屬松潘衛。正統元年二月改屬壘溪所。八年六月改屬茂州衛。後廢爲堡。東南距府五百五十里。領縣一。

汶川州西南。北有七盤山。西有玉輪江，卽汶江也，有汶川長官司，洪武七年五月置。西有寒水關巡檢司。又

南有徹底關。

威州元以州治保寧縣省入。明玉珍復置縣。洪武二十年五月復省縣入州。舊治在西北鳳坪里，宣德三年

六月遷於保子岡河西。十年六月又遷於保子岡河東千戶所城內。東南有定廉山，鹽溪出焉。又西南有雪山，亦曰西山。北有汶江，西北有赤水，北有平谷水，俱流入焉。東有通化縣，洪武三年省。西北有保子關、徹底關。西南有鎮夷關。東南距府四百五十里。領縣一。

保州西北。洪武六年分保寧縣地置。東有汶江。西北有鎮安關。

保寧府元屬廣元路。洪武四年直隸行省。領州二，縣八。西南距布政司七百里。

閬中倚。成化二十三年建雍王府。弘治三年遷於湖廣衡州府。四年八月建壽王府。正德元年遷於湖廣德安府。

舊治在縣東，明玉珍徙於此。東有蟠龍山，其北有鋸山關。〔三〕又有靈山，其麓爲梁山關。南有嘉陵江，卽西漢水，自陝西寧羌州流入，至巴縣合大江，亦曰閬水，又曰巴水，其下流曰渝水。有南津關在城南，臨嘉陵江。又有滴水關，在城北玉臺山下。又東南有和溪關。

蒼溪府西北。洪武十年五月省入閬中縣。十三年十一月復置。大獲山在東，宋江環其下。東南有雲臺山。西南有嘉陵江，宋江自西流入焉。北有八字堡巡檢司。

南部府南，少東。洪武十年五月省入閬中縣。十三年十一月復置。南有南山，一名跨鰲山。東南有離堆山。東

北有嘉陵江。

廣元府北，少西。元廣元路，治綿谷縣。洪武四年改爲府。九年四月降爲州，來屬，以綿谷縣省入。十三年十一月復置綿谷縣。二十二年六月降州爲縣，復省綿谷縣入焉。北有潭毒山，上有潭毒關，下臨大江。又有朝天嶺，上有朝天關。又有七盤嶺，上有七盤關，爲陝西、四川分界處。又東北有大漫天嶺，其北有小漫天嶺。西有嘉陵江。北有渡口，在大、小二漫間。東有百丈關，北有望雲關，有龍門關，北達陝西寧羌州。

昭化府西北。元屬廣元路。洪武十年五月省入廣元州。十三年十一月復置，屬府。西南有長寧山，有白衛嶺。又西有九曲山。東有嘉陵江，其津口曰桔柏津，渡口關在焉。北有白水，自陝西文縣流入，亦曰葭萌水，合於嘉陵江。又北有馬鳴關，又有石櫃閣。

劍州元屬廣元路。洪武六年以州治普安縣省入，來屬。九年省。十三年十一月復置。北有大劍山，亦曰梁山，西北接小劍山，飛閣通衢，謂之劍閣，有大、小劍門關在其上。又有漢陽山。東有嘉陵江。西南有涪江。北有大劍溪、小劍溪，又有泥溪。東南距府三百二十里。領縣一。

梓潼州西南。西有梓潼水，亦曰潼江水，下流入於涪江。又北有揚帆水，流合潼江水。又東有小潼水，下流入嘉陵江。

巴州元屬廣元路。洪武九年四月以州治化城縣省入，又改州爲縣，來屬。正德九年復爲州。東北有小巴山，與漢中大巴山接，巴江水出焉，經州東南，分爲三，下流至合州入嘉陵江。南有清水江，流合巴江。

東有曾口縣，元屬州，後廢。又北有米倉關，巡檢司，本治小巴山之巔，尋徙大巴山下，後廢。東北距府三百五十里。領縣二。

通江，州東，少北。元至正四年置，屬府。正德九年改屬州。舊治在趙口坪，洪武中，徙於今治。東有得漢山。南有巴江。又有宕水，在縣西壁山下，亦曰諸水，流入巴江。東北有濛壩，北有羊圈山，二巡檢司。又東北有桐柏關，相對樛林關。

南江，州北。正德十一年置。北有兩角山。南有雞江，源出南鄭縣米倉山，下流入巴江。西北有大壩，巡檢司。

順慶府，元順慶路。洪武中，爲府。領州二，縣八。西南距布政司六百里。

南充，倚。北有北津渡，縣舊治也。洪武中，徙今治。南有清居山。西有大、小方山。東有嘉陵江。西有曲水，又有流溪水，東有清水溪，又有大斗溪，俱流注於嘉陵江。又西有昆井，產鹽。府境州縣多鹽井。北有北津渡，巡檢司。

西充，府西北。洪武十年五月省入南充縣。十三年十一月復置。南有南岷山，上有九井、十三峯。西有西溪，卽流溪也。

蓬州，元屬順慶路。洪武中，以州治相如縣省入。東南有雲山。西有嘉陵江。東北有巴江。西南距府百四十里。領縣二。

營山州東，少北。洪武十年五月省入蓬州。十三年十一月復置。東北有大、小蓬山。東有巴江。

儀隴州北，少東。洪武十年五月省入蓬州。十三年十一月復置。西有伏虞山。北有金城山，一名金粟山。東有

巴江。北有龍水，流入嘉陵江。

廣安州元廣安府，屬順慶路。洪武四年降爲州，來屬。十年五月以州治渠江縣省入。東北有篆

江，卽巴江，合渠江之下流也。江中有三十六灘，亦名洄水。又北有濃水，南流合於環水，至州南合洄水，并注合州

之嘉陵江。西北距府二百十里。領縣四。

岳池州西北。東有岳池水。

渠州東北。元渠州，屬順慶路。至元二十六年五月省州治流江縣入焉。洪武九年四月降爲縣。東北有八濛山。

東有宕渠山，有渠江，下流合巴江。又北有衛渠關，正德中置。

鄰水州東，少南。成化元年七月置。東南有鄰山，產鐵。有鄰水，下流入大江，縣以此名。

大竹州東，少北。元屬渠州。洪武九年來屬。西有九盤山。東有東流溪，下流合於渠江。

夔州府元夔州路，屬四川南道宣慰司。洪武四年爲府。九年四月降爲州，屬重慶府。十年五月直

隸布政司。十三年十一月復爲府。領州一，縣十二。西距布政司千九百里。

奉節倚。洪武九年四月省。十三年十一月復置。東北有赤甲山。東有白帝山，又有白鹽山。南濱江。東出爲瞿

唐峽，峽口曰灩澦堆。又西有南鄉峽、虎鬚灘，東有龍脊灘，皆江流至險處。又東有大瀼水、東瀼水，俱流入江。南有尖山，又有金子山二巡檢司。又東有瞿唐關。東南有江關。南有八陣磧，磧旁有鹽泉。

巫山府東。東有巫山，亦曰巫峽，大江經其中，東入湖廣巴東縣界。東有大寧河，又有萬流溪，皆流入大江。

大昌府東。洪武十三年十一月置。西有千頃池。又有當陽鎮巡檢司。

大寧府東北。元大寧州。洪武九年降爲縣。北有寶源山，有石穴，鹽泉出焉。又有馬連溪，亦曰昌溪。東北有袁溪巡檢司。北有青崖關。

雲陽府西。元雲陽州。洪武六年十二月降爲縣。南濱江。東有湯溪，源自湖廣竹山，流經此，至奉節湯口入江。西有檀溪，上承巴渠水，入於湯水。北有鹽井。又西北有五溪，北有鐵檠二巡檢司。

萬府西，少南。元萬州。洪武六年十二月降爲縣。南濱江。西有苧溪。東有彭溪。又西有武寧縣，洪武四年省，有武寧巡檢司。又西南有銅羅關巡檢司。又西北有西柳關。

開府西，少北。元開州。洪武六年八月置，九月降爲縣。南有開江，彭溪之上流，有清江自縣東流合焉，亦曰疊江。又南有墊江，一名濁水，亦合流於開江。

梁山府西。元梁山州，治梁山縣。洪武六年十二月省州，存縣。十年五月改屬忠州，後來屬。北有高梁山，又有高都山。西南有桂溪，南有蟠龍溪，下流俱入於江。

新寧元屬達州。洪武三年改屬重慶府。十年五月省入梁山縣。十三年十一月復置，來屬。東有霧山，開江出焉。



又東有豆山關。

建始府東南。元屬施州。洪武中來屬。西有石乳山，產麝金，上有石乳關，與湖廣施州衛界。南有清江，自施州衛流入，又東入湖廣巴東縣界。

達州元治通川縣。洪武九年四月降爲縣，省通川縣入焉。正德九年復升爲州。西有石城山。東有渠江，通川江之下流，西南入渠縣界，合於巴江，中有南昌灘，有土副巡檢司。又西有鐵山關。東北有深溪關。

東南距府八百里。領縣二。

東鄉州東，少北。成化元年七月置。通川江在城東。

太平州東北。正德十年析東鄉縣地置。東北有萬頃池，渠江、通川江出焉，下流爲渠江。北有北江，又北入陝西紫陽縣界，名任河，入於漢江，東北有明通巡檢司。

重慶府元重慶路，屬四川南道宣慰司。洪武中，爲府。領州三，縣十七。西北距布政司五百五十里。

巴倚。東有塗山。大江經城南，又東經明月峽，至城東，與涪江合。西北有魚鹿峽，涪江所經。東南有丹溪，東北有交龍溪，俱流入大江。東有大紅江巡檢司。西有佛圖關。西南有二郎關。東有銅鑼關。又南有南坪關。

江津府西南。北濱大江。東南有雙溪口，雙溪入江處，有清平巡檢司。

壁山 成化十九年三月析巴縣地置。大江在南。涪江在北。又北有壁山巡檢司。

永川府西，少南。洪武六年十二月置。

榮昌府西，少南。洪武六年十二月置。西有雒江，即中水。西北有昌寧縣，明玉珍置，洪武七年省。

大足 明玉珍置，屬合州。洪武四年改屬府。東有米糧關。北有化龍關。

安居 成化十七年九月析銅梁、遂寧二縣地置。東有安居溪，一名瓊江，下流入涪江。

綦江府南，少東。元綦江長官司，屬播州。明玉珍改爲縣。洪武中來屬。南有綦江，即燹溪之上流，一名東溪，

有東溪巡檢司，後徙縣南之趕水鎮。又南有三溪渡，有綦市關。

南川府東南。洪武十年五月省入綦江縣。十三年十一月復置。南有南江，北流爲綦江，中有龍牀灘，在縣北。又

東有四十八渡水，流入南江。又南有馬頸關、雀子崗關。北有冷水關。

長壽府東，少北。洪武六年九月置，屬涪州，尋改屬府。北濱大江。南有樂溫山，下有樂溫灘，大江所經。又東

有桃花溪。

黔江府東。元屬紹慶府。洪武五年十二月省入彭水縣。十一年九月置黔江守禦千戶所。十四年九月復置縣，來

屬。南有黔江，源出貴州思州府界，正流自涪江合大江，支流經此，下流爲湖廣施州衛之清江。又東有石勝關，

又有石牙關。西有白巖關。東南有老鷹關，與湖廣施州界。

合州府北。元治石照縣。明玉珍省縣入焉。東有釣魚山，嘉陵江經其北，涪江經其南。又東北有嘉渠口，嘉陵江與

渠江合流處，經城東南，涪江自西流合焉，亦曰三江口，并流而南，入於大江。南距府百五十里。領縣二。

銅梁州南。北有涪江。

定遠州北。有舊城。今城本廟兒壩，嘉靖三十年徙此。東有武勝山。西南有涪江。東有嘉陵江。

忠州府東。元治臨江縣。洪武中，以縣省入。南濱大江，江中有倒鬚灘，西北有鳴玉溪流入江。西有臨江巡

檢司。西距府八百里。領縣二。

豐都州西南。元曰豐都。洪武十年五月省入涪州。十三年十一月復置，曰豐都。南濱大江，有葫蘆溪自西南流入焉。東南有南賓縣，洪武中省。又有沙子關巡檢司。

墊江州西，少北。明玉珍置，屬州。南有高灘溪，西南入長壽界，爲桃花溪。

涪州大江自長壽縣流入，東逕黃草峽，又東逕鐵櫃山，又東逕州城北，遠城而東，又南有涪陵江流合焉，江口有銅柱灘。又東南有清溪關。西南有白雲關。又西有陽關。西距府四百三十里。領縣二。

武隆州南。元曰武龍。洪武十年五月省入彭水縣。十三年十一月復置，曰武隆。西南有涪陵江，亦曰黔江，亦曰巴江。

彭水州南。元紹慶府治此，屬四川南道宣慰司。洪武四年，府廢，改屬重慶府。洪武十年五月來屬。東有伏牛山，山左右有鹽井。城西有涪陵江。又東南有水德江，源自貴州思南流入涪陵江。東南有天池關。東北有亭子關。

遵義軍民府 元播州宣慰司，屬湖廣行省。洪武五年正月改屬四川。十五年二月改屬貴州都司。二十七年四月改屬四川布政司。萬曆二十九年四月改置遵義軍民府。領州一，縣四。西北距布政司千七百里。

遵義倚。元播州總管。洪武五年正月改爲播州長官司。萬曆二十九年四月改縣，與府同徙治白田壩，在故司城之西。北有龍岩山。其東爲定軍山，又有大樓山，上有太平關，亦曰樓山關。又東有烏江，源自貴州水西，卽涪陵江上源，中有九接灘，其南有烏江關。又東南有仁江，東有湘江、洪江，皆流合於烏江。又西南有落闔水，東有樂安水，亦俱流入焉。又東南有河度關。西南有老君關。又東有三度關。西有落濛關。西北有崖門關、黑水關。北有海龍岡，有白石口隘。

桐梓府東。萬曆二十九年四月以舊夜郎縣望草地置。北有燹溪，源出山箐，綦江之上流。

眞安州 元珍州思寧長官司。明玉珍改眞州。洪武十七年置眞州長官司。萬曆二十九年四月改置。南有芙蓉江，自烏江分流，東北入於黔江。又有三江，東南流合於虎溪，亦注於黔江。西南距府二百里。領縣二。

綏陽府東北。萬曆二十九年四月以舊綏陽縣地置。東有水德江，亦曰涪江，亦曰小烏江，流入彭水縣界。

仁懷州西。萬曆二十九年四月以舊懷陽縣地置。東南有芙蓉江，西南有仁水，其下流俱注於烏江。

敘州府 元敘州路，屬敘南等處蠻夷宣撫司。至元二十三年正月降爲縣。洪武六年六月置府。領州一，縣

九。北距布政司千二百里。

宜賓倚。弘治四年八月建申王府，未之國，除。西有朱提山，舊產銀。西南有石城山。又西北有朝陽崖，大江經其下，又東經城東南，馬湖江來合焉。又西南有石門江，俗呼橫江，北入馬湖江。又東南有黑水，一名南廣溪，北入江。又西北有宣化縣，洪武中省，有宣化巡檢司。又西南有橫江鎮巡檢司。又南有摸索關。

南溪府東。東濱大江，中有石筍灘，在縣西。又有銅鼓灘，在縣東。又南有青衣水，流入大江。

慶符府南。洪武十年五月省入宜賓縣。十三年十一月復置。南有石門山，石門江經其下。又西北有馬鳴溪，流入馬湖江。

富順府東北。元富順州。洪武中，降爲縣。西南有虎頭山。東有金川，亦曰中水，卽雒江也。又西有榮溪，東有鼇溪，俱流合焉。又西有鹽井。東有趙化鎮巡檢司。

長寧府東南。元長寧軍，屬馬湖路。泰定二年十月改爲州。洪武五年降爲縣。治東西有二溪，並冷水溪，三溪合流入大江，曰三江口。又東出虞公峽，曰清溪，亦曰武寧溪，其下流入於大江。又治北有清井，產鹽。東有梅洞堡巡檢司。

興文府東南。元戎州，屬馬湖路。洪武四年降爲縣，來屬。萬曆二年二月改曰興文。南有南壽山，又有思早江，

又東有水車河，俱流入清溪。西有武寧城，萬曆二年二月築，置建武守禦千戶所於此。所南有九絲城，所東南有李子關。縣東北有板橋巡檢司，後遷兩河口，仍故名。

隆昌府東北。本富順縣隆橋馬驛。隆慶元年置縣，析榮昌、富順二縣及瀘州地屬之。西南有維江。

高州元屬敘南宣撫司。洪武五年降爲縣，屬府。正德十三年四月復爲州。舊治懷遠寨。正德十三

年遷治中壩。東有復寧溪，卽黑水之上流。南有江口巡檢司。北距府百五十里。領縣二。

筠連州西。元筠連州，治騰川縣，屬永寧路，尋廢縣存州。洪武四年降州爲縣，屬敘州府。六年十二月改屬綿州，

尋仍屬敘州府。十年五月省入高縣。十三年十一月復置，仍屬敘州府。正德十三年四月來屬。西有定川溪，下流與清溪合。東南有三岔巡檢司。

珙州東。元下羅計長官司，屬敘南宣撫司。明玉珍改爲珙州。洪武四年降爲縣。十年五月省入高縣。十三年十一月復置，屬府。正德十三年四月來屬。西南有珙溪，下流入清溪。南有鹽水壩巡檢司，後遷歇馬堡，仍故名。

龍安府元龍州，屬廣元路。明玉珍置龍州宣慰司。洪武六年十二月復置龍州。十四年正月改松潘等

處安撫司。二十年正月仍改爲龍州。二十二年九月改龍州軍民千戶所。二十八年十月升龍州軍民指揮使司，後復曰龍州。宣德七年改龍州宣撫司，直隸布政司。嘉靖四十五年十二月改曰龍安府。領縣三。南距布政司四百八十里。

**平武**倚。本名寧武，萬曆十八年四月置，後更名。州舊治在江油縣界之雍村。洪武六年徙於青州所。二十二年又徙於盤龍壩箭樓山之麓，卽今治也。東南有馬盤山，又有石門山。東有涪江，有青川溪，下流合白水，入嘉陵江。西北有胡空關，〔巴〕又有黃陽關。東有鐵蛇關，西有大魚關，羊昌關、和平關，俱永樂中置。又東有棧閣，道出陝西文縣。又西有永濟橋，鐵索爲之，達松潘衛。又東有青川守禦千戶所，洪武四年十月以舊青川縣置，屬四川都司。嘉靖四十五年十二月來屬。所東有白水江。東北有明月關巡檢司。南有杲陽關。北有北雄關，接陝西文縣界。又有控夷關，萬曆中置。

**江油**府東南。元省。明玉珍復置。洪武十年五月省入梓潼縣。十三年十一月復置，屬劍州。嘉靖四十五年十二月來屬。西有大匡山，與彰明縣界。東北有寶圖山。北有涪水，水上有涪水關。

**石泉**府西南。元屬安州。洪武中，州廢，改屬成都府。嘉靖四十五年十二月來屬。北有三面山，龍安水出焉。又東有湔水，東至江陽入江，有馬坪口巡檢司。北有松嶺關。西有石板關。東有奠邊關。東北有大方關。西北有上雄關。

**馬湖**府元馬湖路，屬敘南宣撫司。洪武四年十二月爲府。領縣一，長官司四。東北距布政司千一百里。

**屏山**倚。本泥溪長官司，洪武四年十二月置。萬曆十七年三月改縣。西有雷番山。南有馬湖江，其上源自黎州

西徼外流入界，至此合金沙江，經府城東入宜賓縣界。中有結髮灘、鐵鎖灘、雞肝石灘，俱在府西。又有馬湖，湖在山頂，亦曰龍湖。東有悔泥溪巡檢司。又東有龍關。西有鳳關。又北有新鄉鎮，萬曆十七年三月建城，置戍焉。

平夷長官司府西。洪武四年十二月置。舊治在司東。萬曆中，移於今治。南有馬湖江，又南有大汶溪，東有小汶溪，俱流合焉。

蠻夷長官司府西，少南。洪武四年十二月置。南濱馬湖江，西有什葛溪，東有大鹿溪，俱流合焉。南有戎寧巡檢司。

沐川長官司府西，少北。元置。洪武四年十二月改爲州，尋復。北有沐川，下流入大江。東有芭蕉溪，下流入馬湖江。

雷坡長官司府西南。洪武四年十二月置。二十六年省。

鎮雄府元芒部路，屬雲南行省。洪武十五年正月爲府。十六年正月改屬四川布政司。十七年五月升爲軍民府。嘉靖五年四月改府名。萬曆三十七年五月罷稱軍民府。北有樂安山，與敘州府界。又西有白水，亦曰八匡河，源出烏撒界，流經此，境內諸川俱流入焉，下流至敘州府入大江。又南有苴斗河，下流入烏撒之七星關河。又北有鹹泉二，俱產鹽。有益良州、強州，元俱屬芒部路，洪武十七年後廢。又有阿頭、易



溪、易娘三蠻部，元屬烏撒路，洪武十五年三月屬芒部府。十七年又改阿頭部爲阿都府，屬四川布政司。後俱廢。南有阿赫關，與烏撒界。領長官司五。北距布政司千五百八十里。

白水江，欽、酬、長、官司，正德十六年十一月置。

懷德長官司，府西。本却佐寨。

威信長官司，府南。本母響寨。

歸化長官司，府西南。本夷良寨。

安靜長官司，府西北。本落角寨。四司，俱嘉靖五年四月改置。

烏蒙軍民府，元屬蒙路，後至元元年九月屬四川行省。洪武十五年正月爲府，屬雲南布政司。十六年

正月改屬四川布政司。十七年五月升爲軍民府。西有涼山。北有界堆山，與敘州府界。西南有金沙

江，下流合於馬湖江。南有索橋，金沙江渡處。北有羅佐關。〔毛〕有歸化州，洪武十五年三月置，屬府，尋廢。東北距

布政司千三百里。

烏撒軍民府，元屬撒路，〔凸〕後至元元年九月屬四川行省。洪武十五年正月爲府，屬雲南布政司。十六

年正月改屬四川布政司。十七年五月升爲軍民府。西有盤江，出府西亂山中，經府南爲可渡河，入

貴州畢節衛界。有可渡河巡檢司。又西有趙班巡檢司。又有阿赫關、鄔撒二巡檢司。東南有七星關。東有老鴉關，又有善欲關，皆與貴州畢節衛界。又南有倘唐驛，路出雲南霑益州。東北距布政司千八百五十里。

東川軍民府 元東川路，屬雲南行省。 洪武十五年正月爲府。十七年五月升爲軍民府，改屬四川布政司。二十一年六月廢。二十六年五月復置。西南有馬鞍山，府舊治在焉。尋移治萬額山之南。又西南有絳雲弄山，接雲南祿勸州界，下臨金沙江。又東南有牛欄江，自雲南尋甸府流入，至府北合金沙江。有藤索橋，在東北牛欄江上。東北距布政司千四百里。

潼川州 元潼川府，直隸四川行省。 洪武九年四月降爲州，以州治鄭縣省入，〔七〕直隸布政司。北有涪江，南有中江流合焉。又西南有鄆江，有鹽井。西南距布政司三百里。領縣七。

射洪州南。 洪武十年五月省入鹽亭縣。十三年十一月復置。東有涪江。又東南有射江，亦曰瀾江，亦曰梓潼水，自鹽亭縣流入，經縣東南之獨坐山，合於涪江。又東南有沈水，亦入涪江。有鹽井。

中江州西。 洪武十年五月省入州。十三年十一月復置。西南有可蒙山、銅官山，南有賴應山、私鎔山，俱產銅。東南有中江，南有鄆江，有鹽井。

鹽亭州東，少北。北有紫金山。南有梓潼水。東有鹽亭水，自劍州南境流入，亦謂之瀾江。城東有鹽井。

遂寧州東南。元遂寧州。明玉珍省州治小溪縣入焉。洪武九年四月降州爲縣。東有銅盤山，又有涪江，北有鄆江流入焉，謂之鄆口。西有倒流溪，有鹽井。

蓬溪州東南。元屬遂寧州。洪武十年五月省入遂寧縣。十三年十一月復置，徙治故城之西南。西有明月山，下爲明月池。又有伏龍山，下有火井。北有蓬溪，下流合於涪江，有鹽井。

安岳州南。洪武四年於縣置普州。九年，州廢。西有岳陽溪，下流合於涪江，有鹽井。

樂至州南，少西。成化元年七月置，屬州。正德九年改屬簡州。嘉靖元年四月還屬。有鹽井。

眉州元屬嘉定府路。洪武九年四月降爲縣，仍屬嘉定州。十三年十一月復爲州，直隸布政司。

東有墓頭山，西面臨江，下爲墓頭津。南有峨眉山。東有玻璃江，卽大江也。南有思濛江，西南有金流江，一名難江，下流俱入大江。東南有魚耶鎮巡檢司。北距布政司百八十里。領縣三。

彭山州北。洪武十年五月省入眉縣。十三年十一月復置。東有彭亡山，亦曰平無山，俗呼爲平模山。北有天社山。南有打鼻山。東北濱大江，內江自雙流縣流入焉，卽牧馬川也，合流而南，亦曰武陽江，江中有鼓樓灘。又有赤水，亦自東北流入大江。

丹稜州西。洪武六年十二月置，屬嘉定府。十年五月省入眉縣。十三年十一月復置，來屬。東南有青衣水，源出廬山縣，流經此，下流至嘉定州入大江。

青神州南。洪武十年五月省入嘉定州。十三年十一月復還屬。西有熊耳山，青衣水經其下。又東有大江。東南有松柏灘。東有犁頭灣巡檢司。

邛州元屬嘉定府路。洪武九年四月降爲縣，仍屬嘉定州。成化十九年二月復爲州，直隸布政

司。西有古城山，產鐵。又東南有銅官山，產銅。西有相臺山，下有火井，又有鹽井。南有邛水，自雅州流入，至新津縣入大江。南有夾門關巡檢司。西有火井壩巡檢司，後移於州南二十五里。東北距布政司三百里。領縣二。

大邑州北，少東。洪武十年五月省入邛縣。十三年十一月復置，屬嘉定州。成化十九年二月還屬。西北有鶴鳴山，與崇慶州界。東有牙江，下流入邛水。

蒲江州東南。元省入州。洪武六年十二月復置，屬嘉定府。成化十九年二月還屬。南有蒲水，源出名山縣，流經此，東入邛州界。西有雙路巡檢司。

嘉定州元嘉定府路。洪武四年爲府。九年四月降爲州，以州治龍遊縣省入，直隸布政司。東有三龜山。又有九頂山。大江在城東，亦曰通江。又西有陽江，卽大渡河，自峨眉縣流入，經城東烏尤山下，合於大江。又西南有青衣水，至城西雙湖，與陽江合。東南有金石井巡檢司，後廢。北距布政司二百六十里。領縣六。

峨眉州西。西南有峨眉山，有大峨、中峨、小峨，羅目江出焉。陽江在縣南，自黎州所夷界流入，與羅目江合。又西南有中鎮巡檢司，後徙治大圍山。又有土地關，接蠻界。

夾江州西北。西有青衣水，又有洪雅川，合焉。

洪雅州西北。元省入夾江。成化十八年五月復置。西北有青衣水。西有洪雅川。又有竹箐山巡檢司。

犍爲州東南。舊治玉津鎮。今治懲非鎮，洪武中徙此。東有大江。東北有四望溪流入焉。有四望溪口巡檢司。

又北有石馬關巡檢司。

榮州東。本榮州。洪武六年十二月置。九年四月降爲縣。東有榮川水，有甕溪關、飛水關，俱洪武間置。又有大坪隘口，成化十二年八月置。

威遠州東。洪武六年十二月置，屬嘉定府。十年五月省入榮縣。十三年十一月復置。

瀘州元屬重慶路。洪武六年直隸四川行省。九年直隸布政司。舊治在州東茜草壩。洪武中，徙此。城西有寶山。西南有方山。大江在東，一名瀘江，又名汶江，資水自州北來合焉，亦曰中江。又有瀘州衛，洪武二十一年十月置於州城，成化四年四月徙於州西南之渡船舖。南有石棚鎮、北有李市鎮、二巡檢司。又有江門、水流崖、洞掃等關堡，俱成化四年四月置。又南有龍透關，崇禎間修築。西北距布政司千五百五十里。領縣三。

納溪州西南。北濱大江，城西有納溪水，自蕃部西南流合焉。有納溪口巡檢司。南有倒馬關、石虎關，俱通雲南、

交趾路。

江安州西，少南。北濱大江，有綿水西南流入之，謂之綿水口。又南有清溪，又有涇灘，俱流合於綿水。有板橋巡檢司。

合江州東，少北。舊治在神臂山南。洪武初徙安樂山之麓，卽今治也。又南有榕山，俗名容子山。北濱大江，西有之溪、北溪入焉，因謂之合江。又南有安樂溪，西北流入江安縣。

雅州元屬陝西行省吐蕃宣慰司。洪武四年以州治嚴道縣省入，直隸布政司。東有蔡山，一名周公山，其

下有經水，一名周公水。又東南有榮水，一名長潰河，又有小溪，一名百丈河，至州界，俱合流於青衣江。北有金雞關。

東北有金沙關。東北距布政司四百五十里。領縣三。

名山州東北。洪武十年省入州。十三年十一月復置。東北有百丈山，旁有百丈縣，元屬州，洪武中省。西有蒙山。南有青衣江。

榮經州西南。明玉珍省入嚴道縣。洪武中復置。東北有銅山。東有邛崃山，與黎州所界，上有九折坂。西有大關山，邛崃關在焉。北有長潰河，南有周公水，並流入州界。西北有紫眼關，地接西番。又有礪門砦，亦曰和川鎮，元置礪門安撫司。洪武五年設礪門百戶所於此，其地與天全界。

蘆山州西北。元曰瀘山，後省。洪武六年十二月復置，改爲蘆山。東有廬山，青衣水出焉。南有三江渡，其水經

多功峽，下流入平羌江。西北有臨關，舊曰靈關，正統初更名。有臨關巡檢司。又南有飛仙關。

永寧宣撫司元永寧路。洪武七年爲永寧長官司。八年正月升宣撫司。天啓三年廢，地屬敘

州府。故城在西。洪武十五年遷於今治。東南有獅子山。西北有青山。南有永寧河，東北流經瀘州境，入於大江。

又東南有赤水河。東有魚浮關，洪武四年置。領長官司二。距布政司千八百里。

九姓長官司司城西南。元九姓羅氏黨蠻夷長官千戶。洪武六年十二月改置。天啓六年改屬瀘州。南有通江

溪，東北會於納溪之江門峽。西南有金鵝池。

太平長官司元大壩軍民府，洪武中廢。成化四年四月改置。

天全六番招討司元六番招討司。洪武六年十二月改置，直隸四川布政司。二十一年二月改隸

都司。東有多功山。南有和水，一名始陽河，亦名多功河，流入雅州青衣江。又西番境內有可跋海，其下流合雲南樣

備水，流入交趾。又禁門關、紫石關亦俱在司西。又東有善所、張所、泥山、天全、思經、樂藹、始陽、樂屋、在城、靈關

凡十百戶所。東距布政司五百五十里。

松潘衛元松州，屬雲南行省。洪武初，因之。十二年四月兼置松州衛。十三年八月罷衛。未幾，

復置衛。二十年正月罷州，改衛爲松潘等處軍民指揮使司，屬四川都司。嘉靖四十二年

罷軍民司，止爲衛。東有雪欄山，上有關。南有紅花山。西北有甘松嶺。又北有大、小分水嶺。西有岷江，自陝

西洮州衛流經此，亦曰潘州河。又東有涪江，出小分水嶺，東南流，入小河所界。北有潘州衛，洪武中，以故潘州置。二十年省入。又西有鎮夷關，永樂四年七月置。又西北有流沙關。又東有望山、雪欄、風洞、黑松林、三舍、小關子關。南有西寧、歸化、安化、新塘、北定、浦江六關。又有平夷關，萬曆十四年置。又南爲鎮平關。又西北有漳臘堡，洪武十一年置。領千戶所一，長官司十六，安撫司五。東南距布政司七百六十里。

小河守禦千戶所宣德四年正月置。北有師家山，一名文山，山麓有文山關。南有小河，卽涪水也，東流入龍安府界，有鐵索橋跨其上。

占藏先結簇長官司

蠟匠簇長官司

白馬路簇長官司

山洞簇長官司

阿昔洞簇長官司

北定簇長官司

麥匝簇長官司

者多簇長官司

牟力結簇長官司



班班簇長官司

祈命簇長官司

勒都簇長官司

包藏先結簇長官司 以上十三司，俱洪武十四年正月置。

阿用簇長官司 宣德十年五月置。

潘幹寨長官司 正統五年七月置。

別思寨長官司 宣德十年五月置。

八郎安撫司 永樂十五年二月置。

麻兒匝安撫司 宣德二年三月，以阿樂地置。

阿角寨安撫司

芒兒者安撫司 二司，俱正統五年七月置。

思曩日安撫司 正統十一年七月置。

疊溪守禦軍民千戶所 本疊溪右千戶所，洪武十一年以古翼州置，屬茂州衛。二十五年改置，直隸都司。南有排柵山。西有汶江，南有黑水流合焉，謂之翼水。又南有南橋、中橋、徹底三關，北有永鎮橋關、鎮平關，西有疊溪橋關，東有小關，俱洪武十一年置。領長官司二。東南距布政司五百八十里。

疊溪長官司 所城北。

鬱卽長官司 所城西。俱永樂元年正月置。

黎州守禦軍民千戶所 本黎州長官司，洪武九年七月置。十一年六月升安撫司，直隸布政司。萬曆二十四年降爲千戶所，直隸都司。東北有聖鍾山，下有黎州，元屬陝西行省吐蕃宣慰司。洪武五年省州治漢源縣入州。永樂後廢。西北有飛越山，兩面皆接生羌界。西南有大田山，東麓爲大田壩，萬曆二十四年立黎州土千戶所於此。又東有冲天山。南有避瘴山。西北又有筭箕山。南有大渡河，卽古若水。洪武十五年六月置大渡河守禦千戶所，後徙司城西北隅。又西南有漢水，源出飛越山之仙人洞，亦曰流沙河，下流至試劍山，入大渡河。河南卽清溪關，與建昌行都司界。西有黑崖關，洪武十六年置。又有椒子關，路通長河西等處。東北距布政司六百九十里。

平茶洞長官司 元溶江 芝子 平茶等處長官司。洪武八年正月置，屬西陽宣撫司。十七年直隸布政司。西有百歲山。峭溪出於其東，滿溪出於其西，合流入買賽河。北距布政司千六百七十里。

溶溪芝蔴子坪長官司 元溶江 芝子 平茶等處長官司。洪武八年改置，屬湖廣思南宣慰司。十七年

五月直隸四川布政司。

安寧宣撫司 成化十三年二月置，領長官司二。

懷遠長官司

## 宣化長官司

俱成化十三年二月，與宣撫司同置。

酉陽宣慰司 元酉陽州，屬懷德府。明玉珍改沿邊溪洞軍民宣慰司。洪武五年四月仍置酉陽州，兼置酉陽宣慰司，州尋廢。八年正月改宣慰司爲宣撫司，屬四川都司。永樂十六年改屬重慶衛。  
天啓元年升爲宣慰司。東南有酉水，流合平茶水，至湖廣辰州府合流於江，有寧俊江巡檢司。西北距重慶府四百九十里。領長官司三。

石耶洞長官司 司東南。元石耶軍民府。洪武八年正月改爲長官司。

邑梅洞長官司 司南。元佛鄉洞長官司。明玉珍改邑梅沿邊溪洞軍民府。洪武八年正月改置。北有凱歌河，一名買賽河，自貴州平頭著可司流入，東入酉陽司界。

麻兔洞長官司 洪武八年正月置。

石砭宣慰司 〔元〕石砭軍民宣撫司。明玉珍改安撫司。洪武八年正月爲宣撫司，屬重慶衛。嘉靖四十二年改屬夔州衛。  
天啓元年升爲宣慰司。東有石砭山。又有三江溪，卽葫蘆溪之上流也。西南距夔州府七百五十里。

四川行都指揮使司 元羅羅蒙慶等處宣慰司，治建昌路，屬雲南行省。洪武十五年罷宣慰司。二十

七年九月置四川行都指揮使司。治建昌衛。領衛五，所八，長官司四。東北距布政司千四百八十里。

建昌衛軍民指揮使司元建昌路，屬羅羅蒙慶宣慰司。洪武十五年正月爲府，屬雲南布政司，兼置

衛，屬雲南都司。十月，衛府俱改屬四川。二十五年六月，府廢，升衛爲軍民指揮使司。

二十七年九月來屬。領守禦千戶所四，長官司三。南有瀘水，流入金沙江。又北有長河，南有懷遠河，

西南有寧遠河，下流俱合於瀘水。又東有建安州、永寧州，又東有里州，東南有關州，西南有瀘州、隆州，元俱屬建昌

路，洪武十五年三月俱屬建昌府。東有北社縣，元屬永寧州，洪武十五年三月因之，尋改爲碧舍縣。又西有德州，元

屬德昌路，洪武十五年三月屬德昌府。二十七年後，府州縣俱廢。又有建昌前衛指揮使司，洪武二十七年六月置，與

建昌軍民衛同城，九月屬四川行都司，萬曆三年省。又東有建昌土衛，洪武十五年置，萬曆後廢。北有瀘沽巡檢司，

卽故瀘沽縣也。又南有麻刺巡檢司。又西南有打冲河、東南有白水、東有龍溪三巡檢司，後廢。又東北有老君關，有

太平關。東南有甸沙關。又有金川堡。

### 守禦禮州後千戶所

守禦禮州中千戶所衛北。元禮州，屬建昌路。洪武十五年三月屬建昌府，兼置二守禦所，屬衛。二十七年

後，州廢。北有瀘沽縣，元屬禮州，洪武十五年三月因之，亦二十七年後廢。

守禦打冲河中前千戶所衛西。洪武二十七年二月置。西有打冲河，蠻名黑惠江，一名納夷江，源出吐蕃，下流

入金沙江。東北有水砦關。南有天星砦。

守禦德昌千戶所衛南。洪武十五年置。南有德昌路，元屬羅羅蒙慶宣慰司，洪武十五年三月爲府，屬雲南布政司，十月改屬四川布政司，二十七年後廢。

昌州長官司衛南。元屬德昌路。洪武十五年三月屬德昌府。永樂二年七月改置。

威龍長官司衛東南。元威龍州，屬德昌路。洪武十五年三月以「龍」爲「隆」，屬德昌府。永樂二年七月改置。

普濟長官司衛西南。元普濟州，屬德昌路。洪武十五年三月屬德昌府。永樂二年七月改置。

寧番衛軍民指揮使司元蘇州，屬建昌路。洪武十五年三月屬建昌府。二十一年十月兼置蘇州

衛，屬四川都司。二十五年六月，州廢，升衛爲軍民指揮使司。二十六年三月更名，屬四

川都司。二十七年九月來屬。南有南山，產銅。東有長河，亦名白沙江，南流會於瀘水。又有中縣，元屬建

昌路。洪武十五年三月改屬永寧州。十七年改屬蘇州，後廢。又有沙陀關、羅羅關、九盤關。南有烏角關。北有

北山關。又西有定番堡，萬曆十五年置。南距行都司百九十里。領千戶所一。

守禦冕山橋後千戶所衛東。正統七年以冕山堡置。東有東河，與瀘沽河合，下流入金沙江。北有冕山關。

越嶲衛軍民指揮使司 洪武二十五年七月置，屬四川都司。二十七年九月來屬。西有阿露山，

亦曰大雪山。北有大渡河，與黎州界。又有魚洞河，南有羅羅河，合流入大渡河。又北有青岡關，有海棠關，有曬經

關。南有小相公嶺關。西北有刺伯關。南距行都司百九十里。領千戶所一，長官司一。

鎮西後千戶所 衛北。弘治中置。

邛部長官司 衛東。元邛部州，屬建昌路。洪武十五年三月屬建昌府，二十七年四月升軍民府，後仍爲州，屬越嶲。永樂元年五月改爲長官司。東有平夷、歸化二堡，萬曆十五年開部夷地增置。

鹽井衛軍民指揮使司 元柏興府，治閬鹽縣，屬羅羅蒙慶宣慰司。洪武十五年三月屬雲南布政司。二十四年二月降爲州，省閬鹽縣入焉。二十六年六月，州廢，置衛，屬四川都司。二十七年九月來屬。南有柏林山。西有斛樊和山，產金。又西有鐵石山，出磐石。東北有打冲河，上有索橋。西有雙橋河，東有越溪河，俱流入打冲河。又治東有鹽井。北有金縣，元屬柏興府，洪武十五年三月因之，十七年後廢。又東有雙橋關。西有古德關。東南距行都司三百里。領千戶所一，長官司一。

打冲河守禦中左千戶所 衛東北。洪武二十五年置。

馬刺長官司 衛南。永樂初置。

會川衛軍民指揮使司 本會川守禦千戶所，洪武十五年置，屬建昌衛。二十五年六月升軍民千戶所。十一月升會川衛軍民指揮使司，屬四川都司。二十七年九月來屬。東南有土田山，產石碌，有葛砧山，產石青。東有密勒山，產銀礦。西南有金沙江，自雲南武定府流入界。又西有瀘水，南入焉。南有瀘沽河，亦流入焉。又南有搭甲渡巡檢司。東南有瀘津關。南有迷郎關，又有松坪關。西有永昌關，有大龍關。北有甸沙關，接建昌衛界。有會川路，元屬羅羅蒙慶宣慰司。洪武十五年三月爲府，屬雲南布政司。十月改屬四川。

布政司。二十六年四月，府廢。墮其城。二十七年四月復置府，後復廢。又西有永昌州，南有武安州，又有黎漢州，元俱屬會川路，洪武十五年三月俱屬會川府，十月俱改爲縣，二十四年二月復俱爲州。東南有姜州，元屬建昌路，又有會理州，元屬會川路，洪武十五年三月俱改屬東川府。北有麻龍州，元屬會川路，洪武十五年三月改屬東川府。又有麻龍縣，洪武十七年改屬麻龍州。二十七年後，府州縣俱廢。西北距行都司五百里。領千戶所一。守禦迷易千戶所〔九〕衛西北。洪武二十五年閏十二月置。

江西 禹貢揚州之域。元置江西等處行中書省。治龍興路。太祖壬寅年正月因之。正月治吉安府。二月還治洪都。洪武三年十二月置江西都衛。與行中書省同治。八年十月改都衛爲都指揮使司。九年六月改行中書省爲承宣布政使司。領府十三，州一，縣七十七。爲里九千九百五十六有奇。北至九江，與江南、湖廣界。東至玉山，與浙江界。南至安遠，與福建、廣東界。西至永寧，與湖廣界。距南京一千五百二十里，京師四千一百七十五里。洪武二十六年編戶一百五十五萬三千九百二十三，口八百九十八萬二千四百八十二。弘治四年，戶一百三十六萬三千六百二十九，口六百五十四萬九千八百。萬曆六年，戶一百三十四萬一千五百，口五百八十五萬九千二十六。

南昌府 元龍興路，屬江西行省。太祖壬寅年正月爲洪都府。癸卯年八月改南昌府。領州一，縣七。

南昌倚洪武十一年建豫王府。二十五年改爲代王，遷山西大同。永樂初，寧王府自大寧衛遷此，正德十四年

除。故城在東。今城，明太祖壬寅年改築。東湖在城東南隅。西有贛江，自豐城縣流入，東北入鄱陽湖，出湖

口縣，入大江，亦曰章江。又東南有武陽水，上源自南豐縣 吁江，北流經此，又東北入宮亭湖。南有市汊巡檢司。

新建倚。西有西山，跨南昌、新建、奉新、建昌四縣之境。北有吳城山，臨贛江。東有鄱陽湖，卽彭蠡也，俗謂之

東鄱湖；其西與宮亭湖相接，謂之西鄱湖。西南有筠水，一名蜀江，自高安縣流入，合於章江。東北有趙家園、

西有烏山、北有吳城、西北有昌邑四巡檢司。

豐城府南，少西。元富州。洪武九年十二月改爲豐城縣。南有羅山，富水所出。又有柘山，豐水所出。西南有

章江，豐水自南，富水自東南，俱流入焉。又東有雲韶水，自撫州流入，亦入於章江。南有沛源、西南有江潯口

二巡檢司。又有河湖巡檢司，廢。又北有港口巡檢司，治大江口，後遷縣東北小江口，廢。

進賢府東南。西南有金山，產金。北有三揚水，又有軍山湖，又北有日月湖，下流俱入於鄱陽湖。東有潤陂、東

北有鄔子寨、北有龍山、東南有花園四巡檢司。

奉新府西。西有百丈山，馮水所出，下流入於章江。又西有華林山，華林水出焉。又西北有藥王山，龍溪水出焉。

二水合流，注於馮水。西有羅坊巡檢司。又有白沙巡檢司，廢。



靖安府西北。西有毛竹山，接寧州界，雙溪水出焉，下流入於馮水。北有桃源山，桃源水所出，流與雙溪水合。又西北有長溪，源出名山，下流入於修水。

武寧府西北。西有太平山。西北有九宮山。南有修水。

寧州府西。元分寧縣，爲寧州治。洪武初，改縣爲寧縣，省州入焉。弘治十六年，升縣爲州。西有幕阜山，修水發源於此，下流入鄱陽湖。又東有鶴源水，源發九宮山，下流合修水。西有杉市巡檢司，後遷於崇鄉北村。南有定江，又有八疊嶺二巡檢司，廢。東南距府三百六十里。

瑞州府元瑞州路，屬江西行省。洪武二年爲府。領縣三。東北距布政司二百里。

高安倚。北有米山。西北有華林山。又北有蜀江，自上高縣流入，東流匯於南昌之象牙潭而入章江，一名錦水。此別一蜀江，非出岷山之大江也。又南有曲水，亦東入章江。南有陰岡嶺，又有洪城二巡檢司，廢。

上高府西南。南有蒙山，舊產銀鉛。西有天嶺。又西有蜀江，自萬載縣流入，至縣西北凌江口合新昌縣之鹽溪水。又有斜口水，源出蒙山，至縣西亦流入焉。西有離婁橋，又有麻塘二巡檢司。

新昌府西。元新昌州。洪武初，降爲縣。西有鹽溪水，一名若耶溪，南流至上高縣入於蜀江。又北有藤江，下流與鹽溪水合。西有黃岡洞，北有大姑嶺二巡檢司。

九江府 元 江州路，屬江西行省。太祖辛丑年爲九江府。領縣五。南距布政司三百里。

德化倚。南有廬山，亦曰匡廬。東南有鄱陽湖，湖中有大孤山。縣北濱大江，亦曰潯陽江，北岸爲湖廣黃梅縣，南岸經湖口、彭澤二縣，而入南直東流縣境。江中有桑落州，與南直宿州縣界。又西有湓浦，自瑞昌縣流入，經城西，注於大江，所謂湓口也。又東南有女兒浦，源出廬山，東北入鄱陽湖。西有城子鎮巡檢司。又東有南湖，西有龍開河二巡檢司，後廢。

德安府西南。南有博陽山，古文以爲敷淺原，博陽川出焉，〔一〇〕東南流入於鄱陽湖。東北有谷籬水，源出廬山，下流亦入鄱陽湖。

瑞昌府西。西有清湓山，湓水出焉。北有大江，北岸與湖廣廣濟縣分界。

湖口府東。北濱大江。南有上石鐘山。北有下石鐘山。又南有青山，在鄱陽湖中。西南卽鄱陽湖，滙章、貢羣川之水，由此入江。南有湖口鎮巡檢司，後遷上石鐘山。西北有茨石磯鎮巡檢司，後遷於黃茅潭。

彭澤府東，少北。濱大江。北有小孤山在江中，江濱有彭浪磯，與小孤對。東北有馬當山，橫枕大江。有馬當鎮巡檢司。西南有峯山、磯鎮二巡檢司。

南康府 元 南康路，屬江西行省。太祖辛丑年八月爲西寧府。壬寅年四月改曰南康府。領縣四。

南距布政司三百里。

星子倚西北有廬山。北有鞋山，在鄱陽湖中。湖東爲宮亭湖，西北爲落星湖。又西有谷簾水，下流入鄱陽湖。東有長嶺巡檢司，後遷縣南渚溪鎮，又遷縣東北青山鎮，仍故名。

都昌府東。西南有石壁山，臨章江。東南爲鄱陽湖，北有後港河，合諸水入焉。西北有左蠡巡檢司，濱湖。東南有柴棚巡檢司，在湖中。

建昌府西南。元建昌州。洪武初，降爲縣。西南有長山，南有修水，自寧州流入，亦謂之西河。東有蘆潭巡檢司。安義府西南。正德十三年二月析建昌縣安義等五鄉置。東有東陽新逕水，南有龍江水，俱流合於修水。

饒州府元饒州路，屬江浙行省。太祖辛丑年八月爲鄱陽府，隸江南行省。尋曰饒州府，來隸。領縣七。西南距布政司二百四十里。

鄱陽倚。正統元年，淮王府自廣東韶州府遷此。西北有鄱陽山，在鄱陽湖中。湖長三百里，闊四十里，互南康、饒州、南昌、九江四府之境。南有鄱江，源出南直婺源縣及祁門縣，下流會於城東。又南則廣信上饒江來合焉，環城西北出，復分爲二，俱入鄱陽湖，亦名雙港水。又東有東湖，一名督軍湖，流入鄱江。西北有棠陰巡檢司，遷於雙港口。北有石門鎮巡檢司。又東北有大陽埠。西有八字腦。

餘干府南。元饒干州。洪武初，降爲縣。西北有康郎山，濱鄱陽湖南涯，因名其水曰康郎湖。又西有族亭湖。又南有餘水，亦曰三餘水。又南有龍窟河，合於餘水，下入鄱江。有康山巡檢司，舊在康郎山上，後遷黃埠。西有

瑞虹鎮，在鄱陽湖濱。

樂平府東。元樂平州。洪武初，降爲縣。東北有鳳遊山。南有樂安江，卽鄱江之上流也。北有八澗鎮巡檢司。

南有仙鶴鎮巡檢司，後遷萬年縣之荷溪鎮。

浮梁府東。元浮梁州。洪武初，降爲縣。南有昌江，南直祁門縣之水俱流匯焉，鄱江之別源也。西北有桃樹鎮巡檢司，後遷縣東北勒上市。西南有景德鎮，宣德初，置御器廠於此。

德興府東。東有銀山，舊產銀。北有銅山，山麓有膽泉，浸鐵可以成銅。西南有建節水，自弋陽縣流入。北有大溪，自南直婺源縣流入。下流俱合於樂安江。東有白沙巡檢司。西南有永泰巡檢司，廢。

安仁府南，少東。南有錦江，亦名安仁港，自貴溪縣流入，西北入餘干境，爲龍窟河。又東有白塔河，流合於錦江。南有白塔、東有田南二巡檢司，後廢。

萬年府東南。正德七年以餘干縣之萬春鄉置，析鄱陽、樂平及貴溪三縣地益之。北有萬年山。東有桃源洞，桃源水出焉，經縣西南，下流爲餘水。東北有荷溪鎮、北有石頭街二巡檢司，後俱廢。

廣信府元信州路，屬江浙行省。太祖庚子年五月爲廣信府。領縣七。西北距布政司六百三十里。

上饒倚。西北有靈山，舊產水晶。南有丁溪山，產鐵。又南有銅山。北有上饒江，自玉山縣流入，經城北，下流至鄱陽縣合於鄱江。又西有櫛溪，源出靈山，亦曰靈溪，流入上饒江。南有八坊場、東北有鄭家坊二巡檢司。

玉山府東。有三清山。又有懷玉山，玉溪出焉，分二流，東入浙，西爲上饒江。東南有柳都寨巡檢司。

弋陽府西。南有軍陽山，舊產銀。東有弋陽江，卽上饒江下流也，又有弋溪流合焉。又有葛溪，源出上饒縣靈山，下流入鄱江。又有信義港，自福建邵武流入，合於葛溪。

貴溪府西。西南有象山，又有龍虎山，上清宮在焉。其南爲仙巖。又南有薌溪，亦名貴溪，上流卽上饒江也。又有須溪，自福建光澤縣流入，來合焉。南有管界寨巡檢司。西有神前街巡檢司，本神峯寨，在縣北，後遷潭溪，更名。

鉛山府南。元鉛山州，直隸江浙行省，治在八樹嶺之南。洪武初，降爲縣，遷於今治。西南有銅寶山，湧泉浸鐵，可以爲銅。又有鉛山，產銅及青綠。北有鵝湖山。南有分水嶺，與福建崇安縣界，上有分水關巡檢司。又有紫溪嶺，紫溪水出焉。北有上饒江，至汭口，與紫溪、桐木、黃蘗諸水合流，入弋陽縣界，謂之鉛山河口。又東北有石溪，亦流合上饒江。西南有石佛寨巡檢司，後遷善政鄉湖坊街。又西有駐泊巡檢司，治汭口鎮，廢。

永豐府南。東南有平洋山，舊產銀礦。南有永豐溪，源出福建浦城縣界，下流至上饒縣界合玉溪。又東有永平溪，西會杉溪及諸溪谷之水，注於永豐溪。東有柘陽寨巡檢司。又有杉溪寨巡檢司，廢。

興安府西。嘉靖三十九年八月以弋陽縣之橫峯寨置，析上饒、貴溪二縣地益之。縣南有宋溪，源并出靈山，下流入上饒江。東有丫巖寨巡檢司，後廢。

**建昌府** 元建昌路，屬江西行省。

**太祖壬寅年正月爲肇慶府，尋曰建昌府。** 領縣五。西北距布政

**司四百里。**

**南城倚。** 永樂二十二年建荊王府。

正統十年遷於湖廣蘄州。

成化二十三年建益王府。

西南有麻姑山。東有吁

江，一名建昌江，自南豐縣流入，下流入金谿縣。東有藍田、北有伏牛二巡檢司。又南有曾潭、北有岳口二巡檢司，廢。又東南有杉關，接福建光澤縣界。

**南豐府南，少西。**

元南豐州，直隸江西行省。

洪武初，降爲縣。南有軍山。

又東南有百丈嶺，與福建建寧縣分界。

又有吁水。東南有龍池巡檢司，本黃沙源坪，在縣西南，後遷縣南雙港口，又遷縣東南百丈嶺，又遷刊都，尋又遷於此，更名。又南有太平、北有仙君二巡檢司，廢。

**新城府東南。**

西有廬山，黎水出焉，經縣西，下流會於吁江。

又東有飛猿嶺，飛猿水出焉，下流至南城縣入於吁

江。又有五福港，源出杉關，流與飛猿水合。東南有極高巡檢司，遷水口村，後遷縣南德勝關，又遷縣東洵口，仍故名。西南有同安巡檢司，後遷縣西樟村，尋復。

**廣昌府西南。**

西北有金嶂山。

西南有梅嶺。

又南有血木嶺，吁水出焉，經城南，流入南豐縣。

西南有秀嶺、南有

泉鎮二巡檢司。

**瀘溪府東南。**

本南城縣瀘溪巡檢司，萬曆六年十二月改爲縣。東有瀘溪，源出福建崇安縣之五鳳山，流至縣，

又北入於安仁港。

撫州府 元撫州路，屬江西行省。 太祖壬寅年正月爲臨川府，尋曰撫州府。領縣六。北距布政司二百四十里。

臨川倚。南有靈谷山。西有銅山，舊產銅。城東有汝水，上源接盱江，自金谿縣流入，東合於章江。又西有臨水，源出崇仁縣，流合汝水。北有溫家圳，南有青泥，西有清遠三巡檢司。又有白竿巡檢司，後廢。

崇仁府西。南有巴山，一名臨川山，臨水出焉，亦曰巴水。又南有華蓋山，西寧水出焉，下流俱合於汝水。又西南有寶唐山，寶唐水出其下，北合縣境諸溪，入於臨水。東有周坊巡檢司。又西北有丁坊，南有河亭二巡檢司，廢。

金谿府東南。東有金谿山，舊產金。又有雲林山，跨撫、信、建昌三府境。又有崖山，接貴溪縣界。南有福水，卽盱水下流也，自南城縣流入，北合清江水，又北合石門港水。又北流爲苦竹水，又西流爲臨川縣之汝水。

宜黃府西南。東有宜黃水，下流入汝。南有止馬寺巡檢司。又有上勝巡檢司，廢。

樂安府西南。西北有大盤山，與新淦、永豐二縣界，寶唐水出焉，下流合於臨水。東有芙蓉山，鰲溪水出焉，下流合於贛水。北有龍義，又有望仙二巡檢司。又西北有南平巡檢司，後廢。

東鄉府東。正德七年八月以臨川縣之孝岡置，析金谿、進賢、餘干、安仁四縣地益之。西南有汝水。東北有橫山，西北有古爐二巡檢司，後廢。

**吉安府** 元吉安路，屬江西行省。 太祖壬寅年爲府。領縣九。東北距布政司五百九十里。

**廬陵** 倚。北有螺山，南有神岡山，兩山相望，贛江經其下。又北經城東，又北經虎口石，流入峽江縣，爲清江。南

有富田、西有井岡、西南有敖城三巡檢司。

**泰和府南**，少西。元太和州。洪武二年正月改爲泰和縣。東有王山，亦名匡山。贛江在城南，自萬安縣流入，經

縣西之牛吼石，而東北入廬陵縣界。又南有雲亭江，一名縉水，源出興國縣，北流至珠林口注於贛江。西有早

禾市、東北有花石潭、東南有三顧山三巡檢司。

**吉水府東北**。元吉水州。洪武二年正月降爲縣。東有東山。北有王嶺。又東北有吉文水，贛水之支流。北有

白沙巡檢司，遷縣西北三曲灘上，仍故名。

**永豐府東**。東有郭山。南有石空嶺，又有恩江，下流入於贛江。東南有層山、南有沙溪、又有表湖三巡檢司。又

東北有視田巡檢司，後廢。

**安福府西**，少北。元安福州。洪武二年正月降爲縣。西有盧蕭山，盧水出焉，經城北，東流與王江合，又東合禾

水，至廬陵縣神岡山下入於贛江。南有黃茆巡檢司，治黃陂寨，後遷縣西時礬鎮，西有羅塘巡檢司，治洋潭，

後遷江背，俱仍故名。

**龍泉府西南**。東南有錢塘山。西有石含山。南有遂水，東流入於贛江。西北有北鄉巡檢司。西南有禾源巡檢



司，後遷縣西左安司，仍故名。西有秀洲巡檢司，本金田，在縣北，後遷治，更名。

萬安府南。東有蕉源山，產鐵。城西有贛江，江之灘三百里，在縣境者十八灘，皇恐爲最險。又南有阜口江，自贛縣北注於贛江。有造口巡檢司，在縣西南。又東北有灘頭巡檢司。又東南有西平山巡檢司，廢。

永新府西南。元永新州。洪武二年正月降爲縣。東南有義山。西有秋山，一名禾山，禾水出焉，一名永新江，下流至泰和縣入於贛江。東南有上坪寨、西北有栗傳寨、又有禾山寨、又有新安寨四巡檢司。

永寧府西南。北有七溪嶺。西有漿山水，源自湖廣茶陵州界，流經縣南，合於永新縣之禾江。西有升鄉寨巡檢司。西南有礮頭寨巡檢司，尋廢。

臨江府元臨江路，屬江西行省。太祖癸卯年爲府。領縣四。東北距布政司二百七十里。

清江倚。東有閣阜山，互二百餘里。南有贛江，一名清江，有清江鎮巡檢司。又有袁江，自新喻縣流入，至縣南合焉。西有蕭水，南有淦水，至縣東清江鎮，亦俱合於贛江。西南有太平市巡檢司，廢。

新淦府南。元新淦州。洪武初，降爲縣。西北有離嶺，淦水出焉。又西有清江，又南有象江，有泥江，俱流入於清江。東有枉山巡檢司，後遷藍橋，尋復。

新喻府西。元新喻州，洪武初，降爲縣。西有銅山，舊產銅。北有蒙山。南有淦水，卽袁江，潁江水北流入焉。北有水北墟巡檢司。

峽江府南。本新淦縣之峽江巡檢司，嘉靖五年四月改爲縣，析新淦縣六鄉地益之。南有玉筍山，又有贛江，亦名

峽江，有黃金水流合焉。

袁州府 元 袁州路，屬江西行省。太祖 庚子年爲府。領縣四。東北距布政司三百九十里。

宜春倚。南有蟠龍山，又有仰山。又秀江在城北，源出萍鄉縣，流經府西，亦曰稠江，卽袁江之上源也。西有黃

圃，南有澗富嶺二巡檢司。

分宜府東。東有鍾山峽。西有昌山峽。秀江經兩峽中，入新喻縣境，爲渝水。〔二〕

萍鄉府西。元 萍鄉州。洪武初，降爲縣。東有羅霄山，羅霄水出焉，分二派。東流者爲盧溪水，下流爲秀江，入宜

春縣界。西流者入湖廣醴陵縣界，合淥水。〔三〕又西有萍川水，亦曰楊岐水，〔三〕西流經縣南，下流合淥水。北有

安樂鎮，東南有大安里二巡檢司。又西有草市巡檢司，後遷於插嶺關，仍故名。又西有湘東市。東有盧溪鎮。

萬載府北。北有龍江，下流卽瑞州府之蜀江。東北有康樂水入焉。西有鐵山界巡檢司。又有高村鎮巡檢司，

尋廢。

贛州府 元 贛州路，屬江西行省。太祖 乙巳年爲府。領縣十二。西北距布政司一千一百八十里。

贛倚。南有崆峒山，章、貢二水夾山左右，經城之東西。貢水一名東江，自福建長汀縣流入府界。章水一名西江，

自湖廣宜章縣流入府界。至城北，合流爲贛江。北有桂源巡檢司，後遷攸鎮。東北有磨刀寨巡檢司，後遷石院舖。南有長洛巡檢司，後遷縣西黃金鎮。俱仍故名。

零都府東。東北有高沙寶山。又北有零山，零水出焉，合寧都、會昌諸水，繞城而西，至贛縣，合於貢水。東北有平頭寨巡檢司。又有印山，又有青塘二巡檢司，後廢。

信豐府東南。東有桃江，自龍南縣流入，經縣北，爲信豐江，下流入於貢水。東南有新田巡檢司。西有桃枝墟，又有黃田、潭塘，又東有新設四巡檢司，後廢。

興國府東北。北有覆筍山。東北有潏江，西南流，合零水入貢江。東有衣錦鄉，東北有迴龍寨二巡檢司。

會昌府東，少南。元會昌州。洪武初，降爲縣。南有四望山，下有羊角水隘。北有湘洪水，卽貢水，西北流，會零水。南有湘鄉寨，北有承鄉鎮二巡檢司。又西有河口巡檢司，後廢。

安遠府南。元屬寧都州。洪武初，改屬府。西有安遠水，亦曰廉水，流入會昌縣之貢水。又南有三百坑水，下流入廣東龍川縣。西北有板口巡檢司。

寧都府東北。元寧都州。洪武初，降爲縣。西北有金精山。北有梅嶺。南有寧都水，與散水、簣簣、曲陽、黃沙、長樂五水合，又東北有虔化水，下流俱入於零水。又有梅川水，出梅嶺，下流亦經寧都縣入貢水。東南有下河寨巡檢司。

瑞金府東。元屬會昌州。洪武初，改屬府。東北有陳石山，綿江出焉，流至縣南入貢水，又西入會昌縣，爲湘洪

水。西北有瑞林、東北有湖陂二巡檢司。東南有古城鎮，路出福建長汀縣。

龍南府南。元屬寧都州。洪武初，改屬府。西南有冬桃山，桃水出焉，東北流會諸水，至縣北宮山下，與渥、濂二水合爲三江口，又北流爲信豐縣之桃江。有冬桃隘，崇禎初，移定南縣下歷巡檢司駐焉。

石城府東北。元貞元年十一月屬寧都州。洪武初，改屬府。北有牙梳山。東有霸水，西南合虔化水，入貢江。北有捉殺寨巡檢司，後遷縣西赤江市，仍故名。

定南府東南。隆慶三年三月以龍南縣之蓮莆鎮置，析安遠、信豐二縣地益之。西北有程嶺，又南有神仙嶺。東有指揮峯。東北有九洲河，下流會於信豐縣之桃江。東北有下歷巡檢司，後遷高砂蓮塘，又遷龍南縣冬桃隘。

長寧府東南。萬曆四年三月以安遠縣之馬蹄岡置，析會昌縣地益之。東南有頂山，又南有大帽山，俱接閩、廣境。又東有尋鄖水，流入廣東龍川縣界。西北有黃鄉巡檢司。南有新坪巡檢司，本大墩，後更名。北有雙橋、南有丹竹樓二巡檢司，後廢。

南安府元南安路，屬江西行省。太祖乙巳年爲府。領縣四。東北距布政司一千五百二十里。

大庾倚。西南有大庾嶺，「巴」五嶺之一，亦名梅嶺，上有關曰梅關。又有章江，亦曰南江，亦曰橫江，下流與貢水合。西有鬱林鎮巡檢司，治晶都村，後遷浮江隘，又遷黃泥港，東北有赤石嶺巡檢司，治峯山里，後遷小溪城，

又遷峯山新城，後遷峯山水西村，俱仍故名。又縣南有水南城，與府城隔江對峙，嘉靖四十年築。西北有新田

城。又北有鳳凰城，又西有楊梅城，俱嘉靖四十四年築。又東有九所城，亦嘉靖四十四年築。

南康府東北。西北有禽山，禽水出焉，東流至南盤口入於章江。北有羊嶺山。南有芙蓉江，卽章江。東北有潭口鎮，北有相安鎮二巡檢司。

上猶府東北。元永清縣。洪武初，更名。西有書山，一名太傅山。東有大猶山，猶水出焉，下流至南康縣，入於章江。西有浮龍巡檢司，後遷太傅村，仍故名。

崇義府北。正德十四年三月以上猶縣之崇義里置，析大庾、南康二縣地益之。西南有聶都山。西有桶岡。又有章江，自湖廣宜章縣流入，又有橫水，經縣南，又西南有左溪，下流俱合章江。西北有上保巡檢司，本過步，後遷治，更名。西南有鉛廠巡檢司，本在鉛山，後遷聶都，東南有長龍巡檢司，本治隆平里，後遷縣東北尚德里江頭，俱仍故名。

## 校勘記

〔一〕元置四川等處行中書省 原脫「行」字，據元史卷六〇地理志補。

〔二〕南有天社山 天社山，原作「天柱山」，據本志眉州彭山縣下、明史稿志二〇地理志、寰宇通志卷六一、明一統志卷六七改。

〔三〕其北有鋸山關 鋸山關，原作「鉅山關」，據明史稿志二〇地理志、寰宇通志卷六三、明一統志

卷六八改。

〔四〕西北有胡空關 胡空關，原作「湖空關」，據明史稿志二〇地理志、寰宇通志卷七〇、明一統志卷七〇改。

〔五〕北有羅佐關 羅佐關，原作「羅左關」，據明史稿志二〇地理志、寰宇通志卷六九、明一統志卷七二改。

〔六〕烏撒路 原作「烏蒙路」，據明史稿志二〇地理志、寰宇通志卷六九、明一統志卷七二改。

〔七〕以州治鄴縣省入 鄴縣，原作「棲縣」，據明史稿志二〇地理志、寰宇通志卷六六、明一統志卷七一改。按下文兩見「鄴江」，又有「鄴口」，都作「鄴」不作「棲」。

〔八〕石砭宣慰司 石砭，原作「石柱」，據本書卷二七〇秦良玉傳、又卷三一二石砭宣慰司傳、明史稿志二〇地理志改。本志下注亦作「石砭」。

〔九〕守禦迷易千戶所 迷易，原作「述易」，據本書卷三一建昌衛傳附會川衛傳、明史稿志二〇地理志、太祖實錄卷二二三洪武二十五年閏十二月乙未條改。

〔一〇〕南有博陽山古文以爲敷淺原博陽川出焉 博陽山、博陽川，原作「博易山」「博易水」，據明史稿志二一地理志、寰宇通志卷四〇、讀史方輿紀要卷八五改。按書禹貢「過九江至於敷淺原」，僞孔安國傳：「博陽山，古文以爲敷淺原。」又按「易」當爲「易」字之誤。「易」，古「陽」字。

〔二〕爲渝水 渝水，原作「喻水」，據明史稿志二一地理志、明一統志卷五五、讀史方輿紀要卷八七改。

〔三〕合淥水 淥水，原作「淥水」，據本書卷四四地理志、明史稿志二一地理志、寰宇通志卷五五、明一統志卷六三改。

〔三〕亦曰楊岐水 楊岐水，原作「陽岐水」，據明史稿志二一地理志、寰宇通志卷三九、明一統志卷五七改。寰宇通志稱：「源發萍鄉縣楊岐山，因名。」

〔四〕西南有大庾嶺 原脫「大」字，據明史稿志二一地理志、寰宇通志卷四四、明一統志卷五八補。





# 明史卷四十四

## 志第二十

### 地理五

#### 湖廣 浙江

湖廣 禹貢荆、揚、梁、豫四州之域。元置湖廣等處行中書省，治武昌路，又分置湖南道宣慰司，治天臨路屬焉。又以襄陽等三路屬河南江北等處行中書省，又分置荆湖北道宣慰司，治中興路并屬焉。太祖甲辰年二月平陳理，置湖廣等處行中書省。洪武三年十二月置武昌都衛。與行中書省同治。八年十月改都衛爲湖廣都指揮使司。九年六月改行中書省爲承宣布政使司。領府十五，直隸州二，屬州十七，縣一百有八，宣慰司二，宣撫司四，安撫司五，長官司二十一，蠻夷長官司五。爲里三千四百八十有奇。北至均州，與河南、陝西界。南至九疑，與廣東、廣西界。東至蘄州，與江南、江西界。西至施州，與四川、貴州界。距南京一千七百一十五里，京師五

千一百七十里。洪武二十六年編戶七十七萬五千八百五十一，口四百七十萬二千六百六十。弘治四年，戶五十萬四千八百七十，口三百七十八萬一千七百一十四。萬曆六年，戶五十四萬一千三百一十，口四百三十九萬八千七百八十五。

武昌府 元武昌路，屬湖廣行省。 太祖甲辰年二月爲府。領州一，縣九。

江夏 倚。洪武三年四月建楚王府於城內黃龍山。東有黃鶴山，下爲黃鶴磯，臨大江。又南有金水，一名塗水，西流至金口入江，有金口鎮巡檢司。又北有潯黃洲，西南有鮎魚口鎮二巡檢司。

武昌府東。西有樊山，一名西山，產銀銅鐵及紫石英。南有神人山，其下爲白鹿磯。西有西塞山，與大冶縣界。北濱江，中有蘆洲，亦曰羅洲。又西南有樊港，一名樊溪，又名袁溪，匯縣南湖澤凡九十九，北入大江，曰樊口。又東有南湖，一名五丈湖，通大江。東有金子磯鎮，又有赤土磯鎮，西南有白湖鎮三巡檢司。南有金牛鎮，西有三江口鎮二巡檢司，後廢。

嘉魚府西南。西有赤壁山，與江夏縣界。北岸對烏林。西北濱大江，有陸水流入焉，曰陸口，亦曰蒲圻口。（二）東北有牌洲鎮，西南有石頭口鎮二巡檢司。

蒲圻府西南。西有蒲首山。南有蒲圻河，卽陸水也。又西有蒲圻湖。西南有新店等湖，下流至嘉魚縣之石頭口，注於大江。西南有羊樓巡檢司。

咸寧府東南。陳友諒時徙治河北。洪武中復還故城，卽今治也。西有淦水，卽金水之別名。

崇陽府南。西有岩頭山。西南有龍泉山。東北有壺頭山，下有壺頭港，亦曰崇陽港，匯羣川西合陸水，又名雋水。

通城府西南。南有錫山，舊產銀錫。北有陸水，自巴陵縣流入。

興國州元興國路，屬湖廣行省。太祖甲辰年二月爲府。洪武九年四月降爲州，以州治永興縣

省入，來屬。北有銀山，西有黃姑山，舊俱產銀。南有太平山，與九宮山接。東有大坡山，產茶。東北有大江。

東有富池湖，〔三〕亦曰富水，北流注於江，有富池鎮巡檢司。又東北有黃顙口鎮巡檢司。西北距府三百八十

里。領縣二。

大冶州西北。北有鐵山，又有白雉山，出銅礦。又東有圍爐山，出鐵。又西南有銅綠山，舊產銅。大江在北。有

道士洲巡檢司。

通山州西，少南。東南有九宮山，寶石河出焉，下流合於富水。東有黃泥壠巡檢司。

漢陽府元屬湖廣行省。洪武九年四月降爲州，屬武昌府。十三年五月復爲府，屬湖廣布政司，

尋屬河南。二十四年六月還湖廣。領縣二。西北距布政司，隔江僅七里。

漢陽倚。洪武九年四月省。十三年五月復置。大別山在城東北，一名翼際山，又名魯山。漢水自漢川縣流入，舊

逕山南襄河口入江。成化初，於縣西郭師口之上決，而東從山北注於大江，卽今之漢口也，有漢口巡檢司。大

江自巴陵縣西北接洞庭之水，流入府境，至此與漢水會。又西南有沔水，即漢水支流也，仍合漢入江。又有沌水，大江支流也，自沔陽州流入，仍入大江，謂之沌口，有沌口巡檢司。又有弇水，在大江南岸，至弇口入江。又北有潏水，亦漢水支流也，有潏水流合焉，下流注於大江。又西有太白湖，江北諸水多匯焉。西有蔡店鎮、西南有新灘鎮二巡檢司。又西南有百人磯鎮巡檢司，後遷於東江腦。

漢川府西，少北。元屬漢陽路。洪武九年四月改屬武昌府。十三年五月還屬。南有小別山，一名甌山，又有陽臺山。西南有漢水。東有潏水，自雲夢縣來，南入漢，謂之潏口。北有劉家壩巡檢司。

黃州府元黃州路，屬河南江北行省。太祖甲辰年爲府，屬湖廣行省。九年屬湖廣布政司，尋改屬河南。二十四年六月還屬湖廣。領州一，縣八。西南距布政司百八十里。

黃岡倚南有故城。洪武初，徙於今治。南濱大江，西北岸有赤鼻磯，非嘉魚之赤壁。西有三江口，其上流水分三派，至此合流。中有新生洲，又有崢嶸洲。東有巴河，西有舉水，俱入於江。江濱西有陽邏鎮、北有團風鎮，又西北有中和鎮三巡檢司。又有鹿城關，有大活關。又東北有陰山關。

麻城府北。東有龜峰山，舉水出焉，流入黃岡縣。東南有長河，又南有縣前河流入焉，下流注於江西。有雙城鎮、鵝籠鎮，東北有虎頭關三巡檢司。又西北有木陵關，在木陵山上。東北有陰山關，在陰山上。又北有黃土關，與木陵、虎頭、白沙、大城爲五關。又西有岐亭鎮，嘉靖五年築城。

黃陂府西。東南濱大江，有武湖自西來，入於江，曰武口，又曰沙武口，亦曰沙汊口。又西有潏水，自漢陽流入江，曰潏口。北有大城潭鎮巡檢司。又北有白沙關，卽麻城五關之一也。

黃安府西北。嘉靖四十二年以麻城縣之姜家畝置，析黃岡、黃陂二縣地益之。東有三角山，接蘄水、羅田、蘄州界。又有東流河，下流出團風口入江。西有西河，又有雙河，合流出潏口，入漢。又北有雙山關巡檢司。西北有金局關，亦曰金山關，與河南羅山縣界。

蘄水府東，少南。元屬蘄州路。洪武九年四月屬蘄州。十一年十月改屬府。西南濱大江。南有潏水，源出英山縣，流經縣境西南入江。又東有蘭溪，東南流入潏水。又北有巴水，源出縣之板石山，流入黃岡縣界。有蘭溪鎮、巴河鎮二巡檢司。

羅田府東北。元屬蘄州路。洪武九年四月屬蘄州。十一年十月改屬府。東南有潏水。西北有平湖水。南有官渡河，亦名縣前河，平湖水流入焉，下流合黃岡縣之巴河，入大江。東北有多雲鎮巡檢司，又有栗子關，又有上岐嶺、中岐嶺、下岐嶺等關。西北又有平湖關。

蘄州元蘄州路，屬河南江北行省。太祖甲辰年爲府。九年四月降爲州，以州治蘄春縣省入，來屬。正統十年，荆王府自江西建昌遷此。東北有百家冶山，產蘄竹。南濱江。東北有蘄水，出大浮山，經州北，匯爲赤東湖，西南流，接蘄水縣界，注於大江。西有茅山鎮，北有大同鎮二巡檢司。西距府二百十里。領縣二。

廣濟州東北。南濱江，江中有中洲。崇禎末，遷治於此，尋復故。又有武山湖、馬口湖皆流通大江。南有武家穴

鎮、西南有馬口鎮二巡檢司。

黃梅州東北。東南有礦山，舊產鐵。大江在南，江濱有太子洲。又南有縣前河，由小池口入江。西南有新開口鎮巡檢司，屢圯於江，內徙。又南有靖江紫鎮巡檢司。

承天府元安陸府，屬荆湖北道宣慰司。太祖乙巳年屬湖廣行省。洪武九年四月降爲州，直隸湖廣布政司。二十四年六月改屬河南，未幾還屬。弘治四年，興王府自德安府遷此。嘉靖十年升州爲承天府。十八年建興都留守司於此。領州二，縣五。東南距布政司五百七十里。

鍾祥倚。洪武二十四年建郢王府，永樂十二年除。二十二年建梁王府，正統六年除。元曰長壽縣，元末廢。洪武三年復置。九年四月省入州。嘉靖十年八月復置，更名。東有楠木山，一名青泥山。北有松林山，興獻王陵寢在焉，嘉靖十年賜名純德山，置顯陵縣於此。明末，縣廢。西濱漢水。北有直河，自隨州流入，有激水流合焉。又有豐樂水，又東有白水，俱注於漢水。

京山府東。南有縣河，下流至景陵縣，入漢江。又東北有撞河，自隨州流入，至漢川縣入漢江，或謂之富水。潛江府東南。元屬中興路。洪武十年八月來屬。北有漢水。西北有潛水，卽漢水分流，經縣東南入於漢。又東南有深江，又南有恩江，皆漢水支分也。西南有沱水，爲江水之分流，經縣南，有重湖環繞，又東匯於漢水。

荊門州 元治長林縣，屬荊湖北道宣慰司。

洪武九年四月改爲縣，省長林縣入焉，屬荊州府。十三

年五月復爲州，仍屬荊州府。

嘉靖十年八月來屬。

東南有章山，卽內方山也。漢水逕其東，亦曰

沔水。又西有權水，東南有直江，一名直河，又有陽水，一名建水，皆流入焉。南有荊門守禦千戶所。北有宜陽守禦

千戶所。東南有建陽鎮、新城鎮，西北有仙居口，北有樂仙橋四巡檢司。東北距府九十里。領縣一。

當陽州 西。元屬荊門州。

洪武九年改屬荊州府。十年五月省入荊門縣。十三年五月復置，仍屬州。東南有方

城，洪武初移治於此。十三年復故。南有玉泉山，玉泉水出焉。北有沮水，源出房縣，〔三〕逕縣東南，合榕渡，與

漳水會，下流至枝江縣，入於大江。北有漳河口巡檢司。

沔陽州 元沔陽府，屬荊湖北道宣慰司。

洪武九年四月降爲州，以州治玉沙縣省入，直隸湖廣布政

司，尋直隸河南。

二十四年六月還直隸湖廣。

嘉靖十年十二月來屬。

東南有黃蓬山，其下

爲黃蓬湖。南有大江。北有漢水。東有太白湖，州西十四湖之水悉匯焉，由漢陽縣之沌口入於大江。又南有長

夏河，江水支流也，亦曰夏水。西北有襄水，漢水支流也，至州東北瀦口合流，東入於沔水。東有沙鎮、西南有茅鎮

二巡檢司。西北距府三百二十五里。領縣一。

景陵州 西北。南有沔水。西南有楊水，北注沔，謂之楊口，亦曰中夏口，又曰楊林口。又有中水，流合楊水，曰中

口。東有乾鎮巡檢司。

德安府 元屬荆湖北道宣慰司。 洪武元年十月屬湖廣行省。九年四月降爲州，屬黃州府。十一月

屬武昌府。十三年五月復爲府，屬湖廣布政司。二十四年六月改屬河南，未幾還屬。領州一，縣五。東南距布政司四百里。

安陸倚。成化二十三年建興王府。弘治四年遷於安陸州。八年建岐王府，十四年除。正德元年，壽王府自四川

保寧府遷此，嘉靖二十四年除。四十年建景王府，四十四年除。洪武初，縣省。十三年五月復置。東有章山，

卽豫章山。潁水在城西，俗稱府河，亦曰石潼河，又西有漳水入焉，謂之漳口。南有高巖鎮巡檢司，後移於隨州之合河店。

雲夢府東南。西南有潁水。東有興安鎮巡檢司，後廢。

應城府西南。洪武九年四月屬黃州府。十年五月省入雲夢縣。十三年五月復置。西北有西河，下流入漢水。又峙山鎮巡檢司亦在西北。

孝感府東南。洪武九年四月屬黃州府。十年五月省入德安州。十三年五月復置。北有潁水，下流入於漢水。南有淪河，自潁河分流至漢陽，合灤水入江。北有小河溪，東南有馬溪河二巡檢司。

隨州 洪武二年正月以州治隨縣省入。九年四月降爲縣，屬黃州府。十年五月省入應山縣。十三年五月復升爲州。西有大溪山，潁水出焉，下流至漢川縣入漢水。又西有大洪山，漳水所出。西北有潁水，源出栲栳山，又有潁水流入焉。又南有浪水，源出大猿山，下流俱注於潁水。又西北有合河店，東北



有出山鎮二巡檢司。東南距府百八十里。領縣一。

應山州東。洪武初省。十三年五月復置。西有鷄頭山，潁水出焉。西南有潁水。東有白泉河，與潁水合，入孝感縣界。西北有杏遮關巡檢司，即平靖關，義陽三關之一。又西南有平里市巡檢司。又東北有武陽關，一名武勝關，又名禮山關，亦義陽三關之一。

岳州府元岳州路，屬湖廣行省。太祖甲辰年爲府。洪武九年四月降爲州，直隸布政司。十四年正月復爲府。領州一，縣七。東北距布政司五百里。

巴陵倚。洪武九年四月省，十四年復置。西南有巴丘山。又有君山，在洞庭湖中。大江在西北。洞庭湖上納湘、澧二水，自西南來合，謂之三江口。湖之南有青草湖，又西曰赤沙湖，謂之三湖。沅、澧、沅、辰、敘、酉、澧、資、湘九水，皆匯於此，故亦名九江。東南有漚湖，亦名翁湖。南有鹿角巡檢司。

臨湘府東北。東南有龍窖山，跨臨湘、通城、當陽、蒲圻四縣界。西南有城陵磯，又有道人磯，皆濱大江，有城陵磯巡檢司。又南有土門鎮，東北有鴨欄磯二巡檢司。

華容府西北。東有東山，又有石門山。大江在北。又有華容河，自大江分流，南達洞庭湖。南有澧水，東流入洞庭湖。西南有赤沙湖，與洞庭湖接。南有明山古樓巡檢司。又東北有黃家穴巡檢司，後移於塔市。北有北河渡巡檢司，後廢。

平江府東南。元平江州。洪武三年降爲縣。北有永寧山。東北有幕阜山。東有汨水，西南流，昌水北流入焉。東北有長壽巡檢司。

澧州 元澧州路，屬湖廣行省。太祖甲辰年爲府。九年四月降爲州，以州治澧陽縣省入，屬常德府。三十年三月來屬。元元貞末徙治新城。洪武五年復舊治。東有關山。西南有大浮山，跨石門、武陵、桃源三縣界。南有澧水，一名蘭江，亦曰繡水。其東有澹水，北有涔水，俱流入焉。東有嘉山鎮巡檢司。東距府二百七十里。領縣三。

安鄉州東南。西有澧水，一名長河。北有涔水。

石門州西。南有澧水。西北有渚水，亦名添平河，自添平所南流入焉。

慈利州西，少南。元慈利州。洪武二年降爲縣。西南有天門山，有檳榔洞，與瑤分界。又西有崇山。又有歷山，澧水出焉，下流至華容縣入於洞庭湖。又西有澧水，源出四川巫山縣，東流合諸溪澗之水，至縣西匯於澧水，亦

曰後江。西南有永定衛，洪武中置，二十三年八月徙於永順宣慰司之芋岸坪。西北有龍伏關，東南有後平關，

黑崇關，謂之永定三關。所屬曰大庸守禦千戶所，本大庸衛，在衛西，洪武九年四月置，三十一年改爲所，曰茅

岡長官司，在衛東北，正統中永定衛置。北有九溪衛，洪武二十三年六月置，有九淵、野牛、三江口、閘口四關。所

屬曰守禦添平千戶所，在衛北，洪武二年置。曰守禦安福千戶所，在衛西北，洪武二十三年九月置。曰守禦麻寮千戶所，在衛北，洪武四年置。曰桑植安撫司，本桑植、荒溪等處宣撫司，在衛西北，太祖丙午年二月置，後廢，

永樂四年十一月改置。

荊州府 元中興路，屬荆湖北道。 太祖甲辰年九月改爲荊州府，屬湖廣行省。吳元年十月置湖廣分省於此，尋罷。九年屬湖廣布政司，尋改屬河南。二十四年還屬。領州二，縣十一。東距布政司千二百一十里。

江陵倚。洪武十一年正月建湘王府，建文元年四月除。永樂元年，遼王府自遼東廣寧遷於此，隆慶二年十月除。萬曆二十九年十月建惠王府。南濱江。東南有夏水，至沔陽州合於沔水，故沔水亦兼夏水之名。又有陽水，東北至景陵縣，入沔水。又東北有三海，沮、漳水匯流處。北有柞溪。又東有靈溪，亦曰零水，南入江，謂之零口。東北有龍彎市，東南有沙頭市，南有郝穴口，西南有虎渡口四巡檢司。

公安府東南。東北有舊城。今治，崇禎元年所遷。北濱江，西北有油河流入焉，謂之油口，有油口巡檢司。東北有夏水。

石首府東南。元末，治楚望山北。洪武中，徙繡林山左，本宋時舊治也。北濱江，江中有石首山。又東有焦山，下有港，通洞庭湖。有調弦口巡檢司。

監利府東，少南。南濱江。東南有魯汭江，亦曰夏水，自大江分流，下至沔陽州入沔。又西有涌水，南入江，謂之涌口。又東有瓦子灣，西有窰所，南有白螺磯，北有毛家口，又有分鹽所五巡檢司。

松滋府西南。西南有巴山。北濱大江。南有紅崖子巡檢司。又有西坪塞巡檢司，後廢。

枝江府西。洪武十年五月省入松滋縣。十三年五月復置。北濱大江，江中有百里洲，江水經此而分，故曰枝江。北有沮水，南入江，謂之沮口。

夷陵州元峽州路，屬荆湖北道宣慰司。太祖甲辰年爲府。九月降爲州，直隸湖廣行省。九年四

月改州名夷陵，以州治夷陵縣省入，來屬。大江在南。西北有關曰下牢關，夾江爲險。又有西陵、明月、黃牛三峽，峽中有使君、虎頭、狼尾、鹿角等灘，皆江流至險處也。西北有赤谿，東合大江。南有南津口巡檢司。又東有金竹坪巡檢司，後廢。又西有西津關。東北有白虎關。東距府三百四十里。領縣三。

長陽州西南。東南有清江。西有舊關堡、西南有蹇家園、南有漁洋關三巡檢司。南有古捍關。西有梅子八關。

宜都州東南。西北有荆門山，下臨大江，其對岸卽虎牙山也。又西有清江，東流合大江，有清江口巡檢司。又西北有古江關、東北有普通鎮二巡檢司。

遠安州東北。舊治亭子山下。成化四年遷於東莊坪。崇禎十三年又遷鳳凰山麓，卽今治也。東北有沮水。

歸州元治秭歸縣，直隸湖廣行省。洪武九年四月廢州入秭歸縣，屬夷陵州。十年二月改縣名長

寧。十三年五月復改縣爲歸州。舊治江北，後治白沙南浦。洪武初，徙治丹陽。四年徙長寧，在江南楚

王臺下。嘉靖四十年復還江北舊治。東有馬肝、白狗、空船等峽。大江在州北，經峽中，入夷陵界。其西有叱灘、

蓮花灘、新灘，皆濱江。西北有牛口巡檢司，後遷於巴東縣利洲。東南有南邏口巡檢司，後遷於新灘。東距府

五百二十里。領縣二。

興山州西北。洪武九年改屬夷陵州，後還屬。正統九年三月省入州。弘治三年五月復置。南有香溪，亦曰縣前河，南流入江。東北有高雞寨巡檢司。〔四〕又東有桑林坪巡檢司，後廢。又北有貓兒關，達鄖、襄。

巴東州西。元屬歸州。洪武九年改屬夷陵州。隆慶四年還屬。北濱大江，自四川巫山縣流入，東經門扇、東奔、破石，謂之巴東三峽，下流至黃梅縣入南直宿松縣界。又南有清江，一名夷水，自四川建始縣流入，下流入於大江。又北有鹽井。西南有連天關巡檢司。南有野山關巡檢司，本治石柱，隆慶四年更名。

襄陽府元襄陽路，屬河南江北行省。太祖甲辰年爲府，屬湖廣行省。九年屬湖廣布政司。二十四年六月改屬河南，未幾，還屬湖廣。領州一，縣六。東南距布政司六百八十里。

襄陽倚。正統元年，襄王府自長沙遷此。南有虎頭山，又有峴山。東南有鹿門山。又西有隆中山。漢水在城北，亦曰襄江。白河在城東北，與唐河合，南入漢，謂之白河口，亦曰三州口。又西北有青泥河，南有浮河，西南有檀溪，下流皆入於漢。北有樊城，有樊城關巡檢司，後移於縣東北之柳樹頭。又東北有雙溝口巡檢司。又西有油坊灘巡檢司，嘉靖十九年移於縣西北之北泰山廟鎮。

宜城府東南。東有漢水。西有蠻水，亦曰夷水，源出房縣，流至縣界，入漢水，其支流曰長渠。又有沔水，自漢中流入，合於蠻水，謂之沔口。又有疎水，在縣東北，自南漳縣流入，注漢，謂之疎口。

南漳府西南。西北有荆山。南有蠻水，又有沮水，又有漳河，流入當陽縣，合於沮水。東有方家堰、西南有金廂坪。二巡檢司。又西有七里頭巡檢司，後移於保康縣之常平堡。

棗陽府東北。洪武十年五月省入宜城縣，後復置。東南有白水，南有澧水，流合焉，西注於沔水，此縣內之白水也。又西南有滾河，流入襄陽之白河。東北有鹿頭店巡檢司。

穀城府西，少北。東北有漢水，又有均水，流入焉，謂之均口。又有筑水，經縣治東南，注於漢水，曰筑口。西有石花街巡檢司。

光化府西北。洪武十年省入穀城縣。十三年五月復置。舊治在西。隆慶末，改建於阜城衛，卽今治也。東有馬窟山。北有漢水。東有白河，卽清水，自河南新野縣流入，有泌河，流合焉。西北有左旗營巡檢司，萬曆中，徙於縣舊城。

均州 洪武二年七月以州治武當縣省入。南有武當山，永樂中，尊爲太嶽太和山。山有二十七峰、三十六巖、二十四澗。北有漢江，一名滄浪水。東北有均水，自河南淅川縣流入。又東南有黑虎廟巡檢司。東南距府三百九十里。

鄖陽府 成化十二年十二月置。領縣七。又置湖廣行都指揮使司於此。衛所俱無實土。東南距布政司千二百里。

鄖倚。元屬均州。成化十二年置鄖陽府，治此。漢水在南。東南有龍門山，龍門河出焉，下流入於漢水。西北有青桐關。東北有雷峰、堽鎮二巡檢司。

房府南，少西。元房州，屬襄陽路。洪武十年五月以州治房陵縣省入，又降州爲縣，仍屬襄陽府。成化十二年十二月來屬。西南有景山，一名雁山，沮水出焉，流入遠安縣界。又南有粉水，亦曰彭水，又有筑水，俱流入穀城縣。注漢。西南有板橋山巡檢司，後移於縣東南之博磨坪。

竹山府西南。元屬房州。洪武十年五月省入房縣。十三年五月復置，屬襄陽府。成化十二年十二月來屬。東有方城山。西有筑山，筑水出焉，流入房縣界。又有上庸山，上庸水所出，南合孔陽水，下流入漢。又南有堵水，源出陝西平利縣界，東流入漢。西北有黃茅關、吉陽關二巡檢司。

竹谿府西南。本竹山縣之尹店巡檢司，成化十二年十二月改置縣，而移巡檢司於縣東之縣河鎮，尋又遷巡檢司於白土關。南有竹谿河。

上津府西北。洪武初置，屬襄陽府。十年五月省入鄖陽。十三年五月復置，仍屬襄陽府。成化十二年十二月來屬。西有十八盤山，又有吉水，西南流入漢，俗謂之夾河。南有江口鎮巡檢司。

鄖西府西北。成化十二年十二月以鄖縣之南門堡置。南有漢江，自陝西白河縣流入，下流至漢陽縣入於江。

保康府東南。弘治十年十一月以房縣之潭頭坪置。北有粉水。東南有常平堡，嘉靖十九年移南漳縣之七里頭巡檢司於此。

長沙府 元天臨路，屬湖南道宣慰司。太祖甲辰年爲潭州府。洪武五年六月更名長沙。領州一，縣

十一。東北距布政司八百八十里。

長沙倚。治西北。洪武三年四月建潭王府，二十三年除。永樂元年，谷王府自北直宣府遷於此，十五年除。二十二年建襄王府，正統元年遷於襄陽。天順元年三月建吉王府。縣舊治城外，洪武初，徙城中。十八年復徙北門外。萬曆二十四年徙朝宗門內。西有湘水，源出廣西興安縣，流入境，合瀟水、烝水北流，環府城，東北出至湘陰縣，達青草湖，注洞庭湖，行二千五百餘里。北有瀏陽水，西流入湘，謂之瀏口。又有麻溪，流入湘水，曰麻溪口。又西北有喬口巡檢司，喬江與濱江合流處。

善化倚。治東南。舊治在城外，洪武四年徙於城中。十年五月省入長沙縣。十三年五月復置，治在南門外。成化十八年仍徙城中。西南有嶽麓山，湘江繞其東麓。又有靳江，流入湘江。西有橘洲，在湘江中。南有暮雲市巡檢司。

湘陰府北。元湘陰州。洪武初，降爲縣。北有黃陵山。西有湘水，北達青草湖，謂之湘口。湖在縣北，與洞庭連，亦曰重湖。南有哀江。又北有汨羅江，汨水自平江縣流入，分流爲羅水，會於屈原潭，西流注湘，謂之汨羅口。西北有營田巡檢司。

湘潭府西南。元湘潭州。洪武三年三月降爲縣。東有昭山，下有昭潭。西有湘水，西南有涓水流入焉。南有下灘市巡檢司。



瀏陽府東。元瀏陽州。洪武二年降爲縣。北有道吾山。東北有大光山。又有大圍山，瀏水出焉，經縣南，入長沙縣界，曰瀏陽水。東南有渠城界、梅子園二巡檢司。又有翟家寨巡檢司，後廢。

醴陵府東南。元醴陵州。洪武二年降爲縣。南有淥水，亦曰澗水，西北注於湘水，有淥口巡檢司。

寧鄉府西。西有大瀉山。北有濱江，源出綏寧縣，經此入沅江縣界，注洞庭。

益陽府西北。元益陽州。洪武初，降爲縣。西南有濱江，亦曰益水。東有喬江，濱江之分流也，下流復合於濱江。

湘鄉府西南。元湘鄉州。太祖甲辰年降爲縣。西有龍山，澗水出焉，經縣東南，下流入於湘水。又西有湄水，南

有豐溪水，俱入於澗水。西南有武障市巡檢司。又有永豐市、虞磨市二巡檢司，後廢。

攸府南，少東。元攸州。洪武三年三月降爲縣。南有司空山。東有攸水，自江西安福縣流入，東南有洙水流合焉，下流至衡山縣，入於湘水。南有鳳嶺巡檢司，後廢。

安化府西。東有浮泥山，有大峰山。西北有辰山。西有濱江。又南有善溪，自武陵縣流注於濱江。

茶陵州。元直隸湖南道。太祖甲辰年降爲縣。成化十八年十月復爲州。西有雲陽山。西北有洙水，

自酃縣流入。又東南有茶水，源出江西永新縣之景陽山，西流來合焉，北入攸縣之攸水。東有視渡口巡檢司。北距府四百五十里。

常德府。元常德路，屬湖廣行省。太祖甲辰年爲府。領縣四。東北距布政司一千零五十里。

**武陵**倚弘治四年八月建榮王府。東南有善德山。南有沅水，又有朗水流入焉，謂之朗口。又東北有漸水，卽鼎水也，自九溪衛流入。

**桃源府**西。元桃源州。洪武二年降爲縣。西有壺頭山，接武陵、沅陵界。南有沅水，東有朗溪，西南有泥溪，俱流入焉。又西南有高都巡檢司。又南有白馬巡檢司，本名蘇溪，治縣東後春村，尋徙，更名，後廢。

**龍陽府**東，少南。元龍陽州。洪武三年三月降爲縣。舊治在東，今治景泰元年十二月所徙。東有軍山。北有沅水，東北有鼎水流入焉，謂之鼎口，有鼎港口巡檢司。又東南有赤沙湖，一名蠡湖。又西北有小江口巡檢司。

**沅江府**東南。元屬龍陽州。洪武三年，州廢，來屬。十年五月省入龍陽縣。十三年五月復置。西南有沅水。又有濱水、澧水，並流入縣境，至縣東北，入洞庭湖。

**衡州府**元衡州路，屬湖南道宣慰司。太祖甲辰年爲府。領州一，縣九。東北距布政司一千三百里。

**衡陽**倚弘治十二年，雍王府自四川保寧府遷此，正德二年除。萬曆二十九年十月建桂王府。南有回雁峰，北有岫巖峰。衡山之峰七十二，在縣者凡七，而二峰最著。東有湘水，又有烝水自西南流入焉，謂之烝口。又東北有耒水，注湘，謂之耒口。又東有酃湖。又東有新城縣，元末置。洪武十年五月省爲新城市，江東巡檢司治此。西南有松柏市巡檢司。

衡山府東北。元屬天臨路。洪武間改屬。西有衡山，有七十二峰、十洞、十五巖、三十八泉、二十五溪、九池、九

潭、九井，而峰之最大者曰祝融、紫蓋、雲密、石廩、天柱，惟祝融爲最高。東有湘江。東南有茶陵江，卽洙水也，自攸縣合攸水流入境，注於湘，曰茶陵口。東有草市、東南有雷家埠二巡檢司。

耒陽府東南。元耒陽州，直隸湖南道。洪武三年三月降爲縣。耒水在北。東有侯計山，肥水出焉，西南入耒水。又西南有羅渡巡檢司。

常寧府南。元常寧州，直隸湖南道。洪武三年三月降爲縣。西北有湘水，東有舂陵水合焉。

安仁府東，少北。西有楊梅峰。南有小江水，自郴州流入，西北流至衡山縣，合於洙水。南有安平、北有潭湖二巡檢司。

酃府東。洙水在縣東，源出洙泉，西有雲秋水流合焉。

桂陽州元桂陽路，治平陽縣，屬湖南道宣慰司。洪武元年爲府。九年四月降爲縣，省平陽縣入焉。

十三年五月升爲州。西有大湊山。南有晉嶺山。北有潭流嶺。舊皆產銀鉛砂礦。西有藍山。西北有舂陵水，又西有歸水流合焉。北有泗州寨、南有牛橋鎮二巡檢司。西北距府三百里。領縣三。

臨武州南。西北有舜峰山。西有西山，武水出焉，經宜章縣合於章水，〔西〕東北有兩路口巡檢司。又東有赤土巡檢司，後廢。

藍山州西南。舊治在縣北，洪武元年徙於此，屬郴州。二年來屬。南有黃檗山。東南有華陰山。西南有九疑山，

山有杞林峰，歸水出焉，亦名舜水，北流合舂陵水。又西有守禦寧溪千戶所，洪武二十九年三月置。東有毛俊鎮，北有乾溪鎮、西南有大橋鎮三巡檢司。又西有小山堡、張家陂二巡檢司，後廢。

嘉禾州西南。崇禎十二年以桂陽州之倉禾堡置，析臨武縣地益之。東南有歸水，自藍山縣流入，北經石門山，又東北入州界。

永州府元永州路，屬湖南道宣慰司。洪武元年爲府。領州一，縣七。東北距布政司千八百二十里。

零陵倚。北有湘水，經城西，瀟水自南來合焉，謂之湘口，有湘口關。又南有永水，源出縣西南之永山，北流入於湘水。北有黃楊堡巡檢司，本高溪市，隆慶元年徙治，更名。

祁陽府東北。舊治在縣西，景泰元年十二月徙於今治。北有祁山，上有黃鰐鎮。〔○〕西北有四望山。西有湘水。又城北有祁水，源出邵陽縣，東北流入焉。南有浯溪，下流亦入湘水。又東有歸陽市、東南有白水市、西北有水隆太平市三巡檢司。又東北有湘江市巡檢司，後移於縣東北之排山。

東安府西北。八十四渡山在縣東。又東南有湘水，自廣西全州流入。又有盧洪江，源出縣北九龍巖，經城東，下流入湘水。有盧洪市巡檢司。又有結陂市巡檢司，後廢。

道州元道州路，屬湖南宣慰司。洪武元年爲府。九年四月復降爲州，以州治營道縣省入，來屬。西有營山，營水出焉，至泥江，與江華縣之沱水合。東有瀟江，至青口，合於沱水。又西有濂溪，源出州西安定山

下，東北合宜水，謂之龍灘，下流俱入湘水。北距府百五十里。領縣四。

寧遠州東，少北。南有九疑山，介衡、永、郴、道之間。山有朱明峰，瀟水出焉。又南有舜源水，北流與江華縣沱、瀟二水合爲三江口。南有九疑、魯觀巡檢司，在九疑、魯觀二峒口。

江華州南。東南有故城。今治本寧遠衛右千戶所，洪武二十八年置。天順六年徙縣來同治。西有白芒嶺，卽萌渚嶺，五嶺之第四嶺也。東有沱水，源出九疑山之石城、娥皇二峰，下流合於瀟水。又東南有砮水，源出九疑山之女英峰，流合沱水。又東有守禦錦田千戶所，洪武二十九年置。又有錦田巡檢司。又西南有錦岡巡檢司，又有濤墟市巡檢司，後移於寧遠縣之九疑、魯觀。

永明州西，少南。北有永明嶺，卽都龐嶺，五嶺之第三嶺也。南有邀水，自廣西富川縣流入，下流注於瀟水。東南有枇杷守禦千戶所，西南有桃川守禦千戶所，俱洪武二十九年置。又有桃川市巡檢司。又西南有白面墟巡檢司。

新田州東北。崇禎十二年以寧遠縣之新田堡置。西北有春陵山，與寧遠縣界，春陵水出焉，下流至常寧縣，合於湘水。東南有白面寨巡檢司。

寶慶府 元寶慶路，屬湖南道宣慰司。洪武元年爲府。領州一，縣四。東北距布政司千二百五十里。

邵陽倚。南有高霞山。東有烝水。又北有濱水，邵水自東流合焉，有五十三灘，又有四十八灘，皆濱水所經。西北有龍回巡檢司。又北有巨口關。東北有白馬關。

新化府北。南有上梅山，其下梅山在安化縣境。東南有濱水。西南有長鄧巡檢司，尋廢。又北有蘇溪巡檢司。城步府西南。本武岡州之城步巡檢司。弘治十七年改置縣，析綏寧縣地益之，而遷巡檢司於縣東北之茅坪舖，尋又遷山口，後廢。東南有羅漢山，又有巫水，下流入於濱水。

武岡州 元武岡路，屬湖南道宣慰司。洪武元年爲府。九年四月降爲州，以州治武岡縣省入，來

屬。永樂二十二年，岷王府自雲南遷於此。北有武岡山。南有雲山。又有濱水，西南有都梁水，東北流入焉。北有蓼溪隘、峽口鎮，南有石門隘，東有紫陽關四巡檢司。東有石羊關。東距府二百八十里。領縣一。

新寧州東南。舊治在縣東。景泰二年移於沙洲原。南有夫夷水，北流合都梁水。東南有靖位，西有新寨二巡檢司。

辰州府 元辰州路，屬湖廣行省。太祖甲辰年爲府。領州一，縣六。東北距布政司千七百里。

沅陵倚。西北有大西山、小西山。東有壺頭山。西南有沅水，辰水自東北流入焉。又東有百曳、高湧、九磯、清浪等灘。又酉水在西北，東南入沅水。東有大刺，西北有明溪，又有會溪，東北有池蓬四巡檢司。又有高巖巡檢司，後廢。

盧溪府西，少南。南有沅水。西有武溪，卽濞溪也，下流合於沅水。又西有鎮溪軍民千戶所，洪武三十年二月置。

又南有溪洞巡檢司。又西有河溪、西南有院場坪二巡檢司，後廢。

辰溪府西南。東南有五城山。西北有沅水。西有辰水。又東有渡口鎮、南有晉市鎮二巡檢司，後廢。

溆浦府東南。東有紅旗洞。西有溆水，下流入沅水。南有龍潭、東北有鎮寧二巡檢司。

沅州元沅州路，直隸湖廣行省。太祖甲辰年爲府。九年四月降爲州，以州治盧陽縣省入，來屬。

北有明山。南有沅江，其源出四川邊義縣，下流至沅江縣，入洞庭湖。西有舞水，卽无水也，流入於沅水。西有晃州巡檢司。又西南有西關渡口巡檢司，後廢。東北距府二百七十里。領縣二。

黔陽州東南。東南有羅公山。南有雙石崖，一名屏風崖。景泰中，築寨置戍於此，名安江雙崖城。北有沅水。

又東有洪江，西有郎江，南有黔江，俱流入焉。東有安江巡檢司。又西有托口寨。東有洪江寨。

麻陽州北，少西。東有包茅山。西有蠟爾山，與保靖司及四川、貴州界，諸苗蠻在山下者凡七十四寨。南有辰水，自貴州銅仁府流入。西有錦水，下流入於辰州。東北有巖門巡檢司。

郴州元郴州路，屬湖南道宣慰司。洪武元年爲府。九年四月降爲州，以州治郴陽縣省入，直隸布

政司。南有黃岑山，與宜章縣界，亦曰騎田嶺，五嶺之第二嶺也，其支嶺曰摺嶺。又東北有雲秋山，與酃縣界，

雲秋水出焉。東有郴水，發源黃岑山，流合桂陽縣之耒水，下流入於湘水。又西南有桂水，下流合於耒水。西南有

石陂巡檢司。領縣五。北距布政司千八百八十里。

永興州北，少西。東南有土富山，舊有銀井。西有高亭山。東有榔水，又有白豹水，自西南流入焉，謂之森口。西有高亭，北有安福二巡檢司。

宜章州南。西南有莽山。東有漏天山。北有章水，支流曰小章水，源俱出黃岑山，有武水自西來合焉，下流入江西崇義縣界。東有赤石、南有白沙二巡檢司。

興寧州東北。南有耒水，東南有資興水流合焉。東有州門巡檢司。東南有滁口巡檢司，後移於西南之黃家壩。桂陽州西南。南有耒山，耒水所出，西北會於郴水。又東有孤山水，流入江西崇義縣，達於贛水。東有守禦廣安千戶所，洪武二十九年三月置，後廢。宣德八年六月復置。東有益將、西有鎮安、南有長樂山口、北有濠村四巡檢司。

桂東州東。西北有小桂山，桂水所出，南有漚江來合焉。又南有高分嶺巡檢司。

靖州元靖州路，直隸湖廣行省。太祖乙巳年七月爲靖州軍民安撫司。元年降爲州。三年升爲府。九年四月復降爲州，以州治永平縣省入，直隸布政司。南有侍郎山，與廣西融縣分界。東有渠水，下流合會同縣之郎江而入沅水。西有零溪巡檢司。領縣四。東北距布政司千八百五十里。

會同州東北。西有沅水，又西南有郎水，自貴州黎平府流入，又東有雄溪，一名洪江，下流俱入於沅水。南有若水



巡檢司。

通道州南。洪武十年五月省入州。十三年五月復置。北有福湖山。西有渠水，西北有播揚河，自貴州黎平府流合焉。有播揚巡檢司。又西南有收溪寨巡檢司。

綏寧州東。元屬武岡路。洪武元年屬武岡府。三年來屬。東有雙溪，卽城步縣巫水之下流也。東北有青坡巡檢司，後移於武陽。西南有臨口巡檢司。

天柱州西北。本天柱守禦千戶所，洪武二十五年五月置。萬曆二十五年改爲縣，析綏寧、會同二縣地益之。崇禎十年東遷龍塘，名龍塘縣。後東遷雷寨。後還舊治，復故名。東有沅水。西北有屯鎮汶溪後千戶所，洪武二十三年置。東有鎮遠巡檢司，後移上新市，又有江東巡檢司。

施州衛軍民指揮使司 元施州，屬四川行省夔州路。洪武初省。十四年五月復置，屬夔州府。六月兼置施州衛軍民指揮使司，屬四川都司。十二月屬湖廣都司。後州廢，存衛。北有都亭山。東有連珠山，五峰關在山下。又東南有東門山。東北有清江，自四川黔江縣流入，一名夷水，亦曰黔江，衛境諸水皆入焉，下流至宜都縣入於大江。領所一，宣撫司四，安撫司九，長官司十三，蠻夷官司五。東北距布政司千七百里。

大田軍民千戶所 洪武二十三年閏四月以散毛宣撫司之大水田置。東有小關山。西南有萬頃

湖，與西陽界。又南有深溪關。北有硝場，產硝。東北距衛二百二十里。

施南宣撫司元施南道宣慰司。洪武四年十二月因之，後廢。十六年十一月復置，屬施州。

衛。二十七年後，復廢。永樂二年五月改置長官司，屬大田軍民千戶所。四年三月升

宣撫司，仍屬衛。東有舊治。後遷夾壁龍孔，即今治也。西有前江，發源七藥山，西南流與後江合，入四川彭

水縣界。北距衛一百里。領安撫司五。

東鄉五路安撫司元東鄉五路軍民府。洪武四年十二月改置長官司，後升安撫司。領長官司三，蠻夷官司二。

搖把峒長官司元又把峒安撫司，後廢。宣德三年五月改置。

上愛茶峒長官司

下愛茶峒長官司二長官司俱元容美洞地。至大二年置懷德府，屬四川南道宣慰司。至順二年正月升宣撫

司。至正中，升軍民宣慰司。太祖甲辰年六月改軍民宣撫司，後廢。宣德三年五月改置。

鎮遠蠻夷官司宣德三年五月置。

隆奉蠻夷官司元隆奉宣撫司。洪武四年十二月改長官司，後廢。宣德三年五月改置官司。

忠路安撫司明玉珍忠路宣撫司。洪武四年改安撫司，二十三年廢。永樂五年復置，領長官司一。

劍南長官司宣德三年五月置。

忠孝安撫司元置。洪武四年十二月改置長官司，尋復故。二十三年廢。永樂五年復置。

金峒安撫司 元置。洪武四年十二月改長官司。永樂五年復故。宣德三年五月領蠻夷官司一。隆慶五年正月降爲峒長。

西坪蠻夷官司 〔九〕宣德三年五月置。

中峒安撫司 嘉靖初置。

散毛宣撫司 元至元三十年四月置散毛洞蠻夷官。三十一年五月升爲府，屬四川行省。至正六年七月改散毛營厓等處軍民宣慰司。明玉珍改散毛宣慰使司都元帥。洪武七年五月改散毛沿邊宣慰司，屬四川重慶衛。二十三年廢。永樂二年五月置散毛長官司，屬大田軍民千戶所。四年三月升宣撫司，屬施州衛。南有白水河，一名酉溪，自忠建宣撫司流入，又東南入永順司界。東北距衛二百五十里。領安撫司二。

龍潭安撫司 元龍潭宣撫司。明玉珍改長官司。洪武八年十二月改龍潭安撫司，屬四川重慶衛。二十三年廢。永樂四年三月復置，來屬。南有清江。

大旺安撫司 明玉珍大旺宣撫司。洪武八年十二月因之，屬四川。永樂五年改置，領蠻夷官司二。

東流蠻夷官司 洪武八年十二月置東流安撫司，屬四川，後廢。宣德三年五月改置，來屬。

騰壁峒蠻夷官司 宣德三年五月置。

忠建宣撫司 元忠建軍民都元帥府。明玉珍因之。洪武五年正月改長官司。六年升宣撫司。二十

七年四月改安撫司，尋廢。永樂四年復置宣撫司，屬施州衛。南有白水河，源出將軍山，西南

流，車東河自容美司來合焉。北距衛二百五十里。領安撫司二。

忠峒安撫司 元湖南鎮邊宣慰司。明玉珍改沿邊溪洞宣撫司。洪武五年正月改沿邊溪洞長官司，後廢。永樂

四年改置。西南有酉溪。

高羅安撫司 元高羅宣撫司。明玉珍改安撫司。洪武六年廢。永樂四年三月復置。領長官司一。

思南長官司 成化後置。

容美宣撫司 元容美等處宣撫司，屬四川行省。太祖丙午年二月因之。吳元年正月改黃沙靖安麻

寮等處軍民宣撫司。洪武五年二月改置長官司。七年十一月升宣慰司，後廢。永樂

四年復置宣撫司，屬施州衛。〔二〇〕西南有山河，卽淩水之上源，東入九溪衛界。西北距衛二百十里。

領長官司五。

盤順長官司 元元統二年正月置盤順府。至正十五年四月升軍民安撫司。洪武五年三月改爲長官司。

椒山瑪瑙長官司

五峰石寶長官司

石梁下峒長官司

水盡源通塔平長官司 四長官司，俱洪武七年十一月置，十四年廢。永樂五年復置。

木冊長官司 元木冊安撫司。 明玉珍改長官司。

洪武四年廢。永樂四年三月復置，屬高羅安撫

司。宣德九年六月直隸施州衛。

鎮南長官司 元宣化鎮南五路軍民府，尋改湖南鎮邊毛嶺峒宣慰司。 明玉珍改鎮南宣撫司。太祖丙午年二月

因之，尋廢。洪武八年二月復置，屬施州衛。二十三年復廢。永樂五年改置，直隸施州

衛。有酉溪。

唐崖長官司 元唐崖軍民千戶所。 明玉珍改安撫司。洪武七年四月改長官司，後廢。永樂四年三月

復置，直隸施州衛。南有黔水，卽清江之上源。

永順軍民宣慰使司 元至元中，置永順路，後改永順保靖南渭安撫司。至大三年四月改永順等處軍民安撫司。至正

十一年四月升宣撫司，屬四川行省。 洪武二年爲州。十二月置永順軍民安撫司。六年十二月升

軍民宣慰使司，屬湖廣行省，尋改屬都司。西南有水溪，卽酉水也，下流入沅陵縣界。 領州三，長官

司六。東北距布政司二千里。

南渭州司 西。 元屬新添葛蠻安撫司，後廢。 洪武二年復置，改屬。

施溶州司 東南。 元會溪施溶等處長官司，屬思州軍民安撫司，後廢。 洪武二年改置，來屬。

上溪州司 西。 洪武二年置。

騰惹洞長官司

麥著黃洞長官司

驢遲洞長官司

施溶溪長官司司南。元置。洪武七年六月因之。

白崖洞長官司元屬新添葛蠻安撫司。洪武三年改屬。

田家洞長官司洪武三年置。

保靖州軍民宣慰使司元保靖州，屬新添葛蠻安撫司。太祖丙午年二月置保靖州軍民安撫司。洪武元年九月改宣慰司。六年十二月升軍民宣慰使司，直隸湖廣行省，尋改屬都司。北有北河，自酉陽司流入，東入永順司界。又有峒河，下流與盧溪縣之武溪合。領長官司二。東北距布政司千九百七十里。

五寨長官司司南。元置。洪武七年六月因之。

箐子坪長官司司南。太祖甲辰年六月置箐子坪洞元帥府，後廢。永樂三年七月改置。

浙江 禹貢揚州之域。元置江浙等處行中書省，治杭州路，又分置浙東道宣慰使司，治慶元路，屬焉。太祖戊戌年十二月置中書分省。治寧越府。癸卯年二月移治嚴州府。丙午年十二月罷分省，置浙江等處行中書省。治杭州府。洪武三年十二月置杭州都衛。與行中書省同治。八年十月改都衛爲浙江都指揮使司。九年六月改行中書省爲承宣布政使司。領府十一，屬州一，縣七十五。爲里一萬零八百九十九。西至開化，與江南界。南至平陽，與福建界。北至太湖，與江南界。東至海。距南京九百里，京師三千二百里。洪武二十六年編戶二百一十三萬八千二百二十五，口一千四十八萬七千五百六十七。弘治四年，戶一百五十萬三千一百二十四，口五百三十萬五千八百四十三。萬曆六年，戶一百五十四萬二千四百八，口五百一十五萬三千五。

杭州府 元杭州路，屬江浙行省。太祖丙午年十一月爲府。領縣九。

錢塘倚。洪武三年四月建吳王府。十一年正月改封周王，遷河南開封府。南有鳳凰山，有秦望山。西南有靈隱

山。南有錢塘江，亦曰浙江，有三源：曰新安江，出南直歙縣；曰信安江，出開化縣；曰東陽江，出東陽縣。匯而東爲錢塘江，至會稽縣三江海口入海。西有西湖，源出武林泉。又北有運河，至秀水縣北，而接南直運河。又有安溪，卽苕溪也，自餘杭縣流入，下流至烏程縣東北，注於太湖。

仁和倚。東北有臯亭山，有臨平山，下有臨平湖，後塞。北有北新關，成化中設戶部分司於此。又有塘棲鎮。

海寧府東，少北。元海寧州。洪武二年降爲縣。南濱海，有捍海塘。西南有赭山，與蕭山縣龜山相對，浙江經其

中，東接大海，謂之海門。東南有石墩鎮巡檢司，本置縣東北硤石鎮，後遷於此，更名。西南有赭山鎮巡檢司，

本置縣西陳橋北，尋遷赭山，更名，又遷文堂山上，仍故名。又西北有長安鎮。

富陽府西。東有觀山。西南有湖狀山。東南臨富春江，卽錢塘江也。西南有東梓巡檢司，後廢。

餘杭府西北。西南有大滌山。西北有徑山。南有苕溪，源出於潛縣天目山。東北有石瀨巡檢司，後廢。

臨安府西。舊治在縣西西墅鎮。洪武初徙於今所，本吳越衣錦軍也。西有天目山，亦曰東天目，其在於潛境者

爲西天目。西北有南溪，卽東苕溪也，源出天目山，經縣南，亦曰新溪。

於潛府西。北有天目山，浮溪出焉。縣南爲紫溪，下流至桐廬縣入浙江。

新城府西南。西有葛溪，又東北有松溪合焉，至峴口入於浙江。

昌化府西。東南有柳相山。南有銅坑山。西北有千頃山。西有昱嶺，上有關。又西北有黃花嶺，上亦有關。東

南有柳溪，東流合於潛之紫溪。又有雙溪，自縣治南流入柳溪。西有手窠嶺巡檢司，遷縣西南株柳村，又遷

縣西湛村，又遷楊家塘，仍故名。

嚴州府 元建德路，屬江浙行省。太祖戊戌年三月爲建安府，尋曰建德府。壬寅年二月改曰嚴州府。



領縣六。東北距布政司二百七十里。

建德倚北有烏龍山。西有銅官山。又新安江自淳安縣流入，經城南，東陽江自西南來合焉。又東北有胥溪，來入江，謂之胥口，亦曰建德江。東有管界巡檢司。

桐廬府東北。西有富春山，一名嚴陵山。桐江在南，即浙江也，亦曰睦江。自建德縣流入，經富春山之釣臺下，曰七里灘，又東經桐君山下，曰桐江。有桐溪自縣東北流入焉，謂之桐江口，其上源即分水縣之天目溪也。有桐江巡檢司，後遷桐君山，又遷窄溪埠。

淳安府西。南有雲濛山。西有都督山，又有威平洞，亦曰青溪洞，又名幫源洞。南有新安江，自南直歙縣流入，亦曰青溪。西有街口，又有永平、南有港口三巡檢司，後廢。東有錦溪關，嘉靖中置。

遂安府西，少南。西有武強溪，有雙溪流合焉，曰三渡口，經城南，東北注於淳安之青溪。南有鳳林巡檢司，後廢。壽昌府西南。東南有巖峒山。西有壽昌溪，東北流至建德縣，入新安江。南有常樂溪，東南流至蘭溪縣，入東陽江。西有社田、西南有上梅二巡檢司。

分水府東北。東有天目溪，上源即於潛縣之紫溪及昌化縣柳溪也，下流爲桐廬縣之桐溪。又東南有前溪，自淳安縣流入，東注於天目溪。東有吳村巡檢司，後廢。

嘉興府元嘉興路，屬江浙行省。太祖丙午年十一月爲府，直隸京師。十四年十一月改隸浙江。領

縣七。西南距布政司百九十五里。

嘉興倚南有南湖，亦曰鴛鴦湖，流合運河。又有長水塘，西南接海寧，東北接海鹽縣界。又東有雙溪，東出爲華亭塘，南直松江府之漕舟，由此入運河。

秀水倚宣德五年三月析嘉興縣地置。西有運河，北經聞家湖，達南直吳江縣之運河。東北有杉青閘，又有王江涇二巡檢司。

嘉善府東。本嘉興縣魏塘鎮巡檢司，宣德五年三月改爲縣。南有華亭塘河，東有魏塘河，東北有清風涇，皆流合焉。西北有分湖，與南直吳江縣分界。又北有章練塘水，亦流合華亭塘河，達華亭縣之泖湖。東北有風涇、西北有陶莊二巡檢司，廢。

崇德府西南。元崇德州。洪武二年降爲縣。西北有運河，自德清縣流入。東南有語溪，一名語兒中涇，又名沙渚塘。又東北有石門塘水，東南接運河，北達歸安之烏鎮。

桐鄉府西，少南。宣德五年三月以崇德縣之鳳鳴鄉置。北有運河，與崇德縣接界。又有爛溪，北達吳江縣之鴛渚湖，西達湖州府潯溪。北有阜林鎮巡檢司。

平湖府東。宣德五年三月以海鹽縣之當塗鎮置。東南有故邑山。南有雅山，俗曰瓦山。又當湖在縣治東，下流出海鹽澁浦口入海。其西爲市西河，自嘉興縣流入，入於當湖。其分流南出者，則由縣東南乍浦入海；北出者，則由縣東北蘆瀝浦入海。浦傍有蘆瀝鹽場。又北有東泖，卽華亭三泖之上流。東有白沙灣巡檢司，治廣陳墅，

後遷縣東南獨山。又東南有乍浦鎮巡檢司，後遷梁莊，仍故名。

海鹽府東南。元海鹽州。洪武二年降爲縣。南有秦駐山，又有長牆山。西南有鳳凰山。東北有湯山，又有獨山，

舊置鹽場於此。東臨海，有防海塘，洪武初，以石爲之，南北計四千八百丈。又有東、西、南三海口，而西海口在縣東北，尤衝要。東北有呂港，港口有鹽場。西南有鮑郎市，有鹽課司。東北有守禦乍浦千戶所，東南有澈浦守禦千戶所，俱洪武十九年十月置。城東有海口巡檢司，後徙砂腰村，南有澈浦巡檢司，後遷秦駐山，俱仍故名。

湖州府元湖州路，屬江浙行省。太祖丙午年十一月爲府，直隸京師。十四年十一月改隸浙江。領

州一，縣六。南距布政司百九十里。

烏程倚。北有卞山，亦曰弁山。西南有石城山。南有峴山，本名顯山。西南有銅山，一名銅峴山。北有太湖，接

南直蘇、常二府界。東北有大錢湖、小梅湖二口，府境羣水皆於此入太湖。又西有苕溪，源自孝豐天目之陰，流

經毘山下，（一）出大錢湖口。又南有餘不溪，卽杭州境內之苕溪，自德清縣流經府南，匯爲玉湖，（二）復東北出

而匯於苕水，亦曰霅溪。東有後潘村巡檢司，後遷南潯鎮，仍故名。東北有大錢湖口巡檢司。

歸安倚。南有金蓋山，亦名何山。又有衡山。東有昇山，亦曰烏山，一名歐餘山。又運河在城東，源自苕溪、餘

不溪二水，分流爲運河，東北經南潯鎮，入吳江縣界，合嘉興之運河。又南有荻塘，亦曰荻港，東北接運河。其

枝流東南出烏鎮，合桐鄉之爛溪。〔一六〕又東有潯溪，卽餘不溪支流也，流經南潯。東南有璉市巡檢司。又西南有上沃埭巡檢司，後廢。

長興府西北。元長興州。太祖丁酉年三月改名長安州，壬寅年復曰長興。洪武二年降爲縣。西北有顧渚山，產茶，一名西顧山，一名吳望山。東北有太湖，與南直宜興縣分中流爲界。西有箬溪，下流入太湖。西南有荊溪，東南入於苕溪。東北有臯塘，西南有四安二巡檢司。又西有合溪，南有和平二巡檢司，廢。

德清府南，少東。東北有敢三山。東南有運河，有餘不溪，亦曰霅溪，卽苕溪別名。東北有新市鎮巡檢司。又東有下塘巡檢司，後遷五柳港口。又東有荷葉浦巡檢司，廢。

武康府西南。東有封山，一名防風山。又有禺山。西南有覆舟山。南有前溪，東北有後溪流入焉，下流入德清餘不溪。

安吉州元安吉縣。正德元年十一月升爲州。西南有故城。洪武徙於今治。東南有白陽山，舊產錫。西有苕溪。又有龍溪，卽苕溪支流。東南有獨松關巡檢司，又有遞鋪巡檢司，廢。東北距府二十里。領縣一。

孝豐州西南。成化二十三年析安吉縣地置，屬府。正德二年改屬州。南有天目山，有天目山巡檢司。又西南爲金石山，卽天目最高處。又南有苕溪，出天目山，此爲苕溪之別源。又西有松坑巡檢司。

紹興府 元紹興路，屬浙東道宣慰司。太祖丙午年十二月爲府。領縣八。西北距布政司百三十八里。

山陰倚。南有會稽山，其支山爲雲門山，又有法華山。西南爲蘭亭山。西北有塗山。北濱海，有三江口。三江

者，一曰浙江；一曰錢清江，卽浦陽江下流，其上源自浦江縣流入，至縣西錢清鎮，曰錢清江；一曰曹娥江，卽

剡溪下流，其上源自嵊縣流入，東折而北，經府東曹娥廟，爲曹娥江，又西折而北，會錢清江、浙江而入海。又西

有運河，自蕭山縣流入，又東南逕會稽縣，又東入上虞縣界。又南有鑑湖，長十四五里，俗曰白塔洋，有若耶溪

合焉。又北有白水湖，旁通運河。北有三江守禦千戶所，在浮山之陽，洪武二十年二月置。又有三江巡檢司，在

浮山桃松莊。又西北有白洋巡檢司。

會稽倚。東南爲會稽山，其東接宛委、秦望、天柱諸山。又東有銀山、錫山，舊產銀砂及錫。東南有若耶山。東有

曹娥江。東南有平水溪，南合剡溪。東北有瀝海守禦千戶所，洪武二十年二月置。又有黃家堰巡檢司，尋遷瀝

海所西，後遷上虞縣界纂風鎮，仍故名。

蕭山府西北。西南有虎爪山，東南有龜山，俱下臨浙江。龜山傍有小山曰鼈子山，浙江自縣西東北流，出其中，東

接大海，亦曰海門。東南有峽山，錢清江經其中，復北折而東，入山陰縣界。城西有運河，東接錢清江。又有湘

湖。西南有漁浦巡檢司。又西有西興，亦曰西陵，往錢塘者由此渡江。

諸暨府西南。元諸暨州。太祖己亥年正月改諸全州。丙午年十二月降爲諸暨縣。西南有新城，在五指山下，太

祖癸卯年，李文忠所築。西有長山，又有五泄山。南有句乘山。又有浣江，卽浦陽江，亦曰青弋江。又西南有

長清關、西有陽塘關二巡檢司，廢。

餘姚府東北。元餘姚州。洪武初，降爲縣。南有新城，與縣城隔江對峙，姚江經其中。南有四明山，北瀕海。姚

江源自縣西南太平山，一名舜江，西北流至上虞縣，乃東北出，經縣南。又東爲慈溪之前江。東北有燭溪湖，引流爲東橫河。西有牟山湖，引流爲西橫河，俱注於姚江。又西北有臨山衛，洪武二十年二月置。東北有三山守

禦千戶所，一名潛山，亦洪武二十年二月置。又東北有三山巡檢司，治金家山上，尋遷破山。北有眉山巡檢司，

治眉山寨，尋遷縣西北湖海頭。又有廟山巡檢司，治廟山寨，尋遷上虞縣界中源堰，仍故名。

上虞府東。西北有夏蓋山，北枕海，南臨夏蓋湖。西南有東山。東有覆卮山，接嵊縣界。又東有通明江，卽姚江

上流。又有運河，在縣治前。又西北有白馬湖，北接夏蓋湖，其相連者有上妃湖，亦曰上陂湖，引流爲五夫

湖，〔二七〕東北達於餘姚之西橫河。又西有梁湖巡檢司，本治梁湖，尋遷百官市，仍故名。

嵊府東南。東有丹池山。東北有嵊山。北有嵒山，又有清風嶺。西有太白山。南有剡溪，源出天台諸山，下流爲

曹娥江。西有長樂鎮、西北有管解寨二巡檢司，廢。

新昌府東南。東有沃州山。東南有天姥山。又東有東溪，源出天台山，西北流入嵊縣界。南有彩霞鎮、又有豐

樂、又有善政三巡檢司，後廢。

寧波府元慶元路，屬浙東道宣慰司。太祖吳元年十二月爲明州府。洪武十四年二月改寧波。領縣

## 五。西北距布政司三百六十里。

鄞倚。東有鄞山。西南有四明山，周八百餘里。東有灌頂山，舊產鐵。東南有阿育王山，有太白、天童諸山。東北濱海。有鄞江，一名甬江。東南有奉化江，西北有慈溪，皆流合焉。西南有小江湖，又西有廣德湖，東有東錢湖，皆引流入鄞江。北有龍山守禦千戶所，洪武十九年十一月置。東有甬東巡檢司，治甬東隅，後遷定海縣東南竹山海口，仍故名。又有岱山、又有螺峰二巡檢司，後廢。

慈谿府西北。元曰慈溪。永樂十六年改「溪」爲「谿」。西南有車廐山。東北濱海。南有慈谿，一曰前江，卽姚江下流也，藍溪、文溪諸水皆流合焉。西北有鳴鶴鹽課司。又觀海衛亦在西北，洪武十九年十一月置。又有松浦巡檢司，治浦東，尋遷浦西。又有向頭巡檢司，治向頭寨，尋遷洋浦，廢，後復。

奉化府南。元奉化州。洪武二年降爲縣。南有蓬島山，又有天門山。西北有雪竇山。北有奉化江，亦曰北渡江，又謂之剡溪。東有市河，東北有趙河，皆南流入焉。東有塔山、東南有鮎埼二巡檢司。又有公棠、連山、柵壩、東宿四巡檢司，廢。

定海府東北。東有候濤山，一名招寶山，上有威遠城，山麓有靖海城，俱嘉靖三十九年置。東北皆濱海。海中有舟山，有金塘山，有蛟門山，又有普陀落伽山，有大謝、小謝山。南有大浹江，其上流卽鄞江，分流爲小浹江，並入海。南有清泉等鹽場。又東北有定海衛，本定海守禦千戶所，洪武十四年四月置，二十年二月升爲衛。東南有穿山後千戶所，洪武二十七年九月置。又有郭衢守禦千戶所，大嵩守禦千戶所，俱洪武十九年十一月置。又有

舟山中中千戶所，舟山中左千戶所，本元昌國州，洪武二年降爲縣，二十年六月，縣廢，改置。南有上岸太平島，西有管界寨二巡檢司。又西北有施公山、南有長山二巡檢司，後廢。又南有霞嶼巡檢司，本名崎頭，正統間更名，後廢。又舟山東南有寶陀、西北有岑港，又舟山東有岱山、西南有螺峰四巡檢司，後廢。

象山府東南。南有石壇山，亦曰壇頭山。東南北三面皆濱海。其南有三蓼山，一名三仙島，俱在海中。南有玉泉鹽場。又西南有昌國衛，本昌國守禦千戶所，洪武十二年十月置於舟山，十七年九月改爲衛。二十年來徙縣南天門山，二十七年遷縣西南後門山。又山西南有石浦守禦前、後二千戶所，俱洪武二十年置。西北有錢倉守禦千戶所，洪武十九年十一月置。西有爵溪守禦千戶所，洪武三十年十二月置。北有陳山巡檢司，治陳山，尋遷縣東南。西有爵溪巡檢司，遷治姜嶼渡。南有石浦巡檢司，遷治青山頭。又東有趙巖巡檢司，自寧海縣遷此。俱仍故名。

台州府元台州路，屬浙東道宣慰司。洪武初，爲府。領縣六。西北距布政司四百四十里。

臨海倚。西南有括蒼山，一名眞隱山。又東南有海門山，有金鰲山，皆濱海。南有澄江，一名靈江，流合天台、仙居諸山之水，至黃巖縣入海。又大海在東，中有芙蓉山、高麗頭山。又有杜瀆鹽場。又海門衛亦在縣東，洪武二十年二月置。其北爲前千戶所，洪武二十八年置。東北有桃渚前千戶所，洪武二十年九月置。東有蛟湖巡檢司，遷治海口陶嶼。又有連盤巡檢司，遷治海口長沙。俱仍故名。



黃巖府東南。元黃巖州。洪武三年三月降爲縣。南有委羽山。東有大海。西北有永寧江，卽澄江下流。東南有鹽場，又有長浦巡檢司。

天台府西南。西有天台山。北有赤城山，又有石橋山，皆天台支阜也，其絕頂曰華頂峰。又西南有始豐溪，卽澄江上源。又東有榴溪，產鐵。其東爲甬溪。又西有胡寶巡檢司，廢。

仙居府西南。西北有蒼嶺，卽括蒼山。又有永安溪，下流亦會於澄江。又西南有曹溪，東有彭溪，俱流合於永安溪。西有田寺巡檢司，後廢。

寧海府東北。北有天門山。西北有龍鬚山，舊產銅鐵。東濱海。東北有鄞江，與象山縣界。南有海游溪，有寧和溪，又有東溪，東有鐵砂，冶之成鐵，俱導流入海。又有梅輿鎮，舊有鐵場。又南有健跳千戶所，洪武二十年九月置。東有越溪，又有長亭，北有鐵場，南有曼輿，東南有寶輿五巡檢司。

太平府東南。成化五年十二月以黃巖縣之太平鄉置，析樂清地益之。南有大雷山。西北有王城山。（二）西南有靈山，與玉環山接。東南濱海，曰大閭洋，中有松門、石塘、大陳等山。又東有遷江，一名新建河，至縣北曰官塘河，北抵黃巖縣，東入海。東有松門衛，本松門千戶所，洪武十九年十二月置，二十年六月升爲衛。東北有新河千戶所，洪武十九年十二月置。南有隘頭千戶所，西南有楚門千戶所，俱洪武二十年二月置。又東有盤馬，西有二山，又有蒲岐三巡檢司。南有沙角巡檢司，本治岐頭山下，後遷今治。西南有小鹿巡檢司，遷治楚門所之橫山後。西有溫嶺巡檢司，廢。

金華府 元婺州路，屬浙東宣慰司。 太祖戊戌年十二月爲寧越府。庚子年正月曰金華府。領縣八。

東北距布政司四百五十里。

金華倚。北有金華山。南有銅山，舊產銅。城南有東陽江，亦曰婺港，自東陽縣流經此。又有南溪，自縉雲縣來合焉，謂之雙溪，亦曰穀溪，合流至蘭谿而會於信安江。

蘭谿府西。元蘭谿州。洪武三年三月降爲縣。東有銅山，舊產銅。西南有蘭溪，卽穀溪也，亦曰大溪，一自衢州之衢港，一自金華之婺港，會於西南蘭陰山下，北入嚴州界。西北有平渡巡檢司。北有靈泉鄉、龍巖鄉二巡檢司，廢。

東陽府東。東南有大盆山，東陽江出焉，經縣北，謂之北溪，亦曰東溪，西南有畫溪，下流至義烏縣入焉。東有永寧巡檢司。又東南有瑞山、玉山。南有興賢、仁壽二巡檢司，廢。

義烏府東，少北。南有烏傷溪，卽東陽江。西有智者同義鄉、南有雙林明義鄉、北有龍祈鎮三巡檢司，廢。

永康府東南。東南有銅山，舊產銅。南有南溪，亦曰永康溪。又東有孝義寨、南有義豐鄉、東南有合德鄉三巡檢司，後廢。

武義府南，少東。東北有永康溪，又有葵道市。西有苦竹市。又北有白溪口市。

浦江府東北。西有深農山，浦陽江出焉，東流入諸暨縣界。東有楊家埠巡檢司，後廢。

湯溪府西南。成化七年正月析蘭谿、金華、龍游、遂昌四縣地置。南有銀嶺。西北有穀江，二石卽信安江。

衢州府 元衢州路，屬浙東道宣慰司。

太祖己亥年九月爲龍游府。

丙午年爲衢州府。

領縣五。東北

距布政司五百六十里。

西安倚。永樂二十二年建越王府，宣德二年除。西有巖山。南有爛柯山，又有爵豆山，舊出銀。又西北有銅山，

舊出銅、錫、鉛。城西南有衢江，其上源曰大溪，自江山縣流入。又有西溪，亦曰信安溪，自開化縣發源，流至此與大溪合焉，曰雙港口。又東有定陽溪，一名東溪，自遂昌縣流入，合於衢江。西南有嚴剝，東南有板固二巡檢司。

龍游府東。東有龍丘山。北有梅嶺。又有穀溪，卽衢江也，一名盈川溪。又南有靈溪，自遂昌縣流經縣南靈山下，又東北入焉。東有湖頭鎮巡檢司。又北有水北、南有靈山二巡檢司，廢。

常山府西。有三衢山。東有常山，卽信安嶺也。北有金川，一名馬金溪，自開化縣流入。東有文溪，自江山縣流入，合於金川，爲信安溪上源。北有下坑、東南有鎮平二巡檢司，廢。

江山府西。東南有江郎山，有仙霞嶺，仙霞關在其上。城東有大溪，仙霞嶺水所匯也。又西有文溪。南有東山巡檢司，本治仙霞嶺下，後遷嶺上。又有小竿嶺巡檢司，廢。

開化府西北。金溪在城東，其源一出馬金嶺，一出百際嶺，至城北合流而南，卽金川上源也。北有金竹嶺巡檢司。

又西有雲臺、北有低坂、又有馬金、南有華埠四巡檢司，廢。

處州府 元處州路，屬浙東道宣慰司。

太祖己亥年十一月爲安南府，尋曰處州府。領縣十。北距布

政司七百三十里。

麗水倚大溪在城南，一名洄溪，自龍泉縣流經此，下流至永嘉縣，入於海。又東有好溪，本名惡溪，東南達於

大溪。

青田府東南。西有大、小連雲山。南有南田山。又有南溪，卽大溪也，亦曰青溪，自麗水縣流入。西南有小溪流合

焉。南有淡洋巡檢司。又北有黃壇巡檢司，廢。

縉雲府北。東有仙都山，亦名縉雲山。又有管溪官山。西南有馮公嶺，一名木合嶺，一名桃花隘。又東有好溪，

源出縣東北之大盆山，有管溪自東流合焉。又北有南源溪，亦曰南溪，下流爲永康溪，入於東陽江。

松陽府西。北有竹峰嶺。〔三〕西有松溪，南有竹溪流入焉，下流至麗水縣，入於大溪。又西南有淨居巡檢司，廢。

遂昌府西。南有雙溪，有二源，至縣南合流。又東經西明山南，分爲二，其一入龍泉縣之大溪，其一爲東溪，入松

陽縣，爲松溪。北有馬步巡檢司。

龍泉府西南。南有匡山，建溪之水出焉。南有大溪，源出臺湖山，又有靈溪，自縣北流合焉，東入雲和縣界。南有

慶元巡檢司，治查田市。

慶元府西南。洪武三年三月省。十三年十一月復置。西南有松源水，南流入福建，爲松溪縣之松溪。

雲和府西南。景泰二年析麗水縣地置。南有大溪，西有黃溪流入焉，東入麗水縣界。又西有七赤渡。東有石塘隘。

宣平府北。本麗水縣之鮑村巡檢司。景泰三年改爲縣，而徙巡檢司於縣之後陶，仍故名，尋廢。西北有礪坑山，舊產銀。南有玉岩山，又有會高山，產礦。又南有虎蹄溪，會流於麗水縣之大溪。

景寧府南。景泰五年析青田縣置。南有敕木山。東有礦坑嶺。西有彪溪，東北有大匯灘，下流皆注於青田縣之大溪。北有沐溪巡檢司，遷縣南大滌，仍故名。又西有盧山巡檢司，後廢。東有龍首關，又有龍匯關、白鹿關，俱嘉靖中置。

溫州府元溫州路，屬浙東道宣慰司。洪武初，爲府。領縣五。西北距布政司八百九十里。

永嘉倚。西有岷岡山，又有鐵場嶺。南有大羅山。東濱海。又永寧江在城北，一名甌江，一名永嘉江，自蒼括諸溪匯流入府界，又東注於海。江中有孤嶼山，與北岸羅浮相望。又西北有安溪，東北有楠溪，俱注於甌江。城西南又有會昌湖，東有寧村守禦千戶所，洪武二十年二月置。東南有中界山巡檢司，後遷縣東永昌堡。

瑞安府南。元瑞安州。洪武二年降爲縣。正德六年五月徙縣城於故城西，去海三丈五尺，以避潮患。西有陶山。北有帆游山。城南有安陽江，源出福建政和縣及青田縣界，合流至此，曰瑞安江，亦曰飛雲江，渡處有飛雲關，

東接海口。又縣東海岸中有鳳凰諸山。又縣東北有海安守禦千戶所，縣東南有沙園守禦千戶所，俱洪武二十  
年二月置。東有東山巡檢司，本名梅頭，治梅頭寨，後遷，更名。

樂清府東北。東有北雁蕩山。南濱海，有玉環山，在海中。又西北有荆溪。又縣治傍有東、西二溪。西南有館頭江。西有象浦河，東北有石馬港，下流皆達海。有長林鹽場。又西有盤石衛，洪武二十年二月置。東有盤石守禦後千戶所，成化五年置。東北有蒲岐守禦千戶所，亦洪武二十年二月置。西有館頭巡檢司，遷治縣西南岐頭寨，後復。東南有北監巡檢司，治玉環山下，尋遷縣東北蔡畧，又遷縣東白沙嶺，又遷鸚頭，又遷密畧山下，仍故名。

平陽府西南。元平陽州。洪武三年降爲縣。西南有南雁蕩山，有玉蒼山。又東南海中有大巖頭山，有南堯山。又西有前倉江，亦曰橫陽江，東南經江口關注於海。南有天富南鹽場。又南有金鄉衛，有蒲門守禦千戶所，東北有壯士守禦千戶所，皆洪武二十年二月置。東南有鮑贖，又有斗門二巡檢司。南有江口巡檢司，治下埠，後遷渡頭。又東有仙口巡檢司，遷縣南麥城山，仍故名。又東南有龜峰巡檢司，廢。

泰順府西南。景泰三年以瑞安縣羅洋鎮置，析平陽縣地益之。南有分水山，上有關，爲浙、閩分界處。又西有白溪，下流至福建寧德縣入海。又東有仙居溪，流入瑞安境入海。北有池村巡檢司。南有三冠巡檢司，本洋望，後更名。東南有鴉陽巡檢司，後廢。又羅陽第一關在縣東。

## 校勘記

〔一〕曰陸口亦曰蒲圻口 原作「曰陸，曰蒲圻口」，脱「口」亦「兩字」，據明史稿志二一地理志、寰字通志卷五〇、明一統志卷五九補「口」字，又據本志文例補「亦」字。本志下文有「蒲圻河卽陸水也」，可證此處是一地二名。

〔二〕東有富池湖 原脱「富池」兩字，據寰字通志卷五〇、明一統志卷五九、讀史方輿紀要卷七六補。

〔三〕源出房縣 房縣，原作「房陵縣」，據本志鄖陽府房縣條、明史稿志二一地理志、寰字通志卷五二、明一統志卷六〇改。

〔四〕東北有高雞寨巡檢司 原脱「有」字，據本志行文例補。

〔五〕經宜章縣合於章水 原脱「宜」字，據寰字通志卷五六、明一統志卷六四補。按下文彬州有宜章縣。

〔六〕北有祁山上有黃巖鎮 黃巖鎮，明史稿志二一地理志作「黃巖嶺」。 寰字通志卷五八、明一統志卷六五、清一統志卷二八二都把祁山和黃巖嶺分作兩座山。黃巖嶺在縣北三十里，祁山在縣北十五里。

〔七〕九年四月復降爲州以州治永平縣省入 原脱「九年」兩字及「治」字。「九年」，據明史稿志二一

地理志、太祖實錄卷一〇五、洪武九年四月甲午條、寰宇通志卷六〇、明一統志卷六六補。「治」字，據明史稿和本志文例補。

〔八〕十六年十二月復置 十二月，太祖實錄卷一五八繫此事於洪武十六年十一月乙卯。

〔九〕西坪蠻夷官司 西坪，本書卷三一〇施州傳、明史稿傳一八四施州傳、宣宗實錄卷四三宣德三年五月戊寅條、明一統志卷六六都作「西坪」。

〔一〇〕屬施州衛 原闕「屬」字，空一格，據本志文例補。

〔一一〕距南京九百里京師三千二百里 三千，寰宇通志卷三三、明一統志卷三八作「四千」。

〔一二〕洪武二十六年編戶二百一十三萬八千二百二十五 二百一十三萬，原作「一百一十三萬」，據明史稿志二一地理志、諸司職掌戶部改。

〔一三〕有防海塘 防海塘，原作「防備塘」，據明史稿志二一地理志、明一統志卷三九改。

〔一四〕流經昆山下 昆山，原作「昆山」，據明史稿志二一地理志、明一統志卷四〇改。讀史方輿紀要卷九卷九一昆山下說：「昆，近也，以近府城而名。」

〔一五〕匯爲玉湖 玉湖，原作「王湖」，據明史稿志二一地理志、明一統志卷四〇、讀史方輿紀要卷九一改。

〔一六〕合桐鄉之爛溪 爛溪，原作「瀾溪」，據本志上文桐鄉下、明史稿志二一地理志桐鄉下、清一統



志卷二二〇改。

〔二七〕引流爲五夫湖 五夫湖，明史稿志二二地理志作「五夫河」。

〔二八〕西北有王城山 王城山，原作「玉成山」，據明一統志卷四七、清一統志卷二二九改。讀史方輿紀要卷九二王城山下注：「相傳越王失國嘗保此。」

〔二九〕西北有穀江 穀江，明史稿志二二地理志、寰宇通志卷二八、明一統志卷四二作「澱江」。

〔三〇〕北有竹峪嶺 竹峪嶺，原作「竹喀嶺」，據明史稿志二二地理志、明一統志卷四四、讀史方輿紀要卷九四改。嘉慶重修一統志卷三〇五竹峪嶺下有「竹峪橋」，字亦作「峪」。



# 明史卷四十五

## 志第二十一

### 地理六

福建 廣東 廣西

福建 禹貢揚州之域。元置福建道宣慰使司，治福州路。屬江浙行中書省。至正十六年正月改宣慰司爲行中書省。太祖吳元年十二月平陳友定。洪武二年五月仍置福建等處行中書省。七年二月置福州都衛。與行中書省同治。八年十月改福州都衛爲福建都指揮使司。九年六月改行中書省爲承宣布政使司。領府八，直隸州一，屬縣五十七。爲里三千七百九十七。北至嶺，與浙江界。西至汀州，與江西界。南至詔安，與廣東界。東至海。距南京二千八百七十二里，京師六千一百三十三里。洪武二十六年編戶八十一萬五千五百二十七，口三百九十一萬六千八百六。弘治四年，戶五十萬六千三十九，口二百一十萬六千六十。萬曆六年，戶

五十一萬五千三百七，口一百七十三萬八千七百九十三。

福州府 元福州路，屬福建道。太祖吳元年爲府。領縣九。

閩倚。南有釣臺山，亦曰南臺山。東南有鼓山。南有方山，一名甘果山，下有官母嶼，有巡檢司。東南濱海。南有閩江，亦曰建江，自南平縣流入府界。東南納羣川之水，至府西曰洪塘江，分二流，南出曰陶江，東出曰南臺江，至鼓山下復合爲一。又東南有馬頭江，自永福縣流入，曰西峽江，又東有東峽江流合焉，又東南至五虎門，入於海。東有閩安鎮巡檢司。

侯官倚。西有旂山，有雪峯山，有建江，又有西禪浦。西南有陽崎、吳山、鳳岡、澤苗、延澤、仙坂等六浦，皆建江支分，仍合正流入海。西北有懷安縣，洪武十二年移入郭內，與閩、侯官同治，萬曆八年九月省。西北有竹崎，又有五縣寨二巡檢司。

長樂府東，少南。東濱海，有海堤。北有馬頭江。又東有守禦梅花千戶所，洪武二十一年二月置。東北有石梁蕉山，東南有松下鎮二巡檢司。又東有小社山巡檢司，後移治大社澳。

福清府南，少東。元福清州。洪武二年二月降爲縣。東南際海，有鹽場，海中有海壇山，又有小練山。南有龍江，又有逕江。東南有海口，江皆匯流入海。又東有鎮東衛，東南有守禦萬安千戶所，俱洪武二十一年二月置。又有澤朗山，有牛頭門，又南有壁頭山三巡檢司。又東有海口鎮巡檢司，洪武二十年移於長樂縣之松下鎮。

連江 府東北。東北濱海，海中有北茭鎮巡檢司。南有連江，東入海。東北有守禦定海千戶所，洪武二十一年二月置。

羅源 府東北。東濱海。西有羅川，南流分三派入海。南有應德鎮。

古田 府西北。建江在縣南，自南平縣流入，經城南，有大溪流合焉，謂之水口。又東南逕模天嶺下，江流至此始出險就平，東入閩清縣界。東有杉洋鎮，出銀坑，有巡檢司，後廢。又西南有谷口鎮、西北有西溪鎮二巡檢司，尋廢。

閩清 府西北。西南有大帽山。北有建江，西南有梅溪流合焉。東有青窰鎮巡檢司，廢。

永福 府西南。西南有高蓋山，又南有陳山。東有東溪，匯諸山溪之水，下流會於福清之龍江而入海。又有滌門巡檢司，後移於嵩口埕，尋復故。

興化府 元興化路，屬福建道宣慰司。洪武元年爲府。領縣二。北距布政司二百八十里。

莆田 倚。東南濱海，海中有湄洲嶼，又有南日山，俱東與琉球國相望。又南有木蘭溪，北有延壽溪，東北有荻蘆溪，又有通應港，俱會流入海。又西北有興化縣，正統十三年四月省。東有平海衛，東南有守禦莆禧千戶所，俱洪武二十一年二月置。東有嶠頭、西北有大洋寨、東南有吉丁三巡檢司。東有沖沁巡檢司，本治尋陽，後徙興福。又有青山巡檢司，本治武盛里南哨，後徙奉國里。東南有南日山巡檢司，後徙新安。東北有迎仙寨巡檢司，

後移鼓樓山。東有峙頭、東南有小峙二巡檢司，後廢。

仙游府西。北有二飛山。東北有何嶺。南臨九鯉湖，湖在萬山中，下流入莆田縣界，合於延壽溪。西有三會溪，卽木蘭溪上源。西有白嶺巡檢司，後遷於文殊寨。南有楓亭市、西有潭邊市二巡檢司，後廢。

建寧府 元建寧路，屬福建道宣慰司。洪武元年爲府。領縣八。四年正月置建寧都衛於此。八年

十月改爲福建行都指揮使司。東南距布政司五百二十五里。

建安倚。東北有鳳凰山，產茶。東有東溪，卽建江，自浙江慶元縣流經此，又西合於西溪。又東南有壽嶺巡檢司。

甌寧倚。西有西溪，源出崇安縣，東會諸溪之水，流入縣境，又東合於東溪，南入延平府界。西北有營頭街巡檢司。

建陽府西北。西北有西山。東南有錦江，亦曰交溪，有二源，合流於縣東東山下，南流達於建溪。

崇安府西北。南有武夷山，中有清溪，九曲流入崇溪。西北有分水嶺，上有分水關巡檢司。其水西流者入江西

境，東流者入縣境，卽崇溪源。俗謂之大溪，經城西而南出，亦謂之西溪。其別源出縣東北之岑陽山，亦曰東溪，

西南流合於西溪，又南合武夷水而入建陽縣界，卽錦江之上源也。又西北有溫林、岑陽、桐木、焦嶺、谷口、寮

竹、觀音等關，與分水關爲崇安入關。

浦城府東北。北有漁梁山，建溪之源出焉。又有蓋仙山，有黎嶺，又有楓嶺，一名大竿嶺，皆浙、閩通途。又東北

有柘嶺，與浙江麗水縣分界，柘水出焉，流合大溪。又南有南浦溪，亦曰大溪，卽建溪也，下合建陽之交溪。東

有高泉、東北有溪源、西北有盆亭三巡檢司。

松溪府東。東有萬山。東北有鷺峯山，接浦城及浙江之龍泉界。南有松溪，源出浙江慶元縣，亦謂之松源水，又西有杉溪，下流俱入於建溪。北有二十四都巡檢司。南有東關巡檢司，後遷於烏鞍嶺，又遷於鐵嶺，又遷於峽橋。

政和府東。南有七星溪，源出縣東之銅盤山，下流合於松溪。又東有丹溪，流經福安縣入海。又東南有赤巖巡檢司。

壽寧府東。景泰六年八月以政和縣楊海村置，析福安縣地益之。東有蟾溪，卽福寧州長溪上源也。東有漁溪巡檢司，後遷縣北之官臺山，又遷斜灘鎮。

延平府元延平路，屬福建道宣慰司。洪武元年爲府。領縣七。東南距布政司四百五里。

南平倚。南有九峯山。東北有衍仙山。城東南有劍溪，卽建江也，亦曰東溪，自建寧府流入，南經黯淡灘，又西逕劍津，與西溪合。西溪出汀、邵二府之境，至縣西，合於沙縣之沙溪，爲沙溪口；又東至劍津，合於東溪；又南至尤溪口，合於大溪，亦名南溪；又東至福州府，入於海；俗亦謂之三溪。東南有蒼峽、西北有大曆二巡檢司。將樂府西。南有天階山。西北有百丈山。南有將溪，亦曰大溪，〔一〕卽西溪之上源也。又西北有梅溪，自邵武界流入，合於大溪。又北有萬安寨巡檢司。

**沙** 府西南。西北有幼山。縣治南有沙溪，亦名太史溪，自永安縣流入，經縣東，有霹靂等灘，下流合於西溪。北有

北鄉寨巡檢司。

**尤溪** 府南。北有丹溪嶺，一名桃木嶺，下有丹溪。東有尤溪，其上源一出龍巖縣，一出德化縣，合流於縣西南，又北流會湯泉等二十溪，北出尤口，入建溪，亦曰湖頭溪。西有英果砦，又有高才坂二巡檢司。

**順昌** 府西，少北。南有徘徊嶺。西北有順陽溪，源出建陽縣，又東經縣南，與將溪合，又東經沙口，合邵武縣之沙溪，又東經縣西，與西溪合，西溪卽邵武縣之紫雲溪也，又東入南平縣界，爲南平之西溪。又西北有仁壽鎮巡檢司。

**永安** 府西南。本沙縣之浮流巡檢司，正統十四年置永安千戶所於此。景泰三年改置縣，析尤溪縣地益之。東北有貢川山。東南有石羅山。西有燕溪，四源合流，經城東北，下流爲沙縣之沙溪。又西有安砂鎮、西南有湖口寨二巡檢司。又西北有黃楊巡檢司，廢。

**大田** 府西南。嘉靖十五年二月以尤溪縣之大田置，析永安、漳平、德化三縣地益之。北有五臺山。南有大仙山。東有銀瓶山，產銀鐵。又南有尤溪，自龍岩縣流入，又東入尤溪縣境。又東南有花橋巡檢司。又西南有桃源店巡檢司，本屬漳平縣，後來屬。北有英寨、西南有安仁隘二巡檢司，後廢。

**汀州府** 元汀州路，屬福建道宣慰司。洪武元年爲府。領縣八。東距布政司九百七十五里。

**長汀** 倚。北有臥龍山。又北有新樂山，貢水出焉，流入江西界。西有新路嶺。東有鄴江，卽東溪，亦曰左溪，自



寧化縣流入，下流經廣東大埔縣入海，中有五百灘，亦謂之汀水。又東南有正溪，西有西溪，北有北溪，南有南溪，俱合於東溪。又西有古城寨巡檢司。

寧化 府東北。南有潭飛淦。又有大溪，源出縣北萬斛泉，分流爲清流縣之清溪，其正流入長汀縣，爲鄞江上流。北有安遠寨巡檢司。

上杭 府南。西有金山，上有膽泉，浸鐵能成銅。西南有羊厨山，產礦。南有大溪。

武平 府西南。北有黃公嶺。南有化龍溪，下流入廣東程鄉縣。西南有武平城，洪武二十四年正月置武平千戶所於此。東南有象洞巡檢司，後移於縣西南之懸繩隘。北有永平寨巡檢司，後移縣西北之貝寨。

清流 府東北。南有豐山，東南有鐵石山，南臨九龍溪，有鐵石磯頭巡檢司。西南有清溪，自寧化縣流入，東北合半溪，又東南經九龍灘而入永安縣界，亦曰龍溪，卽燕溪之上源。

連城 府東南。本曰蓮城，洪武十七年後改「蓮」曰「連」。(一)東有蓮峯山。南有文溪，下流達於清流縣之清溪。西有北園寨巡檢司，後遷於縣南之朗村隘，後又遷於縣西南之新泉隘。

歸化 府東北。成化七年正月以清流縣之明溪鎮置，析將樂、沙縣、寧化三縣地益之。北有鐵嶺。南有歸化溪，下流合將樂縣之將溪。東有夏陽巡檢司。

永定 府南。成化十四年以上杭縣溪南里之田心地置，析勝運等四里益之。西有大溪，卽汀水，自上杭縣流經此，又東入廣東大埔縣界。東南有三層嶺巡檢司。東北有太平巡檢司，後徙高坡。西南有興化巡檢司，治溪南里。

古鎮，尋廢，復置，後遷於上杭縣之峯頭。

**邵武府**

元邵武路，屬福建道宣慰司。

太祖吳元年爲府。領縣四。東南距布政司六百七十里。

**邵武**

倚。東有三臺山。東南有七臺山，又有道人峯。又有樵溪，源自樵嵐山，經城內，出北門，合紫雲溪，流至順

昌縣爲順陽溪。

又東南有水口巡檢司。又東有拏口、南有同巡、東北有楊坊三巡檢司，廢。

**光澤府**

西北有雲際嶺。西北有杉嶺，杉關在其上，與江西南城縣接界。杭川出焉，亦名大溪，下流入紫雲溪。

又有大寺寨巡檢司，在杉關東。又西北有黃土關。

**泰寧府**

西南。西有金鏡山。西北有大杉嶺。西有二十四溪，南有灘江流合焉，〔三〕下流會於樵溪。

**建寧府**

西南。北有百丈嶺，藍溪出焉。南有綏江，源出金鏡山，一名灘江，亦名寧溪，至綏城口，合藍溪流入泰寧

縣界。西有西安巡檢司，本治里心保，後遷丘坊隘，尋廢，後復置，後又遷新安保之黃泥鋪。

**泉州府**

元泉州路，屬福建道宣慰司。

洪武元年爲府。領縣七。東距布政司四百十里。

**晉江**

倚。東北有泉山，一名清源。東南有寶蓋山。南有靈源山。東南濱海，有鹽場。海中有澎湖嶼。南有晉江，

自南安縣流入，經城西石塔山下，又東南至岱嶼入海。東北有洛陽江，南流入海。又東南有永寧衛，南有守禦

福泉千戶所，俱洪武二十一年二月置。東南有祥芝，又有烏潯、南有深滬，又有圍頭四巡檢司。西南有安平城，

嘉靖中築。東南有石湖城，萬曆中築。

南安 府西，少北。東南濱海。南有黃龍溪，卽晉江之上流，西有桃林溪流入焉。南有石井巡檢司。又西北有澳頭，西南有達河二巡檢司，後廢。

同安 府西南。西有文圃山。南濱海，有鹽場。西北有西溪，流合縣東之東溪，縣西之苧溪，又東南注於海。西南有守禦金門千戶所，西有守禦高浦千戶所，俱洪武二十一年二月置。又西南有永寧中左千戶所，在嘉禾嶼，卽廈門也，洪武二十七年二月置。西有苧溪，南有塔頭山，東南有田浦，又有陳坑四巡檢司。又西南有白礁巡檢司，後移於縣西之灌口寨。東南有烈嶼巡檢司，後移於石潭港口。又有官澳巡檢司，後移於踏石寨。又有峯上巡檢司，後移於縣西之下店港口。

惠安 府東北。東南濱海，有鹽場。西有洛陽江。又東南有守禦崇武千戶所，洪武二十一年二月置，嘉靖中移於縣東北。城東有黃崎，南有獼窟，東南有小岞，東北有峯尾四巡檢司。又東北有塗嶺，又有沙格，東南有小兜三巡檢司，洪武二十年廢。

安溪 府西。西北有佛耳山。南有藍溪。又西北有源口渡巡檢司，後遷白華堡，尋復。

永春 府西北。西北有雪山，桃林溪出焉，東逕南安縣，北合藍溪，爲雙溪口，又東逕南安縣，南合於黃龍溪。西有陳岩寨巡檢司，洪武中廢。

德化 府西北。西北有戴雲山。西有太湖山。南有丁溪，又有漈溪，合而北流，入興化仙遊境。又西北有高鎮巡

檢司，本東西團，後徙治，更名。東南有虎豹關。

漳州府 元漳州路，屬福建道宣慰司。洪武元年爲府。領縣十。東北距布政司七百里。

龍溪 倚。東有岐山。西有天寶山。北有華封嶺，一名龍頭嶺。東南濱海，海中有丹霞等嶼。又東北有九龍江，亦名北溪，其上源出長汀及沙縣，流入縣界，歷龍頭嶺下，謂之峽中，至縣東出峽，爲柳營江，又南有南溪流入焉。又東南爲鎮門港，入於海。有柳營江巡檢司。又南有九龍嶺巡檢司。

漳浦 府南。南有梁山，又東南有良山，與梁山相峙。東北有大武山。縣東南兩面皆濱海。南有漳江，亦曰雲霄溪，合李澳溪入於海。又有石塹溪。東北又有鎮海衛，東有守禦六鼇千戶所。澳東南有古雷，又有後葛，東有井尾澳，西南有盤陀嶺四巡檢司。又東南有青山巡檢司，後徙治月峙，又西南有雲霄鎮，俱洪武二十一年二月內置。

龍巖 府西。東有龍巖山，又有東寶山，舊產銀鉛。西有紫金山。北有九侯山。又南有龍川，下流入漳平界，爲九龍江上源。東北有雁石巡檢司，後移於皞林口。

長泰 府東。南有長泰溪，下流入九龍江。東南有朝天嶺巡檢司，後移於溪口。

南靖 府西。舊治在西南，雙溪之北。嘉靖四十五年北徙大帽山麓。萬曆二十三年復還舊治。北有歐寮山。南有雙溪，入龍溪縣界，爲南溪。北有永豐，西北有和溪二巡檢司。又有小溪，寒溪二巡檢司，後廢。

**漳平** 府西北。成化六年以龍巖縣九龍鄉置，析居仁等五里地益之。東南有象湖山。南有百家畚洞，踞龍巖、安

溪、龍溪、南靖、漳平五縣之交。又有九龍溪，自龍巖縣流經此，下流入龍溪縣。南有歸化巡檢司，後移於縣東之析溪口。又東北有溪南巡檢司，後廢。

**平和** 府西南。正德十四年六月以南靖縣之河頭大洋陂置，析漳浦縣地益之。東南有三平山。東有大峯山，河頭溪所出，〔四〕分數流達海，又西有蘆溪流合焉。有蘆溪巡檢司，後遷枋頭板，改名漳汀巡檢司。

**詔安** 府南。本南詔守禦千戶所，弘治十八年置。嘉靖九年十二月改爲縣。南臨海，海濱有川陵山，海中有南澳山。又東有東溪，爲河頭溪分流，東南流入海。又南有守禦玄鍾千戶所，東有守禦銅山千戶所，俱洪武二十一年二月置。東有金石、洪淡二巡檢司。西南有分水關，漳、潮分界，巡檢司治焉。

**海澄** 府東南。嘉靖四十五年十二月以龍溪縣之靖海館置，析漳浦縣地益之。東北濱海。西有南溪，自龍溪縣流入，與柳營江合流入海。東有海門巡檢司，後遷於青浦社。東北有濠門巡檢司，本治海滄洋，後遷縣東北之嵩嶼。東有島尾巡檢司。又西北有石馬鎮。

**寧洋** 府西北。本龍巖縣之東西洋巡檢司，正統十一年置。嘉靖四十五年十二月改置縣，又析大田、永安二縣地益之。南有香寮山。東南有東洋，溪流所匯也。

**福寧州** 元屬福州路。洪武二年八月降爲縣，屬福州府。成化九年三月升爲州，直隸布政司。

北有龍首山。東有松山，山下有烽火門水寨，正統九年自海中三沙堡移此。東北有大姥山。東南濱海，海中有嶺山、臺山、官澳山、屏風嶼。東有白水江。西有長溪，源出壽寧縣界，至縣西南古鎮門入海。東有福寧衛，南有守禦大金千戶所，俱洪武二十一年二月置。西北有柘洋巡檢司，又有蘆門巡檢司，後移桐山堡。又東北有大貧簪巡檢司，後移秦嶼堡。又東有清灣巡檢司，後徙牙裏堡。南有高羅巡檢司，後移閭峽堡。又有延亭巡檢司，後移下澣堡。又東北有蔣洋，又有小瀾，西北有小澳、庫溪，西南有藍田，南有西白六巡檢司，後廢。領縣二。西南距布政司五百四十五里。

寧德州西南。洪武二年屬福州府。成化九年來屬。北有霍童山，有龜嶼。東南濱海，中有官廬山，下有官井洋。又東有瑞峯，亦在海中。西有穹窿溪，西南有赤鑑湖，北有外渺溪，下流俱達於海。北有東洋麻嶺巡檢司，後徙涵村，又徙縣東北之雲淡門，又徙縣東之黃灣，後還故治。南有南靖關。東有長崎鎮。

福州西北。洪武二年屬福州府。成化九年來屬。西南有城山。海在南。西北有長溪，東南入福寧州境。西北有白石巡檢司，後徙於縣東南之黃崎鎮。

廣東 禹貢揚州之域及揚州徼外。元置廣東道宣慰使司，治廣州路。屬江西行中書省。又置海北海南道宣慰使司，治雷州路。屬湖廣行中書省。洪武二年三月以海北海南道屬廣

西行中書省。四月改廣東道爲廣東等處行中書省。六月以海南海北道所領并屬焉。四年十一月置廣東都衛。與行中書省同治。八年十月改都衛爲廣東都指揮使司。九年六月改行中書省爲承宣布政使司。領府十，直隸州一，屬州七，縣七十五。爲里四千二十八。北至五嶺，與江西界。東至潮州，與福建界。西至欽州，與廣西界。南至瓊海。距南京四千三百里，京師七千八百三十五里。洪武二十六年編戶六十七萬五千五百九十九，口三百萬七千九百三十二。弘治四年，戶四十六萬七千三百九十，口一百八十一萬七千三百八十四。萬曆六年，戶五十三萬七百一十二，口五百四萬六百五十五。

廣州府

元廣州路，屬廣東道宣慰司。

洪武元年爲府。領州一，縣十五。

南海

倚。西北有石門山、雙女山。南濱海。又南有三江口。三江者，一曰西江，上流合黔、鬱、桂三水，自廣西梧

州府流入；一曰北江，卽潏水；一曰東江，卽龍川水。俱與西江會，經番禺縣南，入於南海。西北有三江巡檢司，

本治側水村，後遷村堡。又有金利、西南有神安、又有黃鼎、又有江浦四巡檢司。又南有五斗口巡檢司，後遷磨

刀口，又遷佛山鎮。

番禺

倚。在城有番、禺二山，縣是以名。東有鹿步、南有沙灣、北有慕德、東南有葵塘、又有獅嶺五巡檢司。

順德

府西南。景泰三年，以南海縣大良堡置，析新會縣地益之。西北有西江。南有馬寧、北有紫泥二巡檢司。西

有江村巡檢司，後遷縣西北查浦。北有寧都巡檢司，後遷都粘堡。又東南有馬岡巡檢司，後廢。

東莞 府東南。南濱海，海中有三洲，有南頭、屯門、雞栖、佛堂門、十字門、冷水角、老萬山、零丁洋等澳。北有東江。西有中堂，西南有白沙，又有缺口鎮三巡檢司。東北有京山巡檢司，本治茶園，後遷京口村，更名。又西南有虎頭山關，洪武二十七年置。

新安 府東南。本東莞守禦千戶所，洪武十四年八月置。萬曆元年改爲縣。南濱海。有大鵬守禦千戶所，亦洪武十四年八月置。東南有官富，西北有福永二巡檢司。

三水 府北。嘉靖五年五月以南海縣之龍鳳岡置，析高安縣地益之。西江在南，北江在西。又西南有三江，北有胥江，東有西南鎮三巡檢司。又南有橫石巡檢司。

增城 府東。東有增江。南有東江。西南有烏石，西北有茅田二巡檢司。

龍門 府東。弘治六年以增城縣七星岡置，析博羅縣地益之。南有龍門水，亦曰九淋水，流入東江。東有上龍門巡檢司。

香山 府南。南濱海。東有零丁洋。北有黃圃巡檢司。西北有大攬巡檢司，本名香山，後更名。

新會 府西南。南濱海，中有崖山。東北有西江。西南有恩平江，一名峴岡水。東南有潮連，西有牛肚灣二巡檢司。又西北有樂巡巡檢司，後遷縣北之石螺岡。又東北有大瓦巡檢司，本治中樂都，後遷鸞臺村。又南有沙村巡檢司，本治大神岡，後遷仙洞村，又遷長沙村，後復故治。



新寧府西南。弘治十一年以新會縣德行都之上坑蒞置，析文章等五都地益之。南濱海。北有恩平江，一名長沙河。又南有廣海衛，洪武二十七年九月置。西有望高巡檢司。西南有城岡巡檢司，後廢。

從化府東北。弘治二年以番禺縣橫潭村置，析增城縣地益之。九年遷於流溪馬場曲。東北有流溪巡檢司，本治縣北石潭村，後遷神岡村。

清遠府北。東有中宿峽。西有大羅山。又湞水在縣東北，東南有潯水來合焉，謂之潯江口，有潯江巡檢司。又西南有迴岐、西北有濱江二巡檢司。東北有橫石磯巡檢司，後廢。

連州元桂陽州，直隸廣東道。洪武二年三月省入連州。四月，連州廢，地屬連山。三年九月，連山廢，地屬陽山。十四年置連州於此，屬府。東北有桂水。西有湟水，亦曰涯水，自湖廣寧遠縣流入，東南合湞水。西北有朱岡巡檢司。又有西岸巡檢司，治仁內鄉，後徙陽山縣境。東南距府五百六十里。

領縣二。

陽山州東北。元屬桂陽州。洪武二年三月，桂陽州廢，屬連州。四月，連州廢，屬韶州府。十四年四月改爲連州，徙州於桂陽州舊治，復置縣，屬焉。南有陽谿，卽涯水。西北有星子巡檢司。東有西岸巡檢司，自連州移此，治青蓮水口。又北有湟谿、陽山二關。

連山州西。元連州治此，直隸廣東道。洪武二年四月，州廢，屬韶州府。三年九月省入陽山。十三年十一月復置。十四年四月屬州。舊治在縣西北鍾山。永樂元年徙縣西程山下。天順六年又徙小坪。南有黃連山。北有高

良水，又名大獲水，東至州界入湟水。西有宜善巡檢司，卽程山下舊縣治。

肇慶府 元肇慶路，屬廣東道。洪武元年爲府。領州一，縣十一。南距布政司二百三十里。

高要 倚。北有石室山。南有銅鼓山。東有高峽山、爛柯山。城南有西江，又南有新江，東南有蒼梧水，俱流入焉。

東南有古耶巡檢司，治龍池都之馮村，後遷縣東之橫槎下都。東有祿步巡檢司，初在下村，後遷上村水口。東有橫槎巡檢司，初治上半都，後遷水口，尋廢。

高明 府東南。本高要縣高明鎮巡檢司，成化十一年十二月改爲縣，析清泰等都益之。南有倉步水，一名滄江，下流入於西江。東北有太平巡檢司，治太平都，後遷縣東都含海口。又遷縣西南山臺寺，又遷縣東清溪申石奇海濱。

四會 府北。南有北江。東有南津巡檢司，治黃岡村，尋遷縣東南南津水口。

新興 府南。元新州治，直隸廣東道。洪武二年四月，州廢，來屬。東有新江。西南有立將巡檢司。又南有祿緣巡檢司，後廢。

開平 府南。本恩平縣之開平屯。明末改爲縣，析新興、新會二縣地益之。南有恩平江，源出舊恩平縣西北平城山，東流合烏石水，下流入廣州新會縣界。東南有沙岡巡檢司，本治沙岡村，後遷平康都之長沙村。又南有松柏，北有四合二巡檢司。

陽春府南。元屬南恩州。洪武元年屬新州。二年四月，新州廢，屬府。西有漠陽江。北有古良巡檢司，尋廢，後復置於縣西，又遷南鄉都小水口。又北有思良巡檢司，後廢。

陽江府南。元南恩州治此，直隸廣東道。洪武元年，南恩州廢，改屬新州。二年四月，新州廢，屬府。南濱海。中有海陵山，山西北爲鶴州山，海陵巡檢司在焉。西有漠陽江，源出古銅陵縣北雲浮山下，南流過陽春縣，會諸水，經南恩舊城，直通北津港門，入於海。東南有海朗守禦千戶所，西南有雙魚守禦千戶所，俱洪武二十七年置。又東北有蓮塘堡，西有太平堡，俱嘉靖間築。

恩平府南。本陽江縣之恩平巡檢司，初治縣東北之恩平故縣，後遷恩平堡。成化十四年六月改堡爲縣，析新興、新會二縣地益之，而遷巡檢司於縣東南之城村，仍故名，後又遷白蒙屯。縣南有恩平江。

廣寧府西北。嘉靖三十八年十月以四會縣地置。初治縣東南潭園山下，後遷大圃村福星山下，卽今治也。北有綏江，又有龍口屯田千戶所，亦嘉靖三十八年置。西北有金溪巡檢司。南有扶溪巡檢司，初治東鄉水口，後遷扶溪口，又遷官埠。

德慶州。元德慶路，屬廣東道。洪武元年爲府。九年四月降爲州，以府治端溪縣省入，來屬。西有小湘峽，西江經其中，端溪自東北流入焉。東有悅城鄉巡檢司，治悅城故縣，後遷靈溪水口。東距府二百十里。領縣二。

封川州西。元封州治此，直隸廣東道。洪武二年三月，州廢，改屬。南有西江，西有賀江，西北有東安江，俱流入

焉。北有文德巡檢司，初治縣西北大洲口，後遷縣西賀江口，後又遷於此。

開建州西北。元屬封州。洪武二年三月改屬。西有開江，一名封溪，卽賀江之下流。北有古令巡檢司，治古令村，後遷縣東北之樛村。

韶州府 元韶州路，屬廣東道宣慰司。洪武元年爲府。領縣六。西距布政司八百里。

曲江倚永樂二十二年建淮王府，正統元年遷於江西饒州府。南有蓮花山。東北有韶石山。西有桂山。湞水在東，東南有曹溪水，西有武水，俱流入焉，抱城回曲，故謂之曲江，下流卽始興江。東北有平圃、南有濛濛二巡檢司。

樂昌府西北。南有昌山。東北有靈君山。西有三瀧水，卽武水。北有九峯、西北有黃圃、又有羅家灣三巡檢司。東有高勝巡檢司，後廢。

英德府西南。元英德州，直隸廣東道。洪武二年三月降爲縣，來屬。南有臯石山，一名湞陽峽。又湞水在縣東，一名湞水，湞水在縣西，一名洗水，至縣西南合流，謂之洗口，有洗口巡檢司。又南有瀧頭水，與湞水合。又東有象岡，北有清溪，西有含洸三巡檢司。又南有南崖巡檢司，廢。

仁化府東北。治水西村，後遷城口村。西北有吳竹嶺，吳溪水出焉，下流爲潼溪，入湞。東北有扶溪巡檢司。又北有恩村巡檢司。

乳源府西。本治虞塘，洪武元年遷於洲頭津。西有鴈嶺，五嶺之一。西北有武水，自湖廣宜章縣流入，有武陽巡檢司。

翁源府東南。元屬英德州。洪武二年三月改屬。故城在西北，今治本長安鄉也，洪武初，遷於此。北有寶山。東有靈池山，滄溪出焉，卽瀧頭水。東有桂丫山巡檢司，初治茶園舖，後遷南浦。

南雄府元南雄路，屬廣東道。洪武元年爲府。領縣二。西距布政司千九十里。

保昌倚。大庾嶺在北，亦曰梅嶺，上有梅關，湏水所出。西北有凌江水，流合焉，南至番禺入海，謂之北江。又縣東有小庾嶺。西北有百順、東南有平田二巡檢司。又東北有紅梅巡檢司，舊治梅關下，後遷於此。

始興府西。西有始興江，卽湏水。南有清化徑巡檢司。又東北有黃塘巡檢司，本治瓔珞舖，後遷黃塘江口，又遷黃田舖。

惠州府元惠州路，屬廣東道宣慰司。洪武元年爲府。領州一，縣十。西北距布政司三百六十里。

歸善倚。南濱海。西江在西南。東有東江，自江西安遠縣流入府境，亦曰龍川江，西南至番禺縣，會西江入海。東南有平海守禦千戶所，洪武二十七年九月置。又有內外管理、又有碧甲二巡檢司。

博羅府西北。西北有羅浮山。南有東江。西有石灣、又西北有善政里二巡檢司。

長寧府西。隆慶三年正月以歸善縣鴻雁洲置，析韶州府英德、翁源二縣地益之。萬曆元年徙治君子峯下。南有新豐江，下流入龍江。西有垵坪巡檢司。又北有黃峒巡檢司，後廢。

永安府東北。隆慶三年正月以歸善縣安民鎮置，析長樂縣地益之。西有東江。西南有寬仁里巡檢司，治苦竹派，後遷桃子園。又有馴雉里巡檢司，治鳳凰岡，後遷縣東烏石屯。尋俱還故治。

海豐府東。北有五坡嶺。南濱海，一名長沙海。又東南有碣石衛，東有甲子門守禦千戶所，俱洪武二十七年十月置。南有捷勝守禦千戶所，洪武二十八年二月置，初名捷徑，三月更名。有甲子門巡檢司。又西有鵝埠嶺巡檢司。又西南有長沙港巡檢司，後遷謝道。

龍川府東北。元循州治此，直隸廣東道。洪武二年四月，州廢，來屬。東有霍山。南有龍江，卽東江上流，自江西安遠縣流入。東有通衢巡檢司，後遷老龍埠，尋還故治。東北有十一都巡檢司。

長樂府東北。元屬循州。洪武四年四月來屬。舊治在紫金山北。洪武初，徙於今治。東南有興寧江。南有十二都巡檢司。又西有清溪巡檢司，後廢。

興寧府東北。元屬循州。洪武二年四月來屬。南有興寧江，東入潮州府程鄉縣界。東南有水口巡檢司，治水口隘，後廢，復置於下岸，尋遷於上岸水東。又北有十三都巡檢司，後遷白水砦，尋復故。

連平州本連平縣。崇禎六年以和平縣惠化都置，析長寧、河源二縣及韶州府翁源縣地益之。尋升爲州。西有銀梅水，源出楊梅坪，卽湞水上源。南有長吉里、東南有忠信里二巡檢司。東北距府百八

十里。領縣二。

河源州北。舊屬府，崇禎六年改屬州。故城在西南。洪武二年徙於壽春市。萬曆十年遷於今治。南有槎江，卽龍川江，下流爲東江。又北有新豐江入焉。又東北有藍口巡檢司。

和平州少北。正德十三年八月以龍川縣之和平司置，析河源縣地益之，屬府。崇禎六年改屬州。北有九連山。西北有洲頭山，三洲水出焉，亦名和平水，有洲頭巡檢司。

潮州府元潮州路，屬廣東道宣慰司。洪武二年爲府。領縣十一。西距布政司千一百九十里。

海陽倚南濱海，有急水門。東有鱸溪，一名惡溪，亦名韓江，又名意溪，東入於海。西北有潘田巡檢司。又有楓洋巡檢司，尋遷縣南園頭村。

潮陽府南。東南濱海。西南有練江。南有海門守禦千戶所，洪武二十七年置。東有招寧、西北有門關、北有桑田三巡檢司。又有吉安巡檢司，治泮水都南山下，後遷貴嶼村。

揭陽府西。西北有揭嶺。南有古溪。東南濱海。西有南寨巡檢司，本名湖口，治湖口村，後遷棉湖寨，更名。東有北寨巡檢司，本治縣西北岡頭山，後遷縣東北烏石山南，尋還舊治，後又遷縣東桃山鋪前。

程鄉府西北。元梅州治此，直隸廣東道。洪武二年四月，州廢，來屬。南有梅溪，卽興寧江之下流，一名惡溪，西北有程江合焉。西有太平鄉巡檢司，治梅塘堡，後遷縣西北石鎮村旁。東南有豐順鄉巡檢司，本在縣西北平遠

縣界，後遷松口市。

饒平 府東北。成化十二年十月以海陽縣三饒地置，治下饒。東南濱海，海中有南澳山，有大成守禦千戶所，洪武二十七年置。南有黃岡、西有鳳凰山二巡檢司。又東南有柘林寨。

惠來 府西南。嘉靖三年十月以潮陽縣惠來都置，析惠州府海豐縣地益之。南濱海。西有三河，以大河、小河、清遠河三水交會而名，即韓江之上源。東南有靖海守禦千戶所，洪武二十七年置。南有神泉巡檢司，本名北山，治縣西北山村，後遷神泉村，更名。

鎮平 府北。本平遠縣石窟巡檢司，崇禎六年改爲縣，析程鄉縣地益之。西有石窟溪，下流入於程江。東有藍坊巡檢司，自石窟司遷治，更名。

大埔 府東。嘉靖五年以饒平縣大埔村置，析饒洲，清遠二都地益之。南有神泉河，即福建汀州府之鄞江。又西有惡溪。東北有虎頭沙、西有三河鎮二巡檢司。又南有大產巡檢司，後遷黃沙。西南有烏槎巡檢司，後遷高陂。平遠 府西北。嘉靖四十一年五月以程鄉縣豪居都之林子營置，析福建之武平、上杭，江西之安遠，惠州府之興寧四縣地益之，屬江西贛州府。四十二年正月還三縣割地，止以興寧程鄉地置縣，來屬。

普寧 府西南。嘉靖四十二年正月以潮陽縣泮水都置，析洋烏、黃坑二都地益之，寄治貴山都之貴嶼。萬曆十年移治黃坑，以洋烏、泮水二都還潮陽。西有冬瓜山，冬瓜水出焉，下流爲揭陽縣之古溪，與南、北二溪合，下流至澄海縣入於海。西南有雲落徑巡檢司。



澄海 府東南。本海陽縣之關望巡檢司。嘉靖四十二年正月改爲縣，析揭陽、饒平二縣地益之，而徙關望巡檢司於縣北之南洋府，仍故名。南濱海，亦曰鳴洋海。西南有蓬州守禦千戶所，洪武二十六年四月置。又有駝浦巡檢司。

高州府 元高州路，屬海北海南道，治電白。洪武元年爲府。七年十一月降爲州。九年四月復爲府。後徙治茂名。領州一，縣五。東南距布政司一千里。

茂名倚。洪武七年十一月省，十四年五月復置。南濱海。城西有寶江，源出信宜縣，東北流，鑑江入焉，西南流入化州界。南有赤水巡檢司。東南有平山巡檢司，治紅花堡，後遷縣東北之電白故縣。又西南有博茂巡檢司，後廢。

電白府東。舊治在西北。今治本神電衛，洪武二十七年十月置。成化三年九月遷於此。東濱海。西北有立石巡檢司，後廢。

信宜府北。南有寶江。東北有中道巡檢司，治在懷德鄉黃僚寨之左，廢，後復置於羅馬村，尋又遷於三橋。

化州 元化州路，屬海北海南道。洪武元年爲府。七年十一月降爲州，以州治石龍縣省入。九年四月又降爲縣，來屬。十四年五月復爲州。北有石城山，又有來安山。東北有茂名水，寶江之下流。又有陵水、羅水，俱自廣西北流縣流入，與茂名水合，至吳川縣爲吳川水，南入於海。北有梁家沙巡檢司。東

南距府九十里。領縣二。

吳川 州南。元屬化州路。洪武九年四月屬高州府。十四年五月改屬州。南濱海，中有碇洲。有碇洲巡檢司，在

洲南濱海，後遷洲上。東南有寧川守禦千戶所，洪武二十七年四月置。又北有寧村巡檢司，治川濤，後遷縣西北之地聚村，又遷於芷芑口。

石城 州西。元屬化州路。洪武九年四月屬高州府。十四年五月改屬州。南濱海。西有零緣巡檢司。

雷州府 元雷州路，屬海北海南道宣慰司。洪武元年爲府。領縣三。東距布政司千四百五十里。

海康 倚。東濱海。南有擎雷水，自擎雷山南流，東入於海。西有海康守禦千戶所，洪武二十七年十月置。西南有清道、東南有黑石二巡檢司。

遂溪 府北。東西濱海。西南有樂民守禦千戶所，洪武二十七年十月置。西北有湛川巡檢司，治故湛川縣，後遷縣東南故鐵杷縣。又西南有灝洲巡檢司，治海島中博里村，後遷蠶村。

徐聞 府南。東西南三面濱海。西有海安守禦千戶所，東有錦囊守禦千戶所，俱洪武二十七年十月置。西南有東場、東有寧海二巡檢司。又西北有遇賢巡檢司，廢。

廉州府 元廉州路，屬海北海南道宣慰司。洪武元年爲府。七年十一月降爲州。九年四月屬雷州府。

十四年五月復爲府。領州一，縣二。東距布政司千二百十里。

合浦 倚。洪武七年十一月省，十四年五月復置。東有大廉山，州以此名。東南濱海，亦曰珠母海，以海中有珠池

也。又城北有廉江，亦曰合浦江，自廣西容縣流入，逕州，江口分爲五，西南注於海。又北有石康縣，成化八年

省。東有永安守禦千戶所，洪武二十七年置。東南有珠場，東北有永平二巡檢司。又北有高仰巡檢司，治馬欄墟，後遷於縣西南。

欽州 元欽州路，屬海北海南道。洪武二年爲府。七年十一月降爲州，以州治安遠縣省入。九年

四月降爲縣，來屬。十四年五月復爲州。西南濱海，中有烏雷山，入安南之要道也。又有分茅嶺，亦與

安南分界。龍門江在城東，又東有欽江，俱入於海。南有淞海，西南有長墩，西北有管界三巡檢司。又西有如昔，

又有佛淘二巡檢司，與交趾接界，宣德二年入於安南，嘉靖二十一年復。又西南有千金鎮。東距府百四十里。

領縣一。

靈山 州北。元屬欽州。洪武九年四月屬廉州。十四年五月仍屬欽州。北有洪崖山，洪崖江出焉，〔吾〕經縣東，與

羅陽山水合，爲南岸江，南流爲欽江。又南有林墟，西有西鄉二巡檢司。

瓊州府 元乾寧軍民安撫司。元統二年十月改爲乾寧安撫司，屬海北海南道宣慰司。洪武元年十月改爲瓊州

府。二年降爲州。三年仍升爲府。領州三，縣十。東北距布政司千七百五十里。

**瓊山** 倚。南有瓊山。北濱海，有神應港，亦曰海口渡，有海口守禦千戶所，洪武二十年十月置。又西南有水蕉村，萬曆二十八年置水會守禦千戶所於此。南有石山。又有清瀾巡檢司，廢。

**澄邁** 府西。北濱海。南有黎母江。東有澄江。西北有澄邁巡檢司，治石礮都。南有兔穎巡檢司，治曾家東都，後遷南黎都，廢。西南有銅鼓巡檢司，治新安都，後遷西黎都，廢。又有那拖巡檢司，治那拖市，後遷縣西森山，廢。

**臨高** 府西。北濱海。南有黎母江。南有田牌巡檢司，後遷墳橫岡。又東有定南、北有博鋪二巡檢司，廢。

**定安** 府南。元至元二十九年六月置。天曆二年十月升爲南建州。洪武元年十月復爲縣。南有五指山，亦曰黎母山，黎人環居山下，外爲熟黎，內爲生黎。北有建江，繞郡境西北流，入南渡江。東有潭覽屯田千戶所，元置，洪武中因之，永樂四年廢。西有青寧巡檢司。又東有寧村巡檢司，治潭覽村，後遷縣東南南資都，仍故名。

**文昌** 府東。西北有七星山。南有紫貝山。東北濱海。東南有文昌江，入於海。又東北有清瀾守禦千戶所，洪武二十七年八月置，萬曆九年遷縣東南南砦都陳家村。西北有鋪前巡檢司。東北有青藍頭巡檢司，後遷縣東抱凌港。

**會同** 府東南。元至元二十九年六月置。東濱海。西有黎盆溪。東有調羈巡檢司，治端趙都，尋遷縣東南南滄村。

**樂會** 府東南。西有白石山。東濱海。西北有萬泉河，有黎盆水流入焉。

**儋州** 元南寧軍，屬海北海南道宣慰司。洪武元年十月改爲儋州，屬府。正統四年六月以州治宜

倫縣省入。西北有龍門嶺。西濱海。北有倫江。西南有鎮南，又有安海二巡檢司。又東有歸姜巡檢司，廢。東北距府三百七十里。領縣一。

昌化州南。舊城在東南，今城本昌化守禦千戶所，洪武二十五年置。正統六年五月徙縣治焉。西濱海。南有昌江。

萬州元萬安軍，屬海北海南道。洪武元年十月改爲萬州，屬府。正統四年六月以州治萬安縣省入。北有六連山，龍滾河出焉。東南海中有獨洲山。東有蓮塘巡檢司，後廢。西北距府四百七十里。領縣一。

陵水州南。東北有舊縣城，今治本南山守禦千戶所，洪武二十七年置。正統間，遷縣於此。西有小五指山。東濱海，海中有雙女嶼。東北有牛嶺巡檢司。

崖州元吉陽軍，屬海北海南道宣慰司。洪武元年十月改爲崖州，屬府。正統四年六月以州治寧遠縣省入。南有南山。北有大河，自五指山分流，南入海。東有滕橋，西有抱歲，又西北有通遠三巡檢司。北距府千四百一十里。領縣一。

感恩州西北。舊屬儋州。正統五年來屬。西濱海。南有南湘江，源自黎母山，西南入於海。東南有延德巡檢司。

羅定州元瀧水縣，屬德慶路。洪武元年屬德慶州。萬曆五年五月升爲羅定州，直隸布政司。〔古

西南有瀧水，源出瑤境。又有瀧水、新寧、從化三千戶所，俱萬曆七年置。又有函江守禦千戶所，萬曆五年五月置於西寧縣境，十六年遷於州界之滿溝驛。南有開陽鄉、西北有晉康鄉二巡檢司。又東有建水巡檢司，治建水鄉，後遷縣東南古模村，又遷高要縣白坭村，尋復還白模。領縣二。東距布政司五百三十里。

東安州東。萬曆五年十一月以瀧水縣東山黃姜峒置，析德慶州及高要、新興二縣地益之。北有西江，西有瀧水流入焉。東北有南鄉守禦千戶所，西南有富霖守禦千戶所，俱萬曆五年五月置。東南有羅苛巡檢司。

西寧州西。萬曆五年十一月以瀧水縣西山大峒置，析德慶州及封川縣地益之。東北有西江，與德慶州分界。東南有瀧水。西南有封門守禦千戶所，萬曆五年五月置。北有都城鄉巡檢司。又西南有懷鄉巡檢司，後廢。

廣西 禹貢荊州之域及荆、揚二州之徼外。元置廣西兩江道宣慰使司，治靜江路。屬湖廣行中書省。至正末，改宣慰使司爲廣西等處行中書省。洪武二年三月因之。六年四月置廣西都衛。與行中書省同治。八年十月改都衛爲都指揮使司。九年六月改行中書省爲承宣布政使司。領府十一，州四十有八，縣五十，長官司四。爲里一千一百八十三。北至懷遠，與湖廣、貴州界。東至梧州，與廣東界。西至太平，與貴州、雲南界。南至博白，與廣東界。距南京四千二百九十五里，京師七千四百六十二里。洪武二十六年編戶二十一萬一千二百六十三，口一百四

十八萬二千六百七十一。弘治四年，戶四十五萬九千六百四十，口一百六十七萬六千二百七十四。萬曆六年，戶二十一萬八千七百一十二，口一百一十八萬六千一百七十九。

桂林府 元靜江路。 洪武元年爲府。五年六月改爲桂林府。領州二，縣七。

臨桂 倚。洪武三年七月建靖江王府於獨秀峯前。東有桂山。東北有堯山。又有桂江，亦曰灘江，南有陽江來合焉，至蒼梧縣合於左、右江。東有蘆田市、西有兩江口二巡檢司。南有湘山渡巡檢司，後廢。

興安 府北。南有海陽山，湘水出其北，流入湖廣永州府界，灘水出其南，南入梧州府界。北有越城嶺，亦曰始安嶠，五嶺之最西嶺，下有始安水流入灘水。西南有融江六峒、西有鹽砂寨、北有唐家舖三巡檢司。又西南有岩關。

靈川 府北。北有百丈山。東北有融江，源出融山二洞中，一名銀江，流經縣境，又南入靈川縣界，合於灘江。南有白石潭、東北有千秋峽二巡檢司。

陽朔 府南。北有陽朔山。東有灘江。東南有伏荔市、南有都樂墟二巡檢司。西有白竹寨巡檢司，廢。

全州 元全州路，屬湖廣道。 洪武元年爲府。九年四月降爲州，省州治清湘縣入焉，屬湖廣永州府。二十七年八月來屬。西有湘山。南有湘水，又北有洮水流合焉。又西有西延、西南有建安、東北有柳浦三巡檢司。又東北有平塘巡檢司，廢。南距府二百五十里。領縣一。

灌陽州 南，少東。南有灌水，經州界，合於湘水。西南有吉寧鄉崇順里巡檢司。

**永寧州**

元古縣。

洪武十四年改爲古田縣。

隆慶五年三月升爲永寧州。縣舊治在今州南三十里。

洪武初，移於今州南八里。成化十八年又移今治。又有黃源水，下流入灘江。南有桐木鎮，又有常安鎮，西南有富

椽鎮三土巡檢司。東距府百五十里。領縣二。

**永福州**東南。舊屬府，隆慶五年三月改屬州。西南有太和山，太和江環其下，東入柳州府，爲維清江。又西南有

理定縣，元屬靜江舊路，正統五年九月省。又有蘭麻鎮、東北有銅鼓市二巡檢司，廢。

**義寧州**東北。舊屬府，隆慶五年三月改屬州。北有丁嶺，義江出焉，下流分爲二，東流者爲臨桂縣之相思水，入

於灘江，南流者爲永福縣之白石水，卽太和江也。西北有桑江口巡檢司。

**平樂府**元大德五年十一月置。

洪武元年因之。領州一，縣七。北距布政司百九十里。

**平樂**倚。東南有魯溪山。西北有灘江，又北有樂川水，東經昭潭流合焉。又東有榕津寨巡檢司，又有水涯營土巡

檢司。又東有龍平寨巡檢司、昭平堡土巡檢司，廢。又東有團山堡，東南有廣運堡、足灘堡，又南有甌灘堡，俱

弘治後置。

**恭城**府東北。南有樂川水，又東有勢江，南有南平江，北有平川江，西南有西水江，俱流合焉。東北有鎮峽寨、東

有勢江源二巡檢司。又有白面寨、西嶺寨二土巡檢司。

**富川**府東，少北。元屬賀州。洪武十年五月改屬潯州府，後來屬。西南有鍾山縣，舊治於此，洪武二十九年十一



月移治靄石山下，而置邊蓬寨巡檢司於舊治。北有秦山，接湖廣道州界。東北有毗渚嶺，即臨賀嶺，與湖廣江華縣分界。又東有富江，南合賀水。西南有白霞寨、西北有寨下市二巡檢司。

**賀** 府東南。元 賀州，直隸廣西兩江道。洪武初，以州治臨賀縣省入，屬潯州府。十年五月降爲縣，後來屬。東北有臨賀嶺，亦曰桂嶺，下有桂嶺縣，元末廢。東有賀江，至廣東封川縣合於西江。南有信都鄉巡檢司。北有沙田寨巡檢司，後遷縣西點燈寨，尋廢。又東北有大寧寨、樊字寨、白花洞三土巡檢司，後廢。

**荔浦** 府西，少南。舊屬桂林府，弘治四年來屬。舊治在今縣西。景泰七年移於後山，即今治。東有銅鼓嶺，一名火餞山。又荔江在南，下流入灘江。東南有峯門寨巡檢司，後遷中崗。西北有南原寨巡檢司，後遷縣東南下崗，又遷縣東延濱江。又西南有華蓋城，萬曆中築。

**修仁** 府西，少南。舊屬桂林府，弘治四年來屬。舊治在今縣西馬浪坪。景泰初，遷今縣南霸寨村。成化十五年遷於五福嶺，即今治。東北有荔江，有麗壁市土巡檢司。西南有石墻堡，萬曆間築。

**昭平** 府南，少東。萬曆四年四月析平樂、富川二縣地置。五年又析賀縣地益之。東有五指山。又有灘江。又有思勤江，下流入於灘江。東南有龍平縣，元屬府，洪武十八年廢。

**永安州** 元立山縣，屬府。洪武十八年廢爲立山鄉，屬荔浦縣。成化十三年二月置州，曰永安，

屬桂林府。弘治三年九月改爲長官司。五年復爲州，來屬。東有蒙山，下有蒙水。南有古眉寨土巡檢司。北有羣峯寨土巡檢司，後遷州西北杜莫寨，又遷州北貓兒堡。東南有仙廻營，萬曆中置。東北距府

百二十里。

梧州府 元梧州路。 洪武元年爲府。領州一，縣九。北距布政司五百八十里。

蒼梧 倚。城西南有大江，江卽黔、鬱二水，合流於潯州府城東，爲潯江；入府界，東經立山下，又東經此，與桂江合，謂之三江口，下流爲廣東之西江。東有長行，西有安平，北有東安，西南有羅粒四巡檢司。

藤府西。元藤州，直隸廣西兩江道。洪武二年九月省州治鐔津縣入焉。十月來屬。十年五月降爲縣。北有藤江，

亦曰鐔江，卽潯江也。東南有繡江，西有幕僚江，俱流入焉。又西北有五屯守禦千戶所，嘉靖初置。西有白石

寨、南有寶家寨、東北有赤水鎮三巡檢司。又東有湯州、南有周村、西南有驛面、又南有思羅四巡檢司，廢。

容府西南。元容州，直隸廣西兩江道。洪武二年十月來屬。十年五月降爲縣，省州治普寧縣入焉。西北有容山。

南有容江，亦名繡江。又東有波羅里大洞、西南有粉壁寨二巡檢司。

岑溪 府南，少西。元屬藤州。洪武十年五月改屬府。東北有烏峽山。西有繡江。東南有上里平河村、西南有南

渡二巡檢司。又東南有連城鄉義平巡檢司，廢。

懷集 府東北。元屬賀州。洪武初，屬平樂府。十年五月來屬。西南有懷溪水。東有武城鄉、西有慈樂寨、西北

有蘭峒寨三巡檢司。

鬱林州 元直隸廣西兩江道。洪武二年九月以州治南流縣省入。十月來屬。南有南流江，至廣東合

浦縣入海。有橫嶺、文俊二巡檢司，廢。東北距府三百三十里。領縣四。

博白州西南。西有雙角山，綠珠江出其下，流合縣南飲馬水，下流入南流江。南有周羅、西南有沙河二巡檢司。又有安定、春臺、平山、兆常四土巡檢司，尋廢。又東南有海門鎮，舊爲入安南之道。

北流州北。元屬容州。洪武十年五月來屬。東北有勾漏山。東有銅石山，產水銀、硃砂。又南有扶來山，陵水出焉，西南有峩石山，羅水出焉，俱流入廣東化州界。又北有綠藍山，綠藍水出焉，分爲二。東流者經城東，登龍橋，與廣東高州府流入之繡江合，又東經容縣，爲容江。西流者入鬱林州，爲南流江。南有雙威寨巡檢司。西有都隴，又有中山，又有清灣三巡檢司，廢。又西有天門關，本名鬼門關，洪武初，改爲桂門關；宣德中，更今名。陸川州南，少東。元屬容州。洪武十年五月來屬。舊爲入安南之道。東有龍化江，下流合容江。南有溫水寨巡檢司。

興業州西，少北。南有鐵城山。北有翻車嶺，龍母江出焉，下流入南流江。南有趙家寨、西有長寧寨、北有平安寨，又有棠木寨四巡檢司，後俱廢。

潯州府元潯州路。洪武元年爲府。領縣三。東北距布政司九百八十里。

桂平倚。南有白石山。西北有大藤峽。北有黔江，一名北江，亦曰右江，南有鬱江，一名南江，亦曰左江，至城東，匯爲潯江。東北有武靖州，成化三年置，萬曆末廢。又東有大黃江口、北有靖寧鄉、東北有大宣鄉，又有思隆鄉、

又有木盤浦、西南有常林鄉六巡檢司。又南有羅秀土巡檢司，又北有碧灘堡、鎮峽堡，俱成化中置。東有牛屎灣堡，西有淹冲堡、秀江堡，俱嘉靖中置。

**平南**府東。東南有襲江，卽潯江也，東有白馬江流入焉。又有奉議衛，洪武二十八年八月置於奉議州，正統六年五月遷於此。東北有大同、西北有泰川、西南有武林三巡檢司。又南有崗心、東南有三堆、東北有大峽、西北有平嶺四土巡檢司。

**貴**府西。元貴州，直隸廣西兩江道。洪武二年十月降爲縣，來屬。南山在南。又有東、西、北三山。南有鬱江，亦曰南江，羣川悉流入焉。有向武軍民千戶所，本向武守禦千戶所，洪武十八年十月置於向武州，三十年三月升軍民所，正統六年五月來遷縣北門外，萬曆二十三年又遷縣西北謝村鎮。東南有新安寨、北有北山寨二巡檢司。又南有橋頭墟、西有瓦塘渡、又有五州寨、又有東壘渡、又有郭東里五巡檢司，廢。又東南有三江城，萬曆中築。

**柳州**府元柳州路。洪武元年爲府。領州二，縣十。東北距布政司四百里。

**馬平**倚。元爲府屬，洪武元年徙府治於此。南有柳江，亦曰潯水，亦曰黔江，上流自貴州黎平府流入府境，下流至桂平縣合於鬱江，亦曰右江。南有新興鎮、都博鎮二巡檢司。又有歸化鎮巡檢司，廢。

**洛容**府東北。舊治白龍岩，天順中，徙於朱峒。正德時，爲瑤、僮所據，嘉靖三年十一月復。萬曆四年正月遷於靈塘，以朱峒舊治爲平樂鎮，留兵百名守之。城南有洛清江，至馬平縣入於柳江。西南有江口鎮、又有運江二

巡檢司。東有平樂鎮巡檢司，治石榴江，後遷縣東北中渡。又西南有章洛鎮巡檢司，廢。

柳城府西北。舊治龍江南，元爲府治。洪武元年遷治龍江東，而府徙治馬平縣。龍江自天河縣流入，合於融江，

卽柳江上流。東有東泉鎮巡檢司。北有古皆鎮巡檢司，初治融江東岸，後遷馬頭驛。又東北有古清鎮、西有洛好鎮、又有廖洞鎮三巡檢司。

羅城府西北。洪武二年十月以羅城鄉置，屬融州。十年五月來屬。北有武陽江，下流合於融江。北有武陽鎮、又有莫離鎮、又有通道鎮三巡檢司。又舊有安湘鎮、樂善鎮、中峒鎮三巡檢司，廢。

懷遠府北。元屬融州。洪武十年廢，置三江鎮巡檢司。十三年十一月復置縣，來屬，治大融江、潯江之匯。萬曆十九年移治丹陽鎮。西北有九曲山，山南爲石門山，兩山夾峙。福祿江自貴州永從縣流逕其中，至融縣爲融江，至柳城縣爲柳江。又東北有潯江，自湖廣靖州流合焉，有潯江鎮巡檢司。又西北有萬石鎮，又有宜良鎮、丹陽鎮三巡檢司。

融府西北。元融州，直隸廣西兩江道。洪武二年十月以州治融水縣省入，來屬。十年五月降爲縣。東南有靈岩山。北有雲際山。其西曰上石門，以兩山夾峙，融江中流也。又東有寶積山，產鐵。東北有思管鎮、東南有清流鎮、西南有鵝頭隘三巡檢司。又北有長安鎮巡檢司，本在融江東岸，後遷西岸。又有大約鎮土巡檢司。又有保江鎮、理源鎮、西峒鎮三巡檢司，廢。

來賓府南。元屬象州。洪武十年五月來屬。西南有白牛洞。北有白雲洞。南有大江，亦曰都泥江。西有界牌鎮

巡檢司，後遷縣南之南岡。

**象州**

元直隸廣西兩江道。

洪武二年十月來屬，以州治陽壽縣省入。〔七〕西有象山。東有雷山。南有象

江，卽柳江。東北有龍門寨巡檢司。又有鵝頭鎮、尖山鎮二巡檢司，廢。西北距府百十三里，領縣一。

**武宣**

州南。

元曰武仙。

宣德六年更名。

舊治陰江。

宣德六年三月徙於高立。

東南有大藤峽，後名永通峽。西

有柳江，又有都泥江，亦謂之橫水江，來入焉，下流爲潯州府之右江，亦入於柳江。西北有安永鎮、西南有縣郭

鎮二巡檢司。又東有東鄉、又有周冲、又有閑得三巡檢司，廢。

**賓州**

元直隸廣西兩江道。

洪武二年九月以州治領方縣省入。〔八〕

十月來屬。東南有鎮龍山。西南有

燈臺山。西有古漏山，下有古漏關，古漏水出焉，入於賓水。賓水在南，卽都泥江也。東有安城鎮巡檢司。又東有

梁村巡檢司，後廢。

北距府三百里。領縣二。

**遷江**

州北。西有古黨山，有峒。東北有大江，卽都泥江。

東有遷江屯田千戶所，洪武二十五年九月置。東南有

清水鎮巡檢司，又有羅目鎮、李廣鎮二巡檢司，廢。又東有石零堡，北有都歷堡，俱正德中築。

**上林**

州西，少北。西有大明山，澄江出焉，亦名南江，東合北江，又東入遷江縣之大江。西北有三里營，南丹衛在

焉。衛舊在南丹州，洪武二十八年八月置，二十九年正月升軍民指揮使司，尋罷軍民，止爲衛。永樂二年十二

月徙上林縣東，正統六年五月徙賓州城，與賓州千戶所同治，萬曆八年徙於此。西南有周安堡，在八寨中，舊

爲瑤、僮所據，嘉靖三年討平之，萬曆七年改屬南丹衛。西北有三畔鎮巡檢司。又東北有琴水橋，東南有思

龍鎮、又有三門灘鎮三巡檢司。

慶遠府元慶遠路。洪武元年爲府。二年正月改慶遠南丹軍民安撫司。三年六月復曰慶遠府。

領州四，縣五，長官司三。東北距布政司五百七十里。

宜山倚。北有龍江，東流入融縣，合於融江。西有河池守禦千戶所，洪武二十八年十月置於河池縣，永樂六年徙於此。東有大曹鎮、西有懷遠鎮、又有德勝鎮、又有東江鎮四巡檢司。

天河府北，少東。舊縣在高寨。洪武二年遷於蘭石。正統七年又遷甘場。嘉靖十三年又遷福祿鎮。萬曆十九年始移今治。西南有龍江，自貴州獨山州流入。北有東禪鎮巡檢司，又有思農鎮、歸仁鎮二土巡檢司。

忻城府南，少東。西有烏泥江，卽都泥江。北有三寨堡土巡檢司。

河池州元河池縣。弘治十七年五月升爲州。縣舊治在州北懷德故城。天順六年遷屏風山。成化十三年還

治懷德。嘉靖四年又遷鳳儀山南。西有智州山。東有金城江，下流合於都泥江。江北有金城鎮巡檢司。又東有都銘鎮、土堡鎮二巡檢司，後廢。東距府二百五十里。領縣二。

思恩州東北。舊屬府，正德元年二月改屬州。舊治在環江洲。永樂末，遷於清潭村。宣德三年十一月遷於白山寨。成化八年遷於歐家山。南有環江，北有帶溪，皆合流於龍江。有安化鎮、歸思鎮二巡檢司。又有普義鎮、

吉安鎮、北蘭鎮三巡檢司，廢。

荔波州西北。洪武十七年九月析思恩縣地置，屬府。正統十二年改屬南丹州。成化十一年九月又屬府。正德元

年來屬。州東南有勞村江，源出貴州陳蒙爛土長官司，流入州界，爲金城江。又東有窮來、南有蒙石、又有方村

三土巡檢司，後廢。

南丹州 洪武七年七月置。二十八年廢，尋復置。西有孟英山，舊產銀。南有都泥江，自貴州定番州

流入。東距府二百四十里。

東蘭州 洪武十二年置。以西蘭州省入，又省安習、忠、文三州入焉。〔九〕東南有隘洞江，一名都泥江，又名紅

水河，又名烏泥江。東北距府四百二十里。

那地州 元地州。洪武元年改置。北有都泥江，有布柳水流合焉。南有那州，洪武元年省。東北距府二百

四十里。

永順長官司 府西南。

永定長官司 府南。二司皆弘治五年析宜山縣地置。

永安長官司 弘治九年九月析天河縣十八里地置。

南寧府 元南寧路。洪武元年爲府。領州七，縣三。東北距布政司千二百里。

宣化 倚。東有崑崙山，上有崑崙關。又有橫山，又有思玉山。北有馬退山。東南有望仙坡，與青、羅二山相對。



城西南有大江，卽鬱江，一日夜郎豚水。其上流有二：一爲南盤江，經府城南，曰右江；一爲麗江，經府城西南，曰左江。合流處謂之合江鎮，下流爲潯州府之左江。東有金城寨、西有那南寨、又有那龍寨、又有遷隆寨、南有八尺寨五巡檢司。

**隆安** 府西北。嘉靖十二年四月析宣化縣那久地置。東有火餞山。城北有盤江，亦曰右江。西南有那樓寨、西北有馱演寨二巡檢司。

**橫州** 元直隸廣西兩江道。洪武二年九月以州治寧浦縣省入，屬潯州府。十年五月降爲縣，來屬。十三年十一月復爲州，仍置寧浦縣爲州治，縣尋廢。東有烏蠻山。南有鬱江，又東南有武流江，源自廣東靈山縣，流入境合焉。東有古江口、西有南鄉二巡檢司。又南有太平關，成化四年置。西北距府二百四十里。領縣一。

**永淳州** 西。元屬橫州。洪武十年五月省入橫縣。十三年十一月復置，屬州。西臨鬱江。南有南里鄉、北有武羅鄉二巡檢司。又東北有修德鄉巡檢司，景泰間遷於縣西，後廢。

**新寧州** 隆慶六年二月以宣化縣定祿洞地置。北有三峯山。城西有麗江，一名定祿江，又名文字水。東南有渠樂寨巡檢司。東距府二百里。

**上思州** 元屬思明路。洪武初廢。二十一年正月復置，屬思明府。弘治十八年來屬。南有十萬山，上思江出焉，東流合西小江，西卽交趾所出之左江也。又有明江，亦出十萬山，西流入思明府界。又西有遷隆

峒土巡檢司。東南距府三百里。

歸德州元屬田州路。洪武二年屬田州府。弘治十八年來屬。鬱江在西南。〔三〕東南距府三百五十里。

果化州元屬田州路。洪武二年屬田州府。嘉靖九年十二月來屬。南盤江在西。東南距府三百二十里。

忠州元屬思明路。洪武初廢。二十一年正月復置，屬思明府。萬曆三年九月來屬。東北距府四百餘里。

下雷州元下雷峒。洪武初，屬鎮安府。嘉靖四十三年來屬。萬曆十八年升爲州。南有邕水，自鎮安府流入，南寧府左江之別源也。東距府五百八十里。

思恩軍民府元思恩州，屬田州路。洪武二年屬田州府，後屬雲南廣西府。永樂二年八月直隸廣西布政司。正統四年十月升爲府。六年十一月升軍民府。舊治在府西北。正統七年遷府東北之

喬利。嘉靖七年七月又遷武緣縣止戈里之荒田驛，因割止戈二里屬之。西北有都陽山。東南有靖遠峯。北有紅水江，又有馱蒙江，一名清水江，流合焉。又有大攬江，出城東北大名山，下流俱入於鬱江。東有鳳化縣，正德六年七月置，嘉靖八年十月廢。東有古零，西有定羅、那馬、下旺，北有興隆，東北有白山、安定，西北有舊城、都陽九土

巡檢司。領州二，縣二。東北距布政司千二百里。

**奉議州** 元直隸廣西兩江道。洪武五年省入來安府。七年二月復置，直隸行省。二十八年復

廢，尋復置，直隸布政司。嘉靖六年二月來屬。東有舊城。今治本砦林村也，洪武初，遷於此。北濱

南盤江，有州門渡。距府 百 十里。

**上映州** 元屬鎮安路。洪武五年廢爲洞。萬曆三十二年復置，來屬。東北距府四百七十里。

**上林府** 府西南。元屬田州路。洪武二年屬田州府。嘉靖七年七月來屬。北有南盤江，南有大羅溪，東

流合焉，卽枯榕江之下流也。

**武緣** 府南。元屬南寧路。萬曆五年十月來屬。西有西江，卽大欖江也，東南有南流江合焉。東有鑛鄉寨，又有

博澀寨、西有高井寨、西北有西舍寨四巡檢司。又南有橫山寨巡檢司，廢。

**太平府** 元太平路，至元二十九年閏六月置。洪武二年七月爲府。領州十七，縣三。東北距布政司二

千五十里。

**崇善** 倚。府治馱盧村，洪武二年徙治麗江。舊縣治在府西北，嘉靖十九年遷入郭內。北有青連山。〔二〕東有將軍

山，下有威震關，一名伏波關。南有府前江，卽麗江，又西有邏水流入焉。北有壺關，正德三年置。又東北有保

障關。

陀陵府東北。東有淥空山，淥空江出焉，亦名綠甕江。又南有麗江。

羅陽府東北。南有麗江。西有馱排江，源出永康縣，下流入於麗江。以上三縣，元俱屬太平路。

左州東有舊治。成化十三年遷於思崖村。正德十五年遷於今治，本古攪村也。西北有金山。南有麗江。西南距府百里。

養利州有舊州三，一在州北，一在西北，一在東北。又西北有養水。北有通利江，至崇善縣注於麗江。以上二州，元屬太平路。南距府百五十里。

永康州元永康縣，屬太平路。萬曆二十八年六月升爲州。北有故城。〔三〕萬曆中，遷於今治。西有綠甕江，下流亦合麗江焉。西南有思同州，舊屬府。萬曆二十八年六月省。西南距府二百里。

上石西州元屬思明路。洪武末省。永樂二年復置。萬曆三十八年來屬。東有明江，西北流入麗江。東北距府三百三十里。

太平州自此以下十一州，元屬太平路。邏水在西，下流入麗江。東南距府八十里。

思城州南有教水，下流合於邏水。東南距府五百里。

安平州南有邏水，下流合於邏水。東南距府百十里。

萬承州西南有綠降水，亦名玉帶水。西南距府五十里。

全茗州西有通利江，一名大利江。南距府百六十里。

鎮遠州 北有楊山。南有岩磨水。西南距府二百八十里。

茗盈州 南有觀音岩，澗水出焉，下流入於麗江。西南距府六十里。

龍英州 南有通利江，二有三源，下流入於麗江。南距府二百十里。

結安州 西有堰水，下流入麗江。西南距府二百二十里。

結倫州 南有啼畢水，卽堰水之上流。西南距府三百三十里。

都結州 南有啼畢水。西南距府三百三十里。

上下凍州 元屬龍州 萬戶府。洪武初來屬。西有八峯山，太源水出焉。二又北有青連山。南有拱天嶺。東

距府二百二十里。

思明州 元屬思明路。洪武二年屬思明府。萬曆十六年三月來屬。東有逐象山。東北有明江，自思明

府流入。東北距府二百十里。

思明府 元思明路。洪武二年七月爲府，直隸行省。九年直隸布政司。南有明江，有永平寨 巡檢司。領

州三。北距布政司二千二百里。

下石西州 元屬思明路。洪武二年屬府。舊治在東南。萬曆間，始遷今治。西距府百四十里。

西平州 元屬思明路。洪武三年省。永樂二年復置。宣德元年與安南。

祿州 元屬思明府。 洪武三年省。二十一年正月復置，尋沒於交趾。永樂三年收復。宣德元年與安南。

鎮安府 元鎮安路。 洪武二年爲府。西有鎮安舊城。洪武二年徙於廢陳州，卽今治也。南有馱命江，下流合鬱江。

又有邏水，發源府北土山峽中，下流至胡潤寨，與歸順州之邏水合，有湖潤寨巡檢司。距布政司二千二百里。

田州 元田州路。 洪武二年七月爲府。嘉靖七年六月降爲州，徙治八甲，而置田寧府於府城。

八年十月，府廢，州復還故治，直隸布政司。東南有南盤江。西有來安路，元屬廣西兩江道，洪武二

年七月爲府，領歸仁州、羅博州、田州，十七年復廢。北有上隆州，元屬田州路，洪武二年屬府，成化三年徙治潯

州府東北，更名武靖州。又有恩城州，元屬路，洪武初屬府，弘治五年廢。東有床甲、拱甲、婪鳳，西有武隆、累彩，

北有邕馬甲、篆甲，東北有下隆，東南有些桑，西北有凌時，西南有萬岡陽院，又有大甲、子甲，又有縣甲、怕河、怕牙、

思郎、思幼、候周十九土巡檢司。距布政司千六百里。

歸順州 元屬鎮安路。 洪武初，廢爲洞。弘治九年八月復置，屬鎮安府。嘉靖初，直隸布政

司。東北有龍潭水，南入交趾高平府界。又南有邏水，發源西北鵝槽隘界。距布政司二千三百二十里。

泗城州 元屬田州路。 洪武七年直隸行中書省。九年直隸布政司。舊州在西南，洪武六年移於古勘

洞。西有南盤江，自貴州募役長官司流入，下流爲南寧府之右江。又北有紅水江。東北有程縣，洪武二十一年以

泗城州之程丑莊置，屬州，尋屬慶遠府，宣德初，還屬州，嘉靖元年廢。西南有利州，元屬田州路，洪武七年十一月

直隸布政司，正統六年五月徙治泗城州古那甲，嘉靖二年廢。又西有上林長官司，永樂七年以州之上林洞置，直

隸布政司，萬曆中，省入州，崇禎六年分司西地入雲南廣南府。有羅博關巡檢司。北距布政司一千八百一

十五里。

向武州 元屬田州路。 洪武二年七月屬田州府。二十八年廢。建文二年復置，直隸布政司。

舊州在東。萬曆四十五年遷於乃甲。南有枯榕江，下流入於右江。北有富勞縣，元屬田州路，洪武二年屬田州府，

尋爲夷僚所據，建文四年復置，後廢。東有武林縣，元亦屬田州路，洪武二年屬田州府，永樂初省入富勞縣。距布

政司二千四百里。

都康州 元屬田州路。 洪武二年屬田州府，後爲夷僚所據。建文元年復置，直隸布政司。西有

岷爐江，下流合於通利江。距布政司二千五百四十里。

龍州 元龍州萬戶府。 洪武二年七月仍爲州，屬太平府。九年六月直隸布政司。南有龍江，自交趾廣

源州流入，卽麗江也，有明江流入焉，下流爲南寧府之左江。距布政司二千三百里。

江州 元屬思明路。 洪武二十年直隸布政司。東有歸安水，西有綠眉水，下流俱合於麗江。領縣一。距布

政司二千一百十里。

羅白 州東北。 洪武三年置，屬思明府，後來屬。南有隴冬水，下流入於麗江。

思陵州 元屬思明路。 洪武三年省入思明府。二十一年正月復置，直隸布政司。南有角硬山，角硬

水出焉，又有淦削水合之，下流入思明府界。距布政司二千一百二十里。

憑祥州 本憑祥縣。 永樂二年五月以思明府之憑祥鎮置，屬思明府。成化十八年升爲

州，直隸布政司。西北有麗江，自交趾廣源州流入。又南有鎮南關，一名大南關，卽界首關也。距布政司二千四十里。



安隆長官司 元致和元年三月置安隆州，屬雲南行省。後廢爲寨，屬泗城州。洪武三十五年十二月置安隆長官司，仍屬泗城州，後直隸布政司。西有壩達山，渾水河經其下，卽紅水江也，東入泗城州界。又西南有同舍河。距布政司里。

### 校勘記

〔一〕南有將溪亦曰大溪 亦曰，疑誤。讀史方輿紀要卷九七及清一統志卷三三〇均稱將溪在縣西南，東北流入大溪。據此，將溪和大溪是兩條溪，不應稱「亦曰」。

〔二〕本曰蓮城洪武十七年後改蓮曰連 洪武十七年後，疑誤。明史稿志二一地理志、明一統志卷七七、讀史方輿紀要卷九八都稱元改「蓮」曰「連」，寰宇通志卷四七稱元至正中改「蓮」爲「連」。

〔三〕南有灘江流合焉 灘江，明史稿志二一地理志作「灘江」，疑是。

〔四〕河頭溪所出 河頭溪，原作「和頭溪」，據明史稿志二一地理志、讀史方輿紀要卷九九改。下同。

〔五〕北有洪崖山 洪崖江出焉 洪崖山、洪崖江，原作「洪牙山、洪牙江」，據明史稿志二二地理志、寰宇通志卷一〇五、讀史方輿紀要卷一〇四改。

〔六〕萬曆五年五月升爲羅定州直隸布政司 原脫「直隸布政司」五字。本志廣東下稱「領直隸州」

一」，即指羅定州。清一統志卷三五一稱「萬曆四年改縣置羅定州，直隸廣東布政使司」。據補。

〔七〕以州治陽壽縣省入陽壽縣，原作「陽奉縣」，據明史稿志二二地理志、明一統志卷八三、讀史方輿紀要卷一〇九改。陽壽縣是隋置，見隋書卷三一地理志。

〔八〕以州治領方縣省入領方縣，原作「嶺方縣」，據明史稿志二二地理志、明一統志卷八三、讀史方輿紀要卷一〇九改。領方縣見漢書卷二八下地理志。元、明均無「陽奉縣」。

〔九〕又省安習忠文三州入焉。原闕「三」字，空一格，據寰宇通志卷一〇八、明一統志卷八四、讀史方輿紀要卷一〇九補。

〔一〇〕鬱江在西南。鬱江，原作「盤江」，據明史稿志二二地理志改。寰宇通志卷一一〇、明一統志卷八五、讀史方輿紀要卷一一〇都作「大江」。讀史方輿紀要宣化縣下說：「大江即鬱江也。」

〔一一〕北有青連山。青連山，原作「青蓮山」，據明史稿志二二地理志、寰宇通志卷一一〇、明一統志卷八五改。清一統志卷三六五青連山下稱「山色青碧」，「綿亘二三百里」。下文上下凍州的「青蓮山」同。

〔一二〕北有故城。故城，原作「固城」。嘉慶重修一統志卷四七二有永康故縣在永康州北，稱「改州時移治」。故城即永康故縣，據改。

〔二〕南有通利江 通利江，原作「通麗江」，據本志上文全茗州和下文都康州下注、明史稿志二二地理志、明一統志卷八五改。

〔二四〕太源水出焉 太源水，明史稿志二二地理志作「大源水」。



# 明史卷四十六

## 志第二十二

### 地理七

#### 雲南 貴州

雲南 禹貢梁州徼外。元置雲南等處行中書省。治中慶路。洪武十五年二月癸丑平雲南，置雲南都指揮使司。乙卯置雲南等處承宣布政使司。同治雲南府。領府五十八，州七十五，縣五十五，蠻部六。後領府十九，禦夷府二，州四十，禦夷州三，縣三十，宣慰司八，宣撫司四，安撫司五，長官司三十三，禦夷長官司二。北至永寧，與四川界。東至富州，與廣西界。西至干崖，與西番界。南至木邦，與交趾界。距南京七千二百里，京師一萬六千四百四十五里。洪武二十六年編戶五萬九千五百七十六，口二十五萬九千二百七十。弘治四年，戶一萬五千九百五十，口一十二萬五千九百五十五。萬曆六年，戶一十三萬五千五百六十，口一百四十七萬

六千六百九十二。

雲南府 元中慶路。 洪武十五年正月改爲雲南府。 領州四，縣九。

昆明 倚。 洪武二十六年，岷王府自陝西岷州遷於此。 永樂二十二年遷岷王府於湖廣武岡州，建滕王府於此，宣

德元年除。 東有金馬山，與西南碧雞山相對，俱有關，山下卽滇池。 池在城南，周五百里，其西南爲海口，至

武定府北，注於金沙江。 又東有盤龍江，西注滇池。 東有赤水鵬、清水江二巡檢司。

富民府 西北。 東有螳螂川，源自滇池，下流入金沙江。 東南有安寧河。

宜良府 東，少南。 東有大池江，一名大河，亦曰巴盤江。 西有湯池巡檢司。

羅次府 西北。 舊屬安寧州，弘治十三年八月改屬府。 西有星宿河，自武定府流入。 又有沙摩溪，卽安寧河。 南有

鍊象關巡檢司。

晉寧州 西有大堡河，下流入滇池。 北距府百里。 領縣二。

歸化 東北有交七浦，滇池下流。

呈貢州 北。 西有滇池，北有落龍河，南流入焉。

安寧州 西有呀巉山，有煎鹽水，設鹽課提舉司，轄鹽井四。 天啓三年改設於琅井，此司遂廢。 又南有螳螂川。 西

有安寧河。 又有祿脰、貼琉二巡檢司。 東距府八十里。 領縣一。

祿豐州西。西有南平山，上有關。東有大溪，卽安寧河。西有星宿河，河東有老鴉關巡檢司。又西有蘭谷關。

昆陽州東南有渠濫川，東北入於滇池。北距府百五十里。領縣二。

三泊州西北。西有三泊溪，流入滇池。

易門州西。南有易門守禦千戶所，洪武二十四年置，舊縣治在焉。萬曆三年復還縣治於此。又南有黎崖山，產異馬，一名馬頭山。西有九渡河，卽祿豐縣大溪，下流入元江府界。

嵩明州 洪武十五年三月改曰嵩盟。成化十八年復故。東北有羅錦山。東有秀嵩山。(一)西北有東葛勒山。東南有烏納山，牧潑水出焉，西南入滇池。又東南有嘉利澤，亦曰楊林澤。又西有邵甸河，匯九十九泉，至昆明爲盤龍江。西有邵甸縣，洪武十五年三月屬州，尋廢。東南有楊林縣，成化十七年十月廢。又東有楊林守禦千戶所，洪武二十五年置。又西有免兒關巡檢司。西南距府百二十里。

曲靖府 元曲靖路。洪武十五年三月爲府。二十七年四月升爲軍民府。領州四，縣二。西距布政司二百九十里。

南寧倚。東南有石堡山，山西有元越州治，洪武二十八年正月廢。北有白石江，流合城南之瀟湘江，又東南合左小江，亦謂之南盤江，下流環雲南、澂江、廣西三府之境，至羅平州入貴州界。東北有白水關巡檢司。

亦佐府東。元屬羅雄州。永樂初，改屬府。西南有塊澤江。

**霑益州**東南有堆湧山。北有北盤江，其上流卽貴州畢節衛之可渡河，流入州境，又東南入貴州安南衛。其西南又有南盤江，卽南寧縣之東山河。南有交水縣，東南有羅山縣，東北有石梁縣，元皆屬州，洪武十五年皆廢。南有平夷衛，本平夷千戶所，洪武二十一年十一月置，二十三年四月改爲衛，後廢，永樂元年復置衛。衛當貴州西入之衝，東有蠻岡，西有定南嶺，北有豫順關、宣威關。州東南又有越州衛，洪武二十三年七月置，二十四年十二月徙於陸涼州，二十八年與州同廢，永樂元年九月復置。又州南有松韶舖、阿幢橋二巡檢司。又南有炎方城，西南有松株城，俱天啓五年築。西南距府二百十三里。

**陸涼州**東有丘雄山，下有中涎澤，卽南盤江所匯也。西北有木容山，有閭。又西有部封山。又西有芳華縣，南有河納縣，元皆屬州，永樂初皆廢。西南有陸涼衛，洪武二十三年三月以古魯昌地置。〔三〕西南有喬甸，〔三〕萬曆二年立營置戍於此。四十八年復設法古甸、龍崗等營，協守其地。北距府百二十里。

**馬龍州**東南有木容箐山，洪武二十四年十二月置寧越堡於此。山下有木容溪，下流卽瀟湘江。又西有楊磨山，一名關索嶺，上有關。西南有通泉縣，元屬州，永樂初廢。北有馬隆守禦千戶所，本馬隆衛，洪武二十三年七月置，二十八年十月改爲所。南有魯婆伽嶺巡檢司。又有馬龍縣，元屬州，洪武十五年廢。西南有分水嶺關。東有三叉口關。東距府七十里。

**羅平州**元羅雄州。萬曆十五年四月更名。北有祿布山。東南有盤江，下流入貴州慕役長官司界。南有定雄守禦千戶所，萬曆十四年九月置。西北距府二百七十里。



尋甸府 元仁德府。洪武十六年十月辛未升爲仁德軍民府。丁丑改尋甸軍民府。成化十二年改爲尋甸府。舊治在東。今治在鳳梧山下，嘉靖七年十月徙。西南有落隴雄山，又有哇山。〔四〕西有果馬山，其泉流爲龍巨江，下流入滇池。又西南有三稜山，上有九十九泉，卽盤龍江之上源。又東有阿交合溪。又北有爲美縣，西有歸厚縣，元屬府，洪武十五年三月因之，尋廢。東南有木密關，一名易龍堡，洪武二十三年四月置木密關守禦千戶所於此。西南距布政司二百六十里。

臨安府 元臨安路。洪武十五年正月爲府。領州六，縣五，〔五〕長官司九。北距布政司四百二十里。

建水州 倚。元時，府在州北。洪武中，移府治此。西南有寶山。西北右有火燄山。〔六〕東有石巖山，瀘江水自石屏州流經此，伏流入巖洞中，東出爲樂蒙河。又東北有曲江，東入於盤江，有曲江巡檢司。又西有禮社江，源出趙州，流經此。又有寧遠州，萬曆十四年析建水州置，四十八年廢。東南有納更山土巡檢司。

石屏州 元曰石坪。洪武十五年三月改曰石平，後改今名。南有鍾秀山。東有榮玉山，〔七〕產石似玉。有曲江。又有異龍湖，周百五十里，中有大、小、中三島，其大島、中島上皆有城，其水引流爲瀘江。西有寶秀關巡檢司。東距府七十里。

阿迷州 元阿甯萬戶。洪武十五年三月置州。東南有買吾山，萬曆初，改名雷公山。又南有盤江，東有樂蒙

河流入焉。又東有火井，有東山口土巡檢司。又有部舊村巡檢司，後廢。又有阿迷守禦城，萬曆二年築。西距

府百二十里。

寧州 東南有登樓山。東有水角甸山，產蘆甘石。又東有婆兮江，源出澂江府撫仙湖，下流入盤江，又西南有浣

江，〔八〕流合焉。又東有西沙縣，元屬州，後省，洪武十五年三月復置，仍屬州，尋復省。西北有甸直巡檢司。西

南距府百八十里。

通海府 西北。元屬寧州，洪武十五年三月改屬府。南有秀山。北有通海湖。東有守禦通海前前、右右二千戶所，

本元臨安路治。洪武初，徙府治建水州。十五年置守禦千戶所於此。

河西府 西北。東有曲江。又西有祿卑江，自新興州流入，合於曲江。又東北有綠溪河，〔九〕其下流即通海湖。又

北有曲陀關巡檢司，後廢。

嶺巖府 西北。元屬寧州。洪武十五年二月改屬府。東有曲江，自新興州流入，又南有合流江，西北有丁癸江，俱

流合焉。又西南有伽羅關、西有與衣鄉二巡檢司。

蒙自府 東南。西有目則山。東有雲龍山，又有羨哀山。又東南有黎花江，即禮社江也，東南注於交趾清水江。有

黎花舊市柵，宣德五年五月置臨安衛右千戶所於此。又西南有西溪二，出銀礦。又南有蓮花灘，即瀾滄江下

流，交趾洮江上流。西南有箐口關巡檢司，又有大窩關、楊柳河關。東南有廢果寨，又有賀謎寨，俱道通交趾。

新平府西北。萬曆十九年置。東南有魯奎山。東有平甸河。〔一〇〕南有南崗巡檢司。

新化州 本馬龍他郎甸長官司。洪武十七年四月置，直隸布政司。弘治八年改爲新化

州。萬曆十九年來屬。北有微崇山。西有馬籠山，蠻酋結寨處，元置馬籠部千戶於此，屬元江路，洪武十五

年廢。又北有法龍山，亦蠻酋結寨處。又東南有馬籠江，卽禮社江，亦曰摩沙勒江，有摩沙勒巡檢司。東北有阿

怒甸。東南距府五百三十里。

寧遠州元至治三年二月置，直隸雲南行省。洪武十五年來屬。宣德元年與安南。

納樓茶甸長官司府西南。本納樓千戶所，洪武十五年置，屬和泥府。十七年四月改置。北有羚羊洞，產銀

礦。又有祿豐江，卽禮社江下流。又東有倘甸。

教化三部長官司府東南。元強現三部，洪武中改置。西南有魯部河，源出禮社江，下流合蒙自縣黎花江。

王弄山長官司府東南。元王弄山大小二部，洪武中改置。

虧容甸長官司府西南。元鐵容甸，屬元江路。洪武中改置，來屬。西有虧容江，源出沅江府，東經車人寨，出

寧遠州境。

溪處甸長官司府西南。元溪處甸軍民副萬戶，屬元江路。洪武中改置，來屬。

思佗甸長官司府西南。元和泥路。洪武十五年三月爲府，領納樓千戶所伴溪、七溪、阿撒三蠻部，十七年廢，

後改置。

左能寨長官司府西南。本思佗甸寨，洪武中改置。

落恐甸長官司府西南。元仲溪落恐部軍民萬戶。洪武中改置。

安南長官司府東南。元捨資千戶，後改安南道防送軍千戶。洪武十五年三月仍曰捨資千戶所，尋改置長官

司。正德六年省入蒙自縣。天啓二年復置。

澂江府元澂江路。洪武十五年三月爲府。領州二，縣三。西北距布政司八十里。

河陽倚。舊治在西。洪武中，遷繡毬山上。弘治中，又遷縣東金蓮山。正德十三年又遷縣東賜溥山麓。嘉靖二

十年又遷金蓮山南。隆慶四年又遷舞鳳山下，卽今治。北有羅藏山。南有撫仙湖，一名羅伽湖，下流東會於盤

江。又東有鐵池河，源出陸涼州，流至此，會撫仙湖，復引流爲鐵赤河，入於盤江。

江川府西南。南有故城，崇禎七年圯於水，遷於舊江川驛，卽今治。又南有星雲湖，東南入撫仙湖。北有關索嶺

巡檢司。

陽宗府東北。北有明湖，一名陽宗湖，源出羅藏山，流入於盤江。

新興州東北有羅麼山，一名石崖山。西北有大棋山。又有蒙習山，山與晉寧州交界。又有大溪，下流至嶧峨縣，入

於曲江。有羅麼溪，源出羅麼山，入於大溪。又北有普舍縣，南有研和縣，元俱屬州，洪武十五年三月因之，尋廢。

又北有鐵爐關巡檢司。東距府二百里。

路南州 西南有竹子山。東有劉龍山，石可煉銅。西有巴盤江，源自陸涼州。又有鐵赤河合焉。東南有邑市縣，元屬州，弘治三年九月廢。東北有革泥巡檢司。西距府百三十里。

廣西府 元廣西路。洪武十五年三月爲府。西有阿盧山。西北有巴盤江。又西有南盤江。又南有矣邦池，一名龍甸海，跨彌勒州界，南入盤江。領州三。西北距布政司三百十里。

師宗州 西有龜山，萬曆四十八年築督捕城於此。東有英武山。西有盤江，又西北有巴盤江合焉，東北入羅平州界。西南距府八十里。

彌勒州 南有卜龍山。西有阿欲山。東南有盤江山，南盤江經其下。又東有八甸溪，南合南盤江。又西有十八寨山，嘉靖元年二月置十八寨守禦千戶所於此，直隸雲南都司。又南有捏招巡檢司。東北距府九十里。

維摩州 元大德四年二月置。東北有小維摩山。東南有大維摩山，又有阿母山。又東北有寶寧溪，下流經廣南府界，合西洋江。西有三鄉城，萬曆二十二年築。西北距府二百二十里。

廣南府 元廣南西路宣撫司。洪武十五年十一月改置廣南府。西北有牌頭山，土人築砦其上。南有西洋江，東南至廣西田州府，入於左江。領州一。西北距布政司七百九十里。

富州 元至元十三年置，屬廣南西路。洪武十五年改屬府。東南有者鷄山。東北有西寧山。又東有楠木溪，

至州南與南汪溪合，伏流十五里，東出於西洋江。西南有安寧州，東北有羅佐州，俱元至元十三年置，屬廣南西路。洪武十五年因之，後俱廢。西距府二百里。

元江軍民府 元江路。洪武十五年三月爲府。永樂初，升軍民府。領州二。東北距布政司七百九十里。

奉化州 倚。本因遠羅必甸長官司，洪武十八年四月置。嘉靖中，改州。東有羅槃山，亦名玉臺山。又有路通山。東南有元江，亦曰禮社江，東南入納樓茶甸長官司界。西南有瀾滄江，與車里宣慰司分界。又西有步日部，洪武中廢。又東有禾摩村巡檢司。

恭順州 本他郎寨長官司。嘉靖中，改州。

楚雄府 元威楚開南路。洪武十五年三月改爲楚雄府。領州二，縣五。東距布政司六百里。

楚雄 倚。元曰威楚。洪武十五年二月更名。西有徽溪山，又有龍川江，經城北青峰下，曰峩嶺江，下流入武定府，合金沙江。西有波羅澗，其麓有滴水，元設鹽課司於此，明廢。西北有呂合巡檢司。

廣通府 東。元屬南安州。洪武十五年因之，後改屬府。東北有盤龍山，亦曰九盤山。西有羅苴甸山。東有鹽倉山，舊產鹽。又有臥象山，東南有臥獅山，俱產銀礦。又東北有阿陋雄山，有阿陋井、猴井，俱產鹽。又東有捨

資河，自武定府流入，下流入於元江。又北有大河，西北入定遠縣之龍川江。東有捨資巡檢司，東北有沙矣舊，西有回蹬關二土巡檢司。

定遠府西北。西有赤石山。東有龍川江。又有黑鹽井，設提舉於此。又有琅井提舉司，本置於安寧州，天啓三年移此，有黑井、琅井二巡檢司。又西南有羅平關、南有會基關二巡檢司。

定邊府西。元至元十二年置，屬鎮南州。洪武中，改屬。北有螺盤山，〔二〕上有自普關。又有無量山。南有定邊河，又有陽江，自蒙化府流合焉。

礪嘉府南。元置。西有黑初山。東北有卜門河，在卜門山下，又東北合馬龍江，流入新化州。又西有上江河，接南安州界。

南安州東有健林蒼山。又西南有表羅山，產銀。北有捨資河。西北距府五十里。

鎮南州東北有石吠山。東有五樓山。西南有馬龍江，其上流爲定邊河，又東南入礪嘉縣界。又西有平夷川，龍川江之上流。又有沙橋巡檢司。又有鎮南關、英武關、阿雄關三土巡檢司。東南距府五十里。

姚安軍民府元姚安路。洪武十五年三月爲府。二十七年四月升軍民府。領州一，縣一。東南距布政司七百里。

姚州倚。元屬大理路。洪武十五年三月來屬。東有東山，一名飽烟蘿山。東北有金沙江。南有青蛉河，源出三寨

山，〔一〕下流合大姚河。北有守禦姚安千戶所，洪武二十八年置。東有箭場、西有普昌、南有三寨、西南有普溯四巡檢司。

大姚府北。元屬姚州。洪武十五年三月因之，後改屬府。西北有赤石崖。北有大姚河，源出書案山。西北有龍蛟江，源出鐵索箐，一名苴泡江，產金。俱東北流入金沙江。南有白鹽井提舉司，轄鹽井九。又有白鹽井巡檢司。東有姚安中屯千戶所，洪武二十八年置。

武定府元武定路。洪武十五年三月爲府，尋升軍民府。隆慶三年閏六月徙治獅子山。萬曆中，罷稱軍民。領州二，縣一。東南距布政司百五十里。

和曲州倚。舊城在南，元州治於此。隆慶三年十二月徙州爲府附郭，令吏目領兵守焉。西北有三臺山。北有金沙江，源出吐蕃共龍川犂牛石，下流經麗江、鶴慶二府，寧遠府北界，東流入黎溪州，又東入四川會川衛界。有金沙江土巡檢司。又有烏龍河，流入金沙江。又西北有西溪河，卽楚雄府龍川江下流。又有只舊、草起二鹽井。東有南甸縣，元路治，洪武十五年三月改屬州，成化二十年仍屬府，正德元年七月省。西北有乾海子，又有羅摩洱，又南有小甸關三巡檢司。西北有龍街關土巡檢司。

元謀府西北。西北有住雄山，又有竹沙雄山。北有金沙江，西有西溪河流入焉。

祿勸州北有法塊山，又有哇匿歪山。東北有幸丘山，又有烏蒙山，一名絳雲露山。北有金沙江，與四川東川府界。



又東有普渡河，卽螳螂川，下流會掌鳩河水，入於金沙江。北有易籠縣，元屬州，洪武十七年省。東有石舊縣，元屬州，天啓元年七月省。又北有普渡河巡檢司。南有撒墨巡檢司，後廢。西距府二十里。

景東府元至順二年二月置。洪武十五年閏二月因之。三月降爲州，屬楚雄府。十七年正月仍升爲府。西有景董山，洪武中築景東衛城於其上，又築小城於山顛，謂之月城。北有蒙落山，一名無量山。西南有瀾滄江，源出金齒，流經府西南二百餘里，南注車里，爲九龍江，下流入交趾。東南有大河，卽定邊河之下流，又東入鎮南州，爲馬龍江。又南有土井，產鹽。北有開南州，元屬威楚開南路。洪武十五年三月屬楚雄府，尋省。又東有三汊河，西北有保甸二土巡檢司。又北有安定關。南有木瓜關。〔二〕東南有景蘭關。西南有蘭津橋，鐵索爲之。東北距布政司千一百八十里。

鎮沅府本鎮沅州。洪武三十五年十二月置。永樂四年四月升爲府。西有波弄山，山上下有鹽井六。南有杉木江，源出者樂甸，下流合威遠州之谷寶江。領長官司一。北距布政司千五十里。

祿谷寨長官司府東北。永樂十年四月以祿平寨置。北有馬容山。南有南浪江，西南流合杉木江。

大理府元大理路。洪武十五年三月爲府。領州四，縣三，長官司一。東南距布政司八百九

十里。

太和倚。西有點蒼山。東有西洱河，一名洱海，自浪穹縣流入，經天橋下，又東合點蒼山之十八川匯於此，中有三島、四洲、九曲。西有樣備江，一曰漾鼻水，自劍川州流入，經點蒼山後，合於西洱河，又西南流入瀾滄江。南有太和土巡檢司。又北有龍首關，亦曰上關。南有龍尾關，亦曰下關。

趙州 洪武十五年三月改名趙喜州，尋復。南有九龍頂山。又有定西嶺，大江之源出焉，一名波羅江，西北入西洱河。又西南有樣備江，南入蒙化府界。東南有白厓臉江，源出定西嶺，下流爲禮社江。有舊白厓城，嘉靖四十三年修築，更名彩雲城。又東有乾海子、南有迷度市二巡檢司。又有定西嶺上巡檢司。西北距府三十里。領縣一。

雲南州東。元雲南州。洪武十五年三月改爲縣，屬府。十七年改屬州。西北有寶泉山，有一泡江。東北有周官夢海子。〔二四〕西有品甸，洪武十九年四月置洱海衛於此。又東北有你場，又有楚甸、南有安南坡三巡檢司。

鄧川州北有鍾山，又有普陀江，一名蒲萄江，又名彌苴佉江，南入西洱河。又東有豪豬洞，一名銀坑。又有青索鼻土巡檢司。南距府七十里。領縣一。

浪穹州東。東北有佛光山，山半有洞，可容萬人，山後險仄，名一女關。又有蓮花山，有蒙次和山，皆險峻。西南有鳳羽山。北有罷谷山，洱水所出。西有樣備江。西北有寧湖，亦曰明河，卽普陀江上源。又有五鹽井提舉司，洪武十六年置，萬曆四十二年廢。西南有鳳羽縣，洪武十五年三月置，屬鄧川州，尋省。有鳳羽鄉巡檢司。

又東南有晉陀崕巡檢司，後廢。西有上江嘴、西南有下江嘴二土巡檢司。

賓川州 弘治六年四月析趙州及太和、雲南二縣地置。西有雞足山，一名九曲巖。東北有金沙江，

東入姚安府界。西有金龍湫，流入西洱河。又東有大羅衛，在鍾英山下，弘治六年四月與州同置。又東北有赤石崖、西南有賓居二巡檢司。西有神摩洞。又南有蔓神寨、北有白羊市二巡檢司，後廢。又北有金沙江土巡檢司。

西距府百里。

雲龍州 元雲龍甸軍民府，至元末置。洪武十七年改爲州，來屬。正統間屬蒙化府，後仍來屬。

西有三峰山。東有瀾滄江。又西北有諾鄧等鹽井，東南有大井等鹽井，舊俱轄於五井提舉司，後改屬州。東有雲龍甸巡檢司，後廢。東北有順盪井，又有上五井、東有師井、北有箭捍場四巡檢司，又東有十二關土巡檢司，舊俱屬浪穹縣，後改屬。東南距府六十里。

十二關長官司府東。元十二關防送千戶所。洪武中改置。嘉靖元年五月徙於一泡江之西。

鶴慶軍民府 元鶴慶路。洪武十五年三月爲府。三十年十一月升軍民府。南有方丈山，又有半子山，

產礦。東有金沙江。東南有漾共江，即鶴川，其下流入金沙江。有木按州，又有副州，元俱屬府，洪武十五年俱廢。東北有宣化關、西南有觀音山，又有清水江三巡檢司。領州二。東南距布政司千一百六十里。

劍川州 元劍川縣。洪武十五年三月因之。十七年正月升爲州。西南有石寶山。南有劍川湖，俗呼海

子，樣備江之下流。又西南有彌沙井鹽課司。又有彌沙井巡檢司。東距府九十里。

順州元屬麗江路。洪武十五年三月屬北勝府，尋來屬。西有金沙江。東有浴海浦，與北勝州分界。西距府百二十里。

麗江軍民府元麗江路宣撫司。洪武十五年三月爲府。三十年十一月升軍民府。領州四。東南距布政司千二百四十里。

通安州倚。西北有玉龍山，一名雪嶺。又有金沙江，古名麗水，源出吐蕃界犁牛石下，名犁水，「犁」訛「麗」，流經巨津、寶山二州，至武定府，北流入四川大江。西有石門關巡檢司。

寶山州西南有阿那山。南有金沙江。西距府二百四十里。

蘭州元屬麗江路。洪武十五年三月屬麗江府，尋屬鶴慶府，後仍來屬。北有福源山。西北有瀾滄江，源出吐蕃嵯和歌甸，流入境，南入雲龍州界。東北距府三百六十里。

巨津州南有華馬山。北有金沙江，流入州界，有鐵橋跨其上。西北有臨西縣，「一五」元屬州，洪武十五年三月因之，弘治後廢。又東北有雪山關。東南距府三百里。

永寧府元永寧州，屬麗江路。「二六」洪武十五年三月屬北勝府。十七年屬鶴慶府。二十九年改屬

瀾滄衛。永樂四年四月升爲府。金沙江在西。又東有瀘沽湖，周三百里，中有三島。又東南有魯窟海子，

在干木山下，下流入四川鹽井衛之打冲河。又北有勒汲河，自吐蕃流入，亦東流入打冲河。又南有羅易江，自蒗蕓州流入，注於瀘沽湖。領長官司四。東南距布政司千四百五十里。

刺次和長官司府東北。

革甸長官司府西北。

香羅甸長官司府西。

瓦魯之長官司府北。四司，俱永樂四年四月置。

北勝州元北勝府，屬麗江路。洪武十五年三月屬布政司，尋降爲州，屬鶴慶府。二十九年改屬

瀾滄衛。正統七年九月直隸布政司。弘治九年徙治瀾滄衛城。瀾滄衛舊在州南，本瀾滄衛軍

民指揮使司，洪武二十八年九月置，屬都司。弘治九年徙州來同治。尋罷軍民司，止爲衛。西南有瀾滄山。南有九

龍山。西有金沙江，環繞州治，亦曰麗江。又南有陳海，又有呈湖，東南有浪戛海，下流俱入金沙江。東有羅易江，下

流入永寧府界。北有蒗蕓州，元屬麗江路，洪武十五年三月屬北勝府，尋屬鶴慶軍民府，二十九年改屬瀾滄衛，天啓

中廢。東有寧番土巡檢司。南距布政司千二十五里。

**永昌軍民府** 元永昌府，屬大理路。 **洪武十五年三月屬布政司。**十八年二月兼置金齒衛，屬都司。

二十三年十二月省府，升衛爲金齒軍民指揮使司。**嘉靖元年十月罷軍民司，止爲衛，復置永昌軍民府。**領州一，縣二，安撫司四，長官司三。東距布政司千二百里。

**保山** 倚。本金齒千戶所，**洪武**中置。永樂元年九月又置永昌府守禦千戶所，俱屬金齒軍民司。**嘉靖三年三月改**

二所爲保山縣。東有哀牢山，本名安樂，夷語哀牢。西有九隆山。又東北有羅岷山，瀾滄江經其麓。又南有潞

江，舊名怒江，一名喳里江，自潞江司流入。又北有清水河，經縣東南峽口山下，伏流東出，入瀾滄江。又有潞

江州，**宣德八年六月置**，直隸布政司，**正統二年五月廢**。又東北有沙木和、西北有清水關二巡檢司。又北有甸頭、南有水眼二土巡檢司。

**永平府** 東北。元屬永昌府。**洪武二十三年屬金齒軍民司。****嘉靖元年**仍屬府。西南有博南山，一名金浪巔山，俗

訛爲丁當丁山，上有關。又有花橋山，產鐵礦。又東北有橫嶺山，驛道所經。東有銀龍江，下流入瀾滄江。又

東北有勝備江，下流入蒙化府樣備江。又西南有花橋河，源出博南山，流入銀龍江，上有花橋關，亦曰玉龍關。

又東北有上甸定夷關巡檢司。東有打牛坪土巡檢司。

**騰越州** 元騰衝府，屬大理路。 **洪武十五年三月屬布政司，尋廢。**永樂元年九月置騰衝守禦千

戶所，屬金齒軍民司。**宣德六年八月直隸都司。****正統十年三月升所爲騰衝軍民指揮**

**使司。****嘉靖三年十月置騰越州，屬府。**十年十二月罷司爲騰衝衛。東有球牟山。東南有羅

生山。南有羅佐衝山，上有鎮夷關，有巡檢司。又東北有高黎共山，一名崑崙岡。西北有明光山，有銀礦銅礦。西有大盈江，亦曰大車江，〔一七〕自徼外流入，下流至比蘇蠻界，注於金沙江。又東北有龍川江，源出徼外峨昌蠻地之七藏甸，下流合於大盈江，有藤橋在其上。有龍川江關巡檢司。又西南有疊水河，〔一八〕即大盈江之支流。又有騰衝土州，宣德五年六月置，屬金齒軍民司，後直隸布政司，正統三年五月仍屬金齒軍民司，尋廢。又西有古勇關。東北距府二百七十五里。

潞江安撫司

元柔遠路。

洪武十五年三月爲府，後廢，屬麓川平緬司。

永樂元年正月析置潞

江長官司，直隸都司。十六年六月升安撫司。宣德元年六月改隸布政司。正統三年

六月屬金齒軍民司。嘉靖元年十月屬府。北有潞江，一名怒江，源出吐蕃雍望甸，南流經此，折而

東南入府界。東岸有潞江關，北岸有細甸。又西有鎮姚守禦千戶所，萬曆十三年置，治老姚關鳳山之阿。又西有

全勝關。東北距府三百五十里。

鎮道安撫司

楊塘安撫司二司地舊屬西番，與麗江府接界。

俱永樂四年正月置，屬金齒軍民司。嘉靖元年屬

府。

瓦甸安撫司 本瓦甸長官司。宣德二年置，屬金齒軍民司。九年二月直隸都司。正統

三年五月仍屬金齒軍民司。五年十一月升爲安撫司。嘉靖元年屬府。

鳳溪長官司府東。洪武二十三年十一月置，屬金齒軍民司。嘉靖元年改屬府。

施甸長官司府南。元石甸長官司。洪武十七年五月更名，屬府。二十三年屬金齒軍民司。嘉靖元年仍屬府。

西有坪市河，下流入於怒江。東南有猛淋寨，萬曆十三年置鎮安守禦千戶所於此。南有金齒巡檢司，治浦關。（二六）又南有石甸巡檢司。

茶山長官司永樂五年析孟養地置，屬金齒軍民司。嘉靖元年屬府。東有高黎共山。

蒙化府元蒙化州，屬大理路。洪武十五年三月因之。正統十三年六月升爲府。北有龍宇圖山，又有

甸頭山，一名天耳山。南有甸尾山。西有陽江，源出甸頭澗，下流至定邊縣，入定邊河。又西有樣備江，一名神莊江，與永平縣分界，南入順寧府境，爲黑惠江。西南有瀾滄江。有甸頭、甸尾、樣備、瀾滄江四巡檢司。又西南有備溪江土巡檢司。又東有迷渡市，嘉靖初築。東距布政司八百六十里。

順寧府元泰定四年十一月置。洪武十五年三月庚戌因之。己未降爲州，屬大理府。十七年正月

仍升爲府。西北有樂平山。南有把邊山，中有把邊關。東北有瀾滄江，又有黑惠江，卽樣備江也，又名墨會江，南流至府東，山下，合於瀾滄江。又城東有順寧河，源出甸頭村山箐，流入雲州之孟祐河。南有寶通州，又有慶甸縣，元俱與府同置，洪武十五年省。又西南有矣堵寨，萬曆三十年置右甸守禦土千戶所於此。北有錫鉛寨，又有牛街，又



有猛麻、又有錫蠟寨、董壘寨、蟒水寨、亦壁嶺七巡檢司。領州一。東距布政司千五百五十里。

雲州 本大侯長官司。永樂元年正月析麓川平緬地置，直隸都司。宣德三年五月升爲大侯禦夷州，直隸布政司。萬曆二十五年更名，來屬。舊治在南。萬曆三十年移於今治。南有瀾滄江，東有孟祐河流入焉。有臘丁鄉巡檢司，後廢。西距府百五十里。領長官司一。

孟緬長官司 州西南。宣德五年六月以景東府之孟緬、孟梳地置，屬景東府，後直隸布政司。萬曆二十五年來屬。有大猛麻、又有猛撒二土巡檢司，與猛緬稱爲「三猛」。

車里軍民宣慰使司 元車里路，泰定二年七月置，卽大徹里。洪武十五年閏二月爲軍民府。十九年十一月改軍民宣慰使司。永樂中廢。宣德六年復置。東北有瀾滄江，與九龍江會，達於交趾，爲富良江，而入於海。又有沙木江。東有小徹里部，永樂十九年正月置車里靖安宣慰使司，宣德九年十月省入車里。又有元耿凍路，至正七年正月置，又有耿當、孟弄二州，亦元末置，洪武十五年俱省入車里。西北距布政司三十四程。

緬甸軍民宣慰使司 本緬中宣慰司。洪武二十七年六月置，尋廢。永樂元年十月復置，更名。北有大金沙江，其上流卽大盈江也，源出青石山，自孟養境內流經司北江頭城下，下流注於南海。東有阿瓦河，自孟養流入境，下流入大金沙江。又北有江頭城、太公城、馬來城、安正國城、蒲甘緬王城，謂之「緬中五城」。元後至

元四年十二月置邦牙宣慰司於蒲甘緬王城，至正二年六月廢。至元二十六年置太公路於太公城，洪武十五年三月爲府，後廢。領長官司一。東北距布政司三十八程。

東倘長官司宣德八年九月置。

木邦軍民宣慰使司 元木邦路，至順元年三月置。洪武十五年三月爲府，後廢。三十五年十二月復置。永樂二年六月改軍民宣慰使司。北有慕義山。西有喳里江，卽潞江，自芒市流入境，又西南入緬甸界。又北有蒙憐路、蒙來路，俱元置，洪武十五年三月俱爲府，後俱廢。又西北有孟炎甸，有天馬關。東北距布政司三十五程。

八百大甸軍民宣慰使司 元八百等處宣慰使司。洪武二十四年六月改置。東北有南格刺山，下有河，與車里分界。有八百者乃軍民宣慰使司，永樂二年四月分八百大甸地置，後廢。又有蒙慶宣慰司，元泰定四年閏月置，至正二年四月罷，洪武十五年三月復置府，後廢。又有孟絹路，元統元年置，屬八百宣慰司，洪武十五年三月爲府，後廢。又有木按、孟傑二路，俱元置，洪武十五年三月俱爲府，後俱廢。北距布政司三十八程。

孟養軍民宣慰使司 元雲遠路。洪武十五年三月爲府。十七年改爲孟養府，後廢。三十五年十二月復置。永樂二年六月改軍民宣慰使司。正統十三年廢。萬曆十三年改置長官司。

東有鬼窟山，又有茫崖山。又有大金沙江，其上流卽大盈江，南流入於緬甸。又南有密堵城，有速送城。又南有戛撒寨。西有猛倫，西南有孟拱、戛里、猛別、蓋西諸部。東北距布政司三十七程。

老撾軍民宣慰使司 永樂二年四月置。東南有三關，與安南界。西北距布政司六十八程。

南甸宣撫司 元至元二十六年置南甸路。洪武十五年三月爲府，後廢，屬騰衝守禦千戶所。永樂十二年正月置州，直隸布政司。正統三年五月改屬金齒軍民指揮使司。九年六月升宣撫司，仍直隸布政司。東有丙弄山，又有蠻干山。南有沙木籠山，上有沙木籠關。西有大盈江。東北有小梁河，西南經南牙山下，曰南牙江，入于崖境內。又東南有孟乃河，即騰越州之龍川江。又南有黃連坡關。東北有小隴川關。東北距布政司二十二程。

十崖宣撫司 元鎮西路。洪武十五年三月爲府，後廢，屬隴川平緬司。永樂元年正月析置于崖長官司，直隸都司，後屬金齒軍民指揮使司。宣德五年六月復屬都司。正統三年五月復屬金齒軍民指揮使司。九年六月升宣撫司，直隸布政司。東有雲籠山。西有大盈江，又南有檳榔江，自吐蕃界流合焉。東有安樂河，即小梁河，下流經雲籠山下，曰雲籠江，經司治北，折而西，合於檳榔江。又西北有南賧，元置，洪武中廢。又西有雷弄、蓋達等部。東北距布政司二十三程。

隴川宣撫司 本隴川平緬軍民宣慰使司。正統六年廢，九年九月改置，治隴把。元平緬路，在隴把東北。洪武十五年閏三月置平緬宣慰使司。三月又改路爲府，未幾府廢。十七年八月丙子升司爲平緬軍民宣慰使司。甲午改隴川平緬軍民宣慰使司，省隴川路入焉。元隴川路在隴把南，洪武十五年三月爲府，未幾府廢。十

七年八月爲麓川平緬軍民宣慰司治所，正統中，司廢，曰平麓城，亦曰孟卯城，萬曆十二年置宣撫同知於此。又西南有通西軍民總管府，元至元二十六年置，洪武十五年三月爲府，後廢。又東南有遮放城，萬曆十二年置宣撫副使於此。北有馬鞍山。西北有大金沙江。又有麓川江，卽龍川江，自南甸流入，與芒市分界，西南入於大金沙江。東北距布政司六十六程。

孟定禦夷府 元孟定路，至元三十一年四月置。 洪武十五年三月爲府。東北有無量山，又有喳哩江，與麓川江

合。東南有謀粘路，元泰定三年七月置。有木連路，元至正二十六年置。洪武十五年三月俱因之，後俱廢。領安

撫司一。東北距布政司十八程。

耿馬安撫司 萬曆十三年析孟定地置。西有三尖山。南有喳哩江，與孟定分界。北距府百里。

孟艮禦夷府 永樂三年七月置，直隸都司，後直隸布政司。東有木朶路，又有孟隆路，俱元泰定三年

九月置。東北有孟愛等甸軍民府，元至元二十六年置。洪武十五年三月俱爲府，後俱廢。北距布政司三十八程。

威遠禦夷州 元威遠州，屬威楚路，後改威遠蠻棚府。 洪武十五年三月仍爲威遠州，屬楚雄府。十七

年升爲府，後廢。三十五年十二月復置州，直隸布政司。北有蒙樂山，接景東府界。西北有威遠

江，一名谷寶江，下流合瀾滄江。東北距布政司十九程。

灣甸禦夷州 本灣甸長官司。永樂元年正月析麓川平緬地置，直隸都司。三年四月升爲州，直隸布政司。西北有高黎共山。北有姚關，與順寧府界。東北距布政司二十程。

鎮康禦夷州元鎮康路。洪武十五年三月爲府。十七年降爲州，後廢，以其地屬灣甸州。永樂七年七月復置，直隸布政司。西有喳哩江，接潞江安撫司界。南有昔刺寨。西南有控尾寨。東北距布政司二十三程。

孟密宣撫司 本孟密安撫司。成化二十年六月析木邦地置。萬曆十三年升爲宣撫司。東北有南牙山，與南甸分界。西南有摩勒江，有大金沙江，俱與緬甸分界。又有寶井。北有猛乃、猛哈，東北有孟廣等部。東北距布政司三十三程。

蠻莫安撫司 萬曆十三年析孟密地置。東北有等練山。西南有那莫江，下流入大金沙江。又西有孟木寨。東北距布政司三十一程。

者樂甸長官司 永樂元年正月析麓川平緬地置，直隸都司，後改隸布政司。南有瀾滄江。又東有景來河，自景東府流入，下流入馬龍江。東北距布政司千一百七十里。

鈕兀禦夷長官司 宣德八年十月以和泥之鈕兀、五隆二寨置，北距布政司十六程。

芒市禦夷長官司元芒施路。洪武十五年三月爲府，後廢。正統八年四月改置，屬金齒軍民指

揮司，後直隸布政司。西南有永昌幹山，又有孟契山。又有大盈江，西南經青石山下，又西有麗川江來合焉。

東北距布政司二十三程。

孟隄長官司 舊爲麗川平緬司地，後爲孟定府。永樂四年四月置，直隸都司。東南有木來府，元置，洪武十五

年三月因之，後廢。東北距布政司二十三程。

大古刺軍民宣慰使司 在孟養西南。亦曰擺古，濱南海，與暹羅鄰。

底馬撒軍民宣慰使司 在大古刺東南。

小古刺長官司

茶山長官司

底板長官司

孟倫長官司

八家塔長官司 皆在西南極邊。俱永樂四年六月置。

刺和莊長官司 永樂四年十月置，直隸都司。

促瓦長官司

散金長官司 舊俱爲麓川平緬司地。永樂六年四月置。

里麻長官司〔三〇〕永樂六年七月析孟養地置，直隸都司。

八寨長官司 永樂十二年九月置，直隸都司。

底兀刺宣慰使司 永樂二十二年三月置。地舊爲大古刺所據，上諭還之，故置司。

廣邑州 本金齒軍民司之廣邑寨。宣德五年五月升爲州。八年十一月直隸布政司。正統元年三月徙於順寧府之右甸。

貴州 禹貢荆、梁二州徼外。元爲湖廣、四川、雲南三行中書省地。洪武十五年正月置貴州都指揮使司，治貴州宣慰司。其民職有司則仍屬湖廣、四川、雲南三布政司。永樂十一年置貴州等處承宣布政使司。與都指揮司同治。領府八，州一，縣一，宣慰司一，長官司三十九。後領府十，州九，縣十四，宣慰司一，長官司七十六。北至銅仁，與湖廣、四川界。南至鎮寧，與廣西、雲南界。東至黎平，與湖廣、廣西界。西至普安，與雲南、四川界。距南京四千二百五十里。

京師七千六百七十里。弘治四年，編戶四萬三千三百六十七，口二十五萬八千六百九十三。萬曆六年，戶四萬三千四百五，口二十九萬九百七十二。

貴陽軍民府 本程番府。成化十二年七月分貴州宣慰司地置，治程番長官司。隆慶二年六月移入布政司城，與宣慰司同治。三年三月改府名貴陽。萬曆二十九年四月升爲軍民府。領州三，縣二，長官司十六。

新貴倚。本貴竹長官司，洪武五年正月置，屬宣慰司。萬曆十四年二月改置縣，來屬。西有獅子山。西北有木關箐山，在水西境內。北有貴人峰。又西有白龍洞。北有烏江，源出水西，與四川遵義府分界，北流至四川彭水縣，入涪陵江。西北有陸廣河，下流入於烏江，有陸廣河巡檢司。又西有宅溪。又西北有蔡家關，一名響水關，又有闊水關。

貴定倚。萬曆三十六年析新貴縣及定番州地置。東有銅鼓山，有石門山。南有高連山，有南門河。又東有龍洞河，下流俱入陸廣河。

開州 崇禎四年十一月以副宣慰洪邊舊地置。西南距府一百二十里。

廣順州 本金筑長官司。洪武五年三月置，屬四川行省。十年正月改安撫司。十九年十二月屬廣西。二十七年仍屬四川。二十九年屬貴州衛。正統三年八月直隸貴州布



政司。成化十二年七月屬程番府。隆慶二年六月屬貴陽府。萬曆四十年置州。東南

有天臺山。北有天生橋。南距府一百一十里。

定番州 元程番武勝軍安撫司。洪武五年罷。成化十二年七月置程番府，領金筑安撫司，上馬

橋、大龍番、小龍番、程番、方番、韋番、臥龍番、洪番、小程番、盧番、羅番、金石番、盧

山、木瓜、大華、麻响十六長官司。隆慶二年六月移府入布政司城。萬曆十四年三月

置州。距府八十五里，領長官司十六。

程番長官司 倚。洪武五年三月置，屬貴州衛。正統三年八月屬貴州宣慰司。成化十二年七月屬程番府。萬

曆十四年三月屬州。北有青巖。南有都泥江，源出州西北亂山中，曰濛潭，經司南，州境之水皆流合焉，入廣西

南丹州界。下十二司所屬倣此。

小程番長官司 州西北。元小程番安撫司。洪武六年正月改置。

上馬橋長官司 州西北。洪武十五年六月置。

盧番長官司 州北。元盧番靜海軍安撫司。洪武六年正月改置，省元盧番蠻夷軍民長官司入焉。

韋番長官司 州南。元韋番蠻夷長官司。洪武十五年六月改置。

方番長官司 州南。元方番河中府安撫司。洪武五年改置。

洪番長官司 州西。元洪番永盛軍安撫司。洪武六年正月改置。

臥龍番長官司 州南。元臥龍番南寧州安撫司。洪武五年改置。

小龍番長官司 州東南。元小龍番靜蠻軍安撫司。洪武六年正月改置。

大龍番長官司 州東南。元大龍番應天府安撫司。洪武五年改置。

金石番長官司 州東。元金石番太平軍安撫司。洪武五年改置。

羅番長官司 州南。元羅番大龍遏蠻軍安撫司。洪武五年改置。

廬山長官司 州南。元廬山等處蠻夷軍安撫司。洪武六年正月改置。

木瓜長官司 元木瓜等處蠻夷軍民長官司。洪武五年改置，屬貴州衛。正統三年八月屬金筑安撫司。成化十

二年七月，屬程番府。萬曆十四年三月屬州。下二司倣此。

麻响長官司 洪武七年六月置。

大華長官司 洪武七年六月置。

貴州宣慰使司 元改順元路軍民安撫司置，屬湖廣行省。洪武五年正月屬四川行省。九年六月屬四川

布政司。永樂十一年二月來屬。有沙溪、的澄河二巡檢司。又有黃沙渡、龍谷二土巡檢司。領長官司

七。

水東長官司 宣慰司北。元水東寨長官司。洪武五年改置，後廢。永樂元年六月置，屬都司，後來屬。

中曹蠻夷長官司宣慰司東南。元中曹白納等處長官司，〔三〕屬管番民總管。洪武五年改置，來屬。

龍里長官司宣慰司東。元龍里等寨長官司，屬管番民總管。洪武五年改置，來屬。

白納長官司宣慰司東南。元茶山白納等處長官司。洪武五年并入中曹司。永樂四年五月置，來屬。

底寨長官司宣慰司北。元底寨等處長官司。洪武五年改置。

乖西蠻夷長官司宣慰司東北。元乖西軍民府，屬管番民總管。洪武五年改置，後廢。永樂元年六月復置，屬都司，後來屬。

養龍坑長官司宣慰司北。元養龍坑宿徵等處長官司。洪武五年改置。

安順軍民府〔元安順州，屬普定路〕。洪武十五年三月屬普定府。十八年直隸雲南布政司。二十五

年八月屬四川普定衛。正統三年八月直隸貴州布政司。成化中，徙州治普定衛城。萬

曆三十年九月升安順軍民府。普定衛舊在州西北，洪武十五年正月置，屬四川都司。三月升軍民指揮使

司。正統三年改屬貴州都司。成化中，州自衛東南來同治。西北有舊坡山，兩峰相對，中有石關。東有巖孔山。北

有歡喜嶺，又有思臘河，接水西界。西南有北盤江，自雲南霑益州流入。東南有九溪河。又東有元普定路，屬雲南行

省，洪武十五年三月爲府，屬雲南布政司，尋并軍民府，改屬四川布政司，十八年七月廢。領州三，長官司六。

東距布政司百五十里。

寧谷寨長官司府西南。洪武十九年置，屬安順州。二十五年八月屬普定衛。正統三年八月仍來屬。下倣此。  
東南有乾海子。

西堡長官司府西北。建置所屬同上。北有浪伏山，元置習安州於山下，屬普定路，洪武十五年三月屬普定府，後廢。又北有白石巖。東南有楚油洞山。北有谷龍河，下流合烏江。

鎮寧州元至正十一年四月以火烘夷地置，屬普定路。洪武十五年三月屬普定府。二十五年八月屬普定衛，後僑治衛城。正統三年八月直隸貴州布政司。嘉靖十一年六月徙州治安莊衛城。萬曆三十年九月屬府。安莊衛，舊在州西，洪武二十三年五月置，屬貴州都司。萬曆三十五年九月，州自衛東來同治。南有白水河，又有烏泥江，即都泥江，源出山箐中，東南流，入金筑安撫司境。東距府五十五里。領長官司二。

十二營長官司州北。洪武十九年置，屬安順州。二十五年八月屬普定衛。正統三年八月來屬。下倣此。東北有天生橋，又有公具河。北有阿破河。

康佐長官司州東。建置所屬同上。

永寧州元以打罕夷地置，屬普定路。洪武十五年三月屬普定府。二十五年八月屬普定衛，後僑治衛城。正統三年八月直隸貴州布政司。嘉靖十一年三月徙州治關索嶺守禦千戶所城。萬曆三十年九月屬府。關索所舊在州西南，洪武二十五年置，屬安莊衛。萬曆三十年九月，州自所

東北來同治。西北有紅崖山。西有北盤江，自普安州流入，有盤江河巡檢司。東北距府一百二十里。領長官司二。

募役長官司 州西。洪武十九年置，屬安順州。二十五年八月屬普定衛。正統三年八月來屬。下倣此。北有

安籠箐山。(三)西北有象鼻嶺。東有北盤江，與永寧州分界，東南流，南盤江自雲南羅平州來合焉，又南入廣西泗城州界。

頂營長官司 州北。洪武四年置，所屬同上。東有關索嶺。西有盤江。

普安州 本貢寧安撫司。建文中置，屬普安軍民府。永樂元年正月改普安安撫司，屬四川布政司。十三年十二月改爲州，直隸貴州布政司。萬曆十四年二月徙治普安衛城。

三十年九月屬府。普安衛舊在州南，洪武十五年正月置，屬雲南都司，後改屬貴州都司。二十二年三月升軍民指揮使司。萬曆十四年二月，州自衛北來同治。東有八部山，元普安路治山下，屬雲南行省，洪武十五年三月爲府，屬雲南布政司，尋升軍民府，二十七年四月改屬四川，永樂後廢。東北有格孤山。又西北有番納牟山，一名雲南坡。又東南有得都山，一名白崖，產雄黃水銀。又東有盤江。東南有者卜河，下流入於盤江。東有芭蕉關。西有分水嶺關。東南有安籠箐關。又西南有樂民守禦千戶所，西有平夷守禦千戶所，俱洪武二十二年置，又東南有安南守禦千戶所，又有安籠守禦千戶所，俱洪武二十三年置，皆屬普安衛。正統十年四月徙安南所於羅渭江。

東北距府三百三十五里。

都勻府 本都勻安撫司。洪武十九年十二月置。二十三年十月改都勻衛，屬貴州都司。二十九年四月升軍民指揮使司，屬四川布政司。永樂十七年仍屬貴州都司。弘治七年五月置都勻府於衛城。西有龍山。南有獨山鎮巡檢司。北有平定關，西有威鎮關，俱洪武二十四年置。領州二，縣一，長官司八。西北距布政司二百六十里。

都勻長官司 府南。元上都勻等處軍民長官司。洪武十六年更名。南有都勻河，亦名馬尾河。

邦水長官司 府西。元中都雲板水等處軍民長官司，屬管番民總管。洪武十六年更名。邦水河在東南，本名板河，卽都勻河上源。

平浪長官司 府西。洪武十六年置。西南有凱陽山，上有滅苗鎮，卽故凱口囤。東南有麥冲河。

平洲六洞長官司 府西南。洪武十六年置。西南有六洞山。南有平洲河，中有沙洲。

麻哈州 本麻哈長官司。洪武十六年置，屬平越衛。弘治七年五月升爲州，來屬。南有麻哈江，卽邦水河之上源。南距府六十里。領長官司二。

樂平長官司 州西北。洪武二十四年五月置，屬雲南，後屬平越衛。弘治七年五月來屬。東北有馬場山。南有樂平溪。

平定長官司 州西北。洪武二十二年置，屬平越衛。三十年屬清平衛。弘治七年五月來屬。東有山河。

獨山州 本九名九姓獨山州長官司。洪武十六年置，屬都勻衛。弘治七年五月升爲獨山州，屬府。南有獨山，有獨山江，卽都勻河下流，南入廣西天河縣界，爲龍江。北距府百五十里。領縣一，長官司二。

清平府北。本清平長官司，洪武二十二年置，屬平越衛。三十年屬清平衛。弘治七年五月改爲縣，屬麻哈州，後來屬。東有香爐山，嘉靖十二年四月徙清平衛中左所於此。北有雲溪洞。南有木級坡。又東有山江河，源出香爐山，有舟溪江流合焉，亦都勻河上源。又南有雞場關，北有羅冲關，俱洪武二十五年置。又東北有黎樹等寨。合江洲陳蒙爛土長官司。州東。洪武十六年置，屬都勻衛。弘治七年五月屬州。東南有梅花洞。豐寧長官司。州西南。洪武二十三年置，屬都勻衛。弘治七年五月屬州。西南有行郎山。

平越軍民府元平月長官司。洪武十四年置平越守禦千戶所。十五年閏二月改爲平越衛。十七年二月升軍民指揮使司。領長官司五，屬四川布政司，尋屬貴州都司。萬曆二十九年四月置平越軍民府於衛城，以播州地益之，屬貴州布政司。東有義黎山，又有七盤坡。東南有麻哈江，其上源卽黃平州之兩岔江。南有馬場江，又有羊場河，俱東入於麻哈江。南有武勝關。西南有通津關。東南有羊場關。領衛二，州一，縣三，長官司二。西距布政司百八十里。

清平衛 洪武二十三年六月置，屬貴州都司。萬曆二十九年來屬。衛治在清平縣北一里。西

南距府六十里。

興隆衛 洪武二十二年六月置，屬貴州都司。萬曆二十九年來屬。北有龍岩山，亦名龍洞山。又有截洞，甚深險。東有飛雲岩。西南距府百二十里。

黃平州 本黃平安撫司。洪武七年十一月置，屬播州宣慰司。萬曆二十九年四月改爲州，來屬。東有七里谷。西南有兩岔江，以兩源合流而名。又東有冷水河。西北有黃平守禦千戶所，洪武十一年正月置，十五年正月改爲衛，閏二月仍爲千戶所。南距府三十里。

餘慶州西。本餘慶長官司，洪武十七年置，屬播州宣慰司。萬曆二十九年六月改爲縣，〔三〕來屬。東有白泥長官司，亦洪武十七年置，屬播州宣慰司。萬曆二十九年四月省入餘慶縣。南有小烏江，下流入於烏江。東南有白泥河，下流合於思南河。又有走馬坪寨，嘉靖三十四年置。

甕安州西北。本甕水安撫司，洪武初置。萬曆二十九年四月改爲縣，來屬。東有草塘安撫司，洪武十七年六月置，又有重安長官司，永樂四年九月置，俱屬播州宣慰司。萬曆二十九年四月俱省入甕安縣。東南有萬丈山。西有烏江，縣境諸山溪之水皆流合焉。又有黃灘關。東北有飛練堡，有天邦囤，西有西坪等寨。

湄潭州北。萬曆二十九年四月以播州湄潭地置。西有容山長官司，洪武中置，屬播州宣慰司。萬曆二十九年省入湄潭縣。南有湄潭水，又西有三江水，下流俱入於烏江。

凱里長官司 府東北。本凱里安撫司，嘉靖八年二月分播州宣慰司地置，屬清平衛。萬曆二十九年來屬。三十



五年六月改爲長官司。

楊義長官司府東南。洪武初置，屬平越衛。萬曆二十九年屬府。西有杉木箐山。又有清水江，上流自新添衛流入，經城西，又名皮隴江，北經乖西、巴香諸苗界，而入烏江。

黎平府 本思州宣慰司地。洪武十八年正月置五開衛，屬湖廣都司，後廢。三十五年十一月復置。永樂十一年二月置黎平府於衛城，屬貴州布政司。弘治十年徙府治衛南。萬曆二十九年十一月改府屬湖廣。三十一年四月還屬貴州。南有寶帶山。東有摩天嶺。東北有銅鼓巖。西有新化江。又有福祿江，其上源爲古州江，下流入廣西懷遠縣境。西南有黎平守禦千戶所，洪武二十一年九月置，屬五開衛。領縣一，長官司十三。西距布政司六百三十里。

永從府南。本元福祿永從軍民長官司。洪武中改置福祿永從蠻夷長官司，後廢。永樂元年正月復置，屬貴州衛。十二年三月來屬。正統六年九月改爲縣。南有福祿江，有彩江流合焉。又有永從溪。

潭溪蠻夷長官司 府東南。元潭溪長官司。洪武三年正月改置，屬湖廣辰州衛。三月改屬湖廣靖州衛，後廢。永樂元年正月復置，屬貴州衛。十二年三月來屬。西南有銅關鐵寨山。南有潭溪。

八舟蠻夷長官司 府北。元八舟軍民長官司。洪武五年改置。後廢。永樂元年正月復置，屬貴州衛。十二年三月來屬。西南有八舟江，源自府城，西爲三十里江，北流經此，又東北爲新化江。

洪舟泊里蠻夷長官司府東南。元洪舟泊里軍民長官司。洪武初改置，後廢。永樂元年正月復置，屬貴州衛。十三年三月來屬。北有洪舟江，〔三〕下流合於湖廣靖州之渠河。西南有中潮守禦千戶所，洪武二十一年九月置，屬五開衛。

曹滴洞蠻夷長官司府西北。元曹滴等洞軍民長官司。洪武初改置，後廢。永樂元年正月復置，屬貴州衛。十二年三月來屬。西南有容江，源出苗地，北流入福祿江。

古州蠻夷長官司府西北。元古州八萬洞軍民長官司。洪武三年正月改置，屬湖廣辰州衛。三月改屬湖廣靖州衛，後廢。永樂元年正月復置，屬貴州衛。十二年三月來屬。有古州衛，洪武二十六年置，尋廢。東北有古州江。

西山陽洞蠻夷長官司府西南。洪武初置，後廢。永樂元年正月復置，屬貴州衛。十二年三月來屬。西北有大巖山，大巖江出焉，東南入於福祿江。

新化蠻夷長官司府東北。元新化長官司。洪武三年正月改置，屬湖廣辰州衛，三月改屬湖廣靖州衛，後廢。永樂元年正月復置，屬貴州衛。十一年二月置新化府於此，領湖耳、亮寨、歐陽、新化、中林驗洞、龍里六蠻夷長官司，赤溪浦洞長官司。宣德九年十一月，府廢，以所領俱屬黎平府。西有六疊山。東南有新化江，又西北合於清水江。又東有新化亮寨守禦千戶所，洪武二十一年九月置，西南有新化屯千戶所，洪武二十五年置，俱屬五開衛。

湖耳蠻夷長官司府東北。元湖耳洞長官司。洪武三年正月改置，屬湖廣辰州衛。三月改屬湖廣靖州衛，後

廢。永樂元年正月復置，屬貴州衛。十二年三月屬新化府，府廢，來屬。西有銅鼓衛，本銅鼓守禦千戶所，洪武二十一年九月置，屬五開衛，三十年改所爲衛，屬湖廣都司，後二年廢，三十五年十一月復置，屬湖廣都司。

亮寨蠻夷長官司府東北。本八萬亮寨蠻夷長官司。洪武三年正月置，屬湖廣辰州衛。三月屬湖廣靖州衛，後廢。永樂元年正月復置，改名，屬貴州衛。十二年三月屬新化府，府廢，來屬。

歐陽蠻夷長官司府東北。元歐陽寨長官司。洪武三年正月改置，屬湖廣辰州衛。三月改屬湖廣靖州衛，後廢。永樂元年正月復置，屬貴州衛。十二年三月屬新化府，府廢，來屬。

中林驗洞蠻夷長官司府北。洪武初置，後廢。永樂元年正月復置。十二年三月屬新化府，府廢，來屬。下二司倣此。

赤溪浦洞蠻夷長官司府東北。

龍里蠻夷長官司府北。南有龍里守禦千戶所，洪武二十五年置，屬五開衛。

思南府元思南宣慰司，屬湖廣行省。洪武四年改屬四川。六年十二月陞爲思南道宣慰使司，仍屬湖廣。永樂十一年二月改爲府，屬貴州布政司。隆慶四年三月徙治平溪衛。尋復故。有都儒五堡二坑等處巡檢司。又有覃韓偏力水土巡檢司。又有板橋巡檢司，舊屬石阡府，後來屬。領縣三，長官

司三。西南距布政司六百二十里。

安化倚。本水犄姜長官司，元屬思州安撫司。洪武初，改曰水德江，屬思南宣慰司。永樂十二年三月屬府。萬

曆三十三年改置安化縣。西南有崖門山。南有萬勝山。又有烏江，自石阡府流入，經城西鮎魚峽北，入四川彭

水縣界，合涪陵江。東南有水德江，卽烏江之分流，又有思印江流合焉，下流亦入於涪陵江。舊有洪安、化濟二

長官司，屬思南宣慰司，洪武二十六年五月省。東有水勝關。南有武勝關。北有太平關。

蠻夷長官司倚。洪武十年十月置，屬思南宣慰司。永樂十二年三月屬府。

婺川府北。元屬思州安撫司。洪武五年屬鎮遠州。十七年後仍屬思州。永樂十二年三月來屬。東有河只水，

又有羅多水，下流俱注於水德江。

印江府東。本思印江長官司，元屬思南宣慰司。永樂十二年三月屬府。弘治七年六月改爲印江縣。

沿河祐溪長官司府東北。洪武七年十月置，屬思南宣慰司。永樂十二年三月屬府。

朗溪蠻夷長官司府東。洪武七年十月置，屬思南宣慰司。永樂十二年三月屬烏羅府。正統三年五月，府廢，

來屬。有厥溪蠻夷長官司，亦洪武七年十月置，尋廢。

思州府元思州宣慰司。永樂十一年二月改爲府，屬貴州布政司。領長官司四。西距布政司七

百五十里。

都坪峩異溪蠻夷長官司倚。洪武六年置，二十五年省。永樂十二年三月復置。南有峩山。西北有江頭山。

東有異溪。東北有平溪，上有關，洪武二十二年三月置平溪衛於此，屬湖廣都司，萬曆二十九年十一月改屬貴州，三十一年四月還屬湖廣。又有鮎魚關。南有黃土關。又東北有晃州驛，路出湖廣沅州。

都素蠻夷長官司府西。永樂十二年三月置，屬府。

施溪長官司府北。元施溪樣頭長官司。洪武五年改名，屬湖廣沅州衛。永樂十二年三月來屬。東有施溪。

黃道溪長官司府東北。元屬思州宣慰司。永樂十二年三月屬府。西南有黃道溪。

鎮遠府元鎮遠府，屬思州安撫司。

洪武四年降爲鎮遠州，屬思南宣慰司。五年六月直隸湖廣。永

樂十一年二月置鎮遠府於州治，屬貴州布政司。正統三年五月省州入焉。領縣二，長官司三。西距布政司五百三十里。

鎮遠倚。本鎮遠溪洞金容金達蠻夷長官司，洪武二年二月置，屬思南宣慰司。永樂十二年三月屬州。正統三年

五月改屬府。弘治七年十月改爲鎮遠縣。北有石崖山。東有中河山，以兩水夾流而名。東北有鐵山。又東有

觀音山，有馬場坡。東南有巴邦山。西有平冒山。南有鎮陽江，一名鎮南江，亦曰灘水，上受興隆、黃平諸水，

東流三百里，入於沅江。又東北有鐵溪，出鐵山，下流入鎮陽江。又西有油榨關。有焦溪關、梅溪關。又有清

浪關，清浪衛治於此，又西有偏橋，偏橋衛在焉，俱洪武二十三年四月置。西南有鎮遠衛，洪武二十二年七月

置。俱屬湖廣都司，萬曆二十九年十一月俱改屬貴州，三十一年四月還屬湖廣。

施秉府西南。本施秉蠻夷長官司，洪武五年置，屬思南宣慰司。永樂十二年三月屬州。正統九年七月改爲縣。

天啓元年四月省。崇禎四年十一月復置。南有洪江，卽鎮陽江。

偏橋長官司府西。元偏橋中寨蠻夷軍民長官司。洪武五年改置，屬思南宣慰司。永樂十二年三月來屬。

邛水十五洞蠻夷長官司府東。元邛水縣。洪武五年改置團羅、得民、曉隘、陂帶、邛水五長官司，屬思州宣慰司。二十九年以四司并入邛水司，屬思南宣慰司。永樂十二年三月屬府。

臻剖六洞橫坡等處長官司府西。本臻剖、六洞、橫坡三長官司，洪武二十二年置，屬鎮遠衛，後并爲一司。

銅仁府 本思州宣慰司地。永樂十一年二月置銅仁府。領縣一，長官司五。西南距布政司七百七十里。

銅仁倚。元銅人大小江等處蠻夷軍民長官司，屬思州安撫司。〔三〕洪武初，改置銅仁長官司，屬思南宣慰司。永樂十二年三月置府治於此。萬曆二十六年四月改爲縣。南有銅崖山。又有新坑山，產硃砂水銀。西南有銅仁大江，西北有小江流合焉，下流入沅州界，注於沅江。

省溪長官司府西。元省溪壩場等處蠻夷長官司，屬思州安撫司。洪武初，改名，屬思南宣慰司。永樂十二年三月來屬。西有迤邏江，卽省溪，產金。

提溪長官司府西。元提溪等處軍民長官司，屬思州安撫司。洪武初，改名，屬思南宣慰司。永樂十二年三月來屬。東有印江。西有提溪，產砂金。

大萬山長官司府南。元大萬山蘇葛辦等處軍民長官司，屬思州安撫司。洪武初，改名，屬思南宣慰司。永樂十二年三月來屬。

烏羅長官司府西。元烏羅龍干等處長官司，屬思州安撫司。洪武初，更名，屬思南宣慰司。永樂十一年二月置烏羅府，領朗溪蠻夷長官司，烏羅、答意、治古、平頭著可四長官司治於此。正統三年五月，府廢，來屬。西有九龍山，銅仁大江源於此。又西南有觀音囤，亦曰烏羅洞。南有九江。又有木耳溪，亦曰九十九溪，下流亦入沅江。

平頭著可長官司府西北。元平頭著可通達等處長官司，屬思州安撫司。洪武七年十月改置，屬思南宣慰司。永樂十二年三月屬烏羅府，府廢，來屬。又有答意長官司，治古寨長官司，俱永樂三年七月置，屬貴州宣慰司，十二年三月改屬烏羅府，正統三年五月俱與府同廢。

石阡府 本思州宣慰司地。永樂十一年二月置石阡府。領縣一，長官司三。西南距布政司六百三十里。

石阡長官司倚。元石阡等處軍民長官司，屬思州安撫司。洪武初改置，屬思州宣慰司。永樂十二年三月爲石

阡府治。西有崖門山。南有秋滿洞。西有烏江，自四川遵義府流入，東北入思南府界。有石阡江，下流入於烏江。

龍泉府西。本龍泉坪長官司，元爲思州安撫司治。洪武七年七月復置，屬思州宣慰司。永樂十二年三月來屬。萬曆二十九年四月改爲縣。北有騰雲洞。南有鄧坎等寨。

苗民長官司府西南。洪武七年十月置，屬思州宣慰司。永樂十二年三月來屬。

葛彰葛商長官司府南。元屬思州安撫司。洪武中屬思州宣慰司。永樂十二年三月來屬。

龍里衛軍民指揮使司 洪武二十三年四月置衛。二十九年四月升軍民指揮使司。西有蓮花

涇，又有加牙河，下流入甕首河。東南有平伐長官司，本元平伐等處長官司，洪武十五年改置，屬貴州衛，二十八年屬

龍里衛，萬曆十四年二月省入新貴縣。又西有長衝關。東有龍聳關。領長官司一。西距布政司五十里。

大平伐長官司衛南。洪武十九年置，屬貴州衛。二十八年來屬。東北有谷峽山。東南有甕首河，下流合清水江。

新添衛軍民指揮使司 元新添葛蠻安撫司，後廢。洪武二十二年置新添千戶所，屬貴州衛。二十三年二月改爲新添衛，屬貴州都司。二十九年四月升軍民指揮使司。領長官司五。西距布政司百十里。



新添長官司倚。洪武四年置。東有憑虛洞，一名猪母洞。西北有清水江。西南有甕城河，有甕城河土巡檢司。

又東有谷忙關。

小平伐長官司衛西南。洪武十五年六月置，屬貴州衛，尋屬龍里衛。二十九年來屬。

把平寨長官司衛南。洪武十五年六月置，屬貴州衛，尋屬龍里衛。二十九年來屬。

丹平長官司衛西南。洪武三十年置，尋省。永樂二年復置。

丹行長官司衛西南。洪武三十年置，尋省。永樂二年復置。

安南衛 洪武十五年正月置尾灑衛於此，尋廢。二十三年十二月復置，更名，屬貴州都司。

南有尾灑山。東有盤江山，有清源洞。又有北盤江，自雲南霑益州流入，又南入安順府界。東南有者卜河，自普安州流入，注於盤江。西有江西陂，初置柵屯守於此，尋徙於尾灑，築城爲衛。南有烏鳴關，亦洪武中置。東北距布政司三百四十里。

威清衛 洪武二十三年六月置，屬貴州都司。北有羊耳山。西有的澄河，卽陸廣河上流。西北有鴨池河，卽烏江。西距布政司六十里。

平壩衛 洪武二十三年閏四月置，屬貴州都司。東南有南仙洞，有馬頭山。東有東溪。西南距布政司八十里。

畢節衛 洪武十七年二月置，屬貴州都司。東有木稀山，有關。又有響水河。南有善欲關，西有老鴉關，

俱洪武中置。東北有層臺衛，洪武二十一年九月置，二十七年六月廢。領守禦所一。東南距布政司四百

五十里。

守禦七星關後千戶所衛西。洪武二十一年置，屬烏撒衛。永樂中來屬。有七星關河，亦曰可渡河，源出四川

烏撒府，卽北盤江上流，七星關在其上，下流入雲南霑益州界。

赤水衛 洪武二十一年十月置，北有雪山，<sup>三七</sup>上有關。東有赤水河，有赤水關。領所四。距布政司

六百二十里。

摩尼千戶所衛北。

白撒千戶所<sup>三七</sup>衛東南。二所俱洪武二十二年九月置。

阿落密千戶所衛南。

前千戶所衛南。二所俱洪武二十七年置。

普市守禦千戶所 洪武二十三年三月析永寧宣撫司地置，直隸貴州都司。東有木案山。西南

有水腦洞。又東南有龍泉澗。距布政司七百二十里。

敷勇衛 本割佐長官司。洪武五年改元落邦札佐等處長官司置，屬貴州宣慰司。崇禎三

年改置，屬貴州都司。東有陽明洞。西有三湘水。北有烏江，有陸廣河。領所四。南距布政司五十

里。

於襄守禦千戶所衛西。本青山長官司，洪武五年改元青山遠地等處長官司置，屬貴州宣慰司。崇禎三年改置。息烽守禦千戶所衛東北。崇禎三年以貴州前衛故絕六屯并割底寨司地置。西有西望山。南有石天洞。北有

烏江。

濯靈守禦千戶所衛北。西有陸廣河，北流合烏江。

修文守禦千戶所衛東北。二所俱宣慰司水西地，崇禎三年同置。

鎮西衛 崇禎三年以宣慰司水西地置。北有天柱洞，又有鴨池河，卽烏江異名。領所四。西南距布

政司六十里。

威武守禦千戶所衛東。

赫聲守禦千戶所衛北。有鴨池河。

柔遠守禦千戶所衛□。

定遠守禦千戶所衛□。以上俱水西地，崇禎三年與衛同置。

## 校勘記

〔一〕東有秀嵩山 秀嵩山，原作「禿高山」，據寰宇通志卷一一一、明一統志卷八六改。寰宇通志稱：

「聳秀插霄漢，環州諸山，惟此爲最。」

〔二〕洪武二十三年三月以古魯昌地置三月，太祖實錄卷一〇〇將此事繫於洪武二十三年二月癸亥。

〔三〕西南有喬甸 喬甸，明史稿志二二地理志、讀史方輿紀要卷一一四、嘉慶重修一統志卷四八四作「蕎甸」。

〔四〕又有哇山 哇山，原作「哇山」，據明史稿志二二地理志、讀史方輿紀要卷一一四改。

〔五〕領州六縣五 縣五，原作「縣四」。按下文記臨安府的領縣是五不是四，據改。

〔六〕西北右有火燄山 按「右」字非衍卽爲「又」字之譌。

〔七〕東有菜玉山 菜玉山，原作「采玉山」，據明史稿志二二地理志、明一統志卷八六改。清一統志卷三七一菜玉山下稱：「產石碧潤如玉，謂之菜玉。」

〔八〕西南有浣江 浣江，原作「沅江」，據明史稿志二二地理志、讀史方輿紀要卷一一五改。

〔九〕又東北有綠溪河 綠溪河，明史稿志二二地理志作「碌溪河」，讀史方輿紀要卷一一五作「碌礮河」，並稱「在碌礮山下」。

〔一〇〕東有平甸河 平甸河，原作「平甸河司」，衍「司」字。據明史稿志二二地理志、讀史方輿紀要卷一一五刪。

〔二〕北有螺盤山 螺盤山，原作「累盤山」，據明史稿志二二地理志、明一統志卷八六改。讀史方輿紀要卷一一六稱：「螺盤山，山頂盤旋，形如螺髻，故名。」

〔三〕源出三窠山 三窠山，原作「三菓山」，據下文及明史稿志二二地理志、明一統志卷八七改。讀史方輿紀要卷一一六有三窠關，稱「在三窠山上」。

〔三〕又東有三汊河至南有母瓜關 原脫「東」字，據讀史方輿紀要卷一一六補。母瓜關，原作「母瓜關」，據明史稿志二二地理志、讀史方輿紀要卷一一六改。

〔四〕東北有周官夢海子 周官夢海子，原作「周官夢子海」，據明史稿志二二地理志、寰宇通志卷一一一、讀史方輿紀要卷一一七改。按本志劍川州下，「南有劍川湖，俗呼海子」，又永寧府下，「東南有魯窟海子」，作「海子」是。

〔五〕西北有臨西縣 臨西縣，原作「臨江縣」，據明史稿志二二地理志、寰宇通志卷一一三、明一統志卷八七改。元史卷六一地理志：「臨西縣，以西臨吐蕃境故也。」

〔六〕元永寧州屬麗江路 原作「元屬麗江永寧州路」，據元史卷六一地理志、讀史方輿紀要卷一一七改。

〔七〕亦曰大車江 大車江，原作「大車湖」，據明史稿志二二地理志、寰宇通志卷一一三、明一統志卷八七改。讀史方輿紀要卷一一八，大車江在州西，大車湖在州南。

〔一八〕又西南有疊水河 疊水河，原作「壘水河」，據明史稿志三二地理志、讀史方輿紀要卷一一八改。

〔一九〕治浦關 浦關，明史稿志三二地理志、明一統志卷八七、讀史方輿紀要卷一一八都作「蒲關」。

〔二〇〕里麻長官司 里麻，原作「麻里」，據本書卷三一五里麻傳，太宗實錄卷五七永樂六年七月丙辰條、又卷六九永樂八年四月庚申條改。

〔三一〕元中曹百納等處長官司 百納，下文作「白納」，同名異譯。

〔三二〕北有安籠箐山 安籠箐山，原作「安籠箐山」，據明史稿志三二地理志、寰宇通志卷一一四、讀史方輿紀要卷一二一改。本志下文普安州注有安籠守禦千戶所。

〔三三〕萬曆二十九年六月改爲縣 神宗實錄卷三五八繫改縣於萬曆二十九年四月丙申。

〔三四〕洪州泊里蠻夷長官司 至北有洪州江 「洪州泊里」及「洪州江」之「州」字原都作「舟」，據明史稿志三二地理志、寰宇通志卷一一四、明一統志卷八八改。

〔三五〕元銅人大小江等處蠻夷軍民長官司屬思州安撫司 大小江，原脫「江」字，長官司，原脫「司」字，「司」下原脫「屬」字，據明史稿志三二地理志、寰宇通志卷一一四、元史卷六三地理志補。

〔三六〕北有雪山 雪山，原作「雲山」，據明史稿志三二地理志、讀史方輿紀要卷一二三改。嘉慶重修

一統志卷五〇九雪山下稱「方冬積雪，春盡始消」。

〔三七〕白撒千戶所 白撒，原作「日撒」，據明史稿志二二地理志、讀史方輿紀要卷一二三改。

